





BIB. DOM.
ANDEGAV.
S. J.





15.0.

20-It

W 19 / 956

Echange 95

Conserve

comme ancienne édition -

D₉₈

Collegij Belloune: INTRODVCTIO

AD SOLIDAM

PERFECTIONEM,

PER MANVDVCTIONEM

AD S. P. N. IGNATII

Exercitia spiritualia integro

Catal. mense obeunda. *Inscrip.*

Authore R. P. ANTONIO ^{LE} GAUDIER,
Societatis IESV.



L V G D V N. I,

Apud PETRVM GVILLIMIN.

M. DC. LXIV.

Cum Permissu Superiorum.

THE NEW YORK PUBLIC LIBRARY

ASTOR LENOX TILDEN FOUNDATION

500 N. 5TH ST. NEW YORK, N. Y.

Acquired from the

Library of the

City of New York

1911

1911

1911

1911

1911

1911

1911

1911

1911

1911

1911




PRÆFATIO

AD LECTOREM.

IDEM planè dicendum de præclaris hisce in exercitia commentariis, quod de ipsis exercitiis Magistri morum inculcare solent, lectione minùs quàm usu prodesse. Experti sunt è nostris plurimi quid inde fructus legeretur, & quàm utiles essent hominibus qui aliorum saluti vacarent. Neque mirum, siquidem Author cum iis versatus est sæpè, qui SANCTVM IGNATIVM viderant, & quos sanctus Pater suis ipse exercitiis excoluerat. Egit cum PP. Oliuario, Manarrao, Exuperio, Costero, & aliis,

* 2


*aliis, quos SANCTVS IGNATIVS
aut exercuerat, aut Paschali Broë-
to instituendos tradiderat ; Ex iis
omnibus multa percepit Author,
quæ in hunc commentarium retu-
lit. Itaque si quid additum aspe-
xeris iis , quæ ex S. Patris auto-
grapho Societas nostra Typis vul-
gavit, non continuò commentum pu-
tabis Antonij , sed sancti Parentis
fœtum quem in animis suorum de-
scripserat. Hoc enim sæpe testatus
est Author, se in exercitiis suis esse
conatum exprimere pia lumina, quæ
ex primogenitis Societatis nostræ fi-
liis in Belgio didicerat. Hinc vides
quàm parum à SANCTI IGNATII
mente ; ut ætate hæc exercitia di-
stent ; iis utere : agnosces nos ma-
gna pollicitos esse , fructum tamen
esse omni nostrâ pollicitatione ma-
iorem.*



I N D E X

C A P I T V M

T O T I V S L I B R I .

- C A P . I.  N S T R V C T I O pro iis,
qui tertium annum agunt
probationis. pag. I
- II. In tertio anno applicandum seriò
animum ad intellectum scientiã
practicã illustrandum. 6
- III. Obiectum duplex scientiæ pra-
cticæ in 3. anno acquiren-
da , sunt finis & media de
fine. 8
- IV. Quæ sint media ad illum fi-
nem , & quo ordine usurpan-
da. 9
- V. Quænam bona, quæ mala disposi-
tio accidentium ad hanc proba-
tionem. 13
- VI. Quomodo exercitia spiritualia ini-
tio sint peragenda. 15
- * 3 VII. De

Index Capitem

VII.	<i>De exercitio praesentia Dei.</i>	19
VIII.	<i>De regula electionis.</i>	20
IX.	<i>De oratione mentali.</i>	22
X.	<i>De examine conscientia.</i>	23
XI.	<i>De sacrificio & Sacramento, & visitatione sanctissima Eucharistia.</i>	24
XII.	<i>De officio diuino.</i>	25
XIII.	<i>De lectione spiritali & aliis exercitiis.</i>	26
XIV.	<i>Quod cum studio orationis iungenda sit mortificatio.</i>	28
XV.	<i>Comparanda notitia instituti.</i>	32
XVI.	<i>De salute & perfectione proximi procuranda.</i>	33
XVII.	<i>Ante omnes circa domesticos zelus exerceri debet.</i>	34
XVIII.	<i>Quomodo circa proximos exerceri debet animarum zelus.</i>	38
XIX.	<i>De studiis litterarum.</i>	ibid.
XX.	<i>De aliis mediis ad iuuandum proximum.</i>	39
XXI.	<i>Quae in tertio anno sunt inchoata tota Domini vita non tantum exercenda, sed & perficienda sunt.</i>	40
XXII.	<i>Ordo dierum in toto mense.</i>	41
XXIII.	<i>Quomodo fieri debeat regularum consideratio.</i>	53

Eiusdem

totius libri.

Eiusdem necessitas. ibid.

Quanta sit regularum nostrarum praestantia. 55

Qua sit earum obligatio. 58

Qualis debeat esse regularum observatio. 62

Qualis debeat esse eandem consideratio. 66

Eiusdem considerationis praxis. 68

XXIV. *Preparatio ad facienda exercitia.* 74

XXV. *Considerationes nonnullae initio exercitiorum perpendendae lectis. 20. annotationibus.* 77

Ad fundamentum exercitiorum. 85

Fundamentum. 87

Ad primum exercitium de peccatis.

91

More solito. 96

De exercitiorum spiritualium fine.

101

Inclinationes nonnullae, quae multarum imperfectionum fontes esse solent. 117

Ad secundum exercitium de peccatis.

118

Duo praeludia ut in primo. 119

Tertium exercitium est repetitio. 123

*

4

Exerci

Index Capitulorum

<i>Exercitium de morte.</i>	124
<i>Exercitium de iudicio priuato.</i>	127
<i>Præparatio ad mortem, & iudicium vice repetitionis.</i>	131
<i>Exercitium de iudicio generali.</i>	135
<i>Exercitium de inferno.</i>	117
<i>De peccatis venialibus.</i>	140
<i>Exercitium de Pœnitentia & eius fructibus ex Lucâ.</i>	13
<i>Arborem fici habebat, &c. qui textus est legendus.</i>	145
<i>Ad contritionem ex amore.</i>	148
<i>Meditatio de filio prodigo, ex Luc. 15.</i>	151
<i>De sanctissimo Sacramento.</i>	153
XXVI. <i>Ad contemplationem de regno Christi.</i>	155
<i>De contemplatione regni Iesu Christi.</i>	155
XXVII. <i>De procuratione gloriæ Dei ad imitationem Christi, & quanta sit illius excellentia.</i>	162
<i>Qualis esse debeat intentio gloriæ Dei.</i>	165
<i>De mediis ad Dei gloriam promouendam necessariis.</i>	173
<i>Ad sequentia vitæ Christi mysteria, ibid.</i>	
<i>Meditatio</i>	

totius libri.

*Meditatio prima de Incarnatione Iesu
Christi, Luc. 1.* 177

De Natiuitate Christi. 181

Contemplatio 2. de Natiuitate, Luc. 2.
183

*Contemplatio 3. de Circumcisione.
Luc. 2.* 186

*Contemplatio 4. de Purificatione Beata
Virginis, & pueri Iesu praesentatio-
ne, Luc. 2.* 189

*Contemplatio 5. de fuga Christi in
Ægyptum.* 193

*Meditatio 6. de Christo remanente
Hierosolymis.* 196

*Meditatio 8. de vita Christi ab anno
12. ad 30. Luc. 2.* 199

XXVIII. *Ad exercitium de vexillis & se-
quentia vite Christi mysteria.*
202

*Quis sit ordo sequentium exercitiorum.
ibid.*

*In quo consistat finis vite Apostolica, si-
ue procuratio gloria Dei.* 104

*In quo sita sit maior Dei gloria Socie-
tati proposita.* 205

*Hanc Dei maiorem gloriam quanam
impediant.* 208

*Quanam media Christus Dominus ad
finem*

Index Capitulorum

finem Apostolica vitæ proponat.

209

Quinam ordo inter media ea sequendus.

212

In quo sita sit ea sanctitas, & perfectio propria quæ ab Apostolica vitæ sectatoribus requiritur à Christo.

24

Meditatio prima, de vexillis duobus.

215

Meditatio 2. De Baptismo Christi.

Matth. 2.

223

Meditatio 3. de tentationibus Christi.

Matth. 3.

226

Meditatio 4. de vocatione Apostolorum.

212

Meditatio 5. de octo beatitudinibus.

236

Quis sanctitatis & perfectionis gradus vitæ Apostolica sit proprius.

240

Meditatio 6.

242

Meditatio 7. de electione, & præmonitio de ea.

249

Meditatio de tribus hominum classibus.

255

Meditatio de missis ad prædicandum Apostolis, Matth. 10.

262

Meditatio

totius libri.

*Meditatio 10. de missione Apostolorum
ad illa verba. Sicut misit me Pa-
ter, & ego mitto vos.* 262

Meditatio 11. 267

Meditatio 12. 271

Meditatio 13. 274

Meditatio 14. 278

Meditatio 15. 282

Meditatio 16. 286

*Meditatio 17. commendat Christus
orationis studium.* 290

Meditatio 18. 295

*Meditatio 19. quales Christus Do-
minus Apostolos suos esse voluerit,
& velit esse, &c. quos ad vitæ Apo-
stolica formam vocat, apertè signi-
ficat iis nominibus, quibus &c. appel-
lare solet.* 300

XXIX. *Ad 3. hebdomadam de Domini pas-
sione.* 303

*Deus viros Apostolicos perficit tandem
rebus aduersis.* *ibid.*

*Gloriam Dei maiorem per aduersa pro-
moueri.* 306

*Quanam sint illa quæ viros Apostoli-
cos perpeti sæpe oportet ad Dei glo-
riam.* 311

Non

Index Capitum

- Non externis solum malis , sed etiam
internis Deus viros iustos ad suam
gloriam exercet.* 316
- Quo discrimine perfecti & imperfecti
viri aduersa qua contingunt, patian-
tur.* 318
- Quanam potissimum virtutes exer-
ceantur à viris Apostolicis cum quid
patiuntur.* 321
- Quanam perpendenda sunt in medi-
tatione passionis Christi.* 327
- Quomodo sc Christus ad suam passio-
nem prepararit.* 329
- Meditatio 1. de Christi præparatione
ad suam passionem.* 329
- Meditatio 2. de tristitia & agone
Christi.* 333
- Meditatio 3. de Christi comprehensio-
ne , Matth. 22. Luc. Marc. 14.
Ioan. 18.* 344
- Meditatio 4. de gestis in domo Cai-
pha, Matth. 14.* 345
- Meditatio 5. de Christi apud Pila-
tum accusatione , Matth. 26. Luc.
23. Marc. 13. Ioan. 18.* 345
- Meditatio 6. de transmissio Christo ad
Herodem.* 346
- Medita*

totius libri.

Meditatio 7. de reuersione ab Hero-
de ad Pilatum, Matth. 27. Luc. 23.

Marc. 15. Ioan. 19. 346

Meditatio 8. de condemnatione &
crucifixione Iesu Christi, Ioan. 19.

347

Meditatio 9. de mysteriis in cruce fa-
ctis, Matth. 27. Luc. 23. Ioan. 19.

34

Meditatio 10. de Christi sepultura.

347

XXX. *Ad 4. hebdomadam monita.* 348

Meditatio 1. de Resurrectione Christi
& primâ apparitione factâ matri
sue.

Meditatio 2. de Christi apparitione
factâ 11. Apostolis absente Thoma.

Ioan. 20. 352

Meditatio 3. de apparitione in monte
Tabor, Marc. 8.

353

Meditatio 4. de Domini Ascensione
acta.

313

XXXI. *Ad contemplationem de amore spiri-*
tuali.

354

Quis fuerit scopus propositus Beato
Patri Nostro Ignatio in his exerci-
tiis,

ibid.

Quomo

Index Capitulorum totius libri.

Quomodo hæc contemplatio cum exercitiis cohereat. 359

Contemplatio ad amorem spirituales in nobis excitandum. 360

Ad contemplationem de amore spirituali. 362



Facultas R. P. Prouincialis So-
cietatis IESV in Prouincia
Lugdunensi.

IOANNES FILLÆVS Prouin-
cialis Societatis IESV, in Pro-
uincia Lugdunensi, iuxta priuile-
gium eidem Societati à Regibus
Christianissimis HENRICO III.
10. Maij 1583. HENRICO MAGNO
dicto IV. huius nominis 20. No-
uemb. 1606. & LVDOVICO XIII.
nunc regnante 14. Febr. 1611. con-
cessum, quo Bibliopolis omni-
bus, ne libros ab eiusdem Societa-
tis hominibus compositis, absque
Superiorum permissione impri-
mant, permittit *Sebastiano Cra-*
moisy Parisiensi Bibliopola vt libros
omnes quos *de perfectione vite spi-*
ritualis, scripsit *P. Antonius Gau-*
dier

dier, à tribus è nostris Theologis re-
cognitos & approbatos, ad sex pri-
mos annos imprimere ac liberè di-
uendere possit. Datum Gratiano-
poli, 27. Octob. 1630.

IOANNES FILLÆVS.

Hæc prima editio perfecta fuit, 24. Nouemb. 1642.



INTRO



I N T R O D U C T I O
A D S O L I D A M
P E R F E C T I O N E M ,

Per manuductionem ad exercitia spiritua-
lia S. P. N. Ignatij, integro
mense obeunda.

C A P V T I.

*Instructio pro iis qui 3. annum agunt
probationis.*



R I M O qui ad tertij anni proba-
tionem destinantur , diligenter
hæc animaduerrant , oportet. Pri-
mum illam à B. P. N. Ignatio sa-
pienter institutam , & multis con-
stitutionum locis commendatam fuisse: decretum-
que nostros omnes, qui in scholasticos approbati
studia iam sua in societate absoluerint, priusquam
ad gradū vltiorem, siue professorum, siue Coad-
iutorum spiritualium admittantur, in hac vltima
probatione sedulò exerceri.

Institu-
tio hu-
ius pro-
batio-
nis.

Finis
huius
proba-
tionis.

2. Porro finem huius probationis esse in plena & absoluta suipsius abnegatione ita se cum diuina gratia exercere ; & cum eadem ad virtutes religioso dignas incumbere , vt fiat homo in vita spiritali perfectus , idoneúmque societatis instrumentum , ad animas Christo lucrificiendas euadat. Cum enim societatis institutum homines non solum litteris , sed multò magis spiritalis vitæ perfectione conspicuos requirat ; ex illa verò assidua contentione , quæ per aliquot annos in excolendo per studia intellectu , ponenda est , humilitatis ac deuotionis fetuor intepescere soleat : necessarium omnino iudicauit Beatus Pater , vt absolutis studiis certum aliquod tempus vnicuique tribueretur , in quo vires spirituales instauraret ; solidarúmque virtutum studio , & profectu tanquam necessariis in futurum præsiidiis se communi-
ret.

Media
ad con-
sequen-
dum.

3. Ad hunc vero finem consequendum duo esse potissimum necessaria ; vnum, vt qui ad hanc probationem mittitur , non perfunctoriè ad eam transigendam accedat : sed magna cum animi simplicitate , & humilitate ardentique profectus sui desiderio : proponátque sibi omnino abhor-
rere ab omnibus , quæ profectum hunc possunt impedire ; totisque ea viribus amplecti , quæ eum ad eundem adiutura , superioris iudicio videbuntur. Alterum , vt quæ animo ita ita-
tuerit , studiosè constantérque exequatur , nihil omnino , quod ad profectum in humilitate & abnegationem vniuersi amoris sensualis , volun-
tatis , & iudicij proprij , & ad maiorem cogniti-
onem , & amorem Dei conferat, prætermittendo,

vt cum in se ipso profecerit, melius atque efficacius, alios ad Dei & Domini nostri gloriam iuuare possit.

4. Denique cum hæc vltima sit societatis probatio, atque ita illam constitutiones vocent, merito sollicitum esse debere vnumquemque, vt ad quam initio perfectionem vocatus est, ad eam in hac demum probatione acquirendam, omni ope desudet. Iustum enim esse, vt quem à suis fructum societas post tot labores & sumptus illorum causa impensos, totque adiumenta tum in purgando affectu, tum in excolendo intellectu exhibita iure suo exigit, & expectat, eum nunc tandem hoc anno reddant. Hæc igitur illis obseruanda erunt.

5. In sex societatis experimentis, & aliis similibus, iuxta nouitatus consuetudinem exercebuntur, sumpto initio à spiritualibus exercitiis per integrum mensem.

6. Orationis tempus idem habebunt, quod nouitij, tum matutinum, tum meridianum: & illud præterea, quod à communibus occupationibus vacuū, propria cuique deuotio, re cū instructore communicata, subministrabit: cum is potissimū huius anni finis sit, vt intimam illam familiaritatem cum Deo in spiritualibus deuotionis exercitiis acquirant, quam societatis operariis necessariam constitutiones docent.

7. A studiis omnino abstinebunt: quare nec noui aliquid videre, nec præterita recognoscere debebunt. Poterunt tamen præter libellos spirituales vsitatos, legere aliquos similes patres, qui in catalogo recensentur, non eo fine, vt conceptus, aut sententias ad concionandum decer-

Sedulo
incum-
bendū.

Sex, ex-
perimē-
ta.

Oratio-
nis tem-
pus.

pant, sed vt deuotioni tantum , & spirituali vtilitati seruiant.

8. Quo tempore à nouitiis exerceri memoria solet similiter, & ipsi aliquid per semi-horam edificant , veluti Psalmos , & Epistolas S. Pauli, nonnullos ex minoribus prophetis, huius generis alia, prout instructor consultum in Domino iudicauerit.

Partitio
tēporis.

9. Ad vitandum otium:& vt cum fructu tempus exigant,& distinctas habeant horas , & spatia lectioni sanctorū patrum, meditationis, orationis vocalis: vtantur diligenter examine particulari non solum ad vitia extirpanda, verum etiam ad vsum, & conseruationem virtutum,

Loqui
cū aliis.

10. Intelligent sibi non fore liberum colloqui cum nostris aliunde venientibus, aut externis absque facultate instructoris : neque expedire ad vitandas importunas distractiones, vt cum aliis etiā, aut inter se indifferenter agant , aut conuersentur, sed cum iis tantum quos superior cuilibet assignabit.

Ad si-
gnum
cāpanæ.

11. Cum signum datur exeundi vel ad concionem, vel deambulatum, nullus ab accessu cum aliis ad aulam eximatur , vt ibi singulis comites assignentur.

Exerce-
buntur
in hu-
miliori-
bus.

12. In ministerio culinæ, & cæteris corporalibus exercitationibus omnia præstabunt, quæ Nouitij solent, seu tempus spectetur, quo singula præstanda sunt, siue occupationis spatium, quo explenda est. In his verò sic se à præfecto dirigi sinent, sicut ipsi met Nouitij.

Legent
ad men-
sam.

13. Legent ordine suo ad mensam, in exhortationibus & conferentiis assidui erunt, in omnibus denique communibus exercitiis , eam diligentiam adhibe

ad solidam Perfectionem. 5

adhibebunt, quâ nouitios non æquare modo, sed superare studeant.

14. Communem recreationem simul omnes sic Recreationio.
agant, vt dum ea, quæ pios religiosos decent, loqui
assuescunt, deinceps etiam cum extraneis ea collo-
quia miscere norint, quæ pietatem redoleant, &
audientes ædificent.

15. Caueant ne vlla ratione scire satagent, aut Non de se cogitent.
coniicere quid ipsis peracto tertio annò futurum
sit, & qua in re superiores occupare illos statuant:
sed cum indifferentia obedientiæ nutum præsto-
lentur.

16. Si quando extra horas recreationis à supe- Silentium.
riore conceditur, vt in horto relaxandi animi
causa tempore aliquo deambulent, singuli seorsim
incedent, silentiûmque seruabûnt: & importunis ho-
ris per domum non discurrent, sed in suis cubicu-
lis, locisque designatis se continebunt.

17. Hanc instructionem, & regulas semel saltem Legant singulis mensibus.
singulis mensibus ac sæpius etiam legant, vt in pra-
xim vsûmque reducant.

Modus vtiliter tertium Annum per-
agendi.

C A P V T II.

*In tertio Anno applicandum serio animum
ad intellectum scientia practica
illustrandum.*

Quanquam vix dici queat quicquam quod
ad rectè peragendum probationis annum
facere possit quod non contineatur tum in consti-
tutionibus, tum in ordinatione tam antiqua, quam
noua ea de re edita à R. P. N. Claudio Aquauia;
ad rectum tamen eorum quæ ibi traduntur
ordinem & vsum nonnulla obseruare, non erit in-
vtile. Illud autem imprimis sibi debent persuade-
re ij qui ad hanc probationem destinantur, mitti
se non ad quietem & vacationem à studiis, sed ad
vtilissimum studium & eminentem quandam
scholam totius perfectionis, ac proinde operam
dare necessario debere, vt in ea versentur diligen-
ter. Horum autem diligentia ad duo potissimum
pertinet.

Primo enim persuadeant sibi, quod verissimè
studere debent, & quacunque ratione poterunt,
illuminare practicè intellectum, sic vt penetrent
benè & solide quæcumque spectant ad naturam
ipsam & essentiam perfectionis, ad tres eius vias
& gradus, ad instrumentorum etiam singulorum
quibus iuuatur perfectio, naturam & vsum, qua in
re studio & speculatione etiam accurata opus est.

Et

Et certè quanquam Constitutiones vocent hanc scholam affectus, quia tamen naturaliter pendet affectus ab illuminatione intellectus dici non potest, quantum in perfectione acquirenda præsidij, quantum adiuventi & soliditatis adferat clara distinctaque cognitio naturæ perfectionis & instrumentorum.

Quare B. P. N. 5. p.c. 1. §. 2. commendat, vt in hac probatione insistant his quæ ad maiorem cognitionem & amorem conferunt. Et valde mirum est nos totos annos tanto cum labore speculari, quid sit locus, quid tempus, quid quantitas; Existimare vero occultam perfectionis essentiam cursim, pios nonnullos libros legendo posse comprehendere: Existimo igitur opus esse aliquo solido studio, vt solidè spirituales euadamus, quod tamen omnino practicum esse debet, quo nempe intellectus illuminetur, vt voluntatem inflammet, & eius praxim dirigat.

Itaque 2. loco conari debent, vt quod studendo intellexerint, re ipsâ magno affectus feruore exercent, atque ita scientiam illam spirituales quæ speculari acquisita fuit faciant practicam, & ipso vsu experimentalem. Et quia hac affectuosa praxi perficitur ipsa scientia practica, ideo potissima cura in affectus feruore ponenda est, ob quam Constitutiones vocant eam scholam affectus, quia scientiæ quæ ibi traditur, finis est praxis, id est, affectus voluntatis constanter diuino bono adhærens, & solidarum virtutum exercitium perfectum ex solida intellectus cognitione promanans. Et certè nemo vnquam veram & certam spiritualium rerum scientiam adipiscetur, nisi vtrumque coniungat, nec dici potest spiritualis,

qui legit multos libellos spirituales, & de iis bene discurret, sed qui præeunte cœlesti lumine solidæ rerum spiritualium scientiæ quam didicit, verum vsum & praxim prudenti experientia primum circa se, deinde circa alios consequutus est.

C A P V T. I I I.

*Obiectum Duplex scientiæ practicæ in 3. Anno
acquirenda, sunt finis & media.*

Et I. de fine:

DVplex est pars obiecti scientiæ illius practicæ, quam studio & operatione acquirendam esse diximus: vna est ipse finis, altera comprehendit media.

Finis non est alius quàm perfectio propria & aliorum; quare ante omnia circa finem duo sunt curanda. Primò vt perfectè cognoscatur natura perfectionis illius ad quam vocati sumus, & ad quam iuuare alios debemus, quæ quoad essentiam quidem consistit in perfecto amore, & quoad integritatem in virtutum omnium solida possessione; quoad exemplar verò nobis propositum in Christi imitatione, vt ita Deum amemus sicut Christus ipse dilexit: Cum autem varij de amore Dei & natura totius perfectionis, & virtutum scripserint, expedit certè si qui legendi sint, illos eligere qui ea de re tractarunt solidius, ex quibus valde vtile erit, accurato studio rimari ad fundum vsque totam perfectionis naturam, causas, partes, modos &c. & de his sibi breue aliquod scriptum

scriptum componere, perinde ac si aliis tradere oporteret: sic enim & penetrabit magis, & sibi imprimet ideam illam, ad quam tota vita spectare debet, verum debet hæc cognitio esse practica. Praxis autem propria est intentio ipsa finis; & efficax quoddam desiderium, totam amoris diuini virtutumque perfectionem, prout in Christo elucet, complectendi, & si procul ab ea nos abesse videamus, omnibus modis in eam paulatim, per virtutum quibus egemus gradus tendendi: Nam sine hoc desiderio siue praxi, nemo ea quæ de natura perfectionis studio assecutum se esse putat, verè intelliget. Contrà verò si toto in ea conatu feratur, experietur ex hac intentione, vt totius scientiæ sanctorum principio diffundi lumen quoddam copiosum conclusionum practicarum, non secus atque radios ex sole, quibus clarissimè & distinctissimè intelliget, & quò sibi tendendum, & quibus viis, virtutumque omnium naturam penetrabit.

C A P V T I V.

Quæ sint media ad illum finem, & quo ordine usurpanda.

AD hunc finem consequendum, varia in hoc 3. anno media sunt, quæ commodè reuocari possunt ad quatuor veluti capita: primum pertinet ad dispositionem cum qua suscipi debet hæc probatio ab iis, qui ad eam destinantur, de qua §. sequenti.

Secundum complectitur orationis & totius cum Deo Communicationis studium , ad quod pertinent exercitia spiritualia, iugis Dei præsentis memoria , praxis regulæ electionis B. P. N. oratio mentalis, officium diuinum , & vocalis oratio, Sacrificium missæ, confessio, & communio, vtrumque examen conscientiæ, lectio spiritualis & alia id genus.

Tertium ad mortificationem sui integram perfectamque spectat , cuius studium cum Dei communicatione indiuisa societate cohæreat necesse est. Huc autem refertur variarum virtutum praxis potissimum verò humilitatis , paupertatis , castitatis , obedientiæ. Atque 2. hoc & 3. medium ita sibi cohærent , vt in ipsa praxi vnum ab alio separari non queat. Et ipsa quidem oratio est maximè generale & excellens medium quo, omnes ad vnum Sancti suam perfectionem & Dei gloriam promouerunt. Nam ipsa est quæ animam efficit puram & sanctam , nec finit esse inanem, vel malè compositam , sed replet Deo , componit tum mortificationis, tum virtutum omnium exercitio motus eius omnes , cœlesti quadam generositate eam perfundit , vt nec ad leuiiores quidem culpas , aut inutiles nugas se abiiciat, vt nihil magnum in mundo reputet præter Deum, vt labores vitæ huius , & tribulationes , mortem etiam ipsam nihil reformidet , nihil sibi difficile, nihil asperum putet, quod ad Dei gloriam possit esse vtile : quare profectus in orationis & communicationis cum Deo studio , est mensura quædam perfectionis , adeo vt omnino quisque ad perfectionem progredi altius queat , aliorum salutem ac Dei gloriam promouere , quod se magis

gis veræ & solidæ orationi dederit; quare non mirum est si societas cui summa perfectio & Dei gloria proposita est, hoc imprimis in tertio anno requirat, qua etiam de causa vocat scholam affectus.

Hoc igitur debet esse commendatum vt, accedens ardentissimum quoddam & insatiabile, sæpe imo continuo cum Deo conuersandi familiariter excitet desiderium, quo fiet vt solutus aliis alacris in eius amplexus ruat, & discat toto hoc anno praxim ad Deum intrandi, & exeundi; adeò vt siue hoc tempore, siue tota deinceps vita non tantum quando consueta Deum orandi hora est, sed etiam extra id tempus quotiescunque vel vnum momentum temporis vacuum necessaria occupatione conceditur, libero animo sistat se Deo, & deinde reuocante alio negotio ab eo dimissus egrediatur ad eius gloriam promouendam: cum autem varia sint exercitia interna, quibus cū Deo occupari possumus, de his deinceps agendum erit: hoc loco solum id monuisse sufficiat, inexplebile quodammodo versandi cum Deo desiderium necessarium esse ei qui velit seriò proficere.

Huic desiderio communicandi cum Deo, debet omnino coniunctum esse par desiderium mortificationis propriæ, quæ plerumque vel solet præcedere orationem, vt necessaria dispositio ad illam; vel eandem comitatur, cum compescit difficultates quæ in orando occurrunt, vel eandem sequitur & ab ea perficitur, vt necessaria ad ea quæ in oratione proposuimus exequenda: quare commendatur à B. P. N. in hac vltima probatione verbis grauissimis §. p. c. 2. §. 1. tum orationis, tum mortificationis studium, vbi ait, debere illos qui
in

in illa versantur, sese diligentius in schola affectus exercere, & in rebus spiritualibus & corporalibus, quæ ad profectum in humilitate & abnegatione vniuersi amoris sensualis, voluntatis, & iudicii proprii, & ad maiorem cognitionem & amorem Dei conferunt, insistere, additque rationem hanc, ut cum in seipsis profecerint, melius ad profectum spiritus, alios ad Dei & Domini nostri gloriam iuuent. Et certè duo hæc in eum finem valent plurimum, seque mutuo conseruant, acuiunt, perficiunt, nec vnum sine alio aut stare diu potest, aut efficax esse ad opem ferendam proximo; quæ autem sit necessaria mortificatio, & quomodo quouque ordine, dicetur postea.

Quartum caput continet eas virtutes & exercitia quæ ad iuuandum proximum spectant, quo spectat vnio & charitas fraterna, zelus animarum, functiones variæ: hæc autem media fini ita accommodanda sunt, ut quam requirit societas spiritus perfectionem perficiant, quare adiungi omnibus debet amor instituti, & ex eo deriuari necesse est ea, quæ ad singulorum vsum sunt necessaria.

Quamuis enim necessarium videatur ab initio nullius ex iis mediis abicere curam, sed omnia quantum dabitur complecti, fieri tamen non potest, ut omnium perfecta cognitio acquiratur si confusè & temerè procedatur, quare licet nullum negligatur, est tamen operæ pretium singula ordine sibi describere, ut certo tempore cuiusque natura inuestigetur, & attentiori vfu vera praxis acquiratur. Qui porro debeat is esse ordo non facile dixerim, pendet enim ex variis circumstantiis, & in exercitiis spiritualibus, cum seipsum quisque

quisque considerat; & singulas diei actiones perpendit, facile potest iudicare cui rei imprimis operam dare debeat. Si tamen naturam rei attendamus, puto satis commodum fore eum, quem deinceps singula media percurrendo sequemur.

C A P V T V.

Quenam sit bona, quæ mala dispositio accedentium ad hanc probationem.

HAc de re expendenda sunt quæ habet R. P. N. Claudius Aquaiua in instruct. 12. initio, ubi quæ dici possunt breuiter & solidè attingit. Duo tantum addam. Primum est vt cum eo prorsus spiritu suscipiatur hæc probatio, quo est à B. P. N. instituta, & à societate commendata, alioquin vel inutilis erit, vel eò minus utilis, quò longius quis ab eo spiritu fuerit. Certum est B. P. Nostrium diuina quadam prudentia instructum, ab experientia vsûque præclarum hoc institutum hausisse. Cum enim Dei prouidentia primorum patrum iter Hierosolymitanum quod peractis studiis erant aggressi, interruptum, & annum integrum expectare constituissent opportunitatem nauigandi, interim distributi in varias Italiæ partes & ciuitates, orationis & mortificationis excellentis exercitiis exculsi, huius probationis formam quandam societati reliquerunt, & societati constituendæ propriam occasionem ob ingentem ex illo fructu secessum dederunt, vt patet ex lib. 2. vitæ B. P. N. capite 8. & sequentibus. Itaque
tanti

tanti refert ad societatis conseruationem tertij huius anni cursum aggredi prout conuenit, quanti fuit ad eiusdem foundationem primos nostros patres ita posuisse in Italia annum illum, in quod exemplar intueri conuenit eos, qui ad hanc probationem destinantur.

Alterum est hoc efficax & ardens desiderium bene collocandi huius temporis solere impediri, ex eo præcipue quod præterita vita remissior fuerit. Inde enim cōtingit, vt nōnulli nō secus ac viatores aliquot annis in religiosa conuersatione positis defatigati subsistant, & vel ad ignauum quoddā otium aspirent, & ideo in hac probatione solam sibi quietem & otiosam vitam proponunt. Quod nonnunquam honesto prætextu excusant, siue laborum in scholis positorū, siue valetudinis non integræ, siue alio quocumque vel opinionis, aut doctrinæ, aut virtutis suæ vento inflati, putēt se minimè illa egere, & ideo perfunctoriè hoc tempus positum veniunt, qui certè eò amplius hoc egent remedio, quo vel minime egere se putant vel magis torpēt. Equidem dubitari non potest, quin studiorum continuū per tot annos exercitium mirum in modū spiritus deuotionis & mortificationis exsiccet, adeoque videri possit quibusdā difficilior ille transitus ab eorum occupationibus ad hæc humilia, & durā exercitia. Cæterum experientia docuit hætenus illos qui tempore studiorum spiritus religiosi conseruādi aliquam rationem habuerunt, cū his peractis ad tertium annum destinantur, non tantum non ægrè, sed etiam libentissimo animo id suscipere, & non secus ac lapides in aëre suspensos ruptis vinculis in centrū suum rapi, ac dicere; dirupisti Domine vincula mea, tibi sacrificabo hostiam laudis, vota mea Domino

Domino reddam. Et vero cum quis ita resistit, cum hæret, cum lentum se & tardum experitur, cum veluti ad corporis quietem aut inutilem sibi occupationem perfunctoriè & remisso animo accedit, is quidem effectus est torporis vitæ pristinæ, & euidens argumentum eum non satis comprehendere perfectionem ad quam vocatus est, ac proinde nec tanti illam facere quanti debet: in quo totius vitæ fundamento cum erret, quid ab illo bonæ frugis expectari queat; Quare si quæ huiusmodi mala dispositio adsit, omni opere curandum est, ut tollatur; quod fieri potest partim consideratione eorum in instruct. 12. initio, partim ipsis exercitiis spiritualibus, quibus eminentis societatis perfectionis cognitio & æstimatio augeri, & quam procul ab illa simus innotescere, & voluntas ad eam omni studio amplectendam vehementer incitari consuevit.

C A P V T VI.

Quomodo Exercitia spiritualia initio sint peragenda.

INter alia experimenta quæ in vltima probatione præscribuntur, locum primum habent exercitia spiritualia quæ integro mense fieri debent, & quamquam tam longum tempus non nihil reformident, nihil tamen videtur de eo detrahendum, nisi manifesta ratio, vel obedientia secus postulet, imo toto affectu suscipienda sunt, nec tantum ad 30. dies sed etiam ad longius tempus si, ita

res ferat ; quare pusillo animo illi sunt, nec satis generosè suum profectum desiderant , qui initio terrentur hac denuntiatione, cum constet contrarium extitisse spiritum primorum patrum , qui ad tam vtilem occupationem, & iucundam cum Deo conuersationem tam cupido animo ferebantur : Certè in exercitiis hisce ponendus est quodammodo fructus non tantum totius anni probationis, sed etiam reliquæ vitæ. Quare quamvis hoc medium particulare videatur, tamen ad finem ipsum & cætera media valet plurimum , cum hic ea omnia quodammodo delineari, & primis suis veluti coloribus depingi oporteat, quæ tota deinceps vita perficienda erunt. Nam in exercitiis ea proponuntur quæ ad finem, nostram nempe perfectionem & proximi, deinde vero ad media illi fini utilia spectant : vt non solum intellectu & cognitione, sed etiam voluntate & affectu, atque adeo practicè, comprehendantur. Cum enim prolixiora sunt, multum temporis, opporunitatis, luminis, caloris spiritualis suppeditant, vt quisque penitus intueri possit quænam sit perfectio in genere, quæ item perfectio societatis in particulari : Deinde verò quantum ab illa distet, quibus se sentiat impedimentis distineri ; Denique vt insatiabili desiderio, ardentique animi studio, atque maximo mentis fervore aggrediatur, totis ad eam viribus contendere. Nam eo spectat fundamenti consideratio, & tota prima hebdomada & in 2. meditationes de Christi Domini vita, quæ vt nobis tanquam in lucidissimo speculo eam perfectionem quam prosequimur repræsentat, ita est efficacissimum ad eam incitamentum. Et vero dubio procul, si bene & serio tempus hoc collocetur, tum
perfe

perfectionis nostræ cognitio distincta, tum eiusdem inflammatum desiderium Deo inspirante, consequetur, satis experientia ipsa comprobatur: præter meditationes autem & directionem lectio spiritualis multum adferet adiumenti, quam in prima quidem hebdomada, de primo statu perfectionis deque eius impedimentis, in secunda vero, de Christi Domini amore & imitatione, atque adeo de 2. via: deinceps vero tam de natura ipsa perfectionis, & 3. via instituendam putarem. Adiuncta suis temporibus diligenti lectione tum libelli exercitiorum, tum directorii; regula etiam electionis quam B. P. N. tradit in primo modo electionis perpendi hic poterit, ut exinde eiusdem praxis inchoari possit.

Atque hæc de perfectionis essentia quæ cogitata & meditata erunt, breuiter sunt annotanda, ut eius nobis quamdam ideam formemus quam tota vita ante oculos habeamus, & hæc de fine.

Quod ad media vero attinet, & omnia & singula siue ad orationem siue ad mortificationem. spectent, prout in variis exercitiis suppeditantur, sunt examinanda, & recte componenda quantum res & tempus feret, in omne futurum tempus: quare iis distributis pro opportunitate, vnum vno vel pluribus diebus prout necessum videbitur, considerandum erit attentè, & forma eius accurata si fieri possit, sin minus, rudis delineanda: quod vero in vno quoque obscurum erit, quod difficile, annotandum diligenter, donec accuratiori studio & vsui suo cuiusque ordine vacetur. Nec tamen interim minus accuratè quæ concepta fuerit forma, etsi adhuc rudis vsurpanda est: ex ipso

enim diligenti vſu quæ prius obſcura & difficilia, facilia & manifeſta reddentur.

Præterea in tanta luce & ſuiptius cognitione valde expediet certum ſibi ordinem quiſque deſcribat, quo conceptum ſingulorum mediorum vſum, & exercitationem maiori ſtudio, & ad praxim ipſam attentiori excolat, vt verbi gratia ſtatim ab exercitiis ad vnum meſem ſuſcipiat ſtudium, vel intentionis totius perfectionis finis, vel præſentiæ Dei, vel orationis mentalis cum paupertate ſpiritus, ſic vt non tantum conetur eam formam ſeruare quam ſtatuit, ſed etiam legendo authores, qui ea de re tractarunt, ſtudere, vt penitus intelligat quæ ad eius naturam & vſum pertinent, & reipſa quæ ſtudio diſcit, experientia conetur cognoscere in ſeipſo. Et ita altero meſe ad aliud progrediatur ſemper coniungendo cum oratione mortificationem iuxta ea quæ ſtatim dicentur. Hæc vero ordinis diſtributio ſic optimè fieri poterit, quando in otio maiori ſingulæ actiones & media diſcutiuntur. Et ex ea diſcuſſione apparet quid magis vrgeat, quid plus difficultatis habiturum videatur, quid requirat plus temporis. Hoc fundamento bene collocato totius anni tertij curſus vtiliter conficietur.

C A P V T VII.

De exercitio præsentiæ Dei.

QVæ hæcenus diximus pæne ad 3. & 4 caput
mediorum, id est orationem & mortifica-
tionem, pertinent in genere, nam quamquam
exercitia spiritualia ad orationem omnino per-
tineant, tamen vniuersim tam finem quam
media omnia cætera componunt & dirigunt.
Iam vero seorsim de his mediisque ad oratio-
nem pertinent agendum, deinde de aliis, quam-
quam, vt sæpe monuimus, non debeat à studio
mortificationis separari orationis studium. Qua-
re operæ pretium erit si statim ab exercitiis vtrum-
que coniungatur ex æquo, vt sicut in speculati-
uis vtiliter fit, ita etiam in schola hac affectus
matutinum tempus vni, pomeridianum alteri
studio dicetur, siue ad leuandum tædium, siue
vt se mutuò iuuent. Nam sicut sine mortifica-
tione oratio non potest esse perfecta, ita nec si-
ne oratione potest esse mortificatio aut con-
stans, aut feruens, & deuota, aut efficax: Itaque
pari conatu vtrumque studium est amplecten-
dum. Omnis porro orationis & familiaritatis
cum Deo fundamentum est Dei præsentiæ, cui
proinde aliquod tempus tribuendum est, & in-
ter omnes modos quos habet Crombetius,
omnibus studio accuratò discussis, tres aut qua-
tuor aut plures efformandi sunt, & orationi-

bus, conuersationi, externis actionibus nostris practicè accommodandi. Certè quanti id sit momenti dici non potest, & experientia comper-
tum est, permultos ex hoc vel vnico in reliquam vitam, post peractum 3. annum probationis, in mediis occupationibus plurimum adiuuenti hausisse, & ingentes fructus retulisse. Hinc enim profluit vis omnis orationum iaculatoriarum, quibus homines occupati conceptum man-
ne feruorem & vnionem cum Deo conseruant & fouent, in periculis & difficultatibus tutos se & generosos præstant, & in tribulationibus ala-
cres. De hac autem re legi poterit P. Crombe-
tius, P. Arias, & P. Du pont in duce & vlti-
mo opere.

C A P V T V I I I.

De Regula Electionis,

Regulæ illius, quam tradit B. P. N. in primo modo electionis, praxis magnum adiuuentum accipit à Dei præsentia, tota autem refertur ad intentionem finis, quare præsupponit magnam eius notitiam & sitim in exercitiis spiritualibus excitatam, quæ vt augeatur, vtile valde erit aliquod tempus huic exercitio dare. Est enim mirabilis quædam machina, quam B. P. N. primus construxit & docuit, quare puto eius vsum non diu post exercitia spiritualia inchoandum, aut deinceps deferendum: nam optimè cum aliis omnibus coniungi potest, & verò debet, vt ea di-
rigat

rigat nimirum in finem ipsum. Est enim veluti cementum quo cum Deo opera omnia iunguntur. Est machina qua in Deum sustolluntur & animæ instar qua viuunt, & feruent omnia. Est suauissimum condimentum, quo exercitiorum omnium difficultates temperantur. Est denique veluti fons luminis practici, ex quo, velut fonte quodam, in omnes vitæ partes lucidissimi radij prodeunt, quibus partim præteritas actiones diiudicemus, partim futuras disponamus: vt autem vitetur quod posset in hoc exercitio contingere, & maior vtilitas existat, non abs re erit, si primis mensibus ad maioris Dei gloriæ bonum, quod est obiectum proprium amoris Dei, expresso actu intentio dirigatur, aliis denique voluntatis cum Diuina conformatio quærat. Qua de re videri posset qui compositus est paruus tractatus. Nam tria hæc ad electionis regulam pertinent, suntque semper ad manum habenda vel singula, quod initio expedit: vel omnia simul, quod vsu ipso acquiritur, fieri: vt ad mensuram istam non solum discamus omnes nostras actiones internas exigere, sed etiam ipsa perfectionis instrumenta, & media atque exercitia componere, cum verus eorum vsus à fine ipso vel potius finis intentione prorsus dependeat. Ergo iterum repetendum est, omnino expedit, vt hæc norma non deponatur vnquam è manibus, quam merito vocare possumus instrumentum instrumentorum, & instituti societatis summam.

CAPVT IX.

De oratione Mentali.

INter alia instrumenta præcedit dignitate augustissimum sacramentum & sacrificium; deinde officium Ecclesiasticum: quare videretur vtrumque orationi mentali præmittendum: verum quia hæc si bene fiat, optima est ad illa dispositio, idcirco puto proximam ei post examen curam tribuendam. Est autem hæc materia amplissima, deque ea extant plurimorum tractatus. Suares tom. 1. de religione habet vnum de ea librum. Ex eo P. Du pont in suam ducem præcipua deriuauit. Libellus exercitiorum summam omnium continet; cæterum quæcumque de ea tradi solent præceptiones, etsi vtile sit eas ad certa capita bona methodo ad suum vsum reducere, tamen non bene intelliguntur vnquam, nisi frequenti earum exercitio à Deo lumen practicum hauriatur. Opus enim orationis opus Dei est, qui nos orare facit simul etiam orandi modum ostendit. Et certè excolendum est hoc instrumentum eo diligentius, quò & Deo nos magis vnit, & ad magna efficienda plus valet, debetque sibi quisque persuadere, se & eo fore in ea quam prosequitur perfectione, quæ in Dei amore consistit progressurum longius, & plus vtilitatis proximo allaturum, quo fuerit orationi magis deditus: qua etiam de causa in tertio anno plus temporis mentali orationi tribuitur, & commendatur omnibus vt cuiusque

cuiusque affectu & deuotione, spontè etiam diutius ei vacent.

C A P V T X.

De examine Conscientiæ.

Post orationem mentalem inter omnes spirituales exercitationes examen conscientie vtrumque primum locum tenet, eo quod valeat multum ad nostri cognitionem, & mortificationi ita inferuiat, vt ad illam potius spectare videatur vel ad vtramque pertineat. Nam vim tam orationis quam mortificationis continet aptè ad efficacem vitiorum medicinam: quare in vita spirituali nihil maioris momenti esse prudentes & experti iudicant: de eo scribunt multi. De paz, Riccius, Du pont, aptissimè autem coniungetur cum regulæ electionis praxi, sic vt per regulam illam facienda disponamus, & deinde ad eandem facta per examen discutiamus. Et quidem valde iuuat pridie vespèri de totius diei sequentis actionibus, earum præcipuè initio & fine, deque modo ipso decernere aliquid secundum regulam illam: sicut enim fit vt ad illam veluti catenam annexæ actiones non tam fortuitis occasionibus prorumpant temerè, quàm rectâ animi destinatione ordinatè emittantur, & præcunte veluti ea face nihil in illis tenebrosum, nihil cæcum appareat. Ergo tribuendus vnus aut alter mensis, tum studio ipsi spiritualis huius exercitij, vt eius natura bene penetretur & ali-

B 4 quod

quod scriptum commodum de eo conficiatur, tum praxi, vt cum quæ cognita sunt ad vsum reuocantur, fiant ipsa experientia firmiora & clariora. Nec omittendum est vt notentur quæ ad hanc praxim Dominus communicauerit lumina, quod idem faciendum est in oratione & aliis exercitiis omnibus. Porro particularis examinis primo mense suscipienda est cura. Nam eius opem suscepta pro eo tempore exercitia, tum cæteræ omnes actiones rectè componi & perfici debent.

CAP V T XI.

De Sacrificio, & Sacramento, & visitatione sanctissimæ Eucharistia.

CHristum Dominum in SS. Eucharistia vel offerre ipsi nos, vel aliis offerentibus, adesse, vel recipere, aut saltem visitare possumus. Atque hæc omnia quomodo rectè & fructuosè fieri possint in 3. anno inuestigandum, studio & ipso vfu discendum. Et certè cum in Ecclesia Catholica nihil sit dignius & vtilius, atque ad vñionem cum Deo efficacius, existimandum est esse instrumentum ad perfectionem potentissimum, nec vllum esse, circa quod aptandum & perficiendum noster omnis conatus occupari queat cum maiori merito & vtilitate: vtiliter autem sibi quisque eliget, primo, quæ ad excellentiam & æstimationem tanti mysterij facere possunt; secundo, quæ ad præparationem Sacrificij spectant. Tertio quæ ipsam oblationem Sacrificij

cij perficiunt. Quarto quæ ad communionem pertinent. 5. Quæ, vt Sacrificio deuotè interesse possimus, iuuare queunt. 6. Denique quæ ad SS. Sacramentum crebro visitandum cum fructu conducunt.

C A P V T X I I .

De Officio Diuino.

PRoximam sibi curam postulat Diuinum officium quod quoniam ex obligatione attentè & deuotè legendum incumbit, nemo non videt quanto opus studio, vt quæ ad eam deuotionem pertinent procuremus. Itaque legendi hi authores qui descripserunt inter quos P. Du pont in ultimo tomo operis; addi etiam omnino posset epistola R.N.P. Claudij Aquauinæ ea de re, & P. de Paz. & esset vtile annotare ex vita P. Fabri eas industrias quibus S. ille vir solebat sese in hoc exercitio subleuare. Et certè si doctrinæ de officio Diuino soliditati annectantur tam hæ industriæ, quæ similes multæ, quas diuina bonitas communicabit vbertim ei qui se disponet, dici non potest quantum inde spiritualis luminis & feruoris hauriet.

CAPVT XIII.

De lectione spirituali , & aliis exercitiis.

Non est opus singula percensere quæ supersunt : vno enim verbo dicendum est lectionis spiritualis, Litaniarum, & id genus piarum occupationum naturam inuestigandam esse studio, deinde praxi: Nec mirari quisquam debet in hac schola affectus ita commendari studium ipsum, cum vt iam diximus, plurimum momenti sit in eo, vt intellectus practicè illuminetur. Quare quamuis libelli pij, qui passim iam conscripti sunt de sola perfectione & eius praxi, vtiliter legi possint, tamen ea sola lectio non sufficiet, nam plerumque ad fundum vsque naturam illarum actionum non discutiunt, & licet quandoque attingant, tamen id faciunt ita leuiter & obscurè, vt non possit satis penetrari. Horum enim intentio est, facilioribus præceptionibus lectorum quorumcumque etiam imperitorum capacitati sese accommodare, itaque Tyrones docent, non formant magistros: docent quomodo vnaquæque actio facienda sit, nec supremas rerum causas & principia tradunt, sed, deductis inde conclusionibus, quasi quibusdam riuulis leuiter irrigant legentium animos. At verò longè vtilius est rem à suis vsque principiis accersere, & solida practicarum virtutum cognitione implere intellectum

intellectum , sic enim perpetuò voluntatem stimulat , & non desinet ducto à principiis discursu practicis eam conclusionibus vrgere, vt in vsu adeò præstantium instrumentorum perfecto non torpeat, quod non contingit quando leuiter tantum capit intellectus harum actionum siue spiritualium instrumentorum naturam , facili lectione libellorum spiritualium contentus. Nam voluntatis feruor qui fortè excitatus erat ipso vsu in tertio anno probationis , cum deinde aliis vacandum est æque facile languescit : nec (cum suis ipse principiis destituatur) efficaciter satis excitari potest. Ergo huic omnino spirituali scientiæ non perfunctoriè , sed solidè , seriòque studendum est , & tantum cuique exercitio temporis tribuendum , quantum dictabit prudentia , & particulares circumstantiæ permittent. Meminisse autem semper oportet iungendam praxim & vsum proprium, quo fit vt scientia illa practica sit, & scientia sanctorum, & diuino lumine tanquam sigillo quodam admirabili, & intellectui & voluntati profundius imprimatur.



CAPVT XVI.

Quod cum studio orationis iungenda sit mortificatio.

DVm pergit sensum excolere spiritualium actionum instrumenta, debet etiam, vt supra monuimus, progredi æquè in studio & praxi Mortificationis, vt aptè mortificatio orationi adhæreat, nec enim hæc duo patiuntur à se inuicem diuelli, nam ex his componitur totum ædificium perfectionis, quod omnino ex vtraque parte assurgere æqualiter debet, nec spectari potest soliditas, nisi vtraque pars aptè committatur. Quare cum Deus voluit aliquos excellenti sanctitate ad suam gloriam ornare, eos initio conuersionis non orationis tantum crebro vsu, sed acerrimo etiam mortificationis spiritu exercuit, vt prorsus eos mutaret sibi que aptaret. Sic S. Benedictum, authore D. Bernardo in sermone de eo, ita S. Franciscum, ita etiam B. P. N. Manresæ. Certè experientia quotidiana docet eos ad Dei gloriam longe esse vtiliores, qui vel in 1. Nouitiatu hoc spiritu pleni fuerunt, vel postea siue in 3. anno, siue aliàs in variis occasionibus huic vitæ institerunt diligentius, & tempore aliquo congruo studio illi pro Deo perdendi se ipsos animasque suas addixerunt. Cum enim ad societatem primùm accedimus, sicut est imperfecta satis Dei nostrique cognitio, ita mutatio vt plurimum non fit nisi superficie tenus; si non decrescit

decrefcit feruor, faltem non folet augeri, imò fæpe multiplicantur, & corroborantur in perfectiones, quare poft illa egemus maxima mutatione, quæ non ab oratione tantùm pendet, fed etiam à mortificatione. Euertendum eft igitur folum cordis noftri, ftudiorum occupationibus, & externarum rerum vanitatibus æquè vt fpinis fyluefcens, & mutandi penitus affectus & inclinationes, vt fpirituali aratro non leuiter detonfa, fed ad fundum vſque ſubacta terra animæ noſtræ, diuinæ ſationi ſit aptior ad multam frugum vbertatem. Ad hoc expedit ſtatim ab exercitiis veræ mortificationis & virtutum ad eam ſpectantium naturam inueſtigare, & eos authores legere qui de ea ſcripſerunt, & quandoque non erit inutile vbi eius naturam, cauſas, effectus, partes, attenta conſideratione penetrauerit, in breue aliquod ſcriptum dirigere non abſimili modo quàm ſolemus in Philoſophia & Theologia de vnaquaque materia ſuas tractationes componere: quo in opere velim haberi maximam rationem inſtituti, ſic vt quæcumque in Bullis Pontificum, conſtitutionibus, ordinationibus, epiftolis PP. NN. hiftoria ſocietatis, vitisſque PP. NN. ea de re habentur, non tantùm legantur attentè, ſed ſuis locis aptè concinnèque addantur, vt generalis de mortificatione ſcientia ad formam ſocietatis ſpiritus, temperetur & facilius ad noſtram praxim tota accommodetur. Id autem dum fit non poſſunt non venire in mentem quæcumque nos infeſtant malæ propenſiones cum ſuis remediis, quo fit vt ſcientia illa reddatur præctica dum pœne in nobis multiplices imperfectionum fibras quas legendo ſpeculandoque

dóque inuestigamus , vigere cernimus & horremus. Deinde quo quemque ordine atque armis aggredi & oppugnare debeamus , decernimus ; quod si accedat executio ipsa , & vsus, feruensque ac frequens mortificationis exercitium , iam speculatiua illa scientia fit practica , vsu ipso & experientia discimus , quid cuique imperfectioni malitiæ virium pertinaciæ insit, quid in vnoquoque remedio positum sit spei & efficaciam ad victoriam , quæ vt certior, non est omittendum curandum esse vt regula electionis , id est maioris gloriæ Dei vel amoris , vel imitationis Christi singula mortificationis opera informet iuxta dicta §. 12. probatur etiam plurimum vt si quæ occurrant lumina siue orando aut meditando , siue inter pugnandum , ea annotentur diligenter siue futura deinde adiumento, vsui, & praxi, siue additura aliquid clarioris cognitionis, ad id breue scriptum quod hac de materia collegimus. Porro quod ad modum & ordinem, qui in hac praxi tenendus est , pertinet, cum in exercitiis spiritualibus quæ initio fiunt non tantum orationis, vt diximus, sed etiam mortificationis habenda sit ratio : certè in iisdem tota hæc fabrica veluti in plano delineari imò fundamenta eius poni debent , quæ deinde toto anno perficiantur ; sicut igitur in illis spirituales nostras actiones , siue prædicta deuotionis instrumenta consideramus in genere, & quem in singulorum praxi seruare velimus , ordinem constituimus ; ita etiam eodem tempore mortificationis partes & praxim disponere possumus , prout in Domino expedire videbitur. Is ordo rerum naturæ congruere videtur vt antè omnia paupertas excolatur , quam cum dico , intelligo

telligo odium sui generosum , quo fiat , vt primum quidem sese cœteris omnibus expoliet propter Dei amorem , adeo vt vilissima etiam placeant : Deinde verò , quod pauperibus proprium est , in vilissimis & laboriosissimis occupetur libenter. Præterea vt dolores , morbos, & id genus incommoda pauperum more sustineat libenter. Denique omnibus contemptui se esse gaudeat ; hæc enim ad paupertatem spectant , vel eius sunt comites indiuidui : vnde immorari poterit in acquirenda singulari studio humilitate quæ paupertatis quædam est pars. Deinde vero progredietur ad castitatem , & sensuum carnisque mortificationem. Denique obedientiam tum voluntatis , tum intellectus , & voluntatis suæ cum diuina constantem conformationem , non in genere tantum , sed in particulari , & plenissimam indifferentiam tam quoad gradum , quam vniuersas agendi occasiones. Is certe ordo probandus magis quam ille alius quem plerique præscribunt , nempe vt ad singulorum vitiorum capitalium expugnationem ordine aliquo procedat. Idque ob varias rationes quas omitto , quamquam & ex illo ordine in hunc deriuari aliquid possit : vitia enim capitalia radices sunt , quæ nisi euellantur , nec potest esse perfecta paupertas , nec castitas , nec obedientia , fit tamen plerumque vt , cum plantamus has virtutes , malas radices euellamus eo labore , & è contra. Porro iterum hîc monendum est habendam esse semper rationem instituti , itaque omnino consultandum est vt cuiusque virtutis acquirendæ summam perfectionem ex regulis & constitutionibus sibi ipsi tamquam exemplar & ideam

ideam efformet , & quæ alii de ea virtute dixerunt , ad eam accommodet , actusque omnes tam internos quam externos ad eam aptare conetur.

C A P V T X V.

Comparanda notitia Instituti.

SI quæ dicta sunt , seruentur; necesse est bonam cognitionis instituti partem valde vtiliter & practicè esse comparatam. Nam cum totum vocationis nostræ negotium circa finem, id est, perfectionem & media versetur, si cum tam fini quàm mediis prædictis, orationi, meditationi, paupertati, humilitati, castitati, obdientiae studuimus, semper ea adiunxerimus quæ instituti sunt propria, tam in Bullis pontificum & constitutionibus, quam epistolis & vitis P. P. N. N. & societatis historia, certe quod interna media attinet, vix quicquam supererit, quod addiscendum sit: quare opus erit solum instituti formam & media externa considerare, legendo constitutiones; qua in lectione, ne sterilis sit, conandū est vt excitemus amorem vocationis nostræ, & diuinam prudentiam admiremur tanti operis hisce nostris temporibus artificem ad nostram & tam multorum salutem, idque per seruum suum B. P. N. Ignatium: quantum autem temporis huic studio tribuendum sit prudenter ex circumstantiis colliget. Certè non solet hæc cognitio in 3. anno perfici, quare plerumque valde expedit postea aliquid temporis eidem tribuere prout res feret.

De Salute

C A P V T X V I.

*De Salute & Perfectione proximi procu-
randa.*

HÆc est altera pars finis societatis , cuius
etiam ne dimidium tantum eius spiritum
habere censeamur , & merito degeneres filij ap-
pellari possimus , summam curam habere debe-
mus , omni quidem vita , sed præcipue 3. anno.
Nam hoc maxime tempore vel parva vel con-
cessa doctrinæ aliorumque talentorum Præsi-
dia, solidiorum virtutum vi & maiori feruore spi-
ritus imbuenda sunt, vt sint potentia Deo ad de-
structionem & ædificationem , efficianturque
causa veluti in actu primo ad magnos circa pro-
ximum effectus , si ita placeat Deo. Imprimis er-
go in tertio anno etiam finis hic expetendus , &
solidè penetranda omnia quæ ad proximi charita-
tem & zelum animarum pertinent , & ad societa-
tis spiritum accommodanda , simulque omnibus
mediis excitandus ille ipse zelus & ex eo tempo-
re exercendus , prout occasio feret, sed præcipuè
oratione, & mortificatione , vel , quod ex vtro-
que conflatur , vitæ sanctioris exemplo. Prospi-
ciendi autem scopuli qui hîc latent plurimi. Pri-
mò nonnulli natura lentiores ex hoc tempore
ad otia vitæ quietioris aspirant , & propositis in
salute proximi difficultatibus facillè terrentur.
Secundò alij incitantur ultra vires & corporis
& animi, quibus periculum est, ne neglecto spiritu

& orationis studio obruantur. Tertiò sunt qui humanos fauores & applausus etsi directè non intendant, tamen libenter magni faciunt ; quod virus nisi perpurgetur , dici non potest quantum impediatur fructum , & quantum periculorum causa sit. Quartò sunt etiam qui nimia opinione sui concepta, iam sibi has aut illas functiones destinant , non satis intelligentes salutem proximi opus esse Dei, à cuius voluntate proinde pender, uti nobis vel aliis in hac , vel illa functione. Sunt multi similes nàui in zelo animarum qui detegendi , & consideratione & affectu , ut pretiosum hoc zeli animarum aurum omni prorsus scoria expurgetur , & solius Dei purissimo igne inflammetur.

C A P V T X V I I .

Ante omnes circa Domesticos zelus exerceri debet.

Verus societatis Filius , si prout debet verum etiam zelum animarum & gloriæ diuinæ habeat , imprimis illum oportet intra domesticos parietes exerceat , & nostros omnes quibuscum viuere illum ex suauissimo Dei prouidentiae ductu continget, siue in tertio anno, siue postea non solum vera sincerâque charitate prosequatur , sed etiam quantum poterit in spiritu iuuare contendat. Cum enim societatis perfectio tanti sit momenti ad Dei gloriam , & proximi salutem, merito quisque sibi persuadere debet se excellenter cooperari

cooperari gloriæ Dei & eidem saluti, si spirituali societatis bono toto affectu studeat. His ergo imprimis quæ ad fraternam inter se vnionem & sanctius vinculum pertinent, & legisse & expendisse iuuabit, totoque affectu se in mutuo illo amore & voluntatum iudiciorumque consensione exercuisse; quam in rem studium orationis & mortificationis valdè necessarium est; deinde considerandum, numquid in commune omnium vel particulare singulorum bonum à nobis proficisci possit. Et certè in tertio anno id magni momenti occurrit quo iuuare nos inuicem possimus, si singulari zelo disciplinæ totius & regularum etiam minimarum seruandarum teneamur. Id enim ad societatis conseruationem & singulorum ædificationem summoperè est necessarium. Itaque refert magni, defectus illos qui leuitatis aut laxitatis aliquid continent, & nescio quam libertatem & vanitatem spiritus, humilitatis & modestiæ diminutionem vel singularitatem inuehunt, notare, vt omni ratione vitari non tantum in tertio anno, sed deinceps etiam in totam vitam possint. Certè sacris religionibus nihil vnquam fuit perniciosius, nihil ad ruinam potentius, quàm antiquiorum minus ad religiosam disciplinam vita composita, sermo, mores, laxitas, leuitas, libertas, singularitas non tam necessitate concessa, quàm vel importunitate vel veræ necessitatis falsis apprehensionibus exortæ. Ne igitur in hæc mala quæ graua sunt opinione deueniat, maturè sibi in tertio anno prouideat, & generosa mortificatione vitam suam Deo consecret, seposito mortis vel morborum inani sæpe metu, seruata tamen regula, vbi se male ha-

bere senserit. Quod si ad vitæ & mortificationum exempla addat spiritualia colloquia non importunè sed prudenter cū modestia & affabilitate, certum est id plurimum posse asserre ædificationis. Est ergo à domo Domini incipiendum hac ratione zeli animarum exercitium, nec facilè persuaserit quis veram illum Dei gloriam, & proximorum salutem quærere foris, qui domi non ædificet, & societatis conseruationi & integritati, quæ tanti momenti est ad salutem animarum, non studeat.

CAPVT XVIII.

Quomodo circa proximos exerceri debet animarum zelus.

VARIA sunt media quibus procurari potest salus proximi & perfectio. Primum illa locum obtinent quibus suprà diximus nos perfici, Oratio, Meditatio, Sacrificium Missæ, SS. Sacramentum, Confessio, Examen, Mortificatio; Nam si hæc omnia instrumenta efficacia experti sumus ad nostram perfectionem, quis dubitat quin & studio accurato & vsu ipso exulta & perfecta, atque aded nobis iam familiaria & veluti ad manum, aptiora longe futura sint quibus proximum iuuenimus. Nam præterquam quod natura ipsa ita comparati sumus, vt quibus nos veluti pleni sumus, ea cum aliis communicemus, Dei ipsius qui hæc nobis media dedit, & eorum perfectum

perfectum vsum docuit, intentio est vt ea ipsa cæteris tradamus. Sicut itaque communiter fit , vt pater , quam profitetur fabrilem artem , quamque utilem expertus est , filio tradat , ita hoc societati videmus ab initio contigisse , vt per quæ adeò adiuti essent patres nostri , aliis commendarent , & eo utilius. Vnde & exercitiorum spiritualium , & Sacramentorum , & examinis vtriusque vsus tam frequens profluxit , & certè id ortum est à primo ipso societatis spiritu. Nam postquam B. P. N. Manresæ Deo veluti tradente fecit & composuit ex his, quæ experiebatur exercitia spiritualia , monente Spiritu sancto quod expertus fuerat , aliis tradidit , tanto cum fructu vt videmus. Quare in exercitiis Spiritualibus in annot. 18. manifestè insinuat , hominem societatis in id perpetuo intentum esse debere, vt si ad exercitia spiritualia non promoueat , saltem in conuersatione familiari cum hominibus aliquam ex his desumptam praxim semper tradat. Atque inde videre etiam est, quàm coniuncta sit nostra perfectio cum proximi perfectione , quàmque sint aptiores & efficaciores ad Dei gloriam & salutem proximi , illi qui per instrumenta prædicta seriò suæ perfectioni studuerunt quàm alij , denique quanti sit momenti quæ Dominus in vsu illorum instrumentorum suggerit annotare , vt fecit B. P. N. & aliis quibus & nos & alios melius iuuare possimus.

CAPVT XIX.

De studiis litterarum.

DOctrina solet esse quoddam vniuersale instrumentum iuuandi proximum. Comparatur autem illa studiis: verum cum in 3. anno studia confecta iam sint, nihil de illis dicendum est. Proderit tamen admonere non fore inutile, si decursa haec studiorum stadia recogitet & reuoluat, serioque expendat quam bene vel male tempus expenderit, & profecerit in his facultatibus quibus dedit operam, quosnam errores & defectus admiserit, quas difficultates, tentationes, diminutionem spiritus, imperfectiones sit expertus, quibus remediis uti poterat, & debebat, & id genus alia. Nam inde discet prudentiam, & poterit aliis solidiora dare consilia cum res feret. Ita enim P. Faber ex propriis erroribus salubria aliis documenta confecit. Nec verò id etiam erit ipsi inutile. Nam functiones nostrae quibus post 3. annum destinemur, studium perpetuum requirunt, de quo tunc cogitare optimum est. Cauendum tamen ne praeueniamus obedientiae nutum, & nos certae occupationi destinemus, sed suspensi prorsus ex sanctissima Dei voluntate expectemus motum; Itaque haec consideratio si fiat, vel non fiat, antequam moniti simus, cui rei simus applicandi, vel nisi in genere; Meminisse autem debet in comparanda doctrina habendam semper rationem finis nostri, Maioris Dei gloriae, qua si utamur,

mur, non facile curiosam, vanam, & inutilem sectabimur.

C A P V T X X.

De aliis Mediis ad iuuandum proximum.

Generale doctrinæ medium variis instrumentis continetur in Societate, quæ nullum propè excludit. Huc ergo spectant Sacramentorum, præcipuè Pœnitentiæ administratio, conciones, catechismi, lectiones tum Theologiæ tum aliæ, Exercitia spiritualia B.P. N. conuersatio. Hæc omnia quomodo fieri debeant, à peritis petendum. Directorium exercitiorum magni est momenti, & ideo legendum est attentè in ipsis exercitiis; his præterea annotatis quæ ad eam rem facere videbuntur. P. Polanci directorium pro audiendis confessionibus, & præcipuè pro morientibus iuuandis terendum assiduè. P. du Pont in ultimo operis tomo fere de iis omnibus tractat. Esset valde vtile non aggredi illa instrumenta simul aptare, sed singula duntaxat, & prout diximus de propriæ perfectionis instrumentis prudenter tum illos tum alios authores spirituales legere, atque ex his propriam nobis ad singulorum vsum methodum conficere, quàm deinceps prout occasiones sese dabunt, propria experientia & aliorum lectione partim augere, partim perficere possimus. Nec verò occurrit quid his addi possit. Nam in tertio anno hæc omnia non ita perfectè exercentur.

CAPVT XXI.

*Quæ in tertio anno sunt inchoata; tota demum
vita non tantum exercenda, sed &
perficienda sunt.*

HÆc omnia tum propriæ, tum proximi perfectionis instrumenta tanta debent in tertio anno soliditate construi: vt non statim leuiter quod nonnullis contingit, vbi educti fuerunt, & ad opus admoti, frangantur & dissipentur, sed firma ad vitæ finem si fieri potest perseuerent. Verum quia satis difficile est præstare illis vnico anno tantam tamque solidam perfectionem, idcirco optimum consilium est, vt si perfici non queant, saltem ita inchoentur, vt in posito fundamento non tantum constanter insistatur, nihil in vsu ipso temerè mutando vel omittendo eorum quæ bene concepta sunt; sed etiam perficiantur, tandem. Quare non erit inutile methodum studij huius spiritualis præscribere; seruandum etiam deinceps pro ratione temporis, vt nimirum vno anno vnum exercitium spirituale, verbi gratia examen conscientie, vnam item virtutem, verbi gratia paupertatem, charitatem fraternam &c, item vnum instrumentum ad iuuandum proximum, verbi gratia, confessionum audiendarum rationem sibi quisque assumat excolendum & perficiendum, quamuis cætera non negligat: ita enim fiet vt & semper utiliter occupetur

tur atque sibi attendat, & intra paucos annos perfectus euadat operarius Societatis.

C A P V T X X I I.

Ordo dierum in toto mense.

Quotidie fiunt tres meditationes. Consideratio Regularum per horam. Consideratio alicuius actionis per mediam horam. Lectio libelli exercitiorum & directorij. Lectio spiritualis alicuius libelli pij vel tractatus apti ad id quod intenditur.

Meditatio prima. Fiet ab hora quinta mediatâ ad sextam mediatam nisi quis malit ab hora 4. mediatâ ad 5. mediatam.

Post meditationem sequetur examen meditationis, & annotatio fructus ex ea percepti, considerando præcipuè quomodo ad quotidianarum actionum praxim accommodari possit.

Deinde vel fiet sacrum, vel legetur libellus exercitiorum cum Directorio, in qua lectione id obseruandum, vt ea vnoquoque die legantur, quæ ad eius diei exercitia spectant.

Hoc facto fiet consideratio alicuius actionis diei, in qua consideratione hæc forma seruanda est. Primo enim perpendetur quæ sit natura eius actionis, & quomodo perfectissimè obiri queat, & etiam debeat ab homine Societatis. Secundò attendendum est, quàm procul ab ea perfectione recessimus: vbi notandum quinam defectus commissi, quanam perfectio omissa. Tertiò quid remedij

medij adhiberi possit & debeat. Quartò, Defectus & remedia scripto notanda sunt.

Obseruandum verò est, fieri posse, vt non possit vna aliqua actio vna die satis perfectè considerari, egeátque longiori tempore, quare poterit aliquando hæc consideratio eiúsque puncta diuidi in duos vel tres dies. Præterea si non fieri possit matutino tempore, fiet à prandio.

Peracta consideratione vno quadrante, præparabitur meditatio sequens.

Hora 9. fiet secunda meditatio vsque ad decimam, quam sequetur examen prout iam dictum est.

Conscientiæ examen hora consueta fieri debet, accuratè secundum B.P.N. formam, vt non tantum consideratione, sed vsu ipso & praxi defectus consueti emendentur, & consuetudo malè hoc vtendi, meliori consuetudine aboleatur. Quod etiam obseruandum est in reliquis die i actionibus: hoc enim tempore, si vnquam aliàs, eas perfecte formare debemus.

Particulare porrò examen poterit fieri de hoc ordine seruando, & actionibus istis omnibus quæ in exercitiis fiunt bene formandis, sic vt pro errato notetur, si quid non fuerit factum vel non ita perfectè, vt Annotationes meditationis, Examinum, & aliæ præscribunt. Poterit verò fieri vel cum generali, vel post prandium.

In prandio & quoties in publicum prodeundum erit, operæ pretium erit habere specialem modestiæ rationem, & eius regulas, eas præcipuè quæ ad capitis, oculorum, & totius corporis compositionem spectant, diligenter obseruare.

In recreatione expediet suauiter deambulando,

do & nulli rei seriæ attendendo, animum relaxare, vel recitare rosarium, sine vlla tamen animi contentione, vel cubiculum componere, aut quid simile agere, quod & distrahat animum, & tamen non dissoluat.

Sequetur deinde lectio spiritualis libelli vel tractatus pij.

Tum hora secunda ad tertiam fiet consideratio regularum. Primo quidem summarij; deinde communium, denique sacerdotum, & aliarum propriarum:

Inde vsque ad 4. Lectio spiritualis. Hora 4. officium.

Hora quinta ad sextam meditatio tertia.

Post cœnam proderit examen particulare instituere de totius diei actionibus, vbi etiam præter defectus, vtile erit memoria repetere, tum lumina, tum bona proposita à Deo tota die communicata.

Primo Die.

Legetur instructio pro tertio anno, & si ita placeat modus vtiliter tertium annum peragendi.

A prandio legentur 20. Annotationes & considerationes ad eas, in quibus agitur de natura exercitiorum, eorum fine, mediis, & dispositione necessaria ad illa vtiliter facienda.

Hora 4. fiet meditatio quæ continet præparationem ad exercitia.

Secundo Die.

Prima meditatio de fundamento.

Legentur

Legentur in libello 20. Annotationes & considerationes ad eas factæ, si forte lectæ vel satis expensæ non fuerint, sunt enim magni momenti ad exercitia omnia.

Consideratio esse poterit de iis quæ fiunt ab examine vespertino vsque ad meditationem sequentis diei, siue de actionibus parandi se ad lectum cubandi, dormiendi, surgendi, parandi se ad meditationem.

Secūda meditatio erit repetitio fundamenti, in qua ipse finis creationis tanquam certa regula ad res eas quæ in societate indifferentes sunt, vel esse possunt, potissimum applicandus est.

Pag. 23. a. Lectio spiritualis à prandio erit de Regularum consideratione.

Hora 2. 4. aut 5. primæ regulæ considerabuntur.

Pag. 35. b. Tertia Meditatio erit de peccato triplici: ad eam autem meditationem paulo maior præparatio requiritur, quia continet modum meditandi, qui diligenter erit considerandus: Quare statim post regularum considerationem id est hora. 3. legendus est.

Tertio Die.

Pag. 45. b. Prima meditatio erit de peccatis.

Legentur in libro additiones ad exercitia melius agenda.

Consideratio erit de meditatione quotidiana.
Secunda meditatio erit repetitio.

Pag. 39. b. Lectio spiritualis erit de fine exercitiorum, vt ex eo scripto perueniamus ad certam notitiam imperfectionum nostrarum.

Regulæ

ad solidam Perfectionem. 45

Regulæ eæ considerabuntur quæ suo ordine sequuntur.

Tertia meditatio de morte.

Quarto Die.

Prima meditatio erit de iudicio priuato.

Pag. 8.
b.

Legetur ex libello de examine particulari.

Consideratio fiet de praxi eiusdem examinis particularis.

Secunda meditatio erit repetitio ; siue præparatio ad mortem & iudicium.

Pag. 50.
b.

Lectio spiritualis eadem: scilicet de fine exercitiorum vel de examine particulari.

Regulæ suo ordine sequentes cōsiderabuntur.

Tertia meditatio , de iudicio generali , vel de primo modo orandi.

Pa. 52.
b.

Quinto Die.

Prima meditatio de inferno.

Pag. 53
b.

Lectio in libello de examine generali , & confessione tum generali tum particulari. De qua fiet consideratio.

Toto hoc die poterit parari & fieri confessio generalis , paulo ante eam vel post , Meditatio esse poterit de filio prodigo, siue manè confessio fiat, siue vesperi.

Pag. 160. a.
Pag. 151. a.
Pag. 56. b.

Sexto Die.

Meditatio. De pœnitentiæ fructibus.

Pag. 54. b.

Consideratio erit præparatio ad reddendam rationem conscientiae , quæ eadem die fiet de tota vita in societate acta.

Pag. 109. a.

Addi

Addi poterit lectio primi modi orandi in libello.

Septimo Die.

Hoc die poterit vacare, & vti aliqua recapitulatione colligendo fructum, quem in hac prima hebdomada percepit. Iuuabit etiam verò suauiter legere de examine quotidiano.

Cetano Die.

Prima meditatio de Regno Christi.

Pag.
59. a.

Legentur ex libello additiones pro 2. hebdomada,

Consideratio. De praxi rerum Sacramentalium vt aquæ Benedictæ, Agnorum Dei, &c. in quorum vsu qui debet esse frequentissimus, requiritur magna fides imo cum Christo, & Ecclesia reuerentia.

Lectio poterit esse de amore vel de imitatione Christi, aut de natura perfectionis & secundo eius statu, quæ lectio poterit hac tota septimana continuari.

Secunda meditatio. De Christi incarnatione.

Pag.
65. b.

Tertia Meditatio erit repetitio.

Nono Die.

Prima meditatio, De Christi natiuitate.

Pag.
66. b.

Legentur in libello regulæ, de spirituum discretionem primæ, etsi illæ videantur pertinere ad primam hebdomadam.

Consideratio

ad solidam Perfectionem. 47

Consideratio erit. De lectione spirituali.

Secunda meditatio erit de circuncisione.

Lectio spiritualis esse poterit de Christi amore, vel imitatione in genere, vel in iis præcipuè virtutibus quæ in illis mysteriis elucet, nempe humilitate, paupertate, & mortificatione. Pag. 67. b.

Tertia, Repetitio erit.

Decimo Die.

Prima meditatio. De purificatione.

Legetur in libello secundus orandi modus. Pag.

Consideratio erit, de officio Diuino persoluendo. 68. b.

Secunda meditatio, de fuga in Ægyptum.

Lectio spiritualis vt supra, hîc verò poterit esse de Christi imitatione in religione laboribus & afflictionibus. Pag. 69. b.

Regulæ suo ordine sequentes considerabuntur,

Tertia meditatio erit repetitio.

Vndecimo Die.

Prima meditatio. De Christo Hierosolymis remanente. Pag.

Legentur in libello Regulæ posteriores de spirituum discretionem. 70. b.

Consideratio, de oratione vocali, Litaniis, rosario, salutatione Angelica, vbi disponendum, quare fiant aut fieri oporteat, & quomodo,

Secunda meditatio, de vita Christi ab anno duodecimo ad 30. vel de vexillis. Pag. 71. b.

Lectio vt supra, addi potest de vita communi Christi Pag. 72. b.

Christi. Item de obedientia.

Regulæ sequentes.

Tertia meditatio erit repetitio.

Duodecimo Die.

Pag. 76. Prima meditatio de vexillis, vel de vita Christi
a. Pag. sti ad annum 30.
etiam

86. hu- Legetur in libello de Electione.

ius li- Consideratio de priuatis corporis mortifica-
bri. tionibus, & castitate.

Pag. 78. Secunda meditatio erit de Baptismo Christi,
b. vel repetitio præced.

Regulæ quæ sequuntur.

Tertia meditatio erit repetitio de Baptismo Christi.

Decimo tertio Die.

Pag. 79. Prima meditatio de tentationibus Christi.

b. Legetur in libello & directorio, aliquid de Electione.

Consideratio. De mortificationibus sensuum & linguæ.

Pag. 81. Secunda meditatio. De vocatione Apostolorum.
b.

Regularum sequentium consideratio.

Debet fieri lectio, de ordine in vita spirituali seruanda, & impedimentis perfectionis.

Pag. Tertia meditatio de Christi documentis.

128. b.

Pag. 82.

b.

Decimo quarto Dei.

Pag. Prima meditatio. De tribus modis humilitatis.
84. a.

Lectio

LECTIO de electione continuabitur.

Toto reliquo tempore fiet electio de gradu perfectionis, ad quem aspirare conueniat, etsi enim per
2. tempus id aliquando constet, tamen seruanda B. Pag. 89.
P.N. admonitio, nempe non posse esse non vtile
adhibere 3. tempus per 1. & 2. modum bonæ electionis.

Sub vesperum poterit fieri repetitio.

Decimo quinto Die.

Prima meditatio de tribus hominum classibus. Pag. 83.b.

Legi poterit in libello de vitæ emendatione.

Consideratio, de praxi primi modi eligendi in singulis actionibus, siue de puritate intentionis.

Secunda meditatio erit repetitio de tribus modis humilitatis, & tribus classibus simul, nisi fiat alia electio.

Tertia meditatio erit vtriusque repetitio.

Decimo sexto Die.

Prima meditatio de Discipulis missis ad prædicandum. Pag. 91.a.

Legi poterunt Regulæ de fide orthodoxa.

Consideratio de studiis.

Secunda meditatio, de zelo animarum.

Tertia repetitio.

Pag.
91.b.

Decimo septimo Die.

Prima meditatio, de paupertate Apostolica. Pag.
D Legi 94.b.

Legi poterunt regulæ de victu temperando.

Consideratio, de praxi paupertatis, vel de Refectione.

Pag. 95.b. Secunda meditatio, de Mortificatione Apostolica.

Tertia. repetitio.

Decimo octavo Die.

Pag. 96.b. Prima meditatio, de contemptu mundi.

Legi poterit de scrupulis.

Consideratio, de conuersatione cum nostris.

Pag. 98.a. Secunda meditatio, de humilitate.

Tertia. repetitio.

Decimo nono Die.

Pag. 99.b. Prima meditatio, de diffidentia sui & confidentia in Deo.

Legi poterit de Eleemosynis.

Consideratio, de conuersatione cum externis.

Pag. 100.b. Secunda meditatio, de oratione.

Tertia. repetitio.

Vigesimo Die.

Pag. 102.a. Prima meditatio, de conformitate cum voluntate Dei, & obedientia in functionibus.

Lectio, in Directorio.

Consideratio, de sanctissimo Sacrificio.

Secunda meditatio, de præparatione Christi, ad

ad solidam Perfectionem.

51

ad Passionem.

Tertia. Repetitio.

Vigesimo primo Die.

Prima meditatio, de Mysteriis in horto ge- Pag.
stis. 116.b.

Lectio, in Directorio.

Consideratio de Sacrificio Missæ.

Secunda meditatio, de Christi comprehensio- Pag.
ne. 119.b.

Tertia. repetitio.

Vigesimo secundo Die.

Prima meditatio, de gestis in domo Cai- Ibid. b.
phæ.

Consideratio, de visitando Sancto Sacramen-
to.

Secunda, de accusatione apud Pilatum.

Tertia. repetitio.

Ibid. l. b.

Vigesimo tertio Die.

Prima meditatio, de transmissio Christo ad He- Pag.
rodem. 120.a.

Secunda, de reuersione ab Herode ad Pila- Ibid. a.
tum.

Tertia. repetitio.

Consideratio, de refectione corporis.

Vigesimo quarto Die.

Prima meditatio, de crucifixione Christi Ibid. a.
Iesu.

Ibid.a.

Secunda de Mysteriis in cruce factis.

Ibid.b.

Tertia.de sepultura.

Consideratio,de relaxatione animi & recreatione corpori danda.

*Vigesimo quinto Die.*Pag.
123.b.

Prima meditatio,de Christi Resurrectionis Mysterio.

Secunda,de Christi apparitione facta Apostolis absente Thoma.Ioan.20.

Tertia.Repetitio.

Consideratio , de functionibus circa proximum.

*Vigesimo sexto Die.*Ibid.b.
Ibid.

Prima Meditatio , de Apparitione in monte Thabor.Matth.vlt.cap.

Secunda,de Domini Ascensione.

Tertia.Repetitio.

Consideratio , de functionibus circa proximum.

Vigesimo septimo Die.

Prima Meditatio,de missione Sancti Spiritus.

Secunda,de sanctitate fidelium post missionem Spiritus Sancti.

Tertia.Repetitio.

Consideratio,de functionibus circa proximum.

Vigesimo octavo Die.

Prima Meditatio,de beatitudine Sanctorum.

Secunda,

Secunda, de corporis gloria.

Tertia. Repetitio.

Consideratio, de deuotione erga B. Virginem & Sanctos.

Vigesimo nono Die.

Meditatio, de amore spirituali quæ tota die re- Pag. 126. b.
petetur.

Consideratio, de praxi præsentia Dei.

Trigesimo Die.

Fructus Exercitiorum colligentur, & notabuntur defectus.

C A P V T. X X I I I.

Quomodo fieri debeat Regularum Consideratio.

P A R A G R A P H V S I.

Eius Necessitas.

Qui perfectionis ædificium in se construere in religiosa familia aggressus est, debet imprimis eius ædificij ideam sibi quamdam in animo suo formasse, ad cuius similitudinem postea sese suosque omnes mores fingat & componat. Est enim exemplar veluti complementum causæ efficientis, vt aliquid efficere queat. Quare de-
D 3 ber

bet frequenter dum in opere progreditur , eam ipsam intueri , & ad eam omnia sua dicta, facta , & cogitata examinare : verum quia præstans illa perfectionis forma , vel non potest initio à tyro-
ne concipi tota , & vt in se est, sed sensim & ipso usu, vt experientia constat, vel licet aliquando concepta accuratè menti inhæserit, sensim tamen nostris imperfectionibus atteritur quodammodo & euanescit , sic vt eam in nobis ipsis vix amplius inspicere possimus , saltem eo modo vt idea practica esse queat : Idcirco opus fuit externum quoddam exemplar effectum ad eius imitationem ante oculos habere propositum , vt iuuet nos ad veram ideam perfectionis in animo vel efformandam , vel renouandam, qua deinde vtamur in efficienda ipso facto structura. Hoc præstant in vnoquoque ordine leges seu regulæ & constitutiones, quæ vere & proprie aliud nihil quàm forma eius perfectionis quæ cuique proposita est. Cum enim ea ipsa forma non sit simplex, sed varias habeat partes , & varia virtutum omnium officia ad finem talis instituti aptè accommodata atque attemperata , non potest ita paucis explicari , sed dissecta in sua membra proponi debet , vt sit ad usum & praxim accommodatior. Atque hæc ipsa membra nihil aliud sunt, quàm regulæ, quarum crebra inspectione , consideratione , usuque tyrones sensim acquirunt internam ideam (sine qua fieri nullo modo potest vt perfectionis ædificium construant) & sensim etiam ædificant practicèque totam in se exprimunt. Alij verò vel perficiunt eandem ideam vel deletam reparant , vel cum vita pristina moribusque conferentes intelligunt, quid à se peccatum sit hætenus, atque aded

toti

toti suo se instituto conformantes, dispersas tot in regulis formæ illius Diuinæ partes in se colligunt, & eam integrè repræsentant. Propter quas rationes valde necessaria est cuique attenta inspectio instituti, tum præcipuè cum de renouatione agitur, sed vt rectè fiat, nonnulla videntur præmittenda de regularum obseruantia, excellentia, obligatione, & obseruatione.

P A R A G R A P H V S. II.

Quanta sit regularum nostrarum præstantia.

Regulârum nostrarum author est Deus ipse, vt & religionum. Is enim vt infinita sua bonitate ad supernaturalem finem media instituit diuersa, diuersis temporibus pro infinita sua sapientia. Ipse enim habet in se solus innumera exemplaria vitæ perfectioris, & ex illo suo thesauro exprompsit eam religiosorum institutorum varietatem, quæ in Ecclesia cernuntur, quando & quomodo ei visum fuit. Hoc verò tempore cum deficit fides & charitas refrigescit, nouam hanc ideam miseris hisce temporibus aptissimam in mundo exhibuit. Nec enim dubium esse potest quin opus sit magnum eius instituti societatis forma, qua tam multi adeò securè & certò ad suū finem iuuantur, cum eiusdem sit eiusmodi mediolorum adeò excellentium institutio cuius est finis intentio.

Hanc ergo vitæ formam ab æterno in sui consilij decreto absconditam cum diuina mens tradere mundo voluit, vsus est ad id P.B. Ignatio, viro prudentia pariter & sanctitate insigni, cui per multos annos & variis modis exercitato ipsēmet antea eam ipsam impressit altissimè, nec tamen voluit vt quam conceperat ideam effunderet, sed id fieri voluit longa parturitione. Nam nihil scripsit, nisi prius petito à Deo consilio, multisque precibus lachrymisque fuis, multis oblatiis sacrificiis, acceptis etiam vicissim à Deo plurimis illustrationibus, quibus dirigebatur ad regulas æterno illi exemplari conformandas.

Vt vero facilius, & ad humanæ vitæ vsum accommodatiùs hanc in se primum, deinde in ipsis constitutionibus ideam efformaret, diuina quadā & admirabili luce Spiritus sancti perfusus in Christi vitam intendit oculos; & quia in eo sunt omnes thesauri scientiæ & sapientiæ Dei, ac proinde vnus ipse absolutissimum perfectionis exemplar visibile continens, eminenter omnes formas vitæ perfectioris, ex eo solerti manu, quam posset solidissimā vitæ religiosæ imaginem, non tam abstractis animo diuinæ similitudinis coloribus, parum ad vsum aptis effulgentem, quàm veris firmisque virtutum omnium præsiidiis constantem, & viuā practicaque vitæ Christi luce interius, exteriùsque perfusam depingeret.

Hoc vt melius præstaret, duce & monstrante Deo iam inde ab initio suæ conuersionis conatus est penetrare ea omnia, quæ de Christi Domini vita literæ sacræ habent, & per annos 34. circiter assidua meditatione, Christi Domini dicta, facta, desideria, cogitationes continuò expen-

dens

dens, simulque quam ex primis conuersionis annis hauserat vitæ formam, & in libello exercitiorum descriperat, longo usu crebrisque inspirationibus, necnon & persecutionibus probatam, totis decem constitutionum partibus expressit. Nihil enim sunt singulæ societatis regulæ quam vitæ spiritualis documenta, & veluti axiomata ex ipsis Christi exemplis & dictis expressa, vel dictamina quædam æternæ Dei voluntatis & sapientiæ in mentis diuinæ idea descripta, primum in prototypo exemplari Christo Domino & exinde nobis proposita, vt per ea vtrumque hoc exemplar melius concipiamus & animo apprehendamus, & ei nos conformemus.

Inde fit, vt regulæ nostræ contineant totius Euangelicæ perfectionis summam, & quidquid ab aliis authoribus & religionum fundatoribus de perfectione traditum est, vt variis tractatibus dispersum, his collectum comprehensumque sit non temerè, sed ita vt vnâ formam aptè concinnèque efficiat, qua (si adhibeatur) facilè totus homo disponatur optimè ad finem propriæ perfectionis & aliorum, ad Dei gloriam per media aptissima, & efficacissima attingendam. Per eam enim totus homo emendatur, & regitur, cogitationes, verba, facta ad exemplar efformantur, sensus omnes & membra diriguntur, denique quicquid est vel intrinsecum in homine vel extrinsecum, ita componitur, vt aduersus Deum, proximum, & seipsum excellenti modo seruet officium. Quare cum sint media & instrumenta, quibus nos Diuina prouidentia ad nostrum finem deducere statuit; certum est eò se magis ab illius prouidentiae gubernatione subtrahere, & eò longius

gius à fine suo, & Christi Domini imitatione, ideâ-
que propofita recedere quemque, quò regularum
obferuatione magis deficit.

P A R A G R A P H V S III.

Quæ fit earum obligatio.

VT verò intelligatur, quo eæ spiritu & fine mo-
dóque debeant obferuari, operæ pretium eft
nofle quanta fit earum obligatio.

Et quidem certum nullam regulam efle in fo-
cietate, cuius violatio, fi per fe & præcisè viole-
tur, vt eft violatio talis regulæ, fit peccatum aut
mortale aut veniale, obligatio enim legis positi-
uæ pendet ex voluntate Legislatoris volentis per
eam fubditos obligare. Author verò nostrarum
regularum explicuit expreflè, nolle fe vt illæ ad
peccatum obligent, tribuunt tamen ius fuperio-
ri imponendi pœnitentias feu afflições corporis
eas violantibus. Hæc enim fuit intentio authoris,
& hoc modo à fingulis funt acceptatæ.

Quamuis autem per fe non habeant vim obli-
gandi, poteft tamen fieri vt aliunde ita in con-
fientiâ obligent, vt, fi contra eas fiat, peccatum
committatur; hoc autem multis modis contin-
git: Primo ratione voti; fic enim, omnes quæ
pertinent ad vfum rerum, donationem, acceptio-
nem, commutationem obligant fub peccato vt
24. 26. 27. summ. de qua 27. videndus eft Molina
tom. 3. de inftit. Item 7. 8. 9. 11. 17. 25. ex commu-
nibus,

nibus, vsus enim vel vsurpatio cuiusque rei absque dependentia à voluntate Superioris peccatum est in votum paupertatis, etsi non semper mortale propter materiæ prauitatem, sic etiam eæ quæ de obedientia agunt, vt sunt à 31. in summ. sæpe possunt obligare vi voti obdientiæ. Secundo plurimæ possunt sub peccato obligare ratione alicuius virtutis, considerata maximè modestia, maturitate, & ædificatione quam iure naturæ tenetur præbere Religiosus Societatis, id est talis religionis quæ est ad talem finem instituta, tales sunt in summ. 6. 8. 10. 14. 16. 17. 21. 22. 28. 29. 30. 40. 43. 44. 45. 46. ex communibus. 13. 19. 20. 22. 23. 24. 28. 29. 30. 31. 32. 34. 37. 38. & aliæ similes. Nam quod illis continetur, fere totum ad ius naturale & leges virtutum tali instituto vt eius fini necessariorum pertinet, vt quiuis deprehendet si em bene expendit; ita cernitur in regulis pene omnium officiorum particularium.

Tertio. Possunt obligare ratione peculiari expressæ promissionis, vt est 9. vt quisque sit contentus suos defectus ad superiorem deferri, & 40. de reddenda ratione conscientiæ. Nam hæ duæ solent particulariter proponi & expressè; quoad alias verò omnes & si quisq; in genere promittat se eas seruaturum, non tamen vi promissionis censetur se ita obligasse ad singulas obseruandas, vt si aliquam violarit, censeatur contra promissionem peccasse. Nam vi talis promissionis tenetur tantum retinere generale propositum seruandi regulas omnes, & vitam suam illis conformandi. Hoc autem tantum intendit Societas cum illam promissionem exigit: nam sine tali proposito non vellet eum retinere, quod si illud simularet

simularet se habere , grauitè certè Societatem deciperet , censetur autem tantum promittere se conseruaturum generale illud propositum , non autem singulas regulas quauis occasione seruaturum. Neque Societas hoc ab illo requirit , sed tantum bona fide agat, & si labi contigerit , non detrectet pœnitentiam. Quarto. Ratione scandali hoc modo plerumque peccatum est violatio regulæ coram aliis , etsi reuera illi non peruertantur. Non enim Societatis religiosus ab omni tantum malo tenetur abstinere , sed etiam ab omni specie mali vt monet Apostolus, & hoc propter alios. Atque violatio regulæ coram aliis sine dubio habet speciem mali. Quinto. Ratione læsionis disciplinæ , pulchritudo enim & decor religiosæ familiæ consistit in bona disciplina seu conformatione morum cum regulis , sicut enim mirè ornat religionem si in ea seruetur silentium, si omnia tranquilla sint, omnia bene composita ; si omnes statis temporibus surgant , orent , studeant , comedant , corpus exerceant , morem superioribus gerant , &c. ita è contrario illam inficit & dedecorat, si omnia plena sint tumultu, strepitu , cachinnis , si loca publica sint immunda , si quisque surgit , orat , dormit , comedit cum lubet , si nulla cum Superioribus coniunctio , nulla erga illos vel socios reuerentia. Qui ergo violando regulam aliquam notabiliter lædit disciplinam , haud dubiè peccat , quia magnum religionis bonum & ornamentum euerit vel commaculat , imo ratione huius læsionis regulæ posset esse graue peccatum , si nimirum sequeretur grauis læsio disciplinæ , vt cum quis sua libertate & laxitate alios ad laxitatem inducit. Ob eamdem causam Superiores grauitè peccant, qui
sua

sua negligentia patiuntur disciplinam collabi, & subditi certè qui nolunt se ad eam accommodare, vel eo sunt ingenio, vt non sit spes quod sese sint accommodaturi, debent eiici tanquam perniciosi bono Societatis. Sextò ratione negligentiae (inquit D. Thomas 2. 2. quæst. 168. ar. 1. Caietanus, Valentia ibid.) hoc verò habet locum imprimis in iis quæ spectant ad cultum diuinum, vt si quis ex torpore quodam omitteret meditationem, lectionem sacram, examen: est enim ille torpor acediae peccatum, quod quisque vitare tenetur. Idem si ista quidem quis præstet, sed oscitanter & perfunctoriè: Deinde locum etiam habet in aliis omnibus. Nam omis-
sio eorum ex negligentia peccatum est; vt si ex negligentia omittas lectionem, studium, officia charitatis in proximum & alia bona opera. Nam homo tenetur vt non agat vel omittat quicquam extra diuini laboris. Septimo. Si ex libidine regulam violat (inquit B. Thomas, suprà) id est (vt exponit Caietanus, Valentia, & alij ibid.) ex nimia cupiditate, vel alio affectu minus ordinato. Sic sæpè violatur silentium, comeditur, vel bibitur extra tempus, luditur &c. Quidquid enim est ex motu affectuum inordinato et si ex se sit indifferens, peccatum est. Octauo, Ratione contemptus vt ait D. Thom. suprà: potest autem hîc contemptus fieri tribus modis. Primo. Si nihil vel parui æstimas totam regulam, & ideo nullam curam habes eius seruandæ, & hoc sine dubio graue peccatum est imo mortiferum: nam ex vi votorum teneris habere propositum generale viuendi secundum regulam (vt colligitur ex B. Thoma suprà:) si tamen non cures seruare
vnam

vnam regulam, quia parua est, retinens propositum seruandi alias, non est mortale. Secundò, si nolis eam seruare ne te illi aut superiori subiicias, verbi gratia si frangas silentium, omittas meditationem, ne te potestati vel regimini Superioris aut legis submittas, hoc est omnino mortiferum. Nam vi voti obedientiæ propriè te subiecisti regulæ & potestati Superioris, vt omnes docent. Differunt autem hi duo modi, quia aliud est non habere curam vel propositum seruandi regulam, aliud nolle esse subiectum: hoc enim speciale peccatum est inobedientiæ, non autem prius. Tertiò, si nolis seruare regulam, & sic ostendas te illam & eius authorem nihili pendere, & hoc est etiam graue peccatum, vt patet. Nam continet odium formale saltem, sæpe & contemptum personæ qui potest sæpe transire in formalem inobedientiam.

Atque ex his constat satis quantum obligent societatis regulæ, & quomodo intelligi debeat, quod canone 13. Congr. 3. & can. 13. Congr. 4. dicitur, Omnes qui de societate sunt, teneri ad regularum obseruationem.

P A R A G R A P H V S. I V.

Qualis debeat esse regularum Obseruatio.

CVM & societatis conseruatio, bonæque administrationis, ac progressus, & priuatum cuiusque bonum magnopere pendeat ex regularum obseruatione, magni refert vt hæc obseruatio plena

plena sit & perfecta: vt verò talis sit, has conditiones requirit.

Primò debet ex amore esse non timore, ideoque earum author non voluit eas sub peccato obligare, sed iudicauit satis esse societatis generosis Filiis, si illis tantum proponerentur, vt media & instrumenta certissima diuinæ gloriæ, quibus certò & efficaciter iuuamur vt ei placeamus. Certè diuina bonitas non potuit euidentius æternum suum in nos amorem declarare, quàm vocando nos ex mundi periculis ad societatem; hoc verò beneficium ideo tantum est, quia societatis institutum firmum solidumque est & perfectum. Tale autem est quia hisce regulis constat: quare cogitandum est regulas esse nobis à Deo concessas ex amore illo infinito, quo nos prosequitur, non tantum vt sint nobis amoris eius testimonia, sed vincula etiam quibus nos ad se traheret, sibi que vniret: sicut ergo ex amore nostri boni hanc nobis è cælo scalam demisit, per cuius gradus ascendamus; ita etiam nos ex eius amore debemus pereosdem gradus ascendere, vt tandem ei vniamur.

Secundo. Debet ea obseruatio oriri ex vero desiderio totius perfectionis, cum enim regulæ nostræ nihil aliud sint quàm summi apices perfectionis singularum virtutum, nisi ardens hoc desiderium totius perfectionis menti insideat, non facile erit ad tam frequentes & arduos virtutum actus assurgere. Inde est quod in disciplina obseruanda languor, certum sit argumentum interni languoris circa studium perficendi; & si in homine Societatis vllus existat feruor hîc præcipuè se exercet. Societatis enim spiritus
in

in eo potissimum consistit , vt regulas nostras in se mortuas animet in nobis , & viuificet, & totam instituti formam obscuram latentemque in chartis , omnium oculis exhibeat ; si igitur spiritu illo viuimus, spiritu etiam ambulemus imo curramus viam hanc mandatorum Dei.

Tertiò. Debet obseruatio regularum dirigi ad eum finem propter quem regulæ sunt datæ. Finis ille est, vt sint nobis externum veluti exemplar, Christi Domini vitam actionesque repræsentans , vt facilius in nos transferamus excellentem illam perfectionis formam quam ipse nobis proposuit. Quare cum venit nobis in mentem regula aliqua , vel offertur occasio alicuius obseruandæ , non satis est eam quoquo modo obseruare , sed meminisse statim debemus Christi Domini prototypi exemplaris , & cogitare nobiscum quomodo hanc illamue actionem quæ hac regula commendatur obibat , verbi gratia cum commendatur obedientia , paupertas , humilitas , silentium , patientia , mortificatio sensuum , & alia id genus. Regulæ enim omnes, exceptis illis quæ peccatum supponunt , eò possunt dirigi , vt in earum obseruatione Christo Domino nos conformemus : seruemus silentium , vt Christus seruabat cum interna animi recollectione ; oremus vt orabat ; obeamus officia humilitatis & mortificationis vt ipse obibat ; patienter aduersa quæcumque vndecumque promanent , feramus vt ipse ferebat ; comedamus vt ipse comedebat , animi etiam relaxationi vacemus vt ipse vacabat, & ita de cæteris. Est mirum in modum efficax & suavis hæc praxis in regulatum obseruatione , vt experientia discet qui in

ea seriò se exercebit. Sic enim paulatim formatur in nobis Christus , & sic efficimur paulatim Christi socij & fratres, Deo Patri idcirco gratissimi, & in quibus propter dilectum Filium suum sibi complacet, & per quos beneficium illud suum æternum de homine redimendo, quod totum in Filio constituit, libentissimè exequitur , vt per Filij sui membra & fratres simillimos.

Quartò. Debet hæc observatio esse integra. Hæc autem integritas duplex est. Primò quidem ex parte nostra, vt nimirum vires omnes in id conferamus siue internas, siue externas. Observatio enim regularum actus est obedientiæ cuius vi ad eas obligamur. Obedientia autem vt perfecta sit, debet esse cū vera intellectus voluntatisque resignatione, promptitudine, alacritate, diligentia, fortitudine & perseuerantia. Cauendū proinde ne ad oculum seruiamus & exteriori tantum observantia simus cōtenti. Secundò debent omninò omnes observari nulla prorsus excepta. Nam omnes habēt eundem authorem Deum, omnes ex eius sapientia sunt deriuatæ, omnes ex amore in nos concessæ. Nec enim quia parua videntur nonnullæ, idèd quasi temerè atque inconsideratè ab æterna sapientia artifice instituti nostri insertæ sunt aliis, sed omnes ex certa scientia & in bonum nostrum ad vitæ nostræ formam integrandam inspiratæ sunt. Quare si vel vna minima non observatur, ex ea parte minus integra erit perfectio , eritque instar corporis mutili, cui pes aut manus vel quid simile desit.

P A R A G R A P H V S V.

Qualis esse debeat earumdem consideratio.

VT ita obseruari possint regulæ, non tantùm sunt bene intelligendæ, & in memoria habendæ vt promptè occurrant, sed etiam perspectũ esse debet quomodo ad praxim applicari debent: quare sæpè diligentèrque sunt considerandæ. Hæc consideratio quatuor puncta complectitur.

Primò. Attentè consideratèque legenda est regula, deinde remoto libro comprehendendus est breuiter animo sensus, & tota ea perfectio quam continet, est memoriæ imprimenda, vt deinceps promptè occurrat, & regulæ instar sit semper ad manum. Secundò. Considerandũ quomodo ea perfectio quæ ibi continetur in prototypo exemplari Christo Domino reluxerit, siue ab eo obseruata quasi fuerit, iuxta quod dictum est §. 4. num. 3.

Tertiò. Considerandum est quænam sit praxis & vsus talis regulæ, quod vt bene fiat, præsupponi debet regulam dicere respectum ad id quod per eam dirigi solet: per regulas verò nostras dirigi debent nostræ actiones, tum externæ tum internæ; itaque praxis & vsus nostratum regularum est actiones illas rectificare: quare vt benè praxis cuiusque regulæ cognoscatur, applicari ea debet ad actiones omnes nostras internas & externas. Nec verò omnes regulæ sunt eiusdem rationis: nam quædam sunt generales quæ sese ad omnes extendunt vel certè multas actiones; aliæ verò particulares quæ ad vnā vel paucissimas spectant. Cum igitur considerare volumus

ad solidam Perfectionem. 67

volumus quæ sit praxis regulæ alicuius generalis eam veluti manu ducere debemus, vel per omnes diei actiones quas exercemus, conuersando cum Deo, cum proximo, & quæ nos tantum attingunt, vel per actiones internas, cogitationes scilicet & desideria, vel externas verba nimirum & opera, & videre num cum has actiones obimus, meminerimus nos habere talem regulam à qua dirigi debeant; deinde accuratè dispicere quomodo singulæ actiones tali regulæ, & per eam Christi perfectioni sic applicatæ congruant, quomodo exorbitent, quando verò regula vnā tantum actionem spectat ad eam solam applicari debet vnā cum prototypo exemplari, vel etiam cum relatione ad finem nostrum. Nam cum in 2. regula dicatur, finem societatis esse nostram perfectionem & proximi, omnes regulæ quæ sequuntur, sunt veluti ad nostrum finem. Itaque debemus illas applicare ad actiones, quatenus sunt talia media, ac proinde considerare an ita perfectè hanc vel illam actionem fecerimus prout regula requirit & prout exigit Christi imitatio.

Quartò oportebit si quid distortum in actionibus nostris appareat, de eo dolere, & proponere seriò emendationem, & ad id gratiam per Christi Domini merita postulare.

P A R A G R A P H V S VI.

Eiusdem considerationis praxis.

VT melius intelligatur & vtilius exerceatur hæc consideratio, quæ certè magni est momenti, visum est eius exempla aliqua proponere. Sit igitur consideranda prima regula summa.

Primò. Eam attentè legam, postea seposito libello, eius mihi sensum hunc effingam & in animo versabo: nimirum eius summam esse quod in Societate duplex sit regula præcipua, vna interior, lex nimirum charitatis & amoris quæ scripta & impressa esse debet in cordibus omnium filiorum Societatis, quaque in omnibus dirigi debent in sancto Dei seruitio: altera exterior quæ ad id iuuat: hunc sensum conabor memoriæ imprimere.

Secundò. Considerabo Christum Dominum habuisse etiam quodammodo duas similes regulas. Nam habuit omnino internam legem amoris Dei, qua impellente sola, etsi nullum habuisset positium præceptum agendi & patiendi pro nobis, prout fecit, tamen verè ex Dei amore, eadem vltro egisset, & passus esset omnia prout egit de facto & passus est. Et licet non alia regula externa egeret, sicut nos qui sumus infirmi; voluit tamen Deus ei dare præceptum positium, & legi antiquæ
eum

cum subiicere , vt obedientiam exerceret , & legis cuiusque vtilitatem nobis commendaret.

Tertiò. Regulæ praxis , cum sit generalis , versatur circa omnes actiones meas ; quare exquiram. An aliquando meminerim internæ illius legis , deinde dispiciam , quomodo actiones omnes diuini seruitij exequar à prima diei hora ad vltimam ; nimirum an cum manè surgendum est , id faciam alacriter ex lege Dei amoris , & vt ei placeam , & vt Christus ipse faceret , & an id facturus essem , etiamsi non esset in societate regula de surgendo mane. Deinde veniam ad meditationem , & applicata amoris Dei regula , videbo an illa sit quæ me moueat ad orandum &c. Idem erit faciendum circa singula studia , officia , humilitatem , charitatem in proximum , & singulas actiones diei , etiam circa refectionem corporis , & animi relaxationem , quam si lex charitatis dirigat , certè non poterit non rectè fieri.

Quartò. Si videam me ex consuetudine , vel affectu alieno , vel metu quodam seruili , ne ob violatam externam regulam , accipiam pœnitentiam , applicari ad ea quæ sunt diuini obsequij , non autem ex amoris & charitatis interna lege , veniam petam & postulabo per vniuersum Christi amorem , vt eam legem imprimat altius cordi meo , vt sola illa me dirigat , sola illa mihi sit lex.

Sic considerata 4. Regula summarij.

Primò , huius mihi sensum efformabo. Societatem nostram non habere certam & determinatam rationem viuendi , qua veluti constringatur , & intra cuius limites concludatur , sed communem ; non vt remissiùs viuatur , sed potiùs vt sit capacior omnis perfectionis & omnis generis mortificationum & pœnitentiarum ; pro- vt ad maiorem spiritus profectum conueniet : ad quem finem & quisque quasuis suscipere cum venia , & ipsi superiores imponere sine restrictione vlla possunt , cum in multis religionibus ordinarias pœnitentias habentibus , id non si fas.

Secundò. Christi Domini vita etiam fuit communis, vt omnibus perfectionis omnis esset exemplar.

Tertiò. Ad praxim applicabo hanc regulam : videbo imprimis num in communi hac vita , sicut fecit Christus , maius Dei obsequium intuear. Nam quod ad me attinet , debeo toto affectu abhorreere ab iis omnibus quæ commoda sunt carni, quatenus sunt talia , sed tantùm iis vti quatenus continent maius Dei obsequium. Itaque primum eas omnes actiones quæ communes sunt , applicata hac regula examinabo, verbi gratia , victum, vestitum, somnum, animi relaxationem , modum conseruandi , studia &c. considerans quo affectu ad illa ferar , diuini obsequij, an aliquo alio. Deinde considerabo quibus pœnitentiis vti soleam , aut etiam possem , & deberem

ad solidam Perfectionem. 71

rem pro capacitate vitæ huius communis , ad maiorem in spiritu profectum ; denique num impo-
nantur à superioribus aliquando , & quo eas ani-
mo & alacritate recipiam.

Quartò. Statuam me emendare , & in exte-
riori hac communi vita non communiter nitar
vivere , sed animo & desiderio complecti cru-
cem Christi , & omne genus mortificationum ,
quæ desideria (licet utar vita communi ad maius
Dei obsequium) cum potero tamen efficacia
reddam, assumendo quotquot potero mortificatio-
nes pro occasione.

Sic consideranda 6. Regula.

Primò. Utantur quotidie omnes conscientia
suæ examinatione consueta , nimirum per quin-
que puncta.

Secundo. Finis huius examinis est Dei boni-
tatis erga nos cognitio , & nostri & animæ puri-
tas , quæ in Christo excellentissima erat & conti-
nua.

Tertiò. An ita singula puncta percurram , ut
examen sit mihi medium efficax ad perfectio-
nem , & Christi similitudinem mihi imprimen-
dam ; an ita gratias agam Deo ut Christus facie-
bat , tantine meas imperfectiones faciam , & ita
eas detester , ut Christus illas ipsas æstimabat &
detestabatur.

Quartò. Propositum emendationis.

Regula nona.

Primò. Meipsum nihili facere debeo , & in-
E 4 dignum

dignum iudicare qui vel æstimer vel amer , quin potius dignum odio & contemptu ob mea peccata & defectus quos in me cognosco : ita gratum mihi esse debet , vt ob illos defectus quisque me contemnat (quia cum mihi insint , reddunt me vilem apud eos quibus apparent) & eos Superiori referat. Nec debet hoc meam quietem perturbare , imo debet id mihi esse gratum.

Secundò. Pro praxi huius regulæ lustrabo defectus meos præcipuè insignes , quosque maximè vellem occultos , & considerabo de singulis in hunc modum. Hic in me defectus vere inest , & patet oculis Dei & fortè hominum quam ergo putas de me opinionem propter illum concipere possunt ? certe talem. Quid si ad Superiorem referrent, turbarerne ? quomodo non confundor coram Deo ? alienone animo essem ab eo qui retulisset ? &c. quid erit in iudicio quando omnia patebunt omnibus ?

Regula undecima.

Primò. Hæc regula est maximè generalis estque summa totius perfectionis.

Secundò. Summa eius est , societatis Religiosus qui seriò Christum sequitur , amat & ardentè exoptat, contumelias , infamationem, & iniurias quasuis pati debet , & abhorrere omninò , & non ex parte ab iis quæ mundus amat , scilicet fama , honore , magni nominis æstimatione. Hæc regula deducenda est per omnes actiones diei , præsertim publicas, vel quæ ordinem ad publicas habent , vt sunt studia. Et videndum an in meditationibus meis hæc ardentia desideria concipiam

piam Christi exemplo. Ita abhorream à mundanis rebus, & mundo. Item in studiis quomodo me habeam: quomodo in conuersatione vel cum honor defertur, vel contrà contemptus timeri potest; Anne soleam potius fugere toto conatu confusionem, & ardentè optare honorem, plenus potius spiritu mundano quàm Christi? quantum ergo absum à forma perfectionis vitæ Christi.

Regula duodecima.

Christus Dominus tota vita sua crucem portauit, & inuitat nos vt abnegemus nos, & crucē semper etiam portemus. Fieri id potest.

Primò. Verè & de facto in multis diei actionibus nostræ libertati relictis, verbi gratia cum possem cum venia diutiùs dormire, vel aliquam recreationem non ita necessariam admittere, vel quid simile, si nolim petere veniam, & cum Christo feram crucem, Item cum possem dicere aliquid vnde alij meliorem de me opinionem conciperent, possum etiam sine graui nota tacere, cum possum sine noxa vltimum locum in omnibus occupare, cum possum me excusare dum reprehendor, admoneor, rideor, possum etiam sine alio incommodo id non facere, & similia multa, certè nunc debeo me potius abnegare Christi exemplo.

Secundò. Quando non est mihi liberum aliquam mortificationem subire, vt quando non licet ieiunare &c. quando non datur occasio alicuius contemptus, ego ipse me in animo meo contemnā, & agnoscam indignum non tantum honore si quis habeatur, sed etiam cibo & potu qui da-
tur

tur etiam vilissimo. Itaque me sæpe etiam circa omnia abnegans, dicam Domino de singulis eius donis. Exi à me Domine, & hæc tua dona aufer à me, quia homo peccator ego sum, & indignus omnibono tuo.

Tertiò. Denique si quando in anima affligar vel iniuriis, contumeliis que appetar, vel malis corporis exercear, cauebo à sollicitudine vitandi infamiam &c. imò agnoscam me his omnibus malis dignum & grauioribus etiam, amabo eos pro quibus affligar, pro eis que orabo, &c.

C A P V T X X I V.

Preparatio ad facienda exercitia.

PRimò considera. Quis sit finis quem in exercitiis istis intendere debes, is nimirum quem B. P. N. indicat annotatione prima, id est disponere, & præparare animam ad affectiones omnes siue actuales, siue habituales inordinatas antiquas, aut de nouo natas tollendas penitus, & sublatis illis ad quærendam, & inueniendam Dei voluntatem circa vitæ suæ statum, salutem, perfectionemque. Itaque pone ante oculos internam animæ tuæ ruinam & sterilitatem, & cogita te audire quod Hierem. cap. 1. Ecce constitui te hodie super gentes & regna, vt euellas, & destruas, & disperdas, & dissipes, & ædifices & plantes, nimirum vt vitiorum & imperfectiorum diruto dissipatòque ædificio & regno destructo, & euulsis radicibus, in anima cæleste & diuinum

diuinum semen recipias , turris Euangelicæ ædifices celsitatem, denique regnum stabilias : hoc tibi à Deo concessum est vltimum fortè tempus ; & vltimus dies destruendi & ædificandi , euellendi & plantandi; hodie igitur si vocem eius audieris , accinge te vt ædificium animæ tuæ æternum statuas.

Secundò considera, Hoc esse proprium opus infiniti illius artificis , & agricolæ , qui ait ædificabo eos , & non destruam ; & plantabo eos , & non euellam , & dabo eis cor, vt sciant me quia ego sum Deus , & erunt mihi in populum , ego eis in Deum. Huic tamen infinitæ potentiaë debes cooperari ad quod necesse est , vt animo prorsus liberali te in manus eius reponas , totumque ei committas , vt pro sua voluntate destruat , ædificet , euellat , & plantet , teque fingat refingatque vt figulus lutum : quare cum B. Paulo dicendum : Domine quid me vis facere?

Tertiò considera. Tibi super inesse vtendum aptis mediis ad illum finem : hæc autem media sunt exercitia spiritualia , quæ nihil aliud sunt , quam certa quædam methodus examinandi conscientiam , orandi mentaliter , legendi libros spirituales , & considerandi ea quæ cuique propria sunt, quæ quam efficacia sunt , docuit experientia in ipso B. P. N. Ignatio , & primis patribus , tot aliis præclaris doctisque & sanctis viris , qui cum ingenti suo fructu in iis versati sunt ; id tamen fortè aliquando expertus es , nec debes dubitare , quin vnde tam multi tanta lumina & gratias hauserunt ad suam perfectionem, ex eodem tu quoque fonte reposita multa dona sis percepturus à Deo , quoniam forte hac via
per

per hæc instrumenta in alium virum te mutabit ;
vt fecit alios.

Quartò considera , Opus esse vt ea instrumenta integrè , diligentérque & seriò adhibeas, alioquin parum , vel nihil proderunt. Quare nihil omnino reputandum est parui esse momenti, cum sine iis quæ parua videri possent , nec bene stare possint alia , nec constare queat exercitiorum integritas & vis. Quidquid ergo suis temporibus agendum erit , illud age seriò , in eo totus esto , & tibi certò persuade thesaurum esse maximum quem effundis, magnum negotium quod agis.

Quintò cogita, Opus esse tibi generoso animo, nec enim sine vi aliqua & difficultate ad ima vsque vitæ veteris fundamenta, eruenda & perdenda , dissipandaque ea , quæ in te construxit Dæmon , Mundus , & Caro. Arx & Munitio , vt prorsus nihil remaneat , ea tibi quatienda est magnis motibus , & crebris , imo continuis vtriusque potentiæ intellectus & voluntatis ictibus : Deinde non sine tædio & labore in intimos animæ recessus penetrandum , & in profundas abyssos descendendum sæpe tibi erit : eruenda quæ ibi demersa latent pondera & rudera vitiorum , & procul magno conatu proiicienda , sanctisque desideriiis & firmis ac solidis propositis è cælo aduectis fundanda sedes Deo digna : verum si generosè feruentérque aggressus fueris , corruet munus Hierico facilè , fiétque quod Dominus promittit de reædificatione Sanctæ Ciuitatis Hierusalem. In die illa ponam duces Iuda sicut caminum ignis in lignis , & sicut facem ignis in fœno , & deuorabunt ad dexteram , & sinistram omnes

omnes populos in circuitu, & habitabitur Hierusalem rursus in loco suo. Zach. 12. Pete à Domino tibi ignem illum communicari.

Sextò considera. Opus etiam esse magna animi quiete; ad hæc enim efficienda excludi debent creata omnia siue foris; siue ex animo, claudendi sensus omnes, & ex intellectu, & voluntate arceri cætera omnia debent præter vnum Deum, & in solitudinem internam & externam concedendum est: quare persuade tibi ita cum Deo agendum esse his paucis diebus, quasi tu solus cum eo in mundo esses. Ducam, inquit, eum in solitudinem, loquar ad cor eius; huic tu Duci ne resistas, sed cor tuum illi soli præpara.

C A P V T X X V.

*Considerationes nonnullæ initio exercitiorum
perpendendæ lectis 20. Annotationibus.*

CONsidera primò. Finem exercitiorum spiritualium esse duplicem; disponere animam ad tollendas omnes affectiones inale ordinatas, & iis sublatis quærendam & inueniendam Dei voluntatem circa vitæ suæ institutionem & salutem animæ: vnde hæc exercitia constat non esse purè speculatiua, quasi sit satis in sola Dei rerumque diuinarum contemplatione quiescere; sed practica, atque adeò ad aliquid efficiendum ordinata.

Affectiones

Affectiones malæ sunt partim actuales , partim habituales , siue sint innatæ siue acquisitæ ; ad vtrasque tollendas per exercitia spiritualia disponimur. Imprimis quidem actuales , vt quæ plurimum & salutis & voluntati Dei repugnant : atque id fit per pœnitentiæ actus , quibus anima priores actus peccatorum retractando eosdem quodammodo in se extinguit , accedente , præcipuè post diligens examen, exacta & perfectæ singulorum confessione , vt ita Deo reconcilietur, & deinceps ad eius sanctissimam voluntatem sese componat , in quem finem qui nunquam fecerunt exercitia spiritualia intendere solent animum. At quibus quieta est tranquillaque conscientia , delictis pridem peccatis possunt nihilominus valde vtiliter peccatorum etiam pristinorum actus discutere , tum vt dolore perfectiori ea deleant & expediant , tum vt habitum pœnitentiæ salutarem acquirant , vt humilientur inde magis , vt contrà futuras occasiones armentur , vt ad Deum magis amandum feruentiusque ei seruiendum incitentur ; saltem nemo est qui non debeat quotidianos lapsus , & vitæ tepidioris negligentias . quæ aliquando graues esse possunt & periculosæ, deflare & corrigere : verum non minus vtiliter qui iam sæpius in exercitiis versati sunt immediate & directe in habituales affectiones intendunt oculos, quamuis indirectè actus etiam suos discutiant , quatenus duntaxat sunt signa interiorum radicum vel effectus. Huiusmodi affectiones cum partim sint innatæ , partim acquisitæ, nemo hominum est qui multas in se non reperiatur , quas omnes tolli oportet. Ferax est terra animæ nostræ plurimarum malarum herbarum , quæ

quæ licet lateant aliquando , externa aliqua causa repressæ , semper tamen suo tempore apparent & virescunt. Sicut enim terra non in vno tempore omnes malas herbas & bonas profert , sed habent singulæ tempora sua; ita & mens nostra , aliis in iuuentute , aliis in adolescentia , aliis in virili ætate , aliis etiam in senectute morbis tentatur , alias experitur infirmitates quando subest , alias quando regit , alias cum studet , alias cum docet & concionatur , aut quoddam aliud munus gerit ; mutant enim occasiones etiam internum mentis nostræ statum , & vel affectiones malas dormientes excitant , vel suscitant nouas. Quamobrem valde vtile est quotannis in se descendere , & per hæc exercitia , vel antiquas euellere radices , vel exorientes nouas extinguere.

Dicitur verò præparari & disponi anima ad eas tollendas , quia in exercitiis clariùs distinctiùsque cognoscit , & remedia inuenit , proponitque deinceps eas expugnare. Nec enim euelli penitus queunt in exercitiis , sed intellectus & voluntas muniuntur , vt occurrentibus postea occasionibus per actus ipsos frequentes & exercitia virtutum prauæ inclinationes omnino tollantur , vincanturque.

Hæ affectiones mirum in modum obnubilant mentem , vt difficillimè possit Dei voluntatem intueri. Quare iis iam sublati ea quærenda est sedulo in exercitiis , & quidem in genere nemo nescit Dei voluntatem esse , vt quam perfectissimè viuat secundum statum in quo est ; duo tamen vt plurimum obscura restant.

Imprimis quæ sit illa perfectio ad quam vult
Deus

Deus nos peruenire. Et si enim aliquam perfectionis ideam sibi quisque fingat, non tamen omnes in quo sit solida & vera perfectio, intelligunt, quo sit, ut in principio omnium primo, in fine nimirum, errantes, non mirum sit, si non adeò bene ordinatèque cunctam vitæ rationem componant. Hæc verò perfectio quænam sit exercitia spiritualia tradunt.

Secundò: et si alicui fortè nota sit perfectionis natura, non omnes tamen intelligunt in quonam gradu consistat, cum enim non posita sit in indivisibili, sed magnam latitudinem intra triplicem viam habeat, non statim tota acquiri potest, sed sensim idque ordinatè: nam Deus omnis perfectionis amans ordinatissimè solet procedere; quem ordinem debet aliquo modo providere, ut sciat quousque progressus sit ubi ponere pedem debeat, quæ imperfectio magis vrgeat, quæ virtus instet potius acquirenda; ut si confusè omnem perfectionem amplectatur, vel frustra multis annis, vel parum utiliter laborat: sicut igitur totam sibi perfectionem doctrinæ proponit adolescens, qui ad studia primum accedit; tamen in singulos annos examinatur, ut eam ordinatè acquirat; ita in se descendere debet frequenter quisque perfectionis studiosus, & Dei examini se sistere, ut quæ sit eius voluntas circa vitam in posterum instituendam clarius intelligat.

Considera secundò. Ad illum finem media proponit B. P. N. quatuor. Orationem seu meditationem, examinationem, lectionem spiritualem, & directionem; cuius rei sunt duæ causæ.

Primò enim plura sunt veluti exemplaria quorum diligentì & accurata inspectione divina in nobis

nobis perfectionis effingi debet. Inter quæ primum est Deus & Christus, quem imitando consideramus, & in eandem nos imaginem frequenti imitatione transformamus. Alterum est nostra conscientia, & interior animæ nostræ facies, quam nisi perspectam habeamus, in ea nihil perfectioris formæ inducere possimus. Huic rei seruiunt examina; accedunt ad hoc haustæ à Deo præceptiones à viris sanctis scripto nobis traditæ, in quibus tum Deum ipsum, tum nos contemplari legendo possimus. Denique qui nos dirigit, suis instructionibus, nobis viua voce delineat perfectionis ideam ad quam conari debemus.

Secundò. In eo fine assequendo quatuor causæ concurrunt. Imprimis Deus quem orando & meditando nobis & operi tanto applicamus. Deinde nos ipsi cum intra nos per examen descendimus. Accedunt sancti, qui nos scripto instruunt, ipse imprimis B. P. Ignatius, qui præsens adest, cuius exercitia manu, oculis, & animo usurpamus, in quibus suum ipse spiritum nobis viuum & ardentem expressum reliquit. Denique qui nostri Superioris vicem gerit.

Consi. Tertiò. Horum mediorum efficacia cum maxima semper sit, tamen in exercitiis quanta sit colligi potest.

Primò. Ex admirabili prorsus ordine, & nexu quem omnia inter se habent, adeo ut ab ipso ducta fundamento ordinato veluti agmine necessario quodam modo finem inferant, quem ordinem ideo Paulus III. in Bulla approbationis libelli vocat aptissimum ad mouendos fidelium animos.

Secundò, Ex ipsomet authore B. Patre, in quo hæc ipsa Deo dirigente tantum Manresæ exercitia potuerunt, & illum adeo aptum Dei instrumentum redderent: his enim ipsis à Deo ipse excultus fuit, & postea diuino quodam lumine illustratus, illiteratus adhuc, eodem ordine quo acceperat, & propriis experimentis didicerat, vt ait Pontifex, descripta in suum vsum & aliorum ad Dei gloriam reposuit.

Tertiò, Ex admirabili perfectione ad quam deinde per ea ipsa progressus est ipse, nam quibus instrumentis perfectionis Euangelicæ fundamentum solidum posuerat, iisdem vltimam manum imposuit.

Quarto, Ex ipso Societatis instituto, cuius idea quædam in exercitiis delineata quodammodo apparet, vel quod potius in exercitiis non secus ac fructus in semine lateat. Mirum sanè Beatum Xauerium instituto Societatis nondum composito, solis instructum spiritualibus exercitiis paria in India de instituto sensisse, eodem modo & spiritu societatem gubernasse; quo B. Ignatius eius author fundatorque Romæ, id quod etiam in primis patribus notatum est, quos interni lex spiritus ab exercitiis hausti, antequam regulæ conscriberentur, mirabili consensione dirigebat.

Quinto, Hoc instrumento sicut B. Ignatius hoc instrumentum condidit, ita & societati parauit operarios, sic B. Xauerius Societati aptatus, sic P. Faber, quem inter eos qui in Europa remanserunt, diligentissimè excoluerat B. P. sic alii deinceps, vt omittam alios innumeros extra Societatem siue religiosos, siue sæculares, qui &
suam

suam ipsorum , & aliorum reformationem hinc hauserunt , adedò vt verè dici queat libellum hunc , vel potius spiritum B. Patris in eò quodammodo viuentem, fuisse singulare Dei instrumentum ad Ecclesiæ reuocationem. Quare non mirum si illum B. Ignatius tanti fecerit , & non secus atque Dei opus , cum in dubium vocatus est , semper defenderit , grauissimisque verbis in ipsis constitutionibus eius vsum & affectum nostris commandauerit , & familiarem esse omnino decreuerit : didicerat enim in se & aliis B. P. quanta vis horum spiritualium armorum esset ; vt ipse appellabat , si benè tractarentur , quanta eius medicinæ efficacia , si rectè adhiberetur ad quosuis morbos , quantumuis inueteratos & pertinaces , quos nec conciones, nec alia ordinaria remedia curare possent , extirpandos. Certè de nobis id nobis persuadeamus necesse est , fore vt nunquam veri societatis filij simus , & sincerum eius spiritum habeamus, nisi hinc hauriamus. Qui bene & seriò faciunt exercitia , fit in eis fons aquæ perenniter toto anno tum in Deum sursum salientis, tum in proximos manantis, quod experiri sunt primi patres, & omnes alij viri sancti Societatis.

Considera quartò. Ad hoc efficiendum requiritur dispositio , quæ in eo consistit, vt cum intellectus tum voluntas expedita sit ad has spirituales actiones , & quod ad intellectum attinet , cuius est proprium discurrere & ratiocinari , non vllus est qui non pro modulo suo possit de rebus suis cogitare ; quare necesse est ad voluntatem excitandam , cuius potiores sunt hic partes , quamuis iuuari debeat lectione , directione , & ipso

præsertim cælestis luminis influxu, quod nunquam deest cum voluntas rectè disposita est.

Requirit porro ad hanc dispositionem voluntatis B. P. N. Primò, animum generosum, & magnum ob difficultates quæ aliquando sunt superandæ, siue ex natura secessus & orationis, quam interturbare sæpè solet ariditas mentis, tædium, vanæ sollicitudines, & curæ rerum futurarum & negotiorum, passionum & affectionum vis, conscientiæ anxietates, siue ex improbitate dæmonis, qui sicut vniuersas diei tentationes eò solet dirigere, vt orationem nostram matutinam quotidie turbet, ita vniuersa sua molimina toto anno circa nos adhibita tēpore exercitiorum reuocat, & renouat, vt hoc tempus nobis sine fructu effluat.

Secundò, fidelem qui sincerè & coram Deo, & cum directore agat, & à proposito exercitiorum fine, non sinat se vlllo naturalis affectus fauore abduci.

Tertiò liberalem erga Deum, non gloriam eius tantum quærendo, sed maiorem gloriam, & totum illi se offerendo in eius obsequiū sine vlla restrictione, aut dilatione & mora: qui enim se Deo citò dat, cum Deus petit, bis dat.

Quartò, confidentem Deo, qui suam creaturam ad se venientem amplectitur. Itaque sese proiciat in sinum paternæ eius prouidentia.

Quintò, sollicitum, ne qua in re obstat diuino beneplacito, aut gratiæ eius desit, & idcirco obseruantem accuratè ea quæ singulis horis præscripta sunt, & annotationes ipsas imprimis additionesque exercitiorum, quibus ille spiritus sua veluti lumina & dona in nos veluti cana-
libus

libus deriuat. Quis scit an non vltima mihi futura sint exercitia , quis scit an iis in exercitiis Deus sit mihi communicaturus quod non fecit haftenus , & quod totam in vitam mihi erit , & salutis , & perfectionis causa.

Sextò , solitariū , non corpore tantum , sed animo præcipuè , vt non tantum à communi aliorum conuersatione , & liberiori sensuum linguæque vsu abstineamus exterius , sed id faciamus vero mortificationis spiritu , libenter abdicantes externa omnia , vt Deo fruamur , imo internas rerum omnium aliarum imagines , cogitationes , affectusque , quæ cor nostrum pulsare , mouere , & turbare possent , deponamus. Nec vllum etiam internum colloquium cum vlla creatura admittamus ; vt tota nostra conuersatio sit cum Deo , perinde ac si soli cum eo solo in mundo essemus. Proderit certe hæc interna recollectio , & sensuum mortificatio , non tantum tempore exercitiorum , sed vt etiam postea ei assuescamus , eamque tota vita seruemus. Nam de eorum numero sumus , quibus Apostolus ait, Conuersatio nostra in cœlis est.

Ad fundamentum exercitiorum.

NOtandum Primò , Finem huius considerationis primarium non esse dolorem excitare quod à fine nostro aberrauerimus , sed partim tota intellectus attentione clarè & intimè penetrare , quis ille sit finis propter quem sumus id quod sumus , partim vbi bene eum apprehende-

rimus voluntatem ad efficacem eius intentionem efficaciter permouere : id autem vtrumque cum facimus, fieri nequit quin alii affectus admirationis, gratiarum actionis, confusionis, exsurgant; quibus non tam inhærendum est, quam eorum ope voluntas adiuuanda, vt sese firma, & inuiolabili intentione fini illi suo astringat.

Notandum secundò. Hanc considerationem vocari à B. P. Nostro, principium siue fundamentum : finis enim cognitio & intentio in rebus moralibus, atque adeo in vitæ reformatione est principium practicum, ex quo (non secus atque in speculatiuis, ex principiis scientia deducitur) tota actionum nostrarum praxis dimanat; Quare quo ea cognitio & intentio perfectior est, eo perfectior sequitur praxis, atque eadem ratione vocatur fundamentum, quâ totius ædificij spiritualis molem sustentat. Quare in hoc fundamento exercitia omnia primæ, secundæ, tertiæ, & quartæ hebdomadæ nituntur, & ex hoc principio omnis voluntatis praxis & affectus qui tam in prima, quam in cæteris septimanis quaruntur, profluunt. Nam dolor & pœnitentia de præteritæ vitæ peccatis, ab eo præcipuè principio vim omnem accipit, & futuræ vitæ ratio ex eius principii per Christi Domini vitam illustrati & applicati, regula dependet.

Notandum tertio. Huic considerationi nullo definitum tempus assignari à B. P. N. tum quia diuersa est hominum dispositio (nec enim omnes æquè facillè hoc principium quantum satis est, vti practicum esse queat, apprehendunt penetrantque, id quod in cæteris etiam scientiis vsu venit) tum quia propter eius momentum in
vita

vita spirituali hoc primo exercitiorum ingressu non cursim ac leuiter percurrendum, sed intimè penetrandum est, ita vt in toto decursu per se in memoriam redeat, & ad solidam praxim eliciendam influat; quare rarò sufficit huic considerationi horam tribuere.

Fundamentum.

Circa primum punctum. Cogita quod cum nihil esses, nec esse quicquam ex te posses, Deus optimus Creator tuus, cum te in tuo nihilo relinquere posset, vt infinitas alias creaturas reliquit; ab æterno tamen de te cogitauit, & voluit te condere, non lapidem, non equum, sed hominem, adeoque corpus tuum quinque sensibus, animam verò tribus potentiis, memoria, intellectu & voluntate instruere, non propter te, aut vt solū viuas, vel tibi viuas, tuisque commodis, gloriæ & honori inde seruias; sicut enim non es à te, nec esse potes propter te, sed propter Deum, tanquam eius mancipium, iumentum, & medium ad eum finem ordinatum, quem sibi Deus proposuit, nempe ad gloriam eius, quam promoues, cum illum intellectu cognoscis, & affectu complecteris; siue in hac vita, siue in futura pro cuiusque modo, sicut ipse seipsum cognoscit & complectitur. Hoc fere principium vbi bene conceperis, & viuâ fide apprehenderis, illud tibi applicabis, & suauiter ac fortiter per discursum practicum voluntatem excitabis ad hos affectus.

Primo. Admirationis, quod tanta maiestas
F 4 dignata

dignata sit ab æterno recordari, & oculos intendere in tam vilem creaturam.

Secundò, Actionis gratiarum, quod te elegit, relictis tot aliis quos non creauit, & tibi corpus integrum animúmque dedit, quod aliis penè innumeris non concessit.

Tertiò, Amoris, quòd te creauit ad tantum finem, illúmque supernaturalem, vt mensæ diuinitatis suæ participem te faceret, vt eodem quo Deus ipse cibo, eâdem beatitudine fruaris. O Anima mea quomodo talem Deum non diligis!

Quartò, Confusionis & doloris, quòd ita vixeris, ac si Deus non fuisset finis tuus. Ita cum oblitus es, ita parum de eo cogitasti, ita nullo amore, nullo obsequio eum persecutus es, sed appetitus & mundi vanitates eius amori anteponens, ita vt vita tua omnino inanis effluerit. O quantum dolorem de præteritâ eò modo vitâ anima concipit! O quantum cuperet, si daretur, eam ab initio retexere!

Quintò, Timoris, ne tua negligentia malis moribus & tepidâ voluntate fiat, vt nunquam ad hunc vltimum finem perueñias, à quo tantum abes.

Sextò, Horroris aduersus mortale peccatum, præsertim quod omnino ne attingas illum, impedire potest.

Septimò, Firmæ voluntatis, quâ proponas te Deo fauente eius gratiâ penitùs subiicere, offerre te ipsum tuâque omnia in illius obsequium dirigere, vniuersam tuam vitam, cognitiones, desideria, verba, & actiones ad eius vnicam gloriam: hoc perfectum animi propositû explora cum Psal. mista dicens, Nonne Deo subiecta erit anima mea?

Circa secundum Punctum. Recordare Deum creasse cætera omnia: vt tibi tuum in finem adiumento essent, iuuant enim te ad eius cognitionem, amorem, memoriam, cultumque, viresque necessarias ad eius obsequium præbent, ita vt omnium creaturarum vsus qui tibi per operationes facultatum tum corporis tum animæ conceditur, eò tendat, vt Deus glorificetur. Nam ex creaturis omnibus, tam quæ in cælo, quàm quæ in terra sunt hos tres fructus potes elicere, cognitionem Dei, amorem eius, & auxilium & vires ad perfectum ei obsequium præstandum anima & corpore ipso. Hoc vbi viua fide conceperis, excita affectus.

Primò, Actionis gratiarum, quodd liberalis Dei prouidentia omnia creârit tua causa, & licet solus esses in hoc orbe, conseruaret tamen illa omnia etiam tuâ causâ,vti ad omnium vsum conseruat.

Secundò, Contemptus omnium creaturarum, quia media sunt tantum,vt ei seruias,dic ergo cum Psalte; Quid mihi est in cælo,& à te quid volui super terram? Deus cordis mei, & pars mea Deus in æternum.

Tertio,Doloris & confusionis propter inordinatos affectus tuos erga creaturas, quibus tanquam fini adhæstisti,quas ad te ipsum,non verò ad cognitionem,amorem,& obsequium Dei retulisti, vnde tot peccata emanârunt à tuo fine penitus aliena.

Quartò, Propositi emendationis, petitâ gratiâ rectè iis vtendi; nunquam intellectum earum cognitione, memoriam recordatione, voluntatem amore, nullum vnquam sensum, linguam, oculos, gustum,

gustum, auditum earum usu & delectatione occupandi, nisi quantum id ad Dei gloriam redundare potest.

Circa tertium & quartum punctum. Cogita quod licet omnia sint tibi media ad hunc finem, tibi tamen non eodem modo ad eundem finem utilia sunt. Alia enim sunt quæ profunt & nunquam obsunt, alia, ratione tuæ fragilitatis aperte aduersantur, & à fine te impediunt. Denique alia sunt veluti indifferentia, quorum usus neque ordinariè nocet, neque notabiliter utilis est ad eum finem: vide apud te quæ tibi utilia soleant esse, quæ item contraria, quæ porrò indifferentia, & cognita necessitate quâ vrgeris ad tuum ut finem peruenias, excita hos affectus.

Primò. Constantis propositi iis vtendi libentiùs quæ magis profunt, tametsi ardua sint & difficilia, ut est paupertas, dolor, aliorum despectio.

Secundò. Horroris aduersus ea quæ tibi nocent ut plurimum, & deliberati animi ea reiiciendi quamuis alioquin naturæ placeant, despectis quibuscumque hominum colloquiis & difficultatibus.

Tertiò. Constantis iterum propositi; quo statuas vsurum te nunquam iis quæ tantum damni quantum profectus afferre possunt, nisi tanquam mediis, quibus feraris in Deum. Quapropter statuendus est animus in æquilibrio, ut quoad bona hæc omnia, indifferentia malæque indifferens sit, & quidquid demum tibi accidat, te conformes Dei & superiorum voluntati, in id duntaxat intendens, ut siue paupertatem, dolorem, & contemptum patiaris, siue contra diuitiis, honore abundes in Dei gloriam cuncta referas. Hoc est

est enim scire abundare, & scire penuriam pati.

Facto huiusmodi proposito, per vltimum colloquium offeres te Deo cum animo ex hoc momento nouam ordiendi vitam ordinatam, scilicet ad eius obsequium & gloriã (relictis omnibus inordinatis affectibus & amore omnium creaturarum) procurandam.

Pater Ave.

Ad primum exercitium de peccatis.

HEbdomadæ primæ finis est scrutari inordinatas affectiones nostras, & internam animæ nostræ faciem cognoscere, non tantum vt præteritæ vitæ malitiam, ingratitude, & tepiditatem intueamur, & de imperfectionibus actualibus, quibus à Deo vero sine nostro, rectoque nostri & aliarum creaturarum vsu recessimus, confundamur & veniam impetremus; sed præcipuè vt accendamus vehementer ad vitiosas nostrarum imperfectionum radices, ex quibus tot fœdi & damnabiles fructus proruperunt, inuestigandas, & accuratè radicitusque euellendas.

Primi igitur exercitij scopus est, ante oculos ponere exempla peccati Angelorum, Adami, & aliorum priuatorum, tum, quam inordinatè nos ipsos quæramus, & cùm deberemus in Deum vt finem nostrum nos referre, inuerso ordine faciamus nos, finem nostrum, tum, ex quibus radicibus hæc inordinatio actualis quotidie oriatur in nobis, & in illis orta sit, ac proinde quanta sit
necessitas

necessitas eas extirpandi, ne in eadem peccata & pœnas incidamus.

Notandum verò est B.P.N. in hoc primo exercitio tradere verum & maximè solidum modum meditandi, qui tenendus est in omnibus exercitiis non tantùm primæ hebdomadæ, sed etiam aliarum, ac proinde hic accuratè est perpendendus cuius exercitanti.

Pro quo sciendum est, meditationem pendere à Deo sine quo nihil possumus, & ab homine Deus per orationem præparatoriam generaliter aduocatur, & per orationem vltimi præludij applicatur ad particularem meditationis finem promouendum. Homo verò totus hîc vacare debet, vnde compositio loci imaginationem ab alijs obiectis transfert ad rem meditandam; & idcirco iuuat ad attentionem animi motionemque, qui hoc modo alligatâ phantasiâ rei illi certæ, alligatur quoque ipse quodammodo ne euagetur, aut si diuertat, habet quò se faciliè colligat, & reuocet in situm illum suum in quo se ab initio composuit. Idem præstat repræsentatio historiarum cum meditatio est de Christi Domini vita: fit enim generatim tantùm, & vno velut intuitu, vt sciatur materia de quâ meditandum est, & anima incipiat in ea actuari & ad eam eleuari, vt faciliùs deinde singulas eius partes ponderet & penetret: quare vtraque est tantùm præparatio quædam & via ad meditationem, & ideo cauendum, ne iis vel minimùm immoremur, vel vim aliquam capiti faciamus; quare qui difficulter imaginantur, debent potius citè transire, quam laborando nimium caput obtundere, sic enim non possent deinde meditari.

Post præparationem sequitur meditatio in qua tres animæ potentiæ exercendæ sunt circa singulas partes rei propositæ , & ideo antea debet semper diuidi in certa puncta. Hoc autem trium potentiarum exercitium ex mente B. P. N. est huiusmodi vt proposito primo puncto imprimis memoria circa illud versetur per apprehensionem nouam veri sensus , & intelligentiæ eius , qua sese de nouo actuat, & penetrat quicquid diuinæ voluntatis in eo latet, expensisque, si opus sit, singulis verbis : vel etiam si de historia aliqua sit meditatio , personis , earum cogitationibus , verbis, desideriis, & factis : nam harum rerum consideratio spectat ad sensum capiendum , & proinde ad exercitium memoriæ , vt patet in primo puncto huius exercitij , in quo B. P. N. ad exercitium memoriæ spectare ait , cogitare quomodo Angeli creati primùm in statu gratiæ, sed nolentes per arbitrij libertatem Creatori suo reuerentiam & obsequium præstare, conuersi fuerint ex gratia in malitiam &c.

Ex quo etiam liquet hoc exercitium memoriæ non esse nudum , sed habere adiunctum aut saltem consequentem actum Fidei circa tale obiectum , præmissa apprehensione veræ eius intelligentiæ distinctè repræsentatum , per quem Fidei actum mens Deum religiosè colit, & ei se subiicit, ac præterea veritatem propositam tanquam quoddam principium firmat, vt inde efficacius discurrat, & praxim eliciat.

Posito deinde hoc principio , intellectus discurret : hic porro discursus intellectus non est ille actus quo de personis . verbis , factis , intentione cogitamus : nam is ad memoriæ exercitium pertinet

net, sed est ille actus quo ex principio iam posito, id est ex tali veritate iam concepta & apprehensa intellectus conclusiones practicas educit; ad voluntatem deinde promouendam, hunc discursum indicat B. P. N. quandò posita memoriæ comparatione, ait, colligendum esse, cum illi ob vnum crimen sint addicti inferno, quam sæpe ipse idem supplicium meruerim, ex quo discursu oriatur deinde praxis in voluntate, confusio nempe, & dolor.

Atque fidei veritates in punctis meditationis propositæ plerumque latissimè patent, idcirco vix vllum punctum est in quo proposito principio non possint deduci plurimæ conclusiones practicæ ad affectus varios voluntatis promouendos, verbi gratia, ex primo puncto primi exercitij, non tantum possum per discursum elicere hanc conclusionem practicam, quod cum sæpius sum meritus infernum, debeam totus confundi, timere, dolere: sed præterea admirari Dei bonitatem qui me tulit, gratias agere, amare, item possum concipere timorem: ne cadam in eadem peccata eaque graua, cum in me sit & liberis & amoris excellentiæ, & concludere mihi esse extirpandum illum amorem, & per voluntatem id proponere.

In mysteriis porro vitæ Christi Domini facillimum est ex veritate intellecta & viuâ fide apprehensa educere plurimas conclusiones, pertinentes tam ad vitam purgatiuam, quam illuminationem & vniuersalem. Solet autem ordo is communiter observari, vt statim post exercitium memoriæ vel actum Fidei conclusio practica educatur, inducens voluntatem ad actum spei ob Dei bonitatem

bonitatem, Christi misericordiam, benignitatem, meritorum vim &c. Deinde ex hoc principio educatur alia conclusio practica inclinans ad actus religionis, ut est actio gratiarum, oblatio sui & resignatio; item admiratio & similes. Tercio ex eodem principio eruatur conclusio practica in eo principio. Quarto ex eodem principio possunt educi conclusiones practicae de virtutibus moralibus, quibus vel Deo placere, vel Christum imitari possumus. Exempli gratia. Si propositum mihi sit punctum de Christi incarnatione, primum apprehendam per exercitium memoriae verum & intimum sensum mysterij, consideratis ipsis circumstantiis, ut quid nempe sit Deus, quid homo, & quid Deum esse factum hominem, & circa tale obiectum elicitu actu Fidei ex eo concludam. Si hoc ita est quid par est me facere? Certè imprimis confidere de tanta bonitate, & sperare omne bonum: Item amare & vicissim ei aliquid rependere, prætereà eam colere; gratias agere pro tanto beneficio: admirari, offerre me, Denique Christum imitari in annihilatione, in resignatione & amore proximi.

Per huiusmodi conclusiones excitata voluntas non tantum in affectus illos prorumpit, sed in colloquia, secum, cum Sanctis, cum Christo, cum Deo, prout materia fert & suggerit affectus, ut cum est laudis affectus & gratiarum actionis, Deum laudat, &c. Cum spei affectus, dicit. In te Domine speravi, & aliquas rationes, cur speret Deo repræsentat. Cum amoris. Dilegam te Domine fortitudo mea &c. Cum alicuius virtutis moralis qua eget sciens sine Dei ope non

non posse se eam consequi, eam humiliter petit per Dei bonitatem, per Christi merita, per Beatissimæ Virginis & aliorum Sanctorum amorem &c. Et pro materiæ varietate hæc colloquia facit aliquando instar filij, aliquando militis, serui, sponsi, ægroti, &c.

Post meditationem examinandi sunt tum fructus qui non sunt alij quàm dicti affectus, tum defectus qui tam in præparatione, quam dicto meditando modo commissi sunt.

Oratio preparatoria more solito.

Primum præludium. Erit ponere ante oculos animam meam multis imperfectionibus tanquam catenis circumquaque ligatam, & impeditam, ne ad finis perfectionem contendat.

Secundum præludium. Petere à Deo gratiam vt eas imperfectiones cognoscam, & totus confundar considerans quomodo multi ob pauciores & minores è suo statu, gratiâ Dei, & salute exciderint, & ego tepidè viuens sum toties id commeritus.

Primum punctum. Erit in memoriam reuocare quomodo Angeli non à se facti, sed creati in cœlo ad vniuersam Dei gloriam, vt illi nimirum se subiicerent, obediendo illi & eum amando quam perfectissimè; ad quem finem & naturam nobilissimam, & gratiæ dona acceperant, non voverunt per arbitrij libertatem creatori suo reuerentiam obsequiumque præstare, sed euerso ordine se ipsos suum finem fecerunt, sibi gloriam quam

quam Deo debebant , retinuerunt : vnde statim deiectioni & æterna confusione damnati, eius gloriæ illustrandæ etiam nolentes seruiunt, cuius bonitati gloriam se submittendo tribuere noluerunt.

Hoc principium vbi bene intellexero, & viua fide apprehendero, mihi applicando, cogitabo primò quàm parum de fine meo cogitauerim, quàm parum fuerit ante oculos, quàm parum curæ: vnde factum est, vt vsus ipse mei à tot iam annis vanus prope & inutilis fuerit.

Secundò. Perpendā quod non tantum eius oblitus fuerim , sed quod non semel vt Angeli , sed sæpius illo repudiato & contempto me ipsum fecerim finem actionum mearū, variis modis, nimiam mei æstimatione inflatus, meā passim gloriā quærens , & quis scit num aliquando cum graui peccato , saltem cum graui deordinatione ? Tertio post tot beneficia. Quarto. Quinam Angeli erant , & quis ego homuncio vilissima creatura.

Ex hoc principio & applicatione siue reflexione ad meipsum sic facta per discursum eliciam conclusiones practicas, quibus impellam meam voluntatem ad affectus similes.

Primo. Admirabor quod cum infinita Dei sanctitas & puritas infinito odio peccatum prosequatur, & adeo nobiles creaturas ob vnicum peccatum ita punierit, me tamen vilissimum homuncionem post tot peccata adhuc sustineat.

Secundo. Amore quam potero maximo, tantam bonitatem complectar.

Tertio. Dolorem & confusionem eliciam, quod ita illum offenderim.

Quarto. Petam veniam, proponam confiteri ,

& punire peccata à me commissâ perfectâ pœnitentia, denique ea emendare in posterum.

Quinto. Concipiam magnum timorem, ne tandem ob meam superbiam iusto Dei iudicio permittat labi in grauiâ peccata, rebellionem contrâ Deum, & cordis duritiem: sicut enim ipsa actualis Angelorum auersio ex superba sui æstimatione ob eam excellentiam quam ad suam gloriam Deus contulerat, promanauit, quia eam non mortificauerunt, vt poterant. Ita cum in me vigeat & in multos actus sese effundat eadem superbia, quid eueniet nisi eam serio mortificauero.

Secundum punctum. Eodem modo versari debet consideratio circa peccatum parentum. Certè etiam serpens dixerat parentibus. Eritis sicut dii, & eis persuasit vt Dei obedientiæ se subtraherent, & ad bonum corporis fructum comedendo, & excellentiam propriam excusso iugo præcepti diuini, vt ad proprium finem se conuerterent, vnde secuta est ingens illa deordinatio in tota natura humana.

Erit facienda similiter applicatio. Nam quoties ego Dei gloriæ præcepto aut consilio ex vna parte mihi proposito, ex altera verò bono aliquo corporis aut honore gloriam eius posthabui. Ex vtraque hac consideratione elicita conclusione practica voluntatem incitabo in hos affectus.

Primo. Admirabor & timebo purissimam Dei iustitiam, quæ ita puniuit & adhuc punit, imo in æternum puniet vnicum peccatum parui aliqui momenti, si obiectum consideres. Quid enim est sceleris in comedendo pomo? Sed aliunde
magni

magni momenti si superbiam & inobedientiam attendas. Quis autē scire potest? num tot peccata, quæ quotidie in religionis paradiso à te admittuntur, quæ minima apparent, grauiam tamen & seuera aliqua punitione digna sint? quæ forsan pōst aliquando subsequetur.

Secundo. Admirabor Dei bonitatem quæ me hætenus sustinuit, postque tot peccata hoc longè maiora admissa.

Tertio. Agam gratias tantæ misericordiæ, & excitabo quam magnum potero amorem erga benignissimum saluatorem. Quis enim princeps tandiu tam indignum & proteruum seruum pateretur?

Quarto. Postulabo cum dolore veniam, & promittam præteritam vitam confessione sacra eluere, & diuinæ iustitiæ perfectio mei ipsius odio satisfacere, quodque æternis suppliciis deberem eluere, veræ pœnitentiæ operibus, & melioribus moribus tota vita me castigare.

Quintò. Proponam seriò mortificationem amoris mei, commoditatum, sensualitatis & excellentiæ propriæ ad quam procliuem me esse cognosco, ne ex eis radicibus adeò tetrīs in superbam inobedientiam impellar, quæ deinde non tantum statum meum interiorem dissipet, & me cælesti lumine, gratia, protectione, & gubernatione priuet: sed grauem etiam in ipsam religionem, perturbationem, & rerum omnium confusionem inducat, vt contingere solet, & re ipsa Adamo euenit.

Tertium punctum. Quot in Ecclesia & religionibus sanctis fuerunt, quos forte noui, qui licet à Deo magnis ornati donis, & initio magnos

in virtute progressus fecisse viderentur , tamen ob tepiditatem , & remissionem animi , & assiduitatem peccatorum , initio quidem non magni momenti ex radicibus quibusdam quas euellere poterant , pullulantium , tandem ita corrupti fuerunt , vt inutiles omnino euaderent , adhibitis frustra remediis , quia animæ vitiosos habitus qui initio frangi poterant , eorum vel negligentia , vel desidia corroboratos , cum vicino periculo vellent superare , non potuerunt . Atque hæc negligentia esse solet vt plurimum circa intentionem seriam finis , quam solet impedire vanitas & ambitio , cæteræque similes pestes . Hoc vbi bene apprehendero , applicabo ad me ipsum & eliciam hos affectus .

Primò . Admirabor ex vna parte Dei Iudicia & illorum ruinam . Ex altera verò parte eiusdem bonitatem erga me , & gratias agam : quod cum iis imperfectior & negligentior fuerim in vsu gratiarum quas mihi communicauit , in demandis affectibus & vitandis peccatis multis , me tamen incolumē hætenus seruauit , neque abstulit à me misericordiā suam , nec mediis , quibus abusus sum , me priuauit .

Secundò . Concipiam dolorem & confusionem intimā , quod me ita imperfectum videam ante oculos infinitæ illius maiestatis , & proponam seriò emendationem .

Tertiò . Timebo ne si negligentior fuero in euellendis prauis inclinationum radicibus , quæ me in tot peccata impulerunt , ea crescant , & vires acquirant , quibus tandem resistere non possim , deserente me præsertim Deo , atque ita fiat , vt in longè maiorem ruinam præcipiter quàm ij
omnes:

omnes. Aggrediar ergo totis viribus eas omnes ad extremas vique fibras prorsus euellere.

Colloquium vltimum ad Christum in cruce, à quo petam vt sanguine suo promeritam veniam meorum peccatorum & diuinæ suæ gratiæ abundantia largiatur, quâ interius illustratus, actionum mearum prauitatem corrigam, radicésque vltiorū crucifigam, & sanguinis eius vi mortificem, eiusque exemplo vitam meam totam ad Deum dirigam, & omnia mea meque ipsū eius gloriæ postponens, integrum me perfectūque Deo sacrificium perpetuò offeram.

Pater Ave.

De Exercitiorum spiritualium fine.

FInis exercitiorū spiritualium quæ in Societate fiunt, est vitæ nostræ religiosæque conuersationis reformatio, vt dicitur in directorio exercitiorum, cap. 10. §. 6. & sequentibus.

Reformatio autem vitæ præcedentis est vitæ morum, conuersationis, omnium denique quæ ad hominem talem spectant, in præstantiorem formam commutatio: forma vitæ morūque ea sola bona est, quæ est conformis voluntati diuinæ, quæ est exemplar omnis perfectionis: voluntas autem Dei quantum ad præsens negotium attinet, alia est præcipiens, alia consulens; vnde fit vt forma siue reformatio vitæ alia sit præcepti, alia consilij: præcepti est, quâ formam vitæ peccatis grauioribus fœdatam secundum legem man-

datorum Dei , obligationemque cuiusque restauremus. Consilij autem est, quando etsi nihil grauius conscientiam nostram vrgeat, diuino tamen igne succensus animus , paruulas etiam imperfectiones in se superinducta perfectioris vitæ forma persequitur & abolet , ad anteriora se extendit, & qui iustus est , iustificari adhuc magis nititur.

Licet vitæ nostræ exemplar & forma primaria sit Dei voluntas , quia tamen illa cuius non ita exposita est, ideo pro iis præcipuè quæ consilij sunt, aliud Deus ipse exemplar visibile , & formā perfectioris vitæ sensibus perceptibilem nobis proposuit; nimirum Christum Dominum : cuius infinita & nunquam ad extremum imitabilis est perfectio : vnde nemo est tantæ perfectionis qui non adhuc reformatione vitæ opus habeat , vt vtiliter in illius inuestigatione laborare debeat.

37 Triplex igitur est vitæ reformatio. Prima est necessaria omnino ad salutem, cum quis in statu suo damnabiliter & periculosè viuit.

Secunda est extremè contraria, nimirum perfectorum, qui cum nec habeant graua peccata , nec imperfectiones magnas quas tollant in sui reformatione, præcipuè intendunt aliquid addere maioris perfectionis, & magis ac magis Christo sese conformare.

Tertia media , quando nimirum vita non est omnino damnabilis , nec etiam satis perfecta; Sed multis & magnis imperfectionibus est plena, adeò vt periculosè viuatur , & interdum graua peccata de quibus potest dubitari an mortalia sint committantur , vt detractionis , murmurationis

tionis, &c. Ad quæ non tam ratio status qui est perfectionis status, quàm vel propria infirmitas vel negligentia adducit, atque hæc solet esse frequentior.

Ad hanc igitur duo præcipuè præ oculis habenda sunt, nempe terminus ad quem, & terminus à quo. Nempe illa ipsa vitæ perfectio quæ nobis ex instituto proposita esse debet, & quam intendere debemus. Ac recessus ab illa per imperfectiones illas quæ in præsentī hoc statu nostro nos ab ea perfectione seiungant, à quibus recedere necessariò debemus, si propositam perfectionem assequi velimus.

Finis illius perfectionis seu potius intentio eius in hoc toto reformationis genere & negotio potissimas agit partes: ex ea enim præcipuè totus profectus dependet. Sicut enim non potest fieri ut vllam vitæ reformandæ cogitationem suscipiat is, qui nullum vllius perfectionis desiderium habet; ita qui vel non tantam sibi perfectionem proponit, vel si proponat id tamen facit perfunctoriè & speculatiuè potius quàm practicè, fieri non potest ut serio velit, quæ in se aliena ab ea perfectione deprehenderit, ad illius exemplar reformare. Et quidem omni homini societatis non congruum solum est, sed necessarium, ut in formam Christi Domini Redemptoris & Regis nostri intuendo se ad maximam perfectionem excitet, quod quia remissiùs aliqui, aliqui contentius faciunt, inde ea in societate in regularum obseruatione, & mediis perfectionis vsurpandis, modoq; agendi varietas, quæ ad duplex genus reuocari potest. Primi & optimi sunt qui sincerè & serio eam omnē perfectionem

nem intendunt, ad quam Christus ipse nos & verbo & exemplo inuitat, & quam Societatis institutum continet; & conantur perpetuò intentionis suæ oculum nulli contagioni obnoxium conseruare, & in arduum illum finem defixum tenere, sollicitè cauere ne quid remittant. Alij sunt, qui licet videantur eamdem perfectionem intendere, practicè tamen satis apparet eam intentionem nec firmam esse nec veram, cum multùm humani admisceant, & (vt ait S. Bernadus in sententiis.) Et si sint Dei obsequio mancipati ratione status (vnde etiam fit vt sibi imponant & persuadeant se perfectionem prosequi) & Deo etiam seruiant, tamen simul se querunt, & erga se indulgentiores existunt: vnde fit vt nihil vel valdè parum à communi consuetudine recedant, personæ suæ dignitatem omnem conseruatam velint & auctam, infra alios se non humilient, rariora & perfectiora virtutum exempla nec ipsi edant nec in aliis ferant sine aliqua interna tristitia &c. Id quod illis contingit, vel quia initio non satis apprehenderunt quantam perfectionem Societatis institutum requireret suâ negligentia, dum inter occupationes externas sibi satis non attenderunt, sensim sine sensu à bonis desiderijs eò dilapsi sunt. Et horum quidem status plurima habet incommoda: nam multas imperfectiones & in sinceritatem magnam admittit; solet esse coniunctus cum inconstantia, consolatione diuina & pace interna vix fruitur, minùs aptus est ad res magnas prout societatis institutum requirit efficiendas: nam parùm solidus est & firmus, sed mutabilitate rerum humanarum, & respectuum necessariò circumagi turbarique potest, & graui-

ter

ter nonnunquam concuti, non ita conciliat amorem hominum tum nostrorum tum externorum, habet & domi & foris inuidiam hominum, quibus non satisfacit in omnibus, & non habet eam admirationem & probationem hominum, quæ raram virtutem comitari solet, non protegitur peculiari diuinæ prouidentiae fauore, qui faciat vt omnia in optatos fines dirigantur: hunc enim diuina bonitas modum tenet cum hominibus, quos tanta gratia & vocatione ad eò sublimi dignatur, vt quò purius in Deum se & sua omnia referunt, eò sollicitius non tantum quæ sunt spiritualia prouideat, sed cætera omnia adiiciat. Quando autem non ad eò liberaliter se in Deum effundunt, sed humanis ducti rationibus partem sui suarumque actionum & studiorum sibi retinent ad vanam gloriam hominumque fauorem, tunc verò Deus vel permittit, vel iuste ordinat, vt aliquo alio humano casu, vel consilio contrario in omnia peius ruant. Quare certissimè positum hoc fundamentum teneamus, quod si quam statui nostro conuenientem perfectionem cognouerimus, eam totam non seriò fuerimus amplexi quocumque prætextu vel respectu, fore vt diuina prouidentia pleraque nostra insincera consilia euertat, nec patiatur vt recessus à Deo sit nobis honoris, vel alterius alicuius boni accessio. Itaque qui seriò vult esse qualis debet & propriæ vacare reformationi; hoc primum agat vt intentionem suam defigat in finem summæ illius perfectionis assequendæ, & circa illum se stabiliat & confirmet, vt nulla ratione patiatur se ab illa dimoueri, ratus si vel minimùm minuat ea intentio, vel languescat, nec posse succedere reformationem

formationem , nec quidquam aliud.

Hoc fine ita constituto, facile erit de termino à quo est recedendum , iudicare , & sibi materiam propriæ reformationis constituere. Nam ex bene formata ea intentione, Deo influente lumen quoddam practicum statim diffundetur in omnes actiones nostras & internam dispositionem , quo & quam procul ab eo absumus intelligemus statim , & quam multa grauique sint ea quæ nos ab illo prohibent , discernemus, & incipient etiam motiua aliqua & rationes viæque ea ipsa reformandi sese aperire. Huic lumini vt coope- retur qui reformationi studet , si velit ordinatè procedere, debet imprimis materiam circa quam emendandam constantia eius versetur sibi præscribere , deinde causas & fontes illius imperfectionis exquirere , remedia quibus vti in post- rum debeat eligere.

Materia reformationis sunt peccata grauiora , imperfectiones , & alia si quæ sunt impedi- menta perfectionis. Hanc vt clarius cognoscat, seipsum serio & sine fucō & excusatione amoris proprii, secundum status sui finem examinare , & videre qualis sit & esse debeat respectu Dei, pro- ximi, & sui: quid desit in memoria , intellectu & voluntate , passionibus , sensibus externis & lin- gua; quas experiatur inclinationes ad vitia, & num- sentiat auersiones vehementes ab aliqua virtute: ex horum enim & similium discussione faciliè quid in se sit reformandum intuebitur. Vide de Paz p. 1. cap. 11. in fine pag. 408. & Thomam à Kempis.

Licet autem singula etiam minima agnosce- re bonum sit , parui tamen animi , inutilis & infiniti

infiniti laboris est singulis adhærere, sed tantum præcipuà quædam notanda sunt, idque scriptorum ad certiore[m] circa ea constantiorémque pugnam, tum ut in posterum Catalogus ille memoriæ succurrat, & cum opus erit, possit ante oculos poni, ut in eo, quasi legamus, quid nobis desit. Denique ut cum iterum diei examen fiet, facilius constet de profectu. Nec tamen eæ imperfectiones parvæ censendæ sunt, quæ licet in se & natura sua parvi momenti sint, tamen in nobis valde malos affectus habent. Quare nunquam expendendæ sunt in se & in abstracto, sed quatenus in nobis existunt, & tales talésue affectus solent producere: nam hinc de earum gravitate iudicari debet & constare, num notandæ sint. Nam verbi gratia etsi sit parvi momenti studium aliis placendi, vel vanæ existimationis colligendæ, sitamen quis efficiatur invidus, curiosus, mordax, contentiosus, facilè spiritualia contemnat, ut vacet studiis, &c. certè ea imperfectio in eo non erit parva, quæ in alio si sit moderata pene nullius erit momenti. Idem est de negligentia in spiritualibus rebus & exercitiis humilitatis & mortificationis, &c. si inde sequatur animi dissolutio, &c. Interdum notari possunt quædam minutiora, imò etiam externi defectus, quando scilicet notabilem indecentiam & sæpe molestam continent, ut potest esse in aliquo gestu, vel oris compositione aut verbis; sed illa requirunt breuem aliquam ad tempus curam, qua vel superentur, vel ad aliquam mediocritatem redigantur, &c.

Ad mediocritatem: nam in rebus externis, vel etiam internis minimi momenti, non est laborandum

borandum donec plus perficiantur ; sed cum est aliqua in iis laudabilis moderatio , oportet altius assurgere ad alia, non quod ista relinquantur, sed quod alio modo per alia perficiantur. Quemadmodum in scientiis contingit , vt qui perpetuò in inferiori scientia hæreret , non esset in ea tam perfectus quàm is qui ad sublimiorem scientiam cum inferiore coniunctam tenderet , & inferioris recognitioni se traderet.

Possunt verò esse varij imperfectionum fontes. Primus est defectus luminis spiritualis necessarij ad eam perfectionem quæ nobis proposita est : nam inde nascitur cæcitas spiritualis, vnde & magni errores & magni lapsus voluntatis : sicut ad naturales actiones rectè disponendas oculum naturalis luminis dedit Deus , ita ad supernaturales actiones largitus est oculum fidei , quo qui non vtitur , fieri non potest vt bene Christianè viuat ; Illi autem qui ad maiorem perfectionem vocati sunt, egent sine dubio clariore quodam lumine , & fidei vsu longè perfectiore : Quare solet Deus iis infundere lumen sapientiæ & præcipuè prudentiæ supernaturalis , qua actiones omnes suas in finem illum referant , ac proinde perfectioni finis illius proportionatas efficiant. Ad hanc prudentiam spectant practica lumina non generalia tantùm , sed particularia præcipuè & singulis accommodata , quæ solet Deus infundere , siue quando nos seriò ad finem nostrum attingendum in virtutum omnium studio exercemus , siue cum meditamur , siue cum aduersis rebus, aut prosperis vtimur , aut cum legimus , audimúsque spiritualia : nam Deus eiusmodi semper lumina infundit in animam, còque abundantius , quò

& perfectio maior est , & eam magis seriò & diligenter prosequimur. Dici non potest quanto-
pere prosit ad salutem & perfectionem huiusmo-
di luminis abundantia, adeò vt tota inde pene de-
pendeat. Quare necesse est eam valde impediri ,
& graues nasci imperfectiones quando ea ab-
sunt , eoque grauiiores , quò magis iis priuamur ,
vt videmus contingere hæreticis , qui oculo fidei
carent , malis Catholicis , qui dictamina diuinæ
prudentiæ respuunt , & nonnullis Religiosis , qui
licet abundant mediis spiritualibus , & occasio-
nibus magnis , tamen vel negligenti earum vsu
ea lumina non habent , vel si habent aliquando,
ea quasi à se repudiant , & secum ipsi dissimulant,
vt liberiùs in sua laxitate perseuerent. Imo verò
nonnunquam sæcularia planè , & mundana dicta-
mina perfectioni repugnantia admittunt , & iis
vtuntur in vitæ & suarum actionum directione.
Talia sunt.

Primò esse nonnunquam tempori cedendum &
dissimulandum.

Secundò. Non esse homines capaces tantæ per-
fectionis modò, sed esse remittendum de pristina
seueritate, & de conscientiæ siue disciplinæ & in-
stituti rigore, maiores non ita scrupulosos fuisse ,
&c.

Tertiò. Eas tantum pœnitentias , orationes ,
& opera esse approbanda quæ imponit institu-
tum; eos qui præterea aliquid addunt, esse singula-
res.

Quartò. Habendam esse rationem sui ho-
noris ; etiam si id non exigat maius Dei obse-
quium.

Quintò. Existimare sibi aliquid perire si re
huic

huic vel illi submittas, sub illo humilies, ab eo quid patiaris, peius illo habearis in vestitu, cubiculo, &c. is præ te honoretur, &c. idque sine alio intuitu quam maioris gloriæ Dei.

Sexto. Conandum ut omnibus placeas, nemini displiceas, unde fit ut in iocos & exteriora te effundas, parum de internis sollicitus.

Septimo. Officium erga proximum adeò exactè peragendum ut inde honoreris; unde quæ propriæ sunt perfectionis negligas.

Octauo. Valetudinis eam esse rationem habendam, ut corpus indulgentius quam par sit tractetur.

Nono. Quæ corporis animæque relaxationi concessa sunt, ea ex rigore non esse exigenda, & alia id genus.

Secundus fons. Est naturalis voluntatis pro-
pensio ad bonum proprium. Est enim appetitus
vniuersalis hominis, qui cum constet corpore &
anima, eget bono aliquo tam pro corpore quam
pro anima, & à Deo voluntatem accepit, qua v-
trumque & appetat & prosequatur. Verùm vo-
luntas ipsa non apprehendit bonum illud quod
desiderat, sed est alia potentia; verbi gratia, gu-
stus apprehendit cibum, quem appetit voluntas:
Et quia bona spiritualia animæ non apprehen-
duntur perfectè, quia non potest intellectus Deum
& diuina intelligere nisi per phantasmata, nec ita
illa voluntati ut præsentia statuere, ideo vo-
luntas ad ea tardius, segniusque fertur, tanquam
ad ea quæ aliquando sunt aliena. & parum ne-
cessaria ad præsentem statum, & quasi remota
à se & altiora, multisque difficultatibus circum-
septa. Et verò ad inferiora bona fertur longè ve-
hementius

hementius, quia earum plena possessio fructuque ex aliis potentiis inferioribus quæ perfectè ea apprehendunt, in ipsam voluntatem redundat, & eam mirificè afficit, & quò magis afficit, etiam deinceps maiori pondere voluntas in eadem trahitur: vnde variæ inclinationes hominum ad varia bona inferiora, quas cum ratio Dei gratia non coercet intra terminos, generantur peccata. Sic quidam in bonum propriæ excellentiæ magis propendent. Alij in cibum & potum & alias corporis delectationes. Alij in auaritiã, &c. Hinc enim capitalia oriuntur vitia.

Tertius fons est in appetitu inferiori, etenim valde auget eam propensionem voluntatis in bona naturæ commoda. Cum enim huiusmodi bona sint vt plurimum delectabilia mediante delectatione, eorum commoditatem & conuenientiam voluntati magis commendat, ad quod habet passionem vndecim quas in illam immittit, licet enim à Deo datae sint, vt non tantum ad bonum vitæ necessarium acquirendum, malumque propulsandum nos iuuent, sed etiam ad bonum virtutis nos promoueant, tamen quia ad externa & inferiora hæc bona quæ percipiunt, sunt quodammodo determinatæ, sæpe licet voluntas videatur aliud velle, tamen eam secum rapiunt reclamante nequicquam ratione.

Quartus consistit in malis inclinationibus, quas quisque habet à natura, complexione, & corporis habitudine: & si enim vndecim passionem indifferenter hominem exerceant, non eadem tamen omnes ratione. Nam naturalis complexio generalem illam corruptionem determinat magis, & ad affectus magis particulares singulos

gulos facit propendere : hinc sanguinei in vana & ludum sunt propensiores , sibi aliisque indulgentiores , parùm serij & constantes. Biliosi vt plurimum sunt superbi , ambitiosi , impatientes alieni imperij. Phlegmatici somnolenti , tardi , otiosi. Melancholici tristes , obstinati , tenaces proprii iudicii, suspicaces , timidi ; &c. Quia varia tamen est harum complexionum permixtio , & rarò aliquis inuenitur in quò adeo notabilis humor aliquis dominetur, hinc facillè potest notari quæ sint cuiusque inclinationes à complexionem; licet facillè quisque non possit de se iudicium ferre.

Quintus oritur ex malis habitibus in sæculo, & postea in Religione acquisitis , qui additi ad naturalem complexionem , & totius naturæ corruptionem magno impetu trahunt ad vitia , imò aliquando bonam complexionem euertunt ; est autem cuiusque reflectere oculos in vitam pristinam.

Sextus pendet ex occasionibus externis , ratione loci, officij, negotiorum, conuersationis , per quas obiecta bonorum creatorum ab externis sensibus hauriuntur , & per eos in animam penetrant , & ibi suà præsentia vehementer mouent appetitum & passiones , eoque vehementius quò ea bona sunt maiora , & per huiusmodi occasiones viuacibus sensibus externis , & per eos imaginationi, appetitui , & voluntati repræsentantur.

Septimus consistit in tentationibus à Dæmone illatis, Deo id permittente siue ad suam gloriam dum eiusmodi tentationibus occasionem habet ostendendi diuitias suæ bonitatis, misericordiae,

cordiæ, sapientiæ, &c. siue ad nostram vtilitatem, & virtutis exercitium, sollicitudinem acuendam, augendum meritum & maiorem coronam. Nihil potest Dæmon in intellectum & voluntatem, sed tantum permittitur ei exterius obiectum per imaginationem repræsentare. Quod facit vt vehementer suadeat & appetitum inferiorem commoueat, vt magnam vim voluntati faciat, ad quem finem vtitur occasionibus externis, & internâ nostrâ dispositione, quam idcirco diligenter explorat. Et hinc clarum est hos omnes fontes & causas sæpe pertrahere ad peccata & imperfectiones, alias tamen aliis vehementius, id quod sedulò discernendum.

Vt autem possit melius discernere, imprimis necesse est feruenter petat lumen cœlitus: nam facile fit, vt hi fontes minùs nobis displiceant, quia cum penitus insideant animæ nostræ, & sint veluti naturales, facillimè sese regunt, & nobis placent, excusanturque à nobis vel comitatis, charitatisue, aut humilitatis, vel zeli, alteriusque virtutis prætextu. Quod præcipuè locum habet in Religiosis, etiam iis qui diu fuerunt in Religione; in quibus causæ hæ solent esse valde subtiles, & sese multum inuoluere, & perniciosè latere etiam sub prætextu contrariæ virtutis: Nam inde fit vt plerique, quia experiuntur in se aliqua humilitatis desideria & complacentias, non facilè possint iudicare se esse superbos, cum tamen sæpe superbiâ abundant. Deinde proderit percurrere seridè & coram Deo tempus antea actum, occupationes, nostrósque defectus quasi ordinarios. Etsi enim sit difficile ex vno vel altero actu in breui examine discernere

nere fontem, tamen quando simul multi temporis actiones discutimus ex affectionibus ordinariis, & frequentibus, facile est inuestigare totius mali causam.

Nonnunquam tamen permittit Deus lapsum vnum grauiorem, vt ex eo possimus detegere pestilentem aliquam radicem, quã vel non agnoscebamus, vel non tanti faciebamus, sic subinde ex superbia & affectu placendi hominibus, quem non malum putabamus, vel parui momenti, permittit Deus nonnunquam grauem murmurationem, inuidiam, detractiõnem, &c. Et ex negligentia in spiritualibus, graues & periculosas tentationes, & nonnullos lapsus consensûsque. Proderit etiam circumstantias expendere cum quibus peccatum ipsum sit, exempli causa, si sim obnoxius murmurationi de superioribus, possum considerare an de re quauis obmurmurem, an de aliqua tantum, an cum quouis sim pronus ad hoc modo agendum, an tantum cum aliquibus; si tantum cum aliquibus, signum est quod non ab interna inclinatione, sed extrinseca occasione & impulsu oriatur; si cum quouis cui confidam, tum signum est quod ab intrinseco proveniat: si de re aliqua tantum, vel illud est factum particulare, & tum ratio murmurationis solet esse impatientia, vel aliqua immortificatio circa id obiectum, vel est in vno rei genere; verbi gratia in confessionibus audiendis, in officio factoris, &c. & tantum obmurmurandi ratio est iudicium proprium, & quod in ea re peritus haberi velim vel excellere, si denique in omnibus obmurmuro, hoc fit quia proprio iudicio, & superbia abundo.

Causâ mali repertâ, non est difficile remedium inuenire.

Remedia mali quædam sunt vt communia seu generalia, vt sunt quæ omni peccato aut imperfectioni aut saltem multis obsistunt, vt est cognitio nouissimorum, præsentia Dei, deformitatis peccati &c. Quibus egregiè munire mentem par est.

Particularia sunt quæ magis particulariter obsistunt alicui vitio. Ea iterum sunt duplicia, nam quædam sunt in consideratione posita, alia aliquid præterea addunt: Eorum quæ in consideratione posita sunt, quædam sunt eiusmodi vt vehementer hominem statim concutiant, ardentem ad perfectionem excitent, & ab omni imperfectione reddant alienissimum, & hæc perferenda sunt, quando vrget præsens mali occasio, nam vehementi sua concitatione faciliùs voluntatem abducunt ab imminente periculo.

Quandoque autem considerationes non pariunt adeò vehementes voluntatis motus, sed intellectum ita clarè & euidenter conuincunt vt solida & infirma iudicij proposita eliciat de eo quod sit factum opus, & euertant id omne quod in vitio contrario vitiosum apparere posset: atque hæc præferendæ sunt, quando nihil est quod vrgeat, nam huiusmodi considerationes, cum in euidenti ratione fundentur, vires capiunt ipso tempore, & paulatim magnos motus concitant, pariuntque remorsus in conscientia utilissimos, dum referunt veritatem apertè cognitam; Quæ verò aliquid addunt considerationi, habent multum momenti & præcipuè valent ad ipsos fontes coercendos. Talia sunt actus, interni & externi

contrarij ipsis peccatis, & imperfectionibus.

Atque notandum est vt remedia apta eligas, imprimis necesse esse coram Deo totam rem discutere, & eius auxilio impensius implorato, illa eligere ante alia omnia quæ tibi suggesta fuerint. Quam ad rem tamen iuuari debes alterius viri spiritualis consilio.

Deinde sciendum est pro ratione imperfectionis quam quisque intendit, solere etiam præcedere electionem mediorum. Homines sæculares & etiam ij Religiosi, quibus satis est cauere mortalia, solent ordinarie ea solum assumere quibus sibi consulere putant. At verò qui seriò student perfectioni, ea remedia quærunt & amplectuntur studiosè quibus ipsos fontes exsiccent, & non solum vitent peccata grauiora. Quare licet peccata expugnare omni ratione conentur, tamen non tam assumunt remedia quæ illis sunt contraria directè, quàm quæ directè causæ ipsi repugnent eamque tollant; nam ea sunt maximè efficacia, verbi gratia, etiamsi maximè repugnet murmuratiõni contrà Superiorem seipsum ita superare, vt omnes eius actiones laudentur, tamen si oritur illa murmuratio ex eo, quod me in ea arte vel opere reprehendat, in quo peritus videri volo, præstat vt me in eo exerceam, vt non affectem peritus videri, sed imperitus potius: Quare cum animaduertimus aliquam inclinationem in nobis esse causam multorum peccatorum & imperfectionum, vtiliter contrà illam poterit suscipi pugna.

Sunt etiam è remediis ea potius approbanda quæ magis vniuscuiusque naturæ conueniunt, cauendùmque ne ea optima putemus, quæ in aliquo

quo auctore, vel à concionatore aliquo acceperimus, attestante ea sibi fuisse aliisque perutilia, vt enim corpora cibis, sic animi non æqualiter remediis afficiuntur.

Denique non nimis sunt multiplicanda, & deinde inuigilandum est, vt quod bene repertum est frequenti repetitione & altiùs penetret, & magis, familiare reddatur, ita vt vtrò non cogitanti occurrat, & vtrò se ingerat. Ad quod iuuabit certum aliquod tempus illi repetitioni assignare, & certum illius modum sibi præscribere.

*Inclinationes nonnullæ quæ multarum
imperfectorum fontes esse
solent.*

ORdinaria in oratione spiritualibusque exercitiis negligentia, vel distractio aut ariditas, languor & defectus spiritus, vniuersalis quædam debilitas in virtutum perfectionisque studio, defectus obedientiæ & subiectionis voluntatis solitæ voluntati Superioris repugnare, defectus internæ recollectionis, cum secum habitare nescit, sed ad exteriora se totum effundit, neque ea solet ab interno principio moderari.

Amor propriæ excellentiæ, honoris, gloriæ.

Iracundia, impatientia.

Auerfio à fratribus & defectus charitatis quocumque prætextu, vt antipathiæ, &c.

Inclinatio nimia ad corporis commoda, recreationes, & ea quæ ad sensualitatem spectant.

Defectus sinceritatis & simplicitatis agendo,

præcipuè cū superioribus, quo fit vt illis clarè nō aperiamus nos, sed subterfugiamus eorum oculos, & velimus omnia nostra illis esse occulta.

Defectus simplicitatis in nostra conuersatione.

Neglectus quidam conscientiæ parū timoratae, & leuiora parui facientis peccata.

Dissolutio & laxitas in Religiosæ vitæ & disciplinæ obseruatione.

Otiositas & temporis iactura; præcipuè cum fit ex tædio laboris circa illud officium quod nobis impositum est, cum nobis persuademus non esse opus tantâ curâ laboris sollicitudinēque, & ita minùs perfectè obimus ad quietem aspirantes.

Auersio animi à superiore.

Contentiones sine aliis & pertinacia, propriique iudicij durities.

Detractio, murmuratio, discordiarum seminatio, pacis perturbatio quocumque modo fiat.

Ad secundum Exercitium de peccatis.

FInis huius secundi Exercitij & primi duplex est. Primus est detegere & in apertum eruere nostras imperfectiones habituales præcipuè quæ solent esse occultiores. Secundus est eas æstimare vt par est & detestari, seriòque proponere, inuestigare, & vti mediis nostris ad eas extirpandas: priori seruit primum punctum in quo ex actualibus veluti ex riulis ad ipsos habitus & fontes inueniendos perueniemus. Posteriori verò

rò tum primum punctum seruit, tum reliqua. Sunt autem tria motiua maximè ad illum finem efficacia. Primum est ipsa multiplicitas & varietas imperfectionum nostris obiecta oculis: quis enim ad tot veluti monstra non horreat? hæc porrò tanta varietas prouenit ex creaturarum variarum, quæ ad Dei gloriam referri debebant, abusu. Secundum est ipsa natura imperfectionis cuiusque de qua agit in secundo puncto. Tertium est extrinseca Dei prohibitio quæ easdem imperfectiones vt contrarias sibi suisque omnibus attributis atque gloriæ suæ prohibuit: de qua vt colligitur ex fine secundi puncti agit in tertio puncto & sequentibus: vnde hoc exercitium pulcherrimum est & efficacissimum, nam continet omnia prorsus motiua quæ excogitari possunt ad peccata detestanda.

Oratio preparatoria & duo praeludia vt in primo Exercitio.

PRimum punctum erit penitus intrare in animam meam, & attentè rimari internam eius faciem, considerando Primò quæ sint ordinariæ meæ cogitationes, verba, opera, omissiones. Secundò quomodo ab ipsa hora surgendi ad diei finem meas actiones omnes, & Religiosæ vitæ cursum deducam. Tertiò in particulari expendendo quomodo me geram in iis quæ Deum attingunt, quàm circa orationem & communionis cum Deo studium sæpe negligens, quàm parcè, quàm irreuerenter, quàm infructuosè, quantis cum distractionibus, tædio, stupore, me gess-

ferim coram Deo , & quoties etiam orationes solitas omiserim , quàm parum seriò & cordatè & sincerè cum Deo ambulauerim , quàm parum ex animo cumeo egerim , quàm fucata & inani vitæ spiritualis imagine contentus fuerim. Quartò, Circa Religionem; expendendum , quæ fuerit votorum & Regularum observatio , quis instituti amor , & quam cordialis erga illum affectus , quale virtutum Religiosarum, charitatis, humilitatis, patientiæ & modestiæ exercitium. An interno me affectu perfectioni instituti conformarim & solidis virtutibus studuerim ? an tantùm specie quadam virtutum vt hominibus satisfacerem , fuerim contentus? Quintò cum nostris & externis quomodo fuerim conuersatus , & mihi impositum officium expleuerim , an cum ea ædificatione & fructu qui debebat existere , externa compositione vsu linguæ & sensuum. Sextò circa meipsum quomodo corpus tractauerim in cibo , potu, somno, mortificationibus, recreatione , pro Christo laboribus.

In his attendendum; Primò, an aliquod sit grauius peccatum vt de eo magis & expressiùs doleam ; deinde num in aliquibus soleam sæpe & planè voluntariè , atque adeò ex contemptu delinquere.

Ex his bene discussis primò colligam , quàm rara & perfunctoria in me fuerit memoria & intentio finis mei, quàm remissus iam abhinc vno anno præcipuè fuerim circa perfectionis desiderium & mediorum vsum. Secundò quinam sint præcipuè imperfectionum fontes , & radices quæ me impedierunt : an superbia , an ira , an gula, an corporis amor , inuidia , &c. Vbi tres vel quatuor

tuor præcipue sunt notandæ.

Finis huius discussionis est, vt abiecta animi dissimulatione & fuco, quo sæpe nobis imponimus nos tales verè coram Deo agnoscamus quales sumus, verbi gratia, superbos, impatiētes, propriæ voluntati & iudicio, commodis addictos, &c. Vt inde confundamur & ad emendationem pro-
uoceamur.

Secundum punctum. Perpendam quanta sit sceditas horum peccatorum & imperfectionum ex natura sua, singulas quas in me notaui ordine expendendo. Vbi primum cogitabo naturam peccati & imperfectionis talis in eo sitam, quod prius rectitudine & perfectione quæ in eo subiecto deberet in esse.

Secundò. Considerando hominem *Societatis* tot acceptis à Deo beneficiis & donis ornatum, tot adiuuentis instructum, ad tantam perfectionem vocatum, esse subiectum capax eximie cuiusdam perfectionis quæ in eo inesse deberet ratione status, sicut fuit in *B. Ignatio*, & multis aliis.

Tertiò. Peccata & imperfectiones præcipuas prius notatas componam cum oppositis perfectionibus, verbi gratia, superbiam meam cum humilitate, quæ in homine *Societatis* esse deberet, similis Christi humilitati, & confundar coram Deo quod id profitear exterius à quo longissime absum, & ita de aliis.

Tertium punctum erit perpendere harum mearum imperfectionum sceditatem ex extrinseca Dei prohibitione. Considerabo igitur has imperfectiones Deo displicere & prohibitas à supremo meo principe & Creatore, & mihi prohibitas vt gloriæ eius contrarias, & omnibus, eius
perfe

perfectiōibus repugnantes , bonitati , iustitiæ , potentiæ , sapientiæ . Itaque cum ego creatura sim adeo imperfecta & veluti vlcus foedum , eius gloriæ me oppono , & lædo omnes eius perfectiōes easdēque contra me prouoco , & quā me pœnā hætenus dignum puto .

Quartum punctum . Infinita tamen eius misericordia hætenus me expectauit , & tulit non inutilem modò , sed indignissimum seruum & vilissimam creaturam , cui tamen putas bono ? ergo in exclamationem prorumpam & affectu vehementi admirans , mecum inquiram huius tantæ misericordiæ causas ex parte meâ , ex parte vitæ pristinæ , ex parte iustitiæ Dei , &c

Quintum punctum . Videre etiam quod pro iusta reiectione ab amicitia , domo , obsequiòque suo : etiam parat me recipere in seruum , imo iterū in filium charissimum , venit obuiam , protendit brachia , offert amplexus . O quales amplexus ! thesauros suæ bonitatis , sapientiæ , potentiæ aperit vt me ornet magis & instruat , & instrumentū gloriæ suæ amplius efficiat , fontibus peccatorum meorum exsiccatis , euulsis radicibus : confestimabo igitur , & procurram , dicamque , Pater peccaui in cœlum & coram te iam non sum dignus vocari filius tuus , fac me sicut vnum ex mercenariis tuis . O Deus meus etsi filius tuus sim , & amore filiali verè velim in æternum tibi seruire , tamen ob tot meas imperfectiōes vt filius à te agnoscar , & filius tracter , planè sum indignus , ergo plagis potius me contere in hac vita durè , parcè , tenuitèrque tracta , vilissimis officiis me occupa vile mancipium despiciatissimum , tantùm fac vt in tua domo tibi perfectè seruiam .

Tertium Exercitium est Repetitio.

Repetitio utriusque meditationis ita fit ut ex utraque quodammodo una fiat, & factis præludiis omnia puncta primæ meditationis, & deinde omnia secundæ singula suo loco nullo omisso percurrantur, facta tamen ad singula reflectione, num in eo puncto consolationem aut desolationem senserimus. Notandum tamen in repetitionibus vitandos esse longos discursus, sed percurrenda sunt ea quæ prius meditati sumus, & commorandum sola voluntate, confirmando affectus quos ante habuimus. Et puncta in quibus ariditatem experti sumus, proponendo breuiter nobis, ut tentemus nū quis sensus quod sæpè contingit, suauiter queat elici. Porro quia in repetitionibus est indulgendum magis affectibus, ideo triplex hic colloquium præscribitur. Est autem triplex finis repetitionis qui in tribus colloquiis ad B. Virginem, Christum & Patrē petitur. Primò ut intimè pernoscamus, quomodo à fine nostro & recto usu mediæ aberrauimus. Secundò. Errore illo cognito, nos recto ordini nostrasque actiones restituamus. Tertiò. Omnem affectum internum mundi à nobis haustū, omnes malas propensiones & radices eiiciamus & euellamus, quæ petenda sunt eodē ordine & modo quo suggeret affectus,

Pater Ave.

Exercitium de morte.

MOrtis consideratio potissimum est medium ad affectiones nostras inordinatas in ordinem rectum reducendas, & voluntatem nostram abstrahendam à nobis & omnibus rebus creatis, ne illis fruatur, adhæreátque vt fini, sed potius vtatur vt mediis. Ad eum finem confert plurimum consideratio iudicij particularis, itaque non sine fructu hæc exercitia proponi hic possunt. Quamquam aliquando pro ratione circumstantium omitti possint. Quod quando fiet, saltem non est omitenda præparatio ad mortem & iudicium, quæ est repetitio vtriusque.

Primum præludium est, vt me ipsum in lectulo decumbentem à medicis derelictum sine vlla spe vitæ, quàm possum vehementissima apprehensione concipiam.

Secundum prælud. vt petam à Deo gratiam sentiendi nunc mortis incommoda, vt vitam ac mores in melius emendem, ea ratione qua tunc fecisse maxime vellem.

Primum punctum. Considerare mortem esse perpetuam priuationem huius vitæ, parentum, cognatorum, amicorumque, rerumque omnium tum delectabilium, tum vtilium quas maximè diligis sine spe vlla, eadem in hac vita reuifendi. Homo, inquit Iob, cum mortuus fuerit nudatus & consumptus vbi quæso est.

Secundum punctum. Perpendere certitudinem mortis, quæ primo colligitur ex ipsa hominum

num natura, ex contrariarum qualitatum, & humorum conflictu interiore, ex cœli exteriori intemperie. Secundò ex Dei præceptis: statutum est, ait Apostolus, omnibus hominibus semel mori. Tertiò. Ex pœna peccati; per vnum hominem, ait idem Apostolus, peccatum in hunc mundum intrauit, & per peccatum mors. Quartò experientia omnium qui præcesserunt ab initio mundi usque ad hoc tempus, quamuis insignes in sanctitate, doctrina, diuitiis fuerint, & Ecclesiæ Dei viderentur valde vtilis.

Tertium punctum. Expendere certitudinem mortis ratione ætatis, horæ, loci, generis mortis, status, siue gratiæ, siue damnationis, in quo erit homo. Quot putas hac ipsa hora morientes pœnis æternis mulcandos, iam si tibi moriendum esset, quid de te futurum crederes? Illa Christi Domini dicta perpende. Vigilate quia nescitis quâ horâ Dominus vester venturus sit. Estote parati quia nescitis quâ horâ filius hominis venturus est.

Quartum punctum. Considerare quæ sunt ventura circa corpus, tum ante tum post mortem. Primo enim superueniet dolor incomparabilis à diuturnitate & grauitate morbi, & ab animæ discessu mox futuro. Quare vix poterit suscipi vlla efficax cognitio de salute, quia illuc rapitur naturaliter intentio mentis vbi est vis doloris, ait S. Augustinus. Insensibilitas & defectus in omnibus sensibus. Tertio horror fœdissimi sepulchri mentis oculis obiecti, in quo à charioribus corpus expulsum ponendum est, vt sit esca vermium, ne sua putredine & corruptione mundo noceat. Quartò, Quod S. Iob nouerat cum aiebat

bat; putredini dixi pater meus, & mater mea, & soror mea vermibus.

Quintum punctum. Considerare quæ circa animam sint futura, longè enim grauissimus erit animæ languor. Primò ob instantis iudicij rigorem: quia nemo scitan odio vel amore dignus sit. Secundò ob certitudinem veræ contritionis. Tertiò ob multitudinem peccatorum occurrentium, nec digna pœnitentia deletorum. Quartò ob occulta peccata quæ tunc fortasse multa & grauiâ occurrent. Quintò ob grauitatem eorû quæ ante leuia putabantur. Sextò ob terribilium dæmonum grauissimas tentationes, contrâ fidem, spem, charitatem, pœnitentiam. Septimò, ob anxietatem quia nescit an adhuc sit in hac vita vel in alia, & propterea an adhuc sit pœnitendi locus.

Sextum punctum. Quò me vertam nesciam: regredi vetabit morbus, progredi horribile erit, consiliteri non finet Deus, suprà ludex iratus cernetur, infrà sepulchrum fœtidum corpori; infernus verò animæ paratus, intrâ conscientia condemnabit, circum dæmones instabunt, proximi item & amici vix adtumulum comitabuntur, omnia omninò erunt relinquenda, & tanquam vmbra præteriisse clarè perspicientur, intimè cogitabo quod me tunc fecisse vellem quia non concedetur vlterius tempus pœnitendi. Quia vocauit & renuistis, ego quoque in interitu vestro ridebo, erit enim tunc nox quando nemo poterit operari.

Colloquium ad Christum in cruce ipsa pro me mortuum, magno affectu petendo vt per suæ mortis merita, hæc mihi penitus animum penetrent,

trent, & ad seriam mutationem propellant. Idque etiam per B. Virginem & sancta patronorum suffragia postulabo.

Pater Aue.

Exercitium de Iudicio priuato.

Oratio preparatoria more solito.

Primum præludium. Rem ipsam mihi repræsentabo, quo nimirum anima mea statim ubi vinculis corporis soluta erit, coram iudice suo Christo Domino comparebit, vltimam ab eo sententiam auditura.

Secundum præludium. Deum rogabo vt mihi lumen cœleste & gratiam conferat, vt possim seriò apprehendere quæ tunc mihi euenient, & aggredi quæ tunc me fecisse optabo.

Primum punctum. Erit in memoriam reuocare quæ de animæ à corpore separatæ statu fides & sancti patres docent. Primo quidem accipit nouum quendam & inusitatum modum cognoscendi sine corpore, per quem tota eius vita, & minutim singula & verba & cogitata ei repræsentantur, velut in tabella, penetrat quid sint res creatæ omnes, denique statum suum præsentem, & nouam rerum suarum faciem agnoscit, & se coram suo iudice quem præsentem videt nudam, solitariam, desertam ab omnibus cum solis bonis & malis operibus apprehendit.

Secundo

Secundò hinc oritur longè aliud iudicium de suis rebus & omnibus creatis & externis bonis, quàm cum esset in corpore. Tertiò voluntas eius mutatur, nam evanescit omnis boni creati amor, & eius loco solum remanet pondus illud & inclinatio quam habet vehementissimam, & incitatissimam in Deum vt finem suum, quæ sublato corporis impedimento, tanta vi illam rapit vt iam vix retardari & retineri possit quin vnatur ei sine ingenti violentia, & proinde molestia & afflictione grauissima quam de facto patitur, quando ob mortalis vitæ imperfectiones ab illa vnione impeditur. Ex hoc principio conabor deducere conclusiones practicas, quibus voluntatem meam impellam vt suam cæcitatem defleat, quod quasi carneos tantùm oculos habuerit, ea tantùm hætenùs cogitarit quæ ad præsentis vitæ statum pertinent, & tot sibi per tam crebras imperfectiones quasi ferrea vincula iniiciat, quibus à Dei vnione tunc impediatur, & per amorem creaturarum illud pondus in summum bonum retardet.

Secundum punctum. Erit memoria repetere, quæ de ipso iudicio fides docet, nimirum statim post mortem sistendam animam coram Christo Deo & homine qui nunc quidem amabilissimus, & sui sanguinis pretio largissimè donato benignissimus est Redemptor, at verò tunc iudex iustissimus exactam rationem deponcet ab ipso primò momento vsus rationis, ad vltimum vitæ instans de minimis cogitationibus & verbis etiam otiosis, operibus, & omissionibus, de finis intentione ad quem creati sumus, & de mediis tam supernaturalium, quam naturalium quæ nobis concessit,

concessit, vſu neglecto vel abuſu. Ex hoc principio viuâ fide apprehenſo, reflexis in ſtatum meum internum oculis, ratiocinabor quanta mihi eſſet ſecuritas, ſi hæc diſcuſſio iam fieret à Chriſto. Nâ quomodo dies, menſes, annos tranſegi, quàm incuriùs mei ſinis, ſalutis nempè & perfectionis conſequendæ, quàm negligens in vſu mediorum ſupernaturalium, quàm effuſus in abuſum mei & creaturarum per tot & inutiles & malas cogitationes, verba & opera quæ in ſtatera diuini iudicij reprobabuntur, quàm multa peccata puto me per pœnitentiam & Sacramenta deleuiſſe, quæ fortè manent adhuc ſaltem quoad torum pœnæ debitum. Ex quo diſcurſu excitandi affectus ſancti timoris Dei, confuſionis, propoſiti proſpiciendi vitæ meæ & præteritæ & futuræ, vt ſecurior ibi poſſim comparere.

Tertium punctum. Erit in memoriam item reuocare quam ſententiam prolaturus ſit iudex: ſi enim tam ſeuera erit diſcuſſio, certum eſt quod ſententia iuſtiſſima erit, definitiua, immutabilis, & incredibili quadam efficacia ab ipſo iudice pronunciata, & intimata animæ, quam proinde certum eſt ingenti horrore concutiendam & grauiſſimis ſuprà quam credi poteſt anguſtiis comprimendam, quod enim maius pondus eſſe illi poteſt quàm audire, & colluſtrante diuino lumine clarè intelligere, quam de illa Deus habeat vltimam æſtimationem, & iudicium præſertim cum exigentibus peccatis & negligentis videat, ſe minùs eſſe illi gratam & acceptam & idèò arceri & retardari ab vnione ſtrictiori cum illo in quem vt in centrum ſuum tam vehementer fertur. Ex hoc enim principio ratiocinabor

mihi nunc dandam esse operam vt me iudicem , & sententiam crebro contrà me feram , præueniàmque & leuiorem reddam illam quæ tunc pronuntianda est , tum vt per vitæ perfectionem me Deo vniam , vt me seueritas illius sententiæ eò minùs percellat,quò me minùs ab illo separabit.

Quartum punctum. Erit in memoriam itidem reuocare, ita latæ sententiæ executionem citam, rigorosam, exactam. Nam misera anima suis inimicis tradita, & subiecta eorum potestati in infernum trahetur, vel ducetur in purgatorium, vbi pòderanda pœnæ damni grauitas: intolerabile enim erit vel ad vnum momentum Deo priuari, quanto magis ad multos annos, aut si ita res ferat in æternum. Pœnā autem sensus quis affe qui satis potest, vbi tunc bona omnia mundi, & cōmoda vitæ quæ ita mortales consequuntur, vbi mala & commoda quæ iam refugiunt. Ex hoc principio deducam, vt priùs conclusiones practicas quibus voluntatē stimulabo ad exequendum contrà me rigorem iustitiæ, ob peccata pristina & renūciandū omnibus vitæ pompis & vitæ commodis , aduersa quæque & dura sustinenda & igne tum charitatis tum mortificationis purgandam exactè animam meam ab omnibus inordinatis affectionibus, vt nihil in ea purgandū remaneat , nihil quod à Deo me separet vel ad momentum.

Colloquium pro affectu, vel vt suprà in Exercitio de morte.

Pater Aue.

Præparatio ad Mortem & Iudicium vice repetitionis.

Primum præludium. Audire Christum Dominum sæpe nos commonentem de hora hac. Matthæus 14. Estote parati quia quâ horâ non putatis filius hominis veniet. Vigilate quia nescitis quâ horâ Dominus vester venturus sit.

Primum præludium. Petere à Domino Deo ut rê tanti momenti, quanta est bonâ ad mortem præparatio, cum sit singulare eius donum, pro sua pietate infinita impertiri dignetur, ne mors nos aut imparatos occupet, aut malè paratos.

Primum punctum. Considerare quod cum præparatio ad mortem & iudicium hoc sit actus excellentissimus prudentiæ Christianæ & supernaturalis, ad eam requiritur præter Dei auxilium hominis conatus quo intima Dei gratiæ luce perfusus apprehendat horam istam mortis, pro ut sibi contingere potest, tunc enim ad eum finem rectè constituit media. Quare prima præparatio est, ut intimè concipiat animo quid sibi velit, *mori*: Mori duo continet quæ exprimit Iob. Homo cum mortuus fuerit nudatus atque consumptus, ubi quæso est? Primum est privatio vitæ huius, id est inferioris mundi & omnium locorum, urbium, regionum, Collegiorum, item omnium hominum, actionum huius vitæ quibus vel peccare vel mereri possumus ac Deo servire, ut

ministeriorum licet vtilium Ecclesiæ Dei etiam in medio cursu, &c. Denique à corpore separatio eiusque consumptio. Secundum est transitus ad alteram vitam eamque æternam fœlicem vel infœlicem, sed quàm incertam! Conabor eam mei mutationem pro certo futuram apprehendere, & petam à Deo ut in eū finē sua me continuò luce perfundat. Nam ex eo principio facilè multas conclusiones practicas eliciam quibus me totâ vitâ ad mortem præparabo.

Secundum punctum. Ex posito principio deducere, conari me omni studio debere, ut anima mea in eo puritatis gradu continuò perseveret, ut in momento quo migrabit, nulla sit labes ob quam à beata vita excludatur in æternum; In eo enim summa rerum est: ecce venio sicut fur; beatus qui vigilat & custodit vestimenta sua, ne nudus ambulet, & videat turpitudinem eius. Apoc. 6. Quare scrutabor conscientiam meam, & si quid sit, non tantum meas rationes ita componam ut securus sim, sed statuam ita vivere, ut quantum licuerit, semper me extra periculum & dubium ponam; possum enim subito mori, vel de sensu mentis deiici, vel usu sensuum privari, aut vi morbi impediri, aut iusto Dei iudicio ob meam ingratitude eo gratiæ auxilio quod in hora mortis ad res meas in tuto collocandas esset necessarium, destitui, si eò usque differam. Quare me omni ope à peccato conseruabo immunem: quod si quam fortè labem contraham, eam statim etiam, ac sincero examine, dolore, & lachrymis nulla in re mihi parcens, & suo etiam tempore confessione accurata perinde ac si ea vltima esset, rogabo Deum ut mihi det gratiam,

ut actiones meas quotidianas & sermones disponam in iudicio, nullamque abire finem quam non deseam.

Tertium punctum. Cogitabo non tantum eluendas esse culpas peccatorum ut in tuto me collochem, sed statim mihi esse faciendos fructus dignos poenitentiae ad satisfaciendum poenis tot & tantorum meorum peccatorum; Nam quam parum hactenus pro illis satisfeci, quantum mihi soluendum restat, & quam mihi facile est quotidianis vitae Religiosae laboribus feruoreque charitatis ignem illum cui ad multos annos forte tradendus sum, vitare.

Quartum punctum. Perpendam quod magnam & securitatem & consolationem sim habiturus in ea hora, si quae mihi tunc relinquenda sunt, maturè dum vivo, reliquero. Itaque concludam mihi toti mundo esse moriendum & mihi ipsi. Quare statuam omnia externa bona & oblectationes hominum, item vanos fauores, amicitias, honores contemnere, iis etiam me priuare, quae alioquin licita & honesta esse possent, imò optabo multas tribulationes ac misérias in hac vita, studebo mortificationi sensuum, & corporis, & propriae imprimis voluntatis & iudicii. Nam non omnes qui mihi dicunt Domine Domine intrabunt in regnum coelorum, sed qui fecerit voluntatem patris mei: quam securus esse animo poterit, qui dicere poterit, quidquid egi, quicquid volui Domine tu iussisti. Ergo Deo soli vivere incipiam, cui in æternum sum victurus.

Quintum punctum. Multum consolationis afferret in eo transitu firma fides, charitas, & hu-

militas. Quare multum proderit in vita diu multumque versatum esse. Primò, in meditatione mysteriorum fidei, cum alta & magnifica eorum æstimatione, pioque voluntatis affectu; Secundò, in iis cogitandis quæ ad spem & fiduciam de Deo concipiendam excitare possunt: qualia sunt Christi Domini vita, passio, merita, Beatæ Virginis patrocinium, &c. Tertiò, in amore & mutua coniunctione & familiaritate cum Deo, & Christi imitatione. Quartò in retundenda fiducia, quàm de nostris bonis operibus solemus concipere, & comprimenda nimia æstimatione nostri, & occulta præsumptione, id quod assequemur per nostri cognitionem. In his si ita seriò versatus fuero in eo transitu mihi opportunè subuenient, è contra difficile mihi erit ea arma eo momento & acquirere & bene tractare, quibus rarò vel vix vnquam antea bene usus fuero.

Sextum punctum. Mihi reuocare in memoriam mortem aliquorum Sanctorum, verbi gratia sancti Ambrosij, Martini, Hilarionis, & aliorum quos fortè vidi morientes, & ex iis omnibus quæ ipsi in ea hora gessere formam aliquam ac veluti exemplar bonæ ac piæ mortis mihi in animo fingam, & statuam meam vitam ex hoc tempore ad eam aptare, Deumque sæpe rogabo ut ad eum modum velit me à vita migrare, & idem petam à Beata Virgine frequenter, præsertim cum recitabo Rosarium ad illa verba, nunc & in hora mortis nostræ, Amen.

Pater Ave.

Exercitium de Iudicio generali.

*Oratio preparatoria est qua petimus
gratiam , &c.*

Primum præludium. Est vallis Iosaphat iuxta montem Oliueti imaginaria constructio.

Secundum præludium. Est petitio gratiæ ad cognoscendam supremi Iudicis iustitiam , vt hinc concipiam dolorem & odium peccatorum cum firmo proposito illa non ampliùs admittendi.

Primum punctum. Iudicium est ineuitabilis sententia à iustissimo iudice Christo Iesu legitime ferenda in malos omnes vt puniantur , & pro bonis vt præmiis afficiantur iuxta singulorum merita.

Secundum punctum. Præcedent iudicium signa, in cœlis , in elementis , & in hominibus arescentibus præ timore & expectatione eorum quæ superuentura erunt , & varia subinde sentientibus quoad mores & doctrinam, Antichristo adueniente, qui omni cura operaturus est, vt, si fieri posset, in errorem inducantur etiam electi , succedet ignis conflagratio inexpectata, terribilis, nemini parcens , efficax , cuncta destruens : omnia enim , vt ait S. Bernardus , igne dissoluenda sunt.

Tertium punctum. Resurgent homines omnes ex omni orbis parte in iussu & voce Archangelii , & in tuba Dei quam S. Hieronymus, siue

manducaret , siue biberet , audire sibi videbatur sonantem horrendum illud , Surgite mortui, venite ad iudicium. Secundò congregabuntur omnes boni malique in valle Iosaphat , Tertiò, separabuntur mali de medio sanctorum , Angelorum ministerio. Quartò , tantus horror ac timor sententiæ ferendæ inuadet iniustos, vt amanturi sint latebras , & dicturi montibus , cadite super nos, & collibus, operite nos ; item montibus & petris , cadite super nos & abscondite nos à facie sedentis super thronum , & ab ira agni.

Quartum punctum. Primò, adueniet Christus Dominus cum potestate magna & maiestate , comitante illum Angelicorum agminum multitudine copiosa. Secundò, parebit signum filii hominis in cœlo. Tertiò , plangent omnes tribus terræ cum videbunt ipsum iudicem iratum , paratūque ad puniendum mala ab ipsis patrata.

Quintum punctum. Primò , examinabuntur minutissimè peccata omnia mortalia , venialia , propria , aliena, manifesta, occulta, cogitationes , operationes, verba etiam otiosa. Secundò, exigetur ratio beneficiorum , munerum obitorum & talentorum , iuxta parabolam Christi seruatoris , ita vt cui plus datum est plus ab eo exigatur. Tertiò , cumulabunt accusationes Angeli , propria conscientia coram omnibus patens , & Dæmones. Præsto enim aderit aduersarius Diabolus, inquit S. Augustinus , & recitabuntur verba professionis nostræ & obiiciet nobis in faciem quicquid fecimus, quâ die peccauimus, & quo loco , & quid boni tunc temporis facere debuimus. Quartò, fiet comparatio eorum qui maiora accepere cum infidelibus & peccatoribus qui
magis

magis profecissent si talia à Deo dona accepissent : iuxta illud Christi. Væ tibi Corozain, væ tibi Betsaida, quia si in Tyro & Sidone factæ essent virtutes quæ factæ sunt in vobis, olim in cilicio & cinere pœnitentiam egissent. Quintò, feretur sententia in reprobos, ite maledicti in ignem æternum, &c. Et pro bonis & electis : Venite Benedicti Patris mei percipite regnum &c.

Colloquium fiet iuxta affectum, terminabiturque totum exercitium oratione Dominica.

Pater Ave.

Exercitium de Inferno.

Primum Præludium. Est loci cuiusdam profundissimi cum sua longitudine & latitudine, sine aëre aut lumine, imaginaria constructio.

Secundum Præludium. Petere à Deo gratiam, qua intimè pœnas inferorum apprehendas, vt supplicij timor saltem te in officio contineat & à peccatis coërceat.

Primum punctum. Vt cognoscere valeas quanto odio seuera Dei iustitia peccatum prosequatur, cogita quibúsnam pœnis illic damnati cruciantur, simulque omnes mentis neruos ad id contemplandum applica, miserorum fœditatem intueri, flammis quibus vndique vestiuntur, circumspice, audi eorum eiulatus, vociferationes atque blasphemias, huius infandi loci graueolentiam olfactu persentisce, eorum fel amarissimum, & rancorem gusta, tange illius inextinguibilis ignis

ignis ardorem, frigoris asperitatem, infinitos denique cruciatus quibus inibi torquentur, recordare verborum diuitis illius Euangelici clamantis, pater Abraham miserere mei, & mitte Lazarum, vt intingat extremum digiti sui in aquam vt refrigeret linguam meam, quia crucior in hac flamma; apprehensâ hac veritate voluntas in has affectiones prorumpat. Primò, puritatem & sanctitatem iustitiæ diuinæ verearis quæ nobilissimis creaturis non parcit, sed eas ita seuerè damnat. Secundo, ineffabilem etiam peccati malitiam, quæ tantopere Deo exosa est, & admireris. Tertiò, Deo gratias age quòd licet sæpe idem supplicium merueris, te tamen ad hunc vsque diem summa pietate seruauerit. Quartò, firmiter proponas te omnium tribulationum genera libenti animo toleraturum, cum plura pro peccatis merueris.

Secundum punctum. Qualitates pœnarum iam dictarum expende, vniuersales sunt totumque corpus cum anima dolorem sustinet. Secundo, innumeræ quoque sunt, ita vt omnem morborum huius vitæ numerum superent sine vlla consolatione. Tertiò, & absque vlla vel minimi subsidii spe in æternum durant. Ex hoc principio quid agendum sit inspicias, simulque has conclusiones elicias. Primò, tuam stultitiam præteritam & peccatoris qui ita se peccato coinquinat admirare, cum tamen in tantum periculum incidat, vtinam saperes & intelligeres, & nouissima prouideres! Secundo, Deo gratias age qui te ad hunc vsque diem ab his pœnis liberauit, & adiutum ad æternam paradisi gloriam patefecit. Tertiò, pporone te non solum mandata exactissimè seruaturum

seruaturum, sed etiam curaturum vt eius consilia serues, licet multa ad id sint perpetienda, quandoquidem harum poenarum æternitas quæ tuis peccatis debita erat, in temporalem religionis tribulationem commutata sit: quid damnatus quæso, ageret, si liber ab inferno tuo loco destineretur.

Tertium punctum. Recordare has poenas in hora mortis animæ in peccato mortali existenti præparatas esse: verum omnes homines qui modo viuunt licet optimè sint dispositi, & sanctissimam vitam degant, incerti tamen sunt quænam hac horâ conscientia futura sit dispositio, & consequenter quod æternis poterunt addici suppliciis. Scimus infælicem Apostoli ruinam, Salomonis, Origenis, aliorumque grauissimorum virorum exitum non nescimus. Quotidie stellæ de cælo aut religione aut Ecclesia decidunt, denique lata est via quæ ducit ad perditionem. Vi huius principij voluntatem ad hos affectus inclina. Primò, timorem concipe ne licet in statu perfectionis innumeris gratiarum donis illustratus consistas, officio desis, profundissimè te demitte, de propriis viribus diffide, & in apertas diuinæ misericordiæ manus te conice. Secundò, propone fore vt optimè diuinæ gratiæ dono utaris, in particulari verò iis quæ & maioris sunt momenti, & sæpiùs negligis. Tertiò, firmiter statue te magna cum perfectione in obsequio Dei victurum, tepiditatem propriam debellando, nimiosque defectus vitando, cum vita tepidè transacta multos ad infernum detrudat, qui tamen perfectionem profitentur: certè si à plerisque damnati

natis quærere licitum esset, quare in grauiâ peccata incidissent, quibus in barathrum detrusi fuissent? responderent quod nimiam in perfectione assequenda tepiditatem, & in minimis defectibus vitandis negligentiam attulissent.

In Colloquio. Renouatis prædictis affectibus actione gratiarum timoréque bonisque propositis à Deo petes gratiam quâ bonis tuis operibus salutem tuam in tuto collocare possis.

Pater Ave.

De Peccatis venialibus.

PRæludium Primû. Pone tibi ob oculos hominem non mortuum quidem, sed multis implicitum vinculis, plurimis ad hæc debilitatum morbis, vulneribusque confossum.

Præludium secundum. Pete lumen à Deo quo statum animæ tuæ videas hoc statu longè deterio-rem.

Punctum Primum. Cogita veniale peccatum reuera Deum offendere & tam atrociter vt totius mundi salus nunquam licitum faciat vel vnicum: sancti vel fato functi, vel viuentes adhuc in terris certum potius capitis & famæ discrimen adirent quam vnicum deliberatum admitterent. Enimverò cum Dei voluntate pugnat, maiestatem abiicit, potentiam ridet, laceffit iustitiam, irritat bonitatem, virtutes denique diuinas omnes impugnat eiusque gloriam impedit & minuit; itaque quamquam eius amicitiam non abrumpat, dissuit tamen, & ardorem illum sacrum imminuit sensim atque debilitat. Primum enim castos am-
plexus

plexus impedit quibus Deum stringeremus nisi creaturæ nos ad se raperent ; deinde securitatem adimit qua de diuino in nos , vicissimque nostro in Deum amore certi sumus : quare sicut qui piè viuunt atque religiosè , miras ardoris huius faces experiuntur ; ita qui plerumque venialiter peccant has ita deferuescere sentiunt , vt meritò dubitare possint , num penitus extinctæ sint : itaque pacem animi perdunt qui primus est atque præcipuus amicitiae diuinæ fructus. Tertiò, Deus arcana sua tepidis & imperfectis non communicat nec illi Deo suas misérias enudant : écqua enim fronte cor offerent Deo , creaturarum amore pollutum ? Quartò, nec illius modi anima se totam Deo , nec illi se Deus totum committit : seponit hæc enim partem sui , vitæque ac operum, quæ clam aliis elargiatur. Quintò, nec Deus confidit ipsi , neque negotia magni momenti credit, non probatur ægritudinibus , nec arduis vllis opetibus admouetur : nouit enim ille huius ignauiam , vt hæc suæ conscia infirmitatis illi nequaquam innititur. Sextò denique quo se magis anima seiungit à Deo , suique iuris nimium tenax sese in Dei gloriam non profundit, eò minus liberalem experitur Deum ; non consuetos ipsi adiicit oculos , sed vulgari fouet prouidentia , ægrè & rarò loquenti respondet , parcius elargitur thesauros , sensim subducit lumina piósque motus quibus ad opus bonum incitatur , quibus deficientibus amare diu non potest.

Hæc vbi attentè perspexeris , elice conclusiones aliquas practicas quæ voluntatem tuam accendant.

Primò, conclusionis, quod tam parùm hactenus

nus Deum amaueris quem toties offendisti. Quis enim filius amare patrem crederetur quem sic affaretur. Mi pater interficere te quidem nolo, sed cedere ac pulsare. Secundò, admirationis quòd tam multa peccata eius iram non accenderint. Tertiò, doloris, quòd iisdem diuinus sit in te immixtus amor. Quartò, propositi, quòd dæmon potius eliciet à te vitam quàm consensum in veniale deliberatum.

Punctum secundum. Diligenter inspicere damna quæ peccatum veniale parit: singula persequi infinitum esset, iis insistere poteris. Primò, inducit maculam quæ pulchritudinem animæ detrat, quoties enim offendisti venialiter, toties animæ tuæ vultum sordibus illinisse puta: quod enim est in vultu lutum, vel scabies, vel vlcus, vel cicatrix, vel lippitudo, vel enormis tumor, hoc est in anima veniale peccatum, itaque cum sic peccas finge te preciosā vestem amurca inquinare, pulcherrimam imaginem inficere luto. Et vero si sponsam maritus ægrè videt sorditam, Deus animam nostram veniali crimine infectam difficilius adit; secundo adimitur spiritalis fulgor quo illustratur anima, id aduertunt qui se se peccatis irretiri sinunt frequentibus, videlicet se in Dei virtutis, suique cognitione cœcutire.

Quare animam hominis ita se gerentis cubiculum reputa, quod puluis aut fumus oppleuerint, in quo vero sanis oculis durare nequeas Deus lumen est: ita ne verò cum tenebris staret? tertio vitam non adimit, sed sanitatem & robur; quo fiet vt qui sæpe venialiter peccet, nihil aut parum sit de perfectione sollicitus, amoréque diuino: quapropter

quapropter comparari solet cum capitis aut stomachi vel colicis doloribus, aut podagra, vel eiusmodi morbis qui mortem ex se non procurant quidem, sed ita vires infringunt hominis, ut superuenientis febris assaultibus impari reddant. Hinc dicitur venialia peccata ad maiora scelera viam sternere, siue quod peccantem ad creaturas inclinent, ad quas facile contingit grauis lapsus, siue quia gratiarum riuulos auertunt, quos negligentia, & ingrati animi labes exsiccant. Quartò, ardorem pietatis sopit, quo deferuescente bona opera deferuntur, retunditur rerum diuinarum sopor, iugum Dei alias leuissimum graue creditur & intolerandum, pedesque antea ad perfectionis viam decurrendam leues, insueto stupore torpent, nempè stygio quasi succo actiones omnes nostras Dæmon inficit, ne cum voluptate fiant: hinc negligentia negligentiam parit, quæ sensim virtutem reddit insipidam; animaque olim facilis ad concipiendas amoris diuini faces, eas vel omnino respuit, vel admittit ægerrimè. Quintò sic intelligentia cæcutiente vel stupida vel negligente, gratiisque subtractis, sine quibus nec partis inferioris motus assiduos reprimere, nec diu in virtutis tramite stare possumus, quid mirum si anima magnis tentationibus concutitur, tandè que succumbit Dei gratia destituta? Sextò denique, quamquam nullum aliud in veniali subesset malum, proximo nocet, dū prouocatur exemplo; Deum fraudat gloria quam ex bonis operibus expectat; eiusdem gratias inanes reddit & inutiles.

Hæc ubi damna excusseris, & deprehenderis in te, elice sequentes affectus.

Primò, detestationis tanti mali. Secundò, stuporis quod te hæcenus tam parū affecerit. Tertiò, humilitatis vbi tot in cōscientia tua peccata obseruaueris. Quartò, propositi subeundæ cuiuslibet potius calamitatis, quàm peccandi venialiter ex deliberatione.

Sextum punctum. Damna peruestiganda sunt quæ propter peccatum veniale in altera vita manent. Hoc enim iustitia diuina certò puniet, & si maximè volet pœnas remittere non potest, nisi à se peccator illas viuus exegerit: his enim charitas satisfacit & alia opera virtutis, quæ remedia sunt cerrissima: item & afflictiones quas sponte subimus, aut à Deo missas libenter accipimus. Porro alterius vitæ pœnæ ita se habent. Primò, anima detrudetur in obscurissimum carcerem, adeoque diuina visione priuabitur: quæ pœna dubio procul est maxima potissimùm ob impetum & pondus quo à corpore seiuncta fertur in Deum; quæ inclinatio longè vehementiùs illam impellit, quam lapidem ad centrum innata grauitas detrudit. Enimuero in amorem Dei exardescit quo non frui magnum amanti supplicium. Secundò, exuritur flammis iisdem, quibus damnati torquentur: Sic enim prauis amoris scoria debet excoqui, pœna utique incredibili quæ cum nulla quæ à viuis toleratur, componi potest. Itaque sic habe peccata venialia vel ignibus atrocibus post hanc vitam expurganda, vel in hac vita diuino amore consumenda, ex quibus accuratè perpensis in hos affectus prorumpes. Primò, timoris, quòd iustitia diuina tam atrociter in minuta quælibet peccata sæuiat. Secundò, stuporis, quòd tanta insit peccato veniali malitia, vt amicissimos
Dei

Dei compingat in carcerem inferis vicinum, nec inde discedere patiatur, nisi prorsus absumpta sit. Tertio propositi satisfaciendi in hac vita, pœnitentiis & afflictationibus, quas ipse tibi vel Deus procurarit: nam in hac vita perexiguæ sunt, magnique meriti, quoties Dei causa tolerantur. Quartò denique propositi diligentissimè hæc peccata vitandi. Tum quia amoris diuini repugnant, tum quia talibus pœnis peccatores obnoxios reddunt.

Colloquium fiet ad Christum Dominum ex cruce pendentem, quem orabis, vt quia suo sanguine peccatorum etiam venialium maculam abstergere debuit, eodem peccata tua eluat, cor tuum amore suo calefaciat, & te ab amore creaturarum plane seiunctum in hac vita, sibi crucique suæ firmiter adstringat.

*Exercitium de pœnitentia & eius fructibus
ex Luca 13. Arborem fici habebat &c.
qui textus est legendus.*

Primum præludium. Audire Christum dicentē. Nisi pœnitentiam egeritis omnes simul peribitis.

Secundum præludium. Petere gratiam, vt ad illam vocem excusso torpore tandem incipiamus facere fructus dignos pœnitentiæ.

Primum punctum. Considerare quod cum essem arbor syluestris, & infructuosa, & despiciabilis, & quoad omnia frutex inutilis, Deus maiestatis oculos in me coniecit, & ex sterili loco

in quo etiam deputata ignibus inferni arbor mala, transtulit in vineam societatis suæ, & insito mihi pretioso fertilique spiritu filij sui & Societatis admirabilibus planè modis per gratiam suam ad dignitatem prope diuinam extulit, mèque totum in aliam prorsus arborem conuertit, infinita sua sapientia & bonitate eo fine vt fructus bonos facerem.

Secundum punct. considerabo quod ex ea parte eius mihi deinceps nihil defuerit, terra enim in qua me posuit, terra sancta est pretioso eius sanguine tam frequenti Sacramentorum vsu fecunda, irrigata tot Martyrum cruore, tot sanctorum lacrymis, tantâ spiritus abundantia pinguis, vt arbores nutriat altissimas, pulcherrimas, fertilissimas, extendit palmites suos vsque ad mare, & vsque ad terminos orbis terrarum propagines suas, sita in eo cœli solique aspectu, vt diuinos influxus continuo recipiat, continuo cœli rore irrigetur, quibus omnibus accedit assidua superiorum cultura, & cura tum corporis tum animi, quantos ergo fructus fecisse me hætenus tot annis, par fuit?

Tertium punct. Perpendam an reuera aliquem fecerim, & reflexis oculis in pristinam vitam, loca in quibus fui in societate, personas quibuscum vixi, & officia quæ gessi, agnoscam parùm vel nihil solidi fructus retulisse, foliis plenum fuisse, studuisse tantum externis, placere aliis; habitum virtutum & religionis præ me tulisse, quasi hominibus solis, non Deo fructificarem, satis mihi fuit oculis mundi virescere, hoc in studiis meis, hoc in conuersatione mea cum aliis, hoc in vitæ religiosæ actionibus, & ipsa regularum obseruatione;

tione, hoc in orationibus, in quibus cum Deo parum sincerè conuersatus toties fui; agnoscam, cum interim ignorarem, vel non attenderem Deum Maiestatis sæpe me intuentem, sæpe visitantem, sæpe frustra quærentem in me fructum, etsi aliquando sui aduentus & visitationis signum daret, nempe aliquam inspirationem melioris vitæ, contemnerem aut dissimularem.

Quartum punctum. Considerabo me non modo inutilem & infructuosum fuisse Deo & eius gloriæ, sed tot imperfectionibus, quarum mihi sum conscius iniuriosum, quid tam mala arbore & palmite ingratus?

Quintum punctum. Ponderabo damna quæ ex mea tepiditate, & imperfectionibus oriuntur, nam non solum priuavi Deum magna gloria, Christum lætitia, mundum auxilio, exemplo domesticos, ipsam Societatem splendore, Superiores voluptate & ope, meipsum ingenti thesauro meritorum, sed etiam Deum ipsum affeci contumelia: Christi spiritum contristavi & cœlestes omnes, scedando & labem societati aspergendo, & mundum & socios male ædificaui, & à Deo auerti, Superiores & patres spirituales mœrore compleui, vitam ipse miserrimam duxi, inter assiduas tum conscientia interioris, tum exteriores molestias.

Sextum punctum. Audire illam vocem Christi ita de me concludentis. Succidite ergo illam, ut quid etiam terram occupat? & reuocare in memoriam quam multis tepidis religiosi id acciderit, ut dum viderentur arbores speciosæ hominum oculis ob talenta & dona, vel subito deiectæ sint Deo succidente, vel Deo maledicente aruerint, ne frustra illam sanctam ter-

ram acciperent, temporalia bona à piis fundatoribus ad Dei gloriam data, quibus alij poterant valde promouere Dei honorem, ad vanitatem tantum & externam speciem consumerent.

Hanc ergo sententiam iustissimam in me faciã, & cogitabo vt quid etiam terram occupo?

Colloquium fiet ad B.P. Ignatium vel Angelum custodem, vt vineæ huius cultorem, rogans primo vt pro me intercedat, dicatque quod cultor vineæ Domino: dimitte eam Domine etiam hoc anno, & fodiam circa eam & mittam stercora; siue suis precibus impetrando vt fodiat & mittat stercora, vt vitiorum meorum radices detegantur, & ab innata corruptione liberentur, siue per superiores meos ad fundum vsque imas radices purgando, ad quas me paratum offeram; deinde conuertam me ad Christum, vt iis conditionibus me dimittat hoc anno, cui offeram firmum propositum veræ & solidæ emendationis.

Pater Ave.

Ad contritionem ex amore.

Primum præludium: Sum quasi prodigus ille ad patrem rediens.

Secundum præludium. Petam lumen & affectum ad cognoscendam & detestandam meam erga benignissimum patrem ingratitudinem.

Primum punctum. Considerabo singula peccata à me commissa non solum Dei maiestatis infinitæ

finitæ , sed etiam omnibus eius perfectionibus bonitati , iustitiæ , potentiæ , sapientiæ vbique præfenti ita esse contraria , vt debitam singulis gloriam , honorem & amorem detrahant , eas veluti pro nihilo habeant , ac proinde easdem etiam contra se prouocent.

Secundum punctum. Expendam Deum illum infinitæ maiestatis & bonitatis quem ita offendi esse meum creatorem , conseruatorem , gubernatorem , redemptorem , principium denique & finem meum , quem ego dum ita mihi beneficeret , dum me conseruaret , gratiam mihi suam offerret , & pararet æternam gloriam , impiè sic offendere non sum veritus , reddere illi malum pro bono , non sterilitatem solum , sed etiam inauditam malitiam animæ meæ.

Tertium punctum. Præterea beneficia cõmunia quæ à domino meo accepi dispiciam , & in particulari singularem amorem & curam quam mei gessit in omni vita , & primo antequam in hunc mundum venirem , cum sine vllo merito inter tot homines pereuntes , inter tot nationum millia , ideo solum condemnatarum , quod lumen fidei non receperint , ille me elegit & voluit inter suos annumerari , & inter eos qui in gremio Ecclesiæ nascituri erant , & Apostolico lacte nutrir , & sanguine Christi ablui. Secundò , percurram annos , loca , itinera , habitationes , occupationes , personas , studia , officia , vbicumque fui versatus , animaduertendo quo pacto diuina prouidentia semper mihi necessaria prospexerit tum corpori tum animæ , tum temporalia tum spiritualia , quasi me solum curaret , mandans creaturis vt mihi vbique adessent , vt olim Apostolis , cum eos si-

ne sacco & pera mittebat Luc. 22.

Quartum punctum. Audiam eundem ipsum Deum de mea ingratitudine mecum conquerentem. Quid est quod ultra debui facere vineæ meæ animæ tuæ? Isai. 5. in charitate perfecta dilexi te Ier. 31. Ego sum Dominus faciens & formans te, ab utero auxiliator tuus. Isa. 45. Expectaui autem ut vinea mea faceret vuas, & fecit labruscas, faceret iudicium & iustitiam, & ecce iniquitas. Es. 15.

Quintum punctum. Postquam meâ culpâ gratiam illam primam & sanctitatem baptismalem perdidi, non tamen abiecit Deus benignissimus protectionem mei. Nam à quot & quantis periculis animæ & corporis me præseruauit? Admirabor quomodo in tali periculo non sum mortuus, aut quomodo non incidi in malum insanabile, aut in hæresim, peccatūme aliud incorrigibile, ut tot alij homines, qui ut iumenta computrescunt in stercore suo Ioel. 1. Quomodo occasiones peccandi certissimas auerterit, vires ad resistendum carni, mundo, dæmoni subministrârit, meos affectus sanare innumeris modis studuerit, ne infinita alia mala desiderarem aut sequeretur, quâ misericordiâ me expectauit vsque ad hanc horam, & sustinuit adhuc toties peccantem, quanta cum patientia & amore distulit me castigare, dum ipsum offendebam, expectando meam integram & plenam conuersionem, ut me sanaret, ad æternæ gloriæ præmium, super me vigilans quasi mater tenera super dilectissimum filium.

Sextum punct. Animaduertam eundem benignissimum Deum hanc mihi occasionem in præsentia

præsentia per huiusmodi exercitia offerre post tot & tanta flagitia, vt si ex toto corde peccata detestans meipsum ad dignos pœnitentiæ fructus velim constanter conuertere, & vitæ mores donis & talentis diuinis congruentes efficaciter induere; sit ille paratus apertis vlnis tanquam optimus pater resipiscentem filium prodigum ad osculum pacis, & in viscera misericordiæ recipere meipsum.

Colloquium fiet pro affectu filialis contritionis, vt in eius domo non vt seruus, sed vt filius iam charissimus seruiam bono gloriæ eius in sanctitate & iustitia coram ipso omnibus diebus meis.

Pater Aue.

MEDITATIO

De filio prodigo Luc. 15.

Oratio preparatoria eadem quæ semper.

Primum præludium. Proponemus ob oculos ex vna parte locum illum, vbi filius prodigus in summa egestate porcos pascebat: ex altera palatium in quo prodigi filij pater in affluentia rerum omnium cum suis versabatur.

Secundum prælud. Petemus à Deo vt nos in suam gratiam benignè receptos nunquam ampliùs à se recedere permittat.

Primum punctum erit, Considerare quàm dispar sit eorum conditio, qui longè à Deo recedentes, peccatorum sordibus, quasi porcorum filiquis pascuntur, & eorum qui à peccatis absoluti, gratiâ perfruuntur. Id autem faciliùs intelligetur ex iis, quæ de filio prodigo in Euangelio narrantur. & potissimùm ex illis verbis. (Quanti mercenarij in domo patris mei abundant panibus, ego autem hic fame pereco!)

Secundum punctum erit, perpendere filij prodigi confusionem. cum ex altera parte patris in se clementiam & liberalitatem, à quo portionem substantiæ acceperat, recordaretur, ex altera verò suã in patrem ingratitudinem animaduerteret. Quam confusionem tum maximam fuisse considerabimus, cum se squalore ac pannis oblitum coram patre sisteret, suumque ac patris dissimillimum ornatum inspiceret. Hæc & alia partim ad nos tanquam filios, partim ad Deum tanquam parentem referemus.

Tertium punctum erit, attendere summam patris in filium benignitatem quæ adhuc longe existentem videns, misericordiâ motus est, & accurrès cecidit super collum eius, & osculatus est eum; sic nos Deus, cum adhuc longè absumus, intuetur & misericordia motus, auxilio suo præuentos benignè amplectitur, delictorumque oblitus in gratiam denuò recipit: vnde merito coram illo humillimè prostratus, cū filio prodigo exclamabis, Pater peccavi in cœlum & coram te, iam non sum dignus vocari filius tuus.)

Quartum punctum erit, considerare eò progressam esse patris benignitatem, ut ad se redeuntem filium non modo receperit, verum etiam pristinæ dignitati

dignitati restitutum stolâ primâ vestiri, annulo insigniri, calceamentis indui, hoc est gratiâ, cæterisque donis ornari iusserit : Quin imo ad ostendendâ cordis profusam lætitiâ, vt vniuersæ familiæ gaudium de vitulo saginato, è selectis armentis conuiuium instruxerit ; quod quidem conuiuium, rectè sacram Eucharistiam interpretabimur, vbi sanctissimo Christi corpore & sanguine reficimur.

Colloquium erit vt cum Deo loquens hanc tantam ipsius bonitatem in te alioqui indignissimum admireris, interrogando quid in te viderit, vt te tam benignè amplecteretur. Gratias igitur summas parenti optimo referes, petesque ab eo, vt te tandem in domum ac hæreditatem suâ receptum, nunquam ampliùs à se discedere patiatur.

Pater Ave.

De sanctissimo Sacramento.

Oratio preparatoria de more.

Primum præludium. Seipsum imaginari ad sacram mensam accedentem, & dominum de cœlo ad sacramentum descendentem stipatum Angelicis choris.

Secundum præludium. Petere à Deo viam huius mysterij apprehensionem, & intimam erga illud reuerentiam & deuotionem.

Primum punctum. Conari vt animo viuaciter apprehendamus præsentem Dominum. Primo

mò fides certissima id docet. Secundò , non minùs adest quàm si videretur. Tertio, intuetur nos, cogitat de nobis, statuit & disponit; quis scit quales appareamus in oculis eius , quale iudicium, qualem sensum de nobis habeat , quanta nos oportet cum sollicitudine astare tantæ maiestati? Quartò, si viderem illum, quid facerem? quomodo me componerem? quid dicerem? faciendum nunc mihi idem, quando idem æque adest ac videretur.

Secundum punctum. Intueri illum formosum in stola sua, speciosum forma, desiderabilem Angelis, Deum & Dominum meum beneficentissimum, amantissimum, nobilissimum, cogitantem cogitationes pacis. Audire quid probabiliter dicturus esset nobis, quid loquatur, aut quid loqui illum nos iudicare conueniat.

Tertium punctum. Meminisse Virginis erumpentis in illa verba : ecce ancilla Domini fiat mihi secundum verbum tuum , & Regum procidentium , Simeonis accipientis eum in vlnas suas ; quia viderunt oculi mei &c. Ioannis Baptistæ dicentis, Et tu venis ad me? Centurionis dicentis : non me reputavi dignum venire ad te , & Domine non sum dignus; & Magdalenæ pedes osculantis &c. & D. Thomæ exclamantis & dicentis, Dominus meus & Deus meus , imitari sanctos hos. Tu es ipse rex meus & Deus meus. O Domine quia ego seruus tuus , & filius ancillæ tuæ.

Quartum punct. Cogitare quomodo me gerere oporteat cum tantum hospitem in domum meam introduxero , spectare adstantes Angelos , & ex ipsis discere reuerentiam , & deuotionem,
æquissi

æquissimum esse vt illum adorem, gratias ei habeã, veniam postulem, adducam ad ipsum omnes facultates meas, vt eas ipse regendas suscipiat, pro eius amore mutem mala consilia, & iudicia, malos affectus, proponam meliorem vitam, &c. petam gratiam specialem, &c.

Colloquium. Inuocabo diuinam opem, vt dignetur nobis Dominus in tanti mysterij susceptione adesse, vt dignè ad illud mereamur accedere.

Pater Aue.

C A P V T X V I.

*Ad contemplationem de regno
Christi.*

EXutis per primam hebdomadam inordinatis affectionibus, actualibus quidem effectu, habitualibus saltem affectu, & desiderio, incipimus quidem quærere in secunda, Dei voluntatem circa vitæ in posterum agendæ directionem, & formam. Et quia hæc Dei voluntas & vitæ forma in Christo nobis proposita est, non tantum vt exemplari totius perfectionis, sed etiam efficacissimo motiuo; idcirco B.P. hanc primam contemplationem posuit, vt fundamentum alterius partis exercitiorum, & quasi summam vitæ & operum Christi Domini. Continet nempe vocationem quamdam generalē ad Christum sequendū pro cuiusque statu.

Notandum

Notandum verò est eam vocari de' regno Christi, qui à cum Dei regnum in hoc consistat, non vt simpliciter omnia ei subiecta sint (quis enim poterit resistere potestati eius (sed vt rationalis creatura voluntariè & liberè ei prorsus se submittat, illum cognoscendo & amando, qui finis est eius; hoc Dei regnū per rebellionem Angelorum, Adami & cæterorum hominum perturbatum & quodammodo diminutum. Ad illud ergo reparandum Deus ipse homo factus est, vt non tantum suo merito, sed etiam exemplo reduceret hominem in finem creationis, à quo aberrauerat, atque adeo in suum amorem & obedientiam, eūque in ea ipsa natura humana assumpta doceret quomodo Dei gloriæ seruire vltro & liberè, eique omnia & seipsum postponere, deberet. Ipsemet ergo rex æternus, factus homo, non potentiā diuinitatis, sed humilitate & submissione erga patrem, nempe nouo modo suum regnum restituit in integrum, in cuius tanti & tam gloriosi operis societatem atque negotij, vocat omnes homines vnumquemque iuxta gradum suum.

Finis ergo huius contemplationis est imprimis vt bene expendamus & apprehendamus, quis sit finis missionis filij Dei in mundum, nempe Gloriæ regni Dei reparatio, quantāque sit dignitas negotij ab eo suscepti, id est procurationis gloriæ Dei. Deinde, quia in eius finis & negotij societatem ipse nos vocat, nos ipsos offeramus, illum vt sequamur quā perfectissimè possumus, seriōque proponamus, omni alio scopo & fine iam damnato, nos & alios omnes Christi exemplo Dei gloriæ perfectè subiicere, quidquid demum tolerandum sit : donec ergo intentio illa
diuinæ

diuinæ gloriæ tot peccatis à nobis commissis, inordinatōque creaturarum, & nostro ipsorum amore debilitata reparetur, sic vt nullum ei in posterum bonum anteferamus, sed omnia adeoque vitam nostram Christum imitando longissimè posthabeamus, expedit hanc contemplationem sæpius repetere. Est enim desiderium, Christum in finis intentione imitandi, fundamentum & 2. & 3. & 4. septimanæ. Porro videtur Dominus Deus suâ illâ quâ omnia disponit efficaci suauitate, hanc contemplationem B. Patri nostro sub similitudinem regis terreni subditos suos ad bellum euocantis inspirasse, vtpote militari eius ingenio & professi oni accommodatam, quæ illud ad perfectè sequendum Christum pertraheret, vnde per eam videtur sese ad id determinasse: igitur ipsam quodammodo Societatem eadē peperit, vel inchoauit, cum veluti in radice aut semine totam instituti nostri perfectionē contineat.

Contemplatio regni Iesu Christi.

Oratio preparatoria fiet more supradictō.

Primum præludium, ad constructionem loci nunc erit, vt spectare nos imaginemur, Synagogas, villas & oppida, quæ prædicans Christus pertransibat, & sic de locis aliis.

Secundum prælud. Ad gratiam poscendam, pertinens in hac parte erit petere à Deo ne obsurdescamus vocante nos Christo, sed ad sequendum & obtemperandum prompti simus.

Primum

Primum punctum esto proponere mihi ob oculos humanum regem diuinitus electum, cui principes & populi omnes Christiani reuerentiam, & obsequium præstare debeant.

Secundum punctum est, imaginari quòd audiam illum regem loquentem ad omnes subditos. In animo est mihi regiones infidelium vniuersas ditioni meæ subiicere. Quicumque igitur comitari me velit, paratus sit oportet non alio vti victu, vestitu, rebusque aliis quam me videntem conspexerit, in iisdem quoque laboribus, vigiliis & casibus cæteris mecum persistendum erit, vt particeps fiat victoriæ & foelicitatis vnusquisque, prout laboris ac molestiarum socius extiterit.

Tertium punctum est considerare quidnam respondere debeant regi amantissimo & liberalissimo fideles subditi, & quàm promptè ad omnem eius voluntatem offerre se accinctos, contra verò si quis non obaudiret, quanto apud homines vniuersos vituperio dignus esset, atque quam ignauus miles æstimandus.

Pars secunda huius exercitiij consistit in colatione similitudinis inter dictum regem & Dominum Iesum Christum, circa triplex illud punctum.

Primo sic applicabimus exemplum, si terrenus ille rex cum bellica sua euocatione dignus est cui attentio & obsequium præstetur, quanto magis Christus rex æternus, mundoque toti rex conspicuus, qui singulos ad se his inuitat verbis? Mea hæc est iustissima voluntas, totius mundi dominium mihi vindicare, inimicos meos debellare omnes, ac ita demum in patris mei gloriam intrare,

intrare, proinde quisquis eò mecum venire cupit, laboret mecum necesse est. Labori enim præmium respondebit.

Secundò, ratiocinabimur neminem fore sanæ mentis qui non cupidissimè Christi seruitio se totum offerat & addicat.

Tertiò, iudicandum erit quod ij qui se obsequiis illius prorsus duxerint mancipandos, non seipso tantùm ad laborum tolerantiam, verùm etiam maiora & præclariora munera oblaturi sunt, expugnata carnis, sensuum, amorisque proprii & mundani rebellione, vnde respondebit quisque in hunc fere modum. En ô rex supreme ac Domine vniuersorum, tuâ ego, licet indignissimus, fretus tamen gratiâ & ope, me tibi penitus offero, meaque omnia tuæ subiicio voluntati, attestans coram infinitâ bonitate tuâ, necnon in conspectu gloriosissimæ virginis Mariæ matris tuæ, totiusque curiæ cœlestis, hunc esse animum meum, hoc desiderium, hoc certissimum decretum vt (dummodo in maiorem laudis tuæ & obsequij mei prouentum cedat) quàm possim proximè te sequar & imiter in ferendis iniuriis, & aduersis omnibus, cum vera tum spiritus, tum etiam rerum paupertate, si inquam, tuæ sanctissimæ Maiestati placeat ad tale me vitæ institutum eligere atque recipere.

*Oratio preparatoria & duo praeludia
ut suprà.*

PRimum punctum sit perpendere similitudinem regis terreni per illa puncta quæ dicta sunt.

Secundū punctum. Quomodo Dei Filius Deus ipse maiestatis cœli & terræ Dominus & supremus omnium rex, cui omnia subiecta esse eiusque gloriæ subesse debebant (in eo enim Dei regnum consistit ut creaturæ rationales ei perfectè subiectæ sint) cum homines iam inde ab initio defecis-
se, & superba rebellionē longe latèque suis legibus repugnare videret, statuerit descendere in aciem, ut patris sui suamque gloriam tanta hominum cæcitare & iniquitate obscuratam ab iniuria vindicaret, & diuinæ maiestatis notitiam ingereret, & sic spiritualis sui regni splendorem repararet.

Tertium punct. Considerare quemadmodum hunc diuinæ gloriæ finē, non tantum totis 30. annis & amplius quibus vixit nobiscum admirabiliter, & viuens & moriens procurarit, sed etiam adeo efficacibus me exemplis incitavit, ut ego vilis subditus præeuntem meum regem ad talem finem per talia media sequerer, & eiusdem regni gloriam per eadem media procurarem, atque adeo esse vellem tanti operis socius, ac proinde similis illi & conformis eius imagini.

Quartum punctum. Ponderare quomodo Dei beneficio vix sciens quid agerem vocantem me
ad

ad illam formam, Christum sequutus sum, quando ad societatem veni, vbi perpendam vocationis modum & ordinem, & lumina piâque desideria quæ tum habebam, reuocaboque mihi in memoriam; & apertius cognoscens quantum mihi tunc Deus beneficium fecerit ex intimo affectu ei gratias agam.

Quintum punctum. Perpendam quomodo ex eo tempore ad hoc momentum non cessauit vocare me, quò me promiseram sequuturum, nempe ad eum finem per ea media, verum lentius sum secutus. Nam quantis absum spatiis ab ea perfectionis forma, cum tantum in me supersit veteris formæ, amoris proprii & mundani; conabor dolorem de tanta negligentia excitare.

Sextum punctum. Considerabo Christum Dominum me vocare hoc etiam momento vlteriùs, & in me reflexus perpendam quàm fortiter nouis me modis vrgeat quotidie per lumina, per inspirationes, per exempla aliorum; poterat meritò me eiicere vel vt seruum inutilem domo, aut segnem militem militia expellere; verum perinde ac si vtilis illi essem, ita me sollicitè inuitat, vt velim perfectè viuere & illi seruire: quare omni tergiversatione abiectâ totum me illi tradam vt quam proximè illum sequar, & imiter, & firmissimè proponam in corde viuum eius imaginem imprimere, aut sculpere, per attentam vitæ eius considerationem, amorem feruentem, & virtutum omnium eius imitationem, vt viuum ego iam non ego, viuat verò in me Christus.

Colloquium fiet, affectu magno me paratum offerendo, vt illum perfectè sequar, & in eum finem percurrendo votorum formulam.

CAPVT XXVII.

De procuratione gloriae Dei ad imitationem Christi.

PARAGRAPHVS I.

Quanta sit excellentia procurationis gloriae regni Dei, ad quam vocati sumus.

PRimò non est seruire Dei gloriae seruire, sed excellens quiddam & præcelsum, & ideo maximè sublimis & digna homine eius intentio. Est enim Dei gloria quoddam bonum, atque adeo res quædam bona. Nam quid Deo queat esse bonum, quod non sit etiam magnum ac diuinum bonum, imo verò infinitum? Et si enim creaturæ ipsæ atque earum operationes, ex quibus Dei maiestas sui suarumque perfectionum notitiam manifestat, & ad sui amorem excitat, finitæ sint & exiles, ipsa tamen resplendentia diuinarum perfectionum, quæ inde resultat, est quid infinitum, sicut & diuinæ ipsæ perfectiones etiam extra Deum quodammodo sunt, opus enim creationis, verbi gratia, infinitam sapientiam, bonitatemque continet & commonstrat, ac proinde infinitum bonum gloriae Dei, singulæ etiam hominis operationes, maximè supernaturales, & quæ ad salutem perfectionemque pertinent, thesauros bonitatis

nitatis eius & benignitatis, & sapientiæ deregunt, & exhibent diuitias gloriæ & gratiæ suæ Rom. 9.

Secundò. Quare Deus ipse in omnibus nullum alium finem habet quam seipsum, id est, gloriam & manifestationem suæ bonitatis, vt paulo ante dicebamus. Quòd si tanta sit huius boni excellentia vt dignum sit propter quod Deus omnia opera sua ad extra, siue naturalia, siue gratiæ, siue æternæ felicitàs creârit, certe nullum aliud dignum esse potest ad quod rationalis creatura intendere debeat, & ad quod sese totum, suasque omnes actiones & motus referre, nam quod illud esse potest?

Tertiò. Huic loco hæc maximè ratio congruit, quòd Dominus ipse maiestatis, cum eius gloriæ decus vellet reparare, & rationalem creaturam ad debitum suum amorem & obsequium liberè persoluendū inducere, humanæ naturæ infirmitatem, & misérias suscipere dignatus est, & pro infinita illa æstimatione sui honoris, exinaniuit semetipsum, vt quantum sit eius pretium, quantaque dignitas ex eius procuratione homini suo amore excoëcato innotesceret.

Quartò. Accedit, quòd hoc est vnicum bonum quod potest ab homine Deo tribui. Est quidem ipse seipso plenus & bonorum nostrorum non eget, nec minus erit gloriosus; si nos nostraque ei negemus, quæ tamen est eius erga nos benignitas, quæ hoc extrinsecum gloriæ suæ bonum ita in nostra potestate esse voluit, vt liberum sit nobis cum variis modis procurare, quæ certè singularis est dignitas humanæ naturæ, vt ad idem bonum Deotribuendum efficaciter

concurrat, quòd sibi Deus ipse tam admirabilibus modis in hac vita procurat, & in æternum à suis accipiet.

Quintò. Hinc sequitur per hanc intentionem nos fieri maximè similes Deo; similes, inquam, non naturâ, sed voluntate quæ similitudo maximè laudabilis est, & in diuinam nos naturam velut transfundit.

Sextò. Adde hac intentione satisfieri præcipuè illi obligationi, quâ Deo obstricti sumus, siue vt tanti Patris filij, siue vt serui & mancipia tam excellentis Domini, siue vt creaturæ adeo munifici creatoris, siue vt subditi tanti regis. Hoc enim vnicum bonum est quod propriè filios decet velle parenti optimo, seruos Domino, subditos regi, & creaturas suo creatori. Nam quid ei tribuere potest homo? Est denique hoc bonum propriè obiectum amoris, quo Deum prosequimur, nam aliud bonum ei velle efficaciter non possumus.

Septimò. Præterea hoc bonum natura sua finis est omnium bonorum, atque adeo est instar Oceani in quod alia omnia bona defluunt, nam est maximè commune bonum, atque adeo continens in se omnia bona, cum bonum omne siue vniuersum, siue singulorum ab eo dependeat, & ad ipsum ordinetur, vt bonum partis ad bonum totius, ideo quidquid in rerum natura bonum est, ideo bonum est quia aliquid habet de eo bono, & eò quodque bonum maius est, quo plus de hoc bono habet.

Octauò. Denique ex hoc bono eiusque intentione omnia nostra bona promanant. Dici enim non potest quantæ sint utilitates intentionis gloriæ

riæ Dei; sicut namque ex eo quòd Deus hoc sibi bonum velit, nobis & naturam & gratiam & gloriam communicat, ita nos, eo quòd ei bonum hoc volumus, bona omnia necessaria naturæ & gratiæ & gloriæ efficaciter comparamus, etsi de nobis non cogitemus.

P A R A G R A P H V S I I.

Qualis esse debeat intentio gloria Dei.

DEbet habere præcipuè quinque aut sex conditiones. Prima debet esse vniuersalis, & sese tum ad vniuersum vitæ statum, tum ad omnes & singulas actiones nostras extendere. Nam debet sese homo totum Deo multis titulis, quare sollicitus esse plurimum debet. Primum quidem, vt totam vitæ suæ summam in finem diuinæ gloriæ dirigat, & omni alia intentione reiectâ Dei bono sese consecret Christi exemplo. Deinde vt ne vel minima vitæ eius pars, vel actio interna siue externa aliò spectet. Igitur siue naturales siue indifferentes sint eius actiones, siue supernaturales, siue solus secum quid agat, siue cum aliis, conari Christi Domini exemplo debet, vt quæque actio pro sua capacitate Deo plena sit, & in eum finem referatur, quem Deus ipse; dum vt prima causa & vniuersalis in eandem actionem influir, intendit; nimirum diuinæ maiestatis gloriam, quod assequi facillimum erit ei qui assuescit Deum frequenter contemplari in omnibus creaturis suis præsentem & operantem: id quod

nostris esse cupiebat familiare B. P. Ignatius, nam tunc non est difficile & conatū suum & intentionem suam Deo principali agenti conformare, & in idem bonum ferri: Nec enim frustra monet S. Paulus. Siue manducatis, siue bibitis, siue aliud quid facitis, omnia in gloriam Dei facite; & ad Coloss. 3. omnia quaecumque facitis verbo aut in opere, omnia in nomine Domini nostri facite, gratias agentes Deo, & Patri per Iesum. Et ad Rom. 1. ut in omnibus glorificetur Deus.

Secunda, ut sese ad omnes actiones extendat debet esse actualis, & ad singulas actiones, si fieri possit, applicari. Nam si sit tantum generalis intentio Dei gloriæ, & quodammodo habitualis, per se ne quidem sufficit ad meritum. Quare si quis seipsum pridem suaque omnia in Dei honorem retulerit, si tamen ea intentio nihil influat in eius actiones, siquidem supernaturales sunt, ut sunt actiones virtutum infusarum, suam honestatem & meritum habent, sed priuantur accessione illius splendoris, quem ab actuali in Deum relatione acciperent; si autem naturales sunt, certè nihil omnino meriti habent: nec enim, ut rectè docet sanctus Bonaventura ut aliquod opus referri in Deum dicatur, satis est, si quis ad initium anni, vel etiam diei, intentione quidem generali referat suas omnes actiones eâ die futuras in Dei gloriam, sed necesse est ut quoduis opus particulare intentio etiam particularis præcedat, atque adeo actualis vel saltem generalis illa ita virtute perseveret & influat, ut quoduis opus particulare attingat, sitque vera eius causa: ut cum quis ex generali intentione

studendi

studendi ad Dei gloriam, eâ non mutatâ sed aliquo modo influente, solet sese applicare ad studia suis temporibus, censebitur, etsi actu de Dei gloria non cogitet cum studia aggreditur, referre illa in Dei gloriam, quæ virtualis intentio etsi ad aliquod meritum sufficiat, tamen non est ita efficax vt actualis, quare potest sæpe contingere, vt languidior sit, eoque magis quò vel longiore temporis lapsu, vel acriori impugnatione contrariorum affectuum, virtus illa relationis antea factæ debilita fuerit. Quare sæpe vel gliscente occultè inordinato aliquo affectu, vel solâ voluntatis sponte omittentis suas actiones in Deum dirigere, negligentia & cessatione, aut tollitur omninò, aut inficitur. Natura enim sui iuris tenax & callidissima, parata semper instat vt actus suo inferat, & proprium bonum quærat, etiam nobis vix aduertentibus, & subinde existimantibus ob priorem relationem matutini temporis, sincerè Deum solum quærere. Itaque pereunt nobis infinita prope merita, & decor quidam actionum nostrarum omnium, nec enim dubium est cum viget in animo purior illa Dei gloriæ intentio actualis, sollicitari ab ea continuò voluntatem, vt & plura in eum finem faciat & maiora. Talis omnino fuit diuinæ gloriæ intentio in Christo Domino ab ipso primo vitæ momento ad vltimum vsque nunquam intermissa.

Tertia. Debet esse summa appretiatiuè sic vt pluris faciat etiam minimam Dei gloriam, quam quoduis aliud creaturæ vllius bonum, quatenus est solum bonum creaturæ, idque meritò exposcit excellentia boni huius de qua iam di-

ximus quod sine dubio, etsi minimum sit, eligibilius semper est omni alio, cum sit bonum Dei atque adeo infinitum, & ut bonum totius quod pars quævis proprio suo bono meritò anteponat. Quare cum in vnaquaque re & actione plura soleant bona inueniri, ad hanc conditionem pertinet, ut, si separari à se inuicem queant & vnum aliud excludat, iis inter se comparatis, bonum gloriæ Dei præferatur propriis commodis, famæ, integritati, vitæ ipsi: si vero ita coniuncta sint ut vnum aliud non excludat, voluntas tamen ipsa inter se componat, ut in re non tam spectet aliud quoduis bonum, quàm Dei gloriam; itaque dum cibo reficitur, dum honorificas functiones obit, non tam creatum sibi illud bonum quærat quam Dei gloriam, ad quam illa actio velut ad vltimum suum finem à Deo ipso dirigitur, sine quâ ipsa creaturæ delectatio aut utilitas non tantum Deo non placet, sed etiam displicet. Hæc gloriæ Dei æstimatio in Christo Domino fuit summa, cum ei sese totum, suaque omnia, atque vitam subiecerit. Et certe diuina illa maiestas quanti eam faceret satis declarauit, quoniam ad eius reparationem exinaniuit semetipsum & ipsâ prope suâ authoritate & diuinitate spoliavit.

Quarta: verum hæc tertia conditio erit perfectior si accedat quarta, ut intentio sit purissima, id est nullam aliam secundariam intentionem boni cuiusvis alterius adiunctam habeat; est autem varia impuritas intentionis. Nam primo quidem ita Dei gloriam intendunt, ut simul etiam aliquod aliud bonum indirectè intendunt; verbi gratia delectationem, gloriam etiam propriam

priam, vel quid simile; hæc secundariæ intentiones vix possunt esse sine peccato, nam procedunt ex inordinato affectu boni creati, & potest nonnunquam tanta esse inordinatio, ut primariam intentionem diuinæ gloriæ destruat, & bonum illud creatum faciat principaliter intendi, atque adeo postponi ei Deum ipsum, eiusque voluntatem & gloriam: facile enim voluntas duo bona intendens ex vno in aliud se mouet: quod cum fit, dicitur voluntas finem vltimum in bono creato constituere, fitque non impura ex parte, sed omnino abominabilis, sicut ea quæ diligit. Quod si leuis duntaxat sit inordinatio non tantum inficitur voluntas, sed multum etiam debilitatur prima & principalis intentio gloriæ Dei. Quare S. Iacobus capite quarto monet; Purificate corda duplices animo; & capite primo, vir duplex animo inconstans est in omnibus viis suis. Nam secundariæ illæ intentiones cum ex inordinato affectu oriantur, tantum detrahunt intentioni gloriæ Dei, quantum affectus ille inordinatus corde diuiso de Dei affectu detrahit. Et certe hinc multa mala nascuntur; nam inde fit ut in electione & executione mediorum, id est, in omni pene operatione, voluntas ad diuersos istos fines respiciat, ac proinde eligat media non tantum vtilia ad primum, sed etiam ad alios. Quare si quod offeratur medium ad gloriam ipsam Dei, si tamen nihil habet vtilitatis ad alios fines, illud reiicit; sicut si quis præfert Dei gloriam, etiam propriam intendit, licet Dei gloriam forte efficacius promouere posset catechizando, tamen quia hæc functio non est utilis adeo ad propriam gloriam, ideo concionari mauult.

Ex hac impuritate procedit omnis error in electione status, cum enim in ea spectare deberet quisque vnicam Dei gloriam, sæpe multa alia simul spectat saltem vt fines secundarios, vt voluptates, commoda, honores &c. vnde fit vt præferat verbi gratia statum matrimonij consiliis Christi vt medium & ad primarium finem sufficiens, & aptum ad alios.

Secundò. Nonnunquam præter Dei gloriam intenditur bonum aliquod proprium seu honestum & supernaturale, ex quo ipsa Dei gloria resultat: sic enim sæpe ex affectu ad bonum salutis & beatitudinis bona opera facimus, & inclinamus cor nostrum in Dei testimonia propter merita, & gratiæ decus, & retributionem. Et hæc secundaria intentio etiam si sola esset explicitè, tamen alteram interpretatiuè includit. Omnia enim hæc nostra bona in Dei gloriam per sese redundant; non est tamen tunc formalis intentio gloriæ Dei, de qua propriè hic agimus; si autem formalis & explicita sit vtraque, non aptè tantum cohærere, cum bonum hoc nostrum sit subordinatum gloriæ Dei, sed etiam altera alteram corroborare potest; expedit tamen bonum proprium etiam supernaturale abstrahere, & cogitatione, & affectu, saltem velleitate à bono Dei, & ita mentem affectumque componere, vt nihil solliciti simus de proprio bono, sed in vnicum Dei bonum tota feramur voluntate, & cogitemus procuremúsque eius bonum, certi quod ipse etiam de bono nostro cogitabit; Nam ideo vtrumque bonum coniunxit vt scilicet dum volumus bonum nostrum, etiam eius bonum velimus, eo tamen ordine, vt primariò bonum eius curemus, & veluti ex con-

sequente

sequente nostrum, quo etiam ordine ipse suam imprimis gloriam sibi vult, & inde nobis bonum naturæ & gloriæ, tam ut media ad eam ipsam gloriam, quam ut amoris & amicitiae quo nos prosequitur effectus. Hæc igitur est summa puritas intentionis huiusce, cuius in Christo Domino illustre habemus exemplum, ad quam ut perueniamus planè requiritur magna abnegatio proprii cuiusque boni, ut tradidit B. P. N. Ignatius de reformatione vitæ: nam si quis proprium bonum non reiiciat omninò, non potest purè intendere Dei bonum. Hæc tamen ipsa intentio boni gloriæ Dei solet multum iuuare ipsam abnegationem: nam cum tanta sit excellentia boni gloriæ Dei, magna sane vi voluntatis affectum in se trahit, ita sensim eam separat & abstrahit à proprio quouis bono, accessus enim ad vnum terminum fieri nequit sine recessu ab alio. Quare sanctus Augustinus sermone secundo in Psalm. 32. ait. Intentionem iustorum conari ad sublimia per humilitatem.

Quintò, denique non tantum in Dei gloriam ferri debet hæc intentio ut sit perfecta, sed etiam in maiorem Dei gloriam, habet enim suos gradus. Nam fieri potest ut alicui sit satis eam solum intendere, quæ in eo consistit ne mortaliter offendatur; alij præterea etiam ne venialiter. Denique potest à quibusdam excellentissimè intendi, ut etsi nulla planè sit Dei offensa, tamen maior ac maior eius gloria in omnibus intendatur. Hæc conditio magni momenti est ad bonam mediorum electionem. Nam cum sit maximè vniuersalis hic diuinæ gloriæ finis, plurima etiam ad illum sunt media: vnde si simpliciter
& in

& in genere tantum intendatur, vitalis intentionis voluntas non se applicabit efficaciter ad perfectissima & vtilissima media, sed satis ei erit si vtilia quærat. Quare cui satis est aliquam Deo gloriam tribuere, & salutem consequi, vi illius intentionis non applicabitur efficaciter ad Christi consilia sequenda, sed potest statum matrimonij amplecti, vt sufficiens medium ad finem quem intendit, nec ita studiosè suas actiones perficiet, at qui sese totum & quamlibet actionem refert ad Dei gloriam, non quamcumque, sed maiorem & maiorem, vi huius intentionis necesse est cum media quæque excellentissima complecti, & nulla in re sibi, vitæque parcere, nec ullam etiam leuissimam actionem præterire, quin eam impleat bono gloriæ Dei quantum capax esse potest: verum de hac conditione infra agendum pluribus erit, & declarandum in quo potissimum, ex mente B.P.N. & Christi exemplo, hæc maior, Dei gloria consistat.



P A R A G R A P H V S I I I.

De mediis ad Dei gloriam promouendam necessariis.

Ad sequentia vitæ Christi Myſteria.

AD illum finem eo modo promouendum non alia habemus quam proprias actiones, sicut enim Deus ipse non modo vel intrinsecam sibi gloriam quærit, quam internis operationibus; vel extrinsecam, quam extrinsecis, quibus opera naturæ, gratiæ & gloriæ molitur, ita nec possumus aliis eam mediis procurare quam nostris actionibus Deo ipsi cooperando; hæ vero actiones quæ immediatè tantum finem attingunt, sunt intellectus & voluntas, quibus Deum cognoscendo & amando, eum in nobis glorificamus, & ad gloriam eius in alios etiam per externas actiones propagandam, ut nimirum illum perfectè & cognoscant & ament, incitamur & applicamur: verum non potest intellectus & voluntas nostra adeo efficaciter, integrè, purè & sincerè hoc Dei bonum, quod in eius cognitione & amore consistit, prosequi, quandiu proprio bono plus æquo, cogitatione & affectu adhæret. Quare eæ actiones ad Dei gloriam procurandam planè sunt necessariae, quibus à proprio quocumque bono abducimur, sic enim ab omni alieno amore abstracti liberius & purius in
Dei

Dei boni procurationem intendimus. Accedit quòd non potest esse tanta æstimatio gloriæ Dei cum quid creatum vel proponitur, vel pari atque adeo inordinato affectu quæritur. In eo consistit æstimatiua perfectio amoris gloriæ Dei, quòd dum factâ collatione cætera omnia bona etiam vita propria cum illa comparatur, iis despectis & procul abiectis ad illam totis viribus procurandam incitatur. Quare Christus Dominus cum nos ad altissimi huiusce finis intentionem incitat, media etiam proponit in genere, & veluti in abstracto, vt in prima contemplatione vidimus, nempe, labores, paupertatem, iniurias, quorum in tota vita, præstantissima exempla præbuit, cum enim ad purum Dei amorem, sinceramque gloriæ eius solius procurationem duo sint necessaria; & impedimenta mundani ac proprii amoris remouere, & Dei gloriæ altioribus quibusdam actionibus seruire, & scire hominem facilè decipi posse, si, vt fere fit, pro naturæ suæ impetu ad altiora illa frustra sese, non amoris illis impedimentis attollat, ipse vltro se ducem præbuit totius vitæ, & à primo conceptionis suæ momento exorsus sese exinaniuit & à seipso quodammodo longissimè abscessit, vt quanti patris gloriam faceret, ipsa exinanitione declararet, & ad eandem iisdem mediis promouendam suo nos exemplo inflammaret, quod in reliqua deinceps vita præstitit: quamquam enim præstantissimis charitatis internæ, religionis, & id generis virtutum actibus Deum glorificaret, longe tamen Deum eiusque gloriam illustriorem effecit, quando in tota vita ab iis omnibus quæ amor mundanus vel proprius prosequi solet, vt sunt diuitiæ, honores, hominum

hominum æstimationes , delicia , abhorrens , per iniurias , contumelias , opprobria , paupertatem , labores , Dei Patris sui cognitionem & amorem toti mundo efficacissimè commendauit.

Ad hæc eadem ergo media eius exemplo vsurpanda, si verè finem diuinæ gloriæ intendimus , totius eius vitæ meditatio nos prouocat, quocirca in iis quæ sequuntur exercitiis , quamquam etiam oculos in alias personas interdum intendere possimus , vt aliquid inde spiritualis vtilitatis in nos deriuemus, potissimum tamen quæ ad Christum pertinent attentissimè considerata sunt ; & eius facta, dicta, cogitationes , & desideria singula accuratè discutienda , vt eius formam intellectus & voluntatis operatione in nobis imprimamus , atque ita Dei gloriæ seruire sicut ipse seruiuit, discamus.

Porro sicut contemplatio de Christi incarnatione inter alia medium nobis excellentissimum proponit ad Dei gloriam amplificandam nempe exinanitionem & humilitatem Christi , quæ in hoc potissimum mysterio elucet , ita vitæ eius mysteria quamquam multa variis in rebus abnegationis vniuersi amoris mundani & proprij exempla præbeant , solet tamen vt plurimum vnumquodque aliquod sibi proprium, medium, siue virtutem , aut partem mortificationis & abnegationis continere ; quare in singulis mysteriis attendi debet quæ potissimum Christi virtus eluceat , vt eius formam bene penetremus , & moribus nostris accomodemus , & in hoc quidem primo mysterio , vt dixi , potissima nobis humilitatis & exinanitionis Christi ratio habenda est. Nam si-

cut

cut initium omnis peccati, siue in Angelo, siue in homine, superbia fuit, nihilque ita gloriæ Dei procurationi, obstat, sicut propriæ æstimationis amor; ita Christus & hominem & Dei gloriæ reparaturus splendorem ab hac virtute, quæ fundamentum est totius ædificij spiritualis, initium duxit. De quo ita S. Bernardus serm. i. de aduentu. Reuera principes nostri Adam & Eua principia nostræ propaginis inobedientes & socij fuerunt, qui quod Dei filij est, serpentis imo Diaboli per serpentem consilio subripere tentant, nec dissimulat iniuriam Filij Pater (Pater enim diligit Filium) sed continuo & in ipsum hominem vindictam retribuit, & super nos aggrauat manum suam, omnes enim in Adam peccauimus, & in eo sententiam damnationis accepimus omnes. Quid agat filius videns prozelare patrem, & nulli penitus parcere creaturæ? Ecce inquit occasione mei creaturas suas amittit Pater, altitudinem meam primus Angelus affectauit, & populum qui sibi crederet habuit; sed continuo Patris zelus grauiter vindicauit in illum, percutiens eum pariter cum omnibus suis plaga incurabili, castigatione crudeli, scientiam quoque, quæ nihilominus mea, subripere voluit homo, & ne illi quidem misertus est, nec pepercit oculus eius. Nunquid de bobus cura est Deo? Deus tantum fecerat nobiles creaturas, rationis participes, capaces beatitudinis, Angelum videlicet & hominem; ecce propter me Angelos multos perdidit, homines vniuersos. Ergo vt sciant quia & ego diligo patrem, per me recipiat, quos quodammodo propter me amisisse videtur. Si propter me tempestas hæc orta est (ait Ionas)

tollite

tollite me & mittite in mare, omnes inuident mihi, ecce venio, & talem exhibeo memetipsum, ut quisquis inuidere voluerit, quisquis gestierit imitari, fiat ei æmulatio in bonum.

MEDITATIO I.

De Incarnatione Iesu Christi. Lucæ i.

Oratio preparatoria nihil à superioribus variatur.

PRimum præludium, est proferre in medium contemplandæ rei historiam, quæ hoc loco erit. Quomodo personæ tres diuinæ vniuersam terræ superficiem speculantes hominibus referatam qui ad inferos descendebant, in deitatis suæ æternitate decernunt, ut secunda persona pro salute humani generis naturam hominis assumat, vnde adueniente tempore præstituto Archangelus Gabriel ad B. Virginem Mariam nuncius destitatur.

Secundum præludium pertinet ad loci compositionem, quæ erit visio imaginaria; perinde ac si oculis pateret vniuersæ terræ ambitus quam habitant tot diuersæ gentes. Deinde ad certam mundi partem domuncula spectetur Beatissimæ Virginis apud Nazareth in prouincia Galilææ sita.

Tertium præludium continet gratiæ postulationem, ut intimè cognoscam, quo pacto Dei

M

Filius

Filius mei causâ sit homo factus, vt ardentius ipsū amem, abhinc sequar studiosius.

Primò, Angelus Gabriel B. Virginem salutans diuini verbi conceptionem ei nuntiat, Ingressus Angelus ad eam dixit. *Aue grati, plena &c. Ecce concipies in utero & paries filium.*

Secundò, Confirmat Angelus id quod prædixerat adducto exemplo Idæ sancti Ioannis Baptistæ conceptione admiranda. Et ecce Elizabeth cognata tua, & ipsa concepit filium in senectute sua: quæ vocatur sterilis.

Tertiò, Respondit Angelo Virgo sancta. Ecce ancilla Domini fiat mihi secundum verbum tuum.

Primum punctum, est vt speculer personas omnes de quibus agitur, & primo quidem homines suprâ faciem terræ degentes, adeò motibus, gestibus, & actionibus diuersos, quosdam albos, & nigros alios, nonnullos fruantes pace, & reliquos bellis agitados, hunc plorantem, & ridentem illum, sanum vnum, & alterum ægrotum, nascentes multos, & multos vicissim morientes, ceterasque varietates prope innumeras. Deinde contemplandæ erunt personæ tres diuinæ è solio suo regali intuentes omnia hominum genera in superficie terræ cæcorum more viuentium, planèque morientium & descendentium ad infernum, postea B. Virginem Mariam cum Angelo eam salutante considerabimus, aliquid inde semper ad nos reflectendos vt ex consideratione tali fructum aliquem referamus.

Secundum punctum. Est auditu interno excipere quid loquantur personæ omnes, vt homines in terris confabulantes, blasphemantes, sibi inui-

cem conuitiantes. Diuinæ tres personæ in cœlo de redimendo genere humano colloquentes, virgo & Angelus in cellula de incarnationis mysterio tractantes, quorum omnium reflectione seu applicatione quadam ad meipsum facta studebo ex singulis nonnihil fructus decerpere.

Tertium punctū consequenter erit, actiones quoque personarum simul attendere vt puta quomodo se inuicē mortales infestent, concutiant, trucident, & omnes ruant ad inferos; quomodo sanctissima Trinitas incarnationis opus exequatur, quomodo item Angelus sua fungatur legatione, & B. Virgo humillimè se gerens diuinæ gratias agat maiestati, ex quibus ad nos ipsos, vt dictum est, reflexis fructus obiter est legendus.

Colloquium postremò subiiciam disquisitis studiosè verbis, quibus diuinam quamlibet personam verbum incarnatum, & ipsius matrem dignè valeam compellare, petendo etiam pro affectu quem in me sensero quidquid iuuat ad maiorem Domini mei Iesu-Christi velut nunc recens incarnati imitationem.

Recitabitur in fine Pater Noster.

Ad considerationem primam, tria præcipue consideranda sunt.

IN hac contemplatione tria potissimum circa Christi incarnationem ad humilitatis & abnegationis exemplum perpendenda sunt.

Primum. Quid ad gloriam patris reparandam, & ex eius meique amore filius Deus etiam ipse maiestatis fieri dignatus est, nempe exinaniuit semetipsum formam serui accipiens: cum enim Deus esset, & sua gloria plenus, nec posset sibi ipsi aut aliis vilescere, ut tamen suæ bonitatis, iustitiæ, sapientiæ potentiæ diuitias & gloriam extra se effunderet, homo fieri voluit, nec solum nihilum, sed etiã misérias assumpsit, ut quod in diuina natura non poterat Dei verbum, id in humana faceret, & seipsum, suaque omnia bona ac perfectiones quodammodo subiiceret, & contemni ab hominibus, ac extrema quæque pati posset; nonne igitur pare est te tam gloriæ Dei quàm Christi Domini amore ità succendi, ut tibi & aliis vilescas, quodlibet eius causâ fias & æstimeris, & tuum omnem honorem eius gloriæ substernas: si enim Rex tuus inde cepit gloriam regni patris sui reparare, inde pariter conuenit te initium ducere.

Secundum. Ponderanda est perfectissima eius obedientia & voluntatis in eodem momento resignatio, & conformatio cum voluntate patris, ad perfectam diuinæ legis obseruationem, ad agendum & patiendum quiduis pro eius gloria:

nam

nam ait: In capite libri scriptum est de me, vt faciam voluntatem tuam Deus meus volui, & lex tua in medio cordis mei; quam promptitudinem & alacritatem ad finem vsque, donec omnia consummaret in cruce, retinuit: continuò persuadebo hanc mihi resignationem, & amoris Dei perfectionem esse imitandam, vt ex hoc momento totam ei voluntatem meam tradam paratissimam ad integram executionem, & hilarem, eius beneplacitum in medio cordis mei reponendo, quidquid tandem mihi sit patiendum.

Tertiò, perpendenda est regis mei quædam veluti incarceration 9. mensibus in vtero B. Virginis, & generalis rerum omnium huius mundi abnegatio & mortificatio, quam & tunc inchoauit, & deinceps totâ vitâ seruauit, seipsum continuò Deo Patri holocaustum offerens, & eo exemplo inductus, sensuum meorum vsu restricto, & rebus omnibus foras à me proiectis in vitæ religiosæ & secretioris abdita me mundo ignotus libenter recipiam.

De natiuitate Christi.

IN hoc mysterio elucet potissimum Christi paupertas humilitatis germana soror, & indiuidua com, atque post eam maximè necessaria ad dei gloriam amplificandam; Nam amor pecuniæ & mundanæ gloriæ quæ potissimum diuitiis quæritur post amorem propriæ excellentiæ, præcipuus est diuinæ gloriæ & amoris hostis, radix enim omnium malorum est cupiditas 1. Thimoth.

6. quare innumeri homines horum amore excæcati Dei honorem impiè & sacrilegè quotidie proculcant. Ego Christus Iesus hoc à se bonum proiciens iā inde à natiuitate id profitetur, diuitias nihil esse præ Dei gloria, & se ad inexhaustos paternæ gloriæ & perfectionum thesauros hominibus recludendos aduenire. Quare eo ita mundum mundi que opes in præsepio conténente, paupertatē non tam verbo quā exēplo docente, Angeli concinunt *Gloria in altissimis Deo*. Nimirum cum esset diues Deus, factus est pauper, vt quanti sint faciendæ gloriæ Dei diuitiæ ab ipso discamus. D. Bernardus serm. in vigil. de Natiu. Christi de eius paupertate deuotè & appositè ad hunc locum ita habet. Erat enim qui fortè sublimia ei quærenda arbitraretur esse palatia, vbi cū gloria Rex gloriæ susciperetur, sed non propter hoc à regalibus illis sedibus venit. In sinistra eius diuitiæ & gloria, in dextera longiturnitas vitæ? horum omnium æterna in coelis affluentia suppetebat, sed paupertas nō inueniebatur in eis: porrò in terris abundabat, & superabundabat hæc species, & nesciebat homo pretiū eius, hāc itaque Dei Filius concupiscens descendit vt eam eligat sibi & nobis quoque sua æstimatione faciat pretiosam.

CONTEMPLATIO II

De Natiuitate. Lucæ. 2.

Oratio preparatoria vt supra.

Primum præludium ex historia dependet quæ recensenda est ab egressu B. Virginis ex oppido Nazareth, quo scilicet modo ipsa iam nono mense grauida, & insidiens asinæ, vt piè meditari licet, ac Ioseph comes cum ancilla & boue profecti sunt Bethleem tributum à Cæsare exactum pro se soluturi.

Secundum præludium vero deducendum erit ex consideratione itineris æstimatâ eius longitudine, obliquitate, lenitate vel asperitate passim-occurren-; deinceps etiam Natiuitatis locum rimabimur, speluncæ similem latum vel angustum, planum vel erectum, commodè vel incommodè paratum.

Tertium præludium à superiore nihil mutabitur.

Primò, Beata Maria cum Ioseph sponso suo è Nazareth proficiscitur Bethleem. Ascendit autem & Ioseph à Galilæa &c. in Bethleem &c. vt profiteretur cum Maria desponsata sibi vxore prægnante.

Secundo, Peperit filium suum primogenitum, & pannis eum inuoluit, & reclinauit eum in præsepio.

Tertiò , Eodem tempore facta est cum Angelo multitudo militiæ cælestis laudantium Deum , & dicentium , Gloria in altissimis Deo &c.

Primum punctum. Est aspectus personarum vt Virginis Deiparæ & Ioseph coniugis cum famula & Christi Domini vt infantis nunc primum nati, inter quos me adesse fingam tanquam pauperculum eorum utcunque necessitatibus cum reuerentia maxima famulantem , ac inde quid ad me redire emolumenti ex tali spectaculo possit , dispiciam.

Secundum punctum , conficitur ex verborum quæ ibidem fiunt apprehensione fructuosa.

Tertium punctum. Ex negotiorum quæ ibi geruntur inspectione , puta itineris laborum & causarum ob quas summus omnium Dominus in summa natus sit egestate , laturus quoque in hac vita cum perpetua paupertate , laborē , famē , sitim , æstum , frigus , opprobria , verbera , & crucem tandem subiturus , idque mei causâ , vnde per singula studebo prouentum aliquem spirituales colligere.

Ad contemplationem secundam tria maxime perpendenda.

Primum est, quomodo Deus maiestatis , cuius est terra & plenitudo eius, cum esset diues , atque omnium diuitiarum fons, egenus fieri voluit , & voluntate , atque affectu , & re ipsa. Nam omnino nudus & pauper nasci elegit ex paupere matre

matre , in loco alieno coque vili , alieno in fœno excipi , alienis , vt credibile est , & vilibus pannis inuolui , cui deinde totâ vitâ ad crucem vsque non fuit vbi caput reclinaret , vt ita te doceret pro Dei gloria , & , vt eius procurationi vacare possis , omnia contemnenda esse , nōne ergo par est te omnem rerum mundi affectum prorsus ad extremam nuditatem exuere , & reipsa paupertatis effectus experiri non tantum te omni re abdicando , & superflua abiiciendo , sed etiam necessariis rebus priuando , gaudendo cum quid deest siue victui siue vestitui cum meliora dantur , cum id quod habes aufertur : sic natus est Christus , sic in Christo si nouus homo esse velis renasci te oportet.

Secundum est , quanto cum mundi contemptu actiuo & passiuo natus sit. Ideo enim natus est de nocte ; in loco obscuro , & vili sine strepitu aut concursu , ignotus omnibus , & despectus , nec enim erat ei locus in diuersorio. Iam tum mundus erat ipsi crucifixus , & ipse mundo , vt liberius & efficacius omni bono alio proculcato solam patris gloriam , cui mundanus amor & gloria infensissimus hostis erat , procuraret. Hoc quoque te imitari necesse est si eundem finem verè intendas , vt , quantum in te est , lateas , & te in tenebras abdas , sic enim securius te diuina prouidentia ex illis latebris ad suam gloriam illustrādam , cum ei visum fuerit , educet.

Tertium est , quod incipit etiam experiri communes vitæ huius misérias , dolores & gemitus sine vlla singularitate vel priuilegio , adeo vt verissimè dicat , Pauper sum ego & in laboribus à inuentute mea. Nam labor & dolor comes est indiuiduus paupertatis ; vide ergo quomodo tute laboriosis

laboriosis etiam operibus Deo utilem seruum sine vlla exemptione impendere queas regis tui exemplo.

De Christi Circumcisione.

Sicut in Incarnatione humilitatis, in Natiuitate paupertatis, ita in hoc mysterio mortificationis præcipuè dat nobis exemplum Christus Dominus, vt iam inde nos doceret quàm necessarium sit iis qui procurandæ aliorum saluti & gloriæ Dei vacant, corpus suum domare, eius appetitus compescere, mortificationem amare, ad incommoda quæuis perpetienda ad effusionem vsque sanguinis paratos esse. Nam non fert tanta vocatio carnis delicias & commoda vtpote sibi ex diametro contraria. Quare Christus ab iis initiis incipiens totâ vitâ in laboribus & incommodis ad crucem perseuerauit.

CONTEMPLATIO III.

De Circumcisione. Lucæ 2.

Primum punctum. Circumciscus est puer.

Secundum punctum, vocatum est nomen eius Iesus, quod vocatum est ab Angelo priusquam in vtero conciperetur.

Tertium

Tertium punctum. Redditus est matri suæ plorans, quæ illi compatiiebatur de sanguinis visâ effusione.

Tria potissimum hîc expendenda.

Primum. Quomodo rex gloriæ Christus Iesus Deus immortalis, cui ob personæ dignitatem, & animæ beatitudinem corpus gloriosum, impassibile, agile, & subtile debebatur, mundo apparuerit veste miseriæ nostræ, & infamis carnis tectus, corpore, inquam inglorio, passibili, doloribus obnoxio, vt hoc etiam mundo nempe huius vitæ laboribus, & tum communibus tum particularibus quibusdam corporis incommodis, & passionibus salutem nostram & patris sui gloriam procuraret. Hoccine est vestimentum regium in quo scriptum est Rex regum & Dominus dominantium. Non sic filij hominum sui nimium amantes, qui de suo iure nihil cedere, nihil de corporis commodis volunt diminuere, cum tamen admodum difficile sit sine aliquibus vitæ incommodis gloriæ Dei verè & vtiliter seruire: vide ergo tu ne occasiones fugiendi fugias, ne pro tuo iure hæc aut illa commoda, has vel illas animi relaxationes & recreationes quæras, sed potius vltro ad incommoda quæuis aspira.

Secundò, quomodo sit circumcissus & sanguinem iam tum fuderit, vbi personæ eius dignitatem, innocentiam, eius cognitiones, desideria interna, & externam hanc passionem expende; nam infans ille pro sua sapientia id medium ad Dei gloriam vltro elegit exoptans ex tunc

totum in eum finem sanguinem perfundere, vide quo ardore pretiosus ille sanguis ex inflammato corde suo exiit ad tuam salutem & patris gloriam, & cogita quod tibi exemplum dare intendebat veræ & perfectæ mortificationis, sensuum omnium & passionum &c. voluntatis atque iudicij. Nam hîc etiam eius obedientia fuit excellens, cum enim non subiaceret, tamen eam seruare voluit, & innocens peccatoris signum accepit.

Tertiò, Quomodo peractâ circumcissione vocatus sit Iesus, vt scias eius officium verè nullo modo potuisse geri, nec suum finem attingere nisi per circumcissionem. Quare si tu salutis & perfectionis propriæ, & aliorum curam verè habes, si verè in Societate Iesu, & nominis eius & officij particeps es, statue te perfectè circumcidere, aut enim & nomen & vocatio atque officium deserendum est, aut accuratæ perfectæque mortificationi vacandum; vide ne forte hætenus nec salutem tuam in tuto satis collocâris, nec te ad perfectionem promoueris, nec circa proximum quicquam solidi fructus effeceris, atque ita frustra in Societate Iesu fueris, ideo quia incircumciscus fuisti, & tuorum commodorum nimium amans.

De Christi Præsentatione in templo.

Superbæ rebellionis Angeli & hominis Deo creatori suo, quem ei debebat cultum, gloriam, & honorem, negantis exemplum, ne longiùs in genus humanum serperet in gloriæ Dei iniuriam, efficaciter curaturus Christus Iesus non satis habuit ipso primo momento suæ conceptionis in templo

templo suæ humanitatis, in altari purissimi cordis
sui Deo patri sese cum omni cultu & reuerentia
offerre & subiicere, suas ad eum orationes fundere,
humiliter sese in omne eius obsequium illi offerre
& consecrare, sed præterea quoniam id ad exēplum
nostrum necessarium erat, palàm in templo ipso, se-
se illi hostiam viuam, sanctam, Deo placentem ex-
hibuit, & solemnī illo sacrificiorum ritu protestatus
est sese ideo in mundum venisse, vt tantus quantus
erat in Dei patris sui gloriam consumeretur, quam
aduersus partem religionem, reuerentiam, & sui
oblationem ad crucem vsque nunquam intermisso
actu, exterius etiam sæpius, prout se dedit occa-
sio, exercuit.

CONTEMPLATIO IV.

De purificatione B. Virginis, & pueri Iesu
præsentatione. Lucae 2.

Primum punctum : Detulerunt puerum in
templum vt præsentarent eum Deo tanquam
primogenitum, offerentes pro eo consuetum
munus, par turturum, aut duos pullos columba-
rum.

Secundum punctum. Simeon veniens eâdem
hora in templum accepit, eum in vlnas suas, &
benedixit Deum, & dixit: Nunc dimittis seruum
tuum.

Tertium, Anna superueniens confitebatur
Domino,

Domino , & loquebatur de illo omnibus qui expectabant Redemptorem Israël.

Tria hic præcipuè sunt perpendenda.

Primum est, quod Christus in ipso primo templi aditu patri suo obtulerit nempe seipsum totum, corpus , animam , sanguinem vniuersum , vitam omnem , actionesque etiam singulas , & mortem in cruce cum omnibus tormentis , laboribus vitæ persecutionibus , doloribus , paupertate , infamia , contumeliis , opprobriis : hæc enim omnia ante oculos habebat , & videbat multum ad patris sui gloriam promouendam habere momenti , itaque sese suaque omnia ei perfectissimè subiecit , vide tu quid Deo hætenus obtuleris , quidque offerre in posterum debeas , & quomodo te ei ex integro consecrare.

Secundum est, quomodo ita sese Deo patri obtulerit nempe , Primò cum infinita quadam æstimatione & reuerentia erga diuinam maiestatem à qua cum sacratissima illa humanitas sese creatam , cum nihil ex se esset , & tot ornatam donis videret , dubium non est quin eum infinita quadam sui demissione ad nihilum vsque , imo infra nihilum sese ei demiserit , vt eam honoraret , & suam ab ea dependentiam potestaretur.

Secundò , Cum maximo erga eandem amore & ardentissimo gloriæ eius amplificandæ desiderio , nam illuminatissima anima illa cum Dei amore æstuarer , quid ei aliud in hac oblatione speraret quam ei sese refundere , & bonum gloriæ eius quod ei tantopere curæ esse scis, totis viribus procurare.

Tertiò ,

Tertiò, Probabile etiam est addictâ voti obligatione hæc omnia Deo patri obtulisse, non quod ad voluntatis confirmationem voti vinculo egeret: sed quia ad maiorem Patris gloriâ spectaret; & ea solet esse vis amoris, ut cum quippiam gratum esse ei quæ amamus nobis persuademus, illud ipsū statim realiter donemus, vel saltem abdicato omni iure nostro ei perfectè, quantum fieri potest, obstringamus.

Tertium est, quomodo ea quæ obtulit Christus Deo patri tota vita perfectissimè præstitit. Nam eius oblationis perfectio semper perseveravit actu interno: quoad executionē verò tota eius vita nihil aliud fuit quā continuū holocaustū. Christus quidem statim redēptus, nec in tēplo Deo mancipatus remansit, verū id factum est ut à contēplatiua vita quā ibi duxisset, ad actiuam & laboribus Dei gloriæ & hominū saluti vtilioribus exercitiā transiret, possētque ad Dei gloriam plura longè agere & pati, atque adeo plenū sui ipsius Sacrificium offerre eidem. Vide quomodo ea præstes, quæ vel Deo promissisti vel obtulisti, quā infidelis sis, quā avarus, Deo te ipsum aliaque quæ donasti subducens, quā sæpe Deum quod odit rapinam in holocausta ad iracundiam prouoces, quantum otiosam vitam ames, quantum horreas labores pro Dei gloria, tuâ & aliorum salute & perfectione.

De fuga Christi in Ægyptum.

NOn diu post oblationem sibi factam Deus pater filium suum secundum ardentia eius desideria exercet: nam statim permittit Herodiana persecutione in discrimen vitæ venire, ut occasionem habeat præbendi nobis exemplum tum indifferentiæ circa habitationis locum, tum fiduciæ in diuina prouidentia, exuto affectu omni erga patriam, & abiectam inani confidentiam in parentibus & amicis. Hæc certè indifferentia quoad locum habitationis, & fiducia in Dei prouidentia quocumque tandem pro Dei gloria mittamur in Societate valde necessaria est, ut pluribus in locis declarat B. P. N. p. 3. c. 2. ex gen. & p. 6. c. §. 5. & alibi. Quare cum Societatem ad Christi vitam formare intenderet, hæc experimenta constituit, ut quemadmodum Christus Iesus vitæ initio ad præsentationem usque clā in loco obscuro delituit internis potissimum actibus Deo vacans, ita statim initio per integrum mensem spiritualibus exercitiis sese Deo nostri iungat, deinde alterum aut duos menses pauperum more peregrinando mendicent, ut possint, inquit, ad incommoditatem comedendi & dormiendi assuescere, atque adeo ut omni spe illa abiecta, quam in pecuniis & aliis rebus creatis possent constituere, integrè vera cum fide & ardenti amore eam in suo creatore & Domino constituent: sic B. P. N. in examine c. 4. §. 12.

CONTEMPLATIO V.

De fuga Christi in Ægyptum.

Primum punctum. Volens Herodes puerulum Iesum interficere occidi fecit innocentes, præmonito Ioseph per Angelum ut in Ægyptum profugeret; surge & accipe puerum & matrem eius, & vade in Ægyptum.

Secundum punctum. Iter corripuit Ioseph Ægyptum versus; qui consurgens nocte & c. secessit in Ægyptum.

Tertium punctum. Et erat ibi usque ad obitum Herodis.

Tria hic perpendenda.

Primum. Deum hanc persecutionem permisisse ut filium suum iam tum in asperis & laboriosis huius vitæ casibus & itineribus exerceret. Quare cum posset alio modo eum eripere, tamen eum voluit patriam, parentes, amicisque bonaque omnia, ex quibus solatium aliquod haurire poterat, deferere, & fugere, non ad Magos vel ad alios notos, sed in Ægyptum, barbaram & idolis addictissimam regionem, quia id & ad eius labores & misérias maiores, & ad Dei gloriam futurum erat: ubi licet admirari diuinum consilium in vita filij sui ita gubernanda, ut discamus etiam nos dispositioni sanctæ Dei prouidentiae committere,

tere, si quid aliquando nobis accidar.

Secundum est, quomodo iubente Deo per Angelum, ut Iosephus statim de nocte surgeret, cum solo puero & matre, omnibus relictis in regionem longinquam & sibi ignotam abiret, & ibi esset non uno aut altero mense, non certo tempore, sed quamdiu Deus aliud significaret: ipse Iosephus, Beata Virgo & præcipuè Christus Iesus excusso somno posthabita corporis quiete, nocte ipsa, omnibus relictis, ad locum illum Deo confisi, magna fide, cæca obedientia, prompta voluntate; animo generoso alacrique ire cape- rint. Et tu confunde teipsum quod ab his virtutibus ita instituto tuo propriis longissimè absis, & eas à Christo Domino postula.

Tertium est, quod fuerint in duro illo & aspero exilio septem annis ut multi putant, in extrema paupertate, in medio nationis prauæ, expectantes patienter donec Dei prouidentia placeret in Iudæam reuocare. Interim vero dubium non est, quin vitæ innocentia & sanctitate, aliisque rationibus, prout occasio erat, Dei cognitionem & amorem in eo populo propagarent, & forte huius in Ægypto commorationis fructus extitit tot sanctorum virorum religiosorumque innumera multitudo, qui in ea postea ad Dei gloriam floruerunt, nempe nullus est tam desertus, tam agrestis, aut adeo alienus locus, in quo si ad illum te Deus mittat, non possis saltem orando & sancte viuendo magnum Dei gloriæ fructum percipere. Quid scis an non te ab eo, in quo libenter habitas, remoueat quia præuidet fore ut in graui in eo vitæ spiritualis pericula venias, viue ergo & Domini tui negotia fidelis seruus in eo loco

ad solidam Perfectionem. 195

loco gere in quo te esse voluerit. Ille Dei spiritus est, vt quibus vti ad gloriam suam parat, eos prius tanquam indignos procul abiiciat, & in abditas & ignobiles sedes veluti compingat.

De Christo remanente Hierosolymis.

Reuersus in Iudæam Christus non est dubium quin in illa vita priuata cum parentibus in vilibus sese officiis occuparit, cui vitæ eius parti responderet probatio quæ quarto mense fit in Societate, in vilibus culinæ, & aliis domesticis ministeriis, quæ quidem etiam suo modo deinceps perseuerat. In eo autem quod remansit Hierosolymis, vt patris sui negotiis vacaret, significatur tum perfecta mundi derelictio, & omnis humani respectus abdicatio, tum quibus in rebus ij qui ad Christum se se aggregant occupandi sint, nempe discendo ea quæ ad Dei gloriâ vtilia sibi esse possunt, & suo modo alios quos possunt pro sua conditione docendo, hæc Christus fecit hoc triduo.



MEDITATIO VI.

De Christo remanente Hierosolymis.

Primum punctum. Natus Iesus annos duodecim è Nazareth profectus est Hierosolymam.

Secundum punctum. Remansit illic nesciis parentibus.

Tertium punctum. Post triduum inuenerunt eum in templo sedentem inter doctores, & ipse illis causam moræ percunctantibus respondit. Nesciebatis quia in iis quæ sunt patris mei oportet me esse.

MEDITATIO VII.

Ad hæc Christi verba : Nesciebatis quia
in his quæ patris mei sunt
oportet me esse.

Expendenda sunt hæc tria.

Primum est Christum præter Iosephum officio patrem, & B. Virginem veram matrem, significare se patrem verum habere à quo dilectus filius vt fidelis negotiorum paternorum administrator

strator missus sit ad gloriæ eius procurationem ; nam ille est finis missionis eius , quem certè his verbis ita cordi fuisse insinuat , vt præ illo & matrem sanctissimam & Iosephum contristari, imò si fuisset opus merito contemnere potuisset : sciebatis, inquit, me Dei vnigenitum ad eius gloriam procurandam venisse, ergo scire debebatis me in ea re occupari debere: vide num in te Dei creatura seruo, filio, ad officij Iesu societatem vocato tam inefficax insit diuinæ gloriæ intentio, vt omnia ei sic postponas?

Secundum est ea quæ erant negotia in quibus se Christus hoc triduo ad patris gloriam occupauit , fuisse tria. Primò enim toto triduo est verisimile in templo remansisse , & continuis orationibus intentum pro hominibus supplicasse ; Deinde etsi esset Dei sapientia; tamen tanquam discipulus cum humilitate magna, non secus atque si rudis fuisset, doctores interrogauit; denique etiam cum magna prudentia & modestia interrogantibus respondebat, non ostendendæ doctrinæ causa, sed ex vero zelo gloriæ Dei , vt eius cognitione & amore pro eo quod ætatis ratio patiebatur docendo aliis infunderet. Has certè occupationes Dei negotium quod tibi commissum est ordinariè requirit, vt spiritualibus rebus vaces diligenter, & suo tempore studiis te des, denique vt etiam pro tua conditione alios iuues.

Tertium est quod dicat oportere se esse in iis patris negotiis , id est , sese totum omnibus aliis, quæ ad carnem & sanguinem pertinent , abdicans, applicare : vide & tu pariter num in iisdem totus sis, an non tui partem possideat amor corporis , aliam amor mundi & vanitatis : laudabile

quidem est studere, sed ex pura intentione duntaxat gloriæ Dei, & suo tempore, sic vt aliis etiam vaces; plura illa erant in quibus Christus dixit se esse debuisse, si totum te studiis dederes, caue ne à Christi exemplo recedas, quantumuis tibi videaris ex Dei gloriæ intentione, aliis omissis, illis vacare.

De vita Christi ab anno 12. ad 30.

Cum in Iudæa plerique omnes ab hac circiter ætate & deinceps audiendis doctoribus, & legi ediscendæ operam vsque ad annum 30. quo primum licebat doctorem agere & Christus Dominus Dei sapientia, studio non egeret, totum illud tempus, ne in otio viueret, vili opificio, & humilibus parentum obsequiis tribuit, inter quæ tamen sapientiæ & virtutum omnium perfectiora in dies opera edebat. Crescebat enim ætate, sapientia, & gratia apud Deū & homines & parentibus in arte fabrili & cæteris domus officiis subditus erat. Quod nobis exemplo fuit vt non in publicum prodeamus & ad maiores functiones aspiremus nisi quando Deo placuerit. Interim verò ita nos contineamus, vt non otiosam vitam agamus, sed ea instrumenta doctrinæ, & sanctitatis atque humilitatis comparemus quibus suo tempore quando Deus vocabit, vtilis aliis esse possimus.

MEDITATIO VIII.

De vita Christi ab anno 12. ad 30.

Luc. 2.

Primum punctum quomodo subditus erat & obediens parentibus.

Secundum punctum. Proficiebat sapientia, & ætate, & gratia, &c.

Tertium punctum, videtur artem fabrilem exercuisse, cum dicat sanctus Marcus cap. 6. Nonne hîc est faber?

Tria hic perpendenda.

Primum est quomodo Christus crescebat sapientia & gratia apud Deum & homines. Nam etsi à primo momento conceptionis in eo essent thesauri omnes scientiæ, sapientiæ & gratiæ, atque adeo nihil addici posset, tamen non statim perfecta sapientiæ & virtutum opera edidit, sed pro ætatis ratione maiora sensim & perfectiora suæ scientiæ, sapientiæ, & virtutum exercitia tum verbo, tum facto obiuit; adeò ut & coram Deo & coram hominibus maior eius sapientia, scientia, prudentia, amor Dei & proximi, humilitas, mansuetudo, modestia, patientia appareret, ita certè te crescere oportet non in scientia tantùm naturali, sed supernaturali sapientia, Deique & rerum Diuinarum cognitione & æstimatione, itémque in omnibus

N 4

virtutibus;

virtutibus, præcipuè verò humilitate, obedientia, & modestia, idque coram Deo ad vitandam hypocrisim, & coram hominibus, vt iis exemplum bonæ ædificationis præbeas.

Secundum est quomodo Christus fuerit subditus parentibus: vbi perpendendum quis erat subditus, quibus & in quibus rebus, certe in duabus præcipuè; primò quidem in arte fabrili quam cum illis & ex illorum voluntate exercuit non secus atque solent pauperum filii, in quo maxima apparet Christi humilitas etsi liberè id opificium elegisset, ita tamen in eo versatus est tot annis quasi non ex propria electione, sed parentum voluntate non delectatione, & fallendi temporis causâ, vt multi diuites solent, sed ex necessitate, quasi opus eo haberet ad vitam sustendendam, suscepisset.

Secundò in aliis domesticis obsequiis ad eum planè modum quo cæteri pueri parentes pauperes in verrendo, focum componendo, & cæteris id genus solent adiungere, imo magis, cum venisset ipse non ministrari vt parentes filiis sæpe solent, sed ministrare, qui enim discipulis deinde pedes lauit, quæ obsequia patri & matri præstare potuit? fuit hæc Christi vita quasi præludiū quoddam eorum quæ postea gessit, & perfectiorum exercitiorum rudimentum, in quo tamen non miuus diligens & exactus fuit, quam in altioribus illis prædicationis & conuersationis functionibus. Nec enim cum minori æstimatione & feruore hæc exigua obsequia sibi iniuncta præstitit, quam aliis postea vacârit, cum non tam ipsa secundum se opera, sed patris sui voluntatem intenderet, quam tanti æstimabat in vilibus occupantem

panthem, quanti ad excellentia illa vocantem: vide tu quomodo in studiis tuis & aliis domesticis ministeriis Christi exemplo te conformes in humilitate præcipuè & obedientia.

Tertium est quomodo in priuata illa vita tegerit suam maiestatem, excellentiam, sapientiam, accepta à patre dona sub hoc vili statu, exacto silentio & maxima modestia, obtegés, ab omni publico congressu, disputationibus, collationibus, prædicationibus abstinens; adeo vt idiota ab omnibus reputaretur, idque tanto tempore donec Deo patri visum fuerit; vt seipsum mundo manifestaret, disce hinc quis sit Dei spiritus, quis mundi: Deus, etsi suæ gloriæ amantissimus sit, nō tamen vult te illico ad eius procuracionem applicare, vt humilius in humilitate funderis, & inde maiorem ipse gloriam accipiat; vult te in tenebris delitescere, & velut elinguem silere 3. annis, vt postea exiguo forte tempore trium annorum appareas sine tuo periculo illustrior & efficacior gloriæ eius præco, nec enim otiosa sunt tēpora in humilitate & silentio transacta: contra, spiritus mundi, etsi Deus non vocet ad honorificas functiones, impellit nullo fructu, ingenti periculo.



CAP V T X X V I I I.

*Ad exercitium de vexillis & sequentia vitæ
Christi mysteria.*

P A R A G R A P H V S. I.

Quis sit ordo sequentium exercitiorum.

Postquam Christus Dominus triginta integros annos in priuatæ potissimum vitæ studiis posuit, quod reliquum erat vitæ ad hominum salutem & perfectionem promouendam conferre palàm aggressus est, quo in opere 4. præstitit.

Primò enim sese nouo modo ad illud parauit.

Quoniam non erat diu mansurus in hoc mundo, Apostolos sibi tanti operis socios & successores elegit quos secum perpetuò habere voluit, vt faciliùs priuato etiam labore eos ad vitæ perfectionem monitis & exemplis proueheret, & tantæ procurationi idoneos efficeret.

Tertiò, Postquam illos ita instruxit & sinu suo emisit, vt alios ad salutem pariter ac perfectionem tanquam ipsius legati inuitarent, huius verò missionis munia omnia & functiones, vt cum sua & aliorum eximia perfectione re ipsa exquerentur, non solum docuit verbo, sed etiam suis exemplis, quânam ratione virtutum omnium
charitatis,

charitatis, paupertatis, mortificationis, mundi contemptus, humilitatis, ac diffidentiae de suis viribus, orationis & obedientiae vim & splendorem veluti imbuerent, & intexerent, atque ita simul suae & aliorum perfectionis semper rationem haberent.

Quartò. Cum quantum satis esset pro Dei gloria & salute hominum verbo & opere laborasset, quod reliquum erat, patris voluntate vitam ipse suam & sanguinem in holocaustum obtulit Apostolis, & nobis exemplum omnibus relinquens ut sequamur vestigia eius.

Huius ergo partis vitae Christi Domini summa quaedam est exercitium de duobus vexillis, quod ideo à B.P.N. ponitur ante meditationem de Baptismo, ut sit quaedam veluti delineatio vocationis, missionis & vitae Apostolicæ cuius Christus Apostolis exemplar à Baptismo præbuit.

Inducit porro duos exercitus, tum quia Christus Dominus aliquando se venisse significavit, ut destrueret opera Diaboli, & fortem armatum expellat, tum ut significet omnes homines ad alterutram partem pertinere, ac proinde facilius quisque statuatur quam sequi velit, tum ut vocati ad Apostolicam vitam intelligant quam sequantur, contra quam pugnent, quo fine, quibus mediis & armis uti debeant,

P A R A G R A P H V S . II.

In quo consistat finis vitæ Apostolicæ siue procuratio gloriæ Dei.

QVoniam magni refert distinctè concipere & bene apprehendere quis sit vitæ nostræ finis , vt ad illum perpetuò collineare possimus , operæ pretium est pauca hîc inferere de vitæ Apostolicæ & societatis nostræ fine ; deinde de mediis quibus ex Christi Domini exemplo & documentis vti debemus ad illum attingendum.

Finis ergo vitæ Apostolicæ est gloriæ Dei amplificatio , quæ certè in eo consistit, vt Deus tam à nobis quàm ab omnibus proximis cognoscatur verus æternusque Deus , ametur vt suprema maiestas, ritè perfectèque colatur. Hanc enim vtramque partem complectitur commissum Apostolis munus , vt & ipsi in suæ salutis & perfectionis (quæ in perfecta Dei cognitione & amore cōsistit) & proximi salutis pariter ac perfectionis curam totis viribus incumbant : ad hoc vtrumque vocati sunt à Christo Apostoli, vt & ipsi in Christi schola suæ salutis & perfectioni studerent , & aliorum salutis & perfectioni vacarent ; ad eundem etiam modum de societatis institutione ita habet B. P. N. Ignatius. Finis huius societatis est non solum salutis & perfectioni propriarum animarum cum diuinagratiâ vacare , sed cum eadem impensè in salutem & perfectionem proximorum incumbere.

Itaque

Itaque finis iste ex ambabus partibus conflatur, ut non vna tantum alteri extrinsecè & veluti per accidens adiungatur: sed potiùs ex natura huius instituti ita cohæreat, ut sese mutuò peruadant, afficiant, & modificent: nam eam sibi propriam perfectionem proponit non quæ cuius alteri homini, vel instituto religioso propria est, sed quæ proximorum saluti, & perfectioni impensè procurandæ congruit magis. Quare eam diuinæ cognitionis & amoris cæterarumque virtutum praxim potissimum amplectitur, quæ simul etiam ad excellenter promouendam aliorum salutem & perfectionem valeat, & vicissim ita perfectioni & saluti proximorum incumbit, ut hæc ipsa procuratio non solum nulla in re salutem & perfectionem propriam impediat, sed etiam eam multò promoueat, atque adeo multas variâsque occasiones offerat, excellentissimos præstantissimarum virtutum actus (quibus propria perfectio vel continetur vel acquiritur dum aliorum saluti & perfectioni vacant) exercendi.

PARAGRAPHVS III.

*In quo sita sit maior Dei gloria societati
proposita.*

ATque hinc intelligitur quomodo nostrum institutum, maiorem Dei gloriam (quod B. Ignatio in ore assiduè erat) semper intueatur. Nam varia est mensura diuinæ gloriæ quæ intendi ab omni rationali creatura debet.

Primo

Primò enim magna est Dei gloria quod quis ita studeat suæ salutis ut nullum peccatum graue admittere pro vita etiam conseruanda velit.

Secundò, Maior vero est æstimatio diuinæ amicitiae quando ne quidem veniale, etsi moriendum esset, deliberatè admitteret.

Tertiò, etiam maior adhuc, si ad perfectam puritatem, etsi opes, honores, commoda, licite etiam cum æquali Dei gloria, & sine peccato veniali deliberato admittere posset, mallet tamen se iis omnibus exuere & paupertatem, ignominiam, poenitentias & corporis incommoda amplecti, tum ut longiùs ab occasionibus venialium impuritatum abeat, tum ut Christo Domino similior sit. Quartò, est præterea maior Dei gloria quando non ea tantùm puritas, & perfectio propria procuratur, sed etiam pro occasione, etsi non ex instituto proximus ad eam adiunatur. Quintò denique eo maior adhuc est, quando ex instituto ita finis vterque coniungitur, ut simul vtrumque in omnibus intendatur, atque adeo quasi æque primariò. Licet enim quisque priùs de se sollicitus esse debeat, tamen potest sæpe fieri, ut tanto amore diuinam gloriam concupiscat, ut de se vix cogitet, & suam gloriam & salutem, quatenus bonum quodquam proprium est, nihil vel parum curet, vnius Dei gloriæ agglutinatus, vbicumque illa demum existere possit. Sic Apostolus Paulus cupiebat etiam esse anathema à Christo pro fratribus; sic Moyse deleri se de libro vitæ optabat, ut populus ille liberaretur idque ad Dei gloriam quam sibi vterque propositam & cordi habebat quam maxime.

mè. Nam ideo Moyſes ſic extremam ab illo populo perniciem amoliebatur, ne eius interitus in Dei contemptum apud exteras nationes redundaret.

Ad hanc maiorem Dei gloriam tota Chriſti vita compoſita fuit ; Nam cum in forma Dei eſſet nec rapinam arbitraretur eſſe ſe æqualem Deo , tamen exinaniuit ſemetipſum & quodammodo anathema factus eſt formam Dei accipiens, habitu inuentus vt homo, homo inquam, infirmus & mortalis qui propoſito ſibi gaudio ſuſtinuit crucem , confuſione contempta, vt violatum ab homine diuinæ gloriæ decus repararet. Quamquam enim ſanctitas eius & gloria ad maximam Dei gloriam redundaret , tamen erat etiam ingens quoddam bonum ſub ea conſideratione , ita eam in noſtram ſalutem & perfectionem , quatenus in ea Dei gloria conſiſtebat , retulit , perinde ac ſi fuiſſet medium in illum finem ordinatum, atque ita vixit atque ſi hominis ſolius cauſâ in mundum veniſſet ; Ad hanc ideam formata Societas quamquam ſuæ ſaluti & perfectioni cum diuina gratia vacet ſtudioſiſſimè, quatenus in ea maxima Dei gloria poſita eſt : tamen eam proximi ſalutem & perfectionem refert, perinde atque de ſe longè minùs ſollicita eſſet quàm de proximo in cuius ſalutem & perfectionem impenſè incumbere ex inſtituto tenetur , quod dum facit, excellenti plane in Deum amore ſuam ipſe perfectionem cumulat adeo , vt etſi ſuum bonum etiam ſalutis ac perfectionis negligere ipſa pro Deo & ad maiorem Dei gloriam videatur , ſingulari tamen modo illud ipſum procurat.

P A R A G R A P H V S. I V.

*Hanc Dei maiorem gloriam quænam
impediant.*

NON difficile est ex his colligere quænam sint maioris Dei gloriæ impedimenta , qui hostes ; Dæmon enim Dei & hominum hostis cum eius gloriam , & nostram salutem ac perfectionem ab initio auertere in animum induxisset, in miseram hominum vitam, innumera prope impedimenta diuini honoris , auxilio mundi & infirmitatis carnis nostræ adiutus inuexit quibus omni tempore infelices mortales à suo fine longius abduxit. Atque vt de infidelitate impietateque nihil dicam , quot rectè sentientes in mortalia peccata quotidie inducit ? quot ad perfectionis statum vocatos minoribus quibusdam peccatis , non paruis tamen vinculis irretitos tenet , ne ad suum finem perueniant ? atque quotquot ita hos omnes altero è duobus modis impedit ; vel enim fallacium bonorum cupiditate à gloriæ Dei bono prosequendo dolo malo auertit ; vel intentatis mali alicuius minis vique aperta ac persecutionibus obsistit. Prior gloriam Dei oppugnandi modus fundatur in illa humanæ voluntatis inclinatione , quam ad bonum in genere habet. Nam cum Deo expleri in hac vita nequeat, nec satis appareat dignitas & pretium quo diuina gloria æstimari debet , facile fit vt bonorum creatorum familiaritate capiatur , eaque pluris quam par est æstimet,

æstimet , & nimium prosequatur ; quo fit vt. boni gloriæ Dei decreſcat in voluntate æſtimatio , eo plus vel minus quo plura cætera fiunt ; atque ita zelus diuini amoris , deſiderium & intentio tam excellentis finis minus feruens , minus pura , minus vniuerſalis , minus perfecta reddatur , imo quandoque prorsus deſtruatur.

Hæc vero ſunt opera Diaboli , hic eius ſcopus, eò vires omnes ſuas confert , vt ſi initio finis intentionem graui aliquo peccato prorsus euertere non poſſit , ſaltem inordinatis affectibus concutiat & labefactet , atque longe minus idoneam ad vitæ Apoſtolicæ opera reddat. Solet autem vt iis modis eodem ordine, quem B. P. N. in hoc de vexillis exercitio proponit. Quare optimus dux Redemptor noſter , qui venit vt deſtrueret opera Diaboli , iſtis eius impugnationibus contrarias , & Apoſtolico fini proprias ſtruit virtutes . & vexillum vexillo , arma armis , media mediis opponit.

P A R A G R A P H V S V.

*Quenam media Chriſtus Dominus ad
finem Apoſtolicæ vitæ pro-
ponat.*

QVoniam hic finis compoſitus eſt , ita non vnus generis media habet , quæ enim ad propriam perfectionem valent, vera abnegatione & mortificatione , virtutumque omnium
O exercitiis,

exercitiis , deinde orationis, & spiritualium mentis actionum, examinis, lectionis, atque cum Deo familiaritatis studio continentur : quæ autem proprie ad proximum pertinent , sunt externæ functiones , concionum, Catechismorum, administrationis Sacramentorum, lectionum, conuersationis , & id genus alia, quæ tamen in propria sanctitate fundantur, & ab ea suam potissimum vim trahunt. Quare propria perfectio etsi sit finis , tamen à vita Apostolica assumitur , vt medium potissimum ad perfectionem proximi , sicut contra ipsa in proximum charitas, & salutis eius ac perfectionis procuratio ad propriam perfectionem promouendam ab eadem dirigitur. Nam Apostolicæ vitæ finis ita unicam Dei maiorem gloriam intuetur , vt eam & in nobis & in proximo simul & vnica intentione spectet. Quare etsi media quædam sint per quæ in nobis ipsis , quædam alia per quæ in proximis ea promouetur , tamen sic in vita Apostolica simul veluti confluunt & iunguntur omnia , vt nostra sanctitas & perfectio quæ ad nostram perfectionem spectat , medium sit ad proximi perfectionem & maiorem in eo Dei gloriam promouendam , & vicissim quæ circa proximum exercentur functiones , atque adeo ipsa eius perfectio , ad nostram perfectionem medium etiam existant ; Nam finis ipse diuinæ gloriæ ita vtramque perfectionem complectitur , vt vnā ad aliam tanquam medium ad finem referat. Quare etiam sanctitatem persequitur quæ idonea sit vt in proximi sanctitatem intendatur , & rursus ita in proximi perfectione sese impendit, vt dum id agit etiam perfectioni propriæ impense vacet, atque ita dum in propriam

propriam perfectionem tanquam in finem intendit, simul etiam tanquam medium perfectionem proximi dirigat, ut iterum dum gloriam Dei circa proximum curat, eam procuracionem adhibeat quæ propriam etiam perfectionem plurimum promoueat; ex quo fit ut quisque quò ad maioris perfectionis propriæ gradum aspirat, & perfectiori cum intentione persequitur, eò efficacius etiam medium ad finem diuinæ gloriæ in proximo promouendi fabricet; & vicissim ipsa contentio ad finem perfectionis proximi valde efficax medium est non tantum ad proximi, sed etiam ad propriam salutem & perfectionem promouendam. Quare ad Apostolicam vitam pertinet ea vitæ sanctitas quæ perfectam maioris gloriæ intentionem, feruentemque zelum qualem alibi describemus, continet; deinde per plenam omnis amoris mundani & proprii victoriam, virtutumque moralium exercitia, omni bono proprio etiam vitæ & famæ posthabito, non tantum voluntatem liberam ab omni alio affectu in Dei bonum procuranti subiiciant, ut ab ea in eum finem dirigantur, atque ita in proximo etiam parem sanctitatem producat rursus ipsa perfectionis proximi procuratio tot & tam aptas propriæ perfectionis & omnium virtutum exercendarum occasiones offert, ut ad propriam perfectionem plurimum conducat.

P A R A G R A P H V S VI.

Quis ordo inter media ea seruandus.

QUamquam vero hæc media ita se peruant, & ad se mutuo referantur, est tamen certus aliquis inter ea ipsa ordo diligenter obseruandus: Nam ea diuinæ gloriæ portio quæ ex propria perfectione dimanat, prius à nobis intendi & re ipsa pluris æstimari debet, licet enim iis esse animi ardor in procuratione diuinæ gloriæ circa proximum aliquando videatur, vt censerî possimus non tantum vitæ & famæ aliorumque bonorum, sed etiam salutis & perfectionis nostræ obliuisci, tamen nec ita est nec esse debet is circa proximum ardor ex eo diuini amoris igne qui in nobis flagrat, & valde perficit, exoritur; Nam hæc amoris Dei perfectio ideo medium est ad proximi salutem & perfectionem procurandam, quia est amoris proximi principium, procuratio vero perfectionis proximi ideo medium est ad nostram perfectionem, non quod eius principium sit, sed potius quia varias nobis occasiones obicit; quibus diuini boni amor excellenter exerceri à nobis possit. Quare ex natura rei principium prius est eo cuius est principium & quod ab eo dependet; ita sane propria perfectio prius in nobis stabilienda est quàm ad proximi perfectionem stabiliendam profiliat: sicut enim Deus ipse nihil perficeret, imo nihil efficeret nisi bonus & perfectus esset, cum ex eius bonitate

bonitate & perfectione, tanquam ex infinito fonte cuncta promanent, ita prorsus diuini boni gloriæ perfectus amor occupare non antea debet, quàm vt apte & efficaciter erumpere possit ad eandem gloriam in aliis procurandam: Hic igitur ordo tenendus est, vt imprimis diuinus amor in quàm maximum Dei gloriæ bonum tota voluntate tendat purissime; deinde quæ in Deo sunt bona congratulus ad extrinsecam ei gloriam procurandam profiliat. Tertiò quoniam ea procuratio ab amore Dei quæ in nobis est tanquam à principio continuo dependet, plane necesse est, vt ipse seipsum prius stabiliat & perficiat, nostramque mentem & voluntatem exclusis rebus omnibus creatis Deo solo impleat, ei que immobiliter tanquam supremæ veritati & bonitati, tum cognitione tum affectu astringat: Denique ita corroboratus & diuino lumine & ardore inflammatus, ad alios pariter suo igne illuminandos erumpat, & conceptam intellectu & voluntate diuinæ gloriæ æstimationem à se in alios propaget, & longelateque diffundat. Quod dum efficit tantum abest vt detrimenti aliquid in se patiatur, vt etiam ipso sui vsu & effusione exardescat magis. Nec enim solum Dei perfectiones sensim profundius penetrat, & nouas eum amandi rationes detegit, sed etiam in ipsa eius gloriæ procuratione innumeras habet occasiones agendi & patiendi plurima, quibus sicut omnis proprius amor extinguitur, ita diuinus amor exercetur & efflorescit. Hunc ergo ordinem non solum tenuisse visus est Christus Dominus, sed etiam Apostolis tradidisse. Nam licet perfectus esset anrequam ad publicum sui mune-

ris exercitium accederet, primum in tenera ætate, in paterna domo, intra priuatos parietes, deinde etiam in deserto ipso diebus 40. propriè visus est perfectionis fundamenta ponere, vt inde ad aliorum salutem procurandam efficacius veniret, Apostolos verò ita ad se vocauit, sibi que socios adiunxit, vt prius in illis Apostolicæ perfectionis & sanctitatis fundamenta poneret, deinde ita perfectos ad aliorum salutem perfectionemque procurandam emitteret.

PARAGRAPHVS VII.

*In quo sita sit ea sanctitas & perfectio propria,
quæ ab Apostolica vitæ sectatoribus
requiritur à Christo.*

EA ergo vitæ sanctitas & perfectio propria cuius nobis exemplum Christus dedit, & quam suis Apostolis tradidit, in iis consistit quæ nos ipsos ab omni amore proprio & mundano euacuant, & ab omnibus creatis rebus mentem nostram affectumque retrahunt, vt postea liberiùs gloriæ Dei procurationi vacare, eique fini omnes facultatum nobis concessarum functiones facile, alacriter & perfectè applicare possimus. Quemadmodum enim Dæmon inordinato amore diuitiarum, mundani honoris, & propriæ excellentiæ, cæterorumque quæ sub sensum cadunt, homines à salute sua, perfectione, & vitæ sanctitate procul abducit, ita Christus Dominus vt eius

eius opera prorsus destruat, & nostram salutem, & perfectionem promoueat hoc in Apostolis suis & nobis solum efficere contendit, vt ab amore inordinato terrenorum bonorum, honorisque mundani, & propriæ excellentiæ, traducat ad purissima & sanctissima maioris gloriæ suæ desideria. Nam quamuis ipsa inordinatorum affectuum mortificatio non sit nostra perfectio, ita tamen est illi coniuncta, vt separari à se mutuo nequeant, est vnus idemque modus, quo & imperfecti & nostri nimium amantes esse desinimus, & perfecti, id est Dei veri amatores efficimur. Quare B.P.N. in hoc exercitio de vexillis hoc proponit ad Dei gloriam promouendam medium, quod Christus & per Apostolos omnibus proposuit, vt Christi paupertatem, mundi nostrique contemptum propter Dei amorem complexi, liberi iam & ab omnibus creatis rebus expediti tutius & efficacius Apostolico muneri vacare possimus.

MEDITATIO I.

De vexillis duobus.

Oratio præparatoria fit more solito.

Primum præludium, erit historica quædam consideratio Christi ex vna parte; ex altera Luciferi, quorum vterque omnes homines

ad se vocat sub vexillo suo congregandos.

Secundum præludium. Est ad constitutionem loci vt nobis representetur campus amplissimus circa Hierosolymam, in quo Dominus Iesus tanquam bonorum omnium hominum dux summus assistat: rursus alter campus in Babylonia, vbi se Lucifer malorum & aduersariorum ducem exhibeat.

Tertium præludium, Ad gratiam petendam, illud erit, vt poscamus exploratas habere fraudes mali ducis, inuocata diuina ope ad eas vitandas, veri autem optimique imperatoris Christi agnoscere mores ingenuos, ac per gratiam imitari posse.

Primum punctum. Est imaginari coram oculis meis apud campum Babylonicum ducem impiorum in cathedra ignea & fumosa sedere horribilem figura, vultuque terribilem.

Secundum punctum est aduertere quodammodo conuocatos Dæmones innumeros per totum orbem spargi ad nocendum, nullis ciuitatibus & locis, nullis personarum generibus immunibus relictis.

Tertium punctum. Attendere cuiusmodi concionem habeat ad ministros quos instigat vt correptis iniectisque laqueis & catenis homines primum trahant (quod fere contingit) ad cupiditatem diuitiarum, vnde postea facilius in mundani honoris ambitionem, ac demum in superbiæ barathrū deturbari queant. Atque ita tres sunt præcipui temptationum gradus, in diuitiis, honoribus, & superbia fundati, ex quibus in alia vitiorum omnium genera præceptis fit decursus.

Similiter ex opposito considerandus est summus

mus optimusque dux noster, & imperator Christus.

Primum punctum erit conspiciari Christum Dominum in amœno campo iuxta Hierosolyman, humili quidem constitutum loco, sed valde speciosum formâ, & aspectu summè amabilem.

Secundum punctum est speculari quo pacto ipse mundi Dominus vniuersi electos Apostolos, discipulos, & ministros alios per orbem mittat qui omni hominum generi, statui & conditioni doctrinam sacram ac salutiferam imperant.

Tertium punctum. Auscultare concionem Christi exhortatoriam ad seruos & amicos suos omnes in opus tale destinatos, qua eis præcipit, vt iuuare studeant quemlibet, & primo inducendum curent (si diuini obsequij ratio & cælestis electio ferat) ad sectandam actu ipso veram paupertatem, deinde vt ad opprobrij contemptusque desiderium alliciant, vnde humilitatis virtus enascitur, & ita tres consurgunt perfectionis gradus, videlicet paupertas, abiectio sui, atque humilitas, quæ ex diametro diutius, honori, & superbiæ opponuntur.

Colloquium Primum postea formandum erit ad B. Virginem, implorandâque à filio per eam gratia, vt recipi possim & manere sub vexillo eius, idque primum per spiritualem tantum paupertatem, aut etiam in rerum expoliatione sitam, siquidem ad eam me vocare, atque admittere dignabitur, deinde per abiectiorem quoque seu ignominiam, vt ipsum imiter viciniùs, deprecando tamen culpam aliorum, ne contemptus
tam

tam in alicuius detrimentum, quàm in offensam Dei cedat: terminabitur colloquium primum per *Aue Maria*.

Colloquium Secundum. Ad Christum hominem dirigitur, vt mihi à patre impetret illud idem, subdeturque in fine oratio, Anima Christi.

Colloquium Tertium. Ad Patrem vt annuat petitioni cum *Pater Noster*.

Sequentia puncta legenda sunt & expendenda.

Primum punctum. Ante Christi Domini aduentum, rex super omnes filios superbix Dæmon explicato mundanæ elationis vexillo, totum pene humanum genus innumeris laqueis & catenis victum trahebat in triumphum, quando Christus Dominus in mundum veniens, tum documentis contrarium euexit vexillum Euangelicæ perfectionis, & omnibus inauditæ paupertatis, & humilitatis admirabilis proposuit exemplum, quod nihil fuit aliud quam statuere se & vitam sanctissimam, stupendamque humilitatem in signum ad quod conuolarent miseri mortales, qui se Dæmonis laqueis & barathro superbix saluos vel-
lent.

Secundum punctum. Hac Christi virtute plurimum decessit illi æstimationi, quam antea faciebant mortales de diuitiis, honoribus, & excellentia, & quod antea multi sequebantur, & erat
omnibus

omnibus admirationi mundanæ superbix, sensim deferi cœpit saltem à pluribus, & vilius haberi, non tamen ideo destitit Dæmon ab incœptis, sed cum sciret Christum licet omnes vocaret, inuitaretque ad se, tamen neminem cogere, pro suo in nos & Deum odio, & pertinacia, ut hominum voluntates à Christo sequendo auerteret, mille iterum artes, mille dolos excogitavit, quibus expugnaret & extingueret perfectionem Evangelicam, atque etiam nunc mirum est quantos de hominum ignavia triumphos agat, quot catenis vinctos rapiat in perditionem, dum illis persuadet imprimis ut diuitias accumulare studeant, quibus deinde sibi viam faciant ad honores, dignitates, & officia, in quibus constituti intumescant superbia, aliosque omnes præ sese, atque adeo ipsos superiores, Religionemque contemnant, & Dei obliuiscantur.

Tertium punctum: Huic ut obuiam iret Christus Dominus quam in mundum intulit perfectionem Apostolis suis communicauit, ut illam postea in successores suos, & illi deinceps in alios transfunderent; Et certè mirum diuinæ sapientiæ consilium fuit quod cum Christus potuisset diu viuere, & totum orbem vincere, vel saltem totam Iudæam conuertere, tamen paucis annis quibus in sola Iudæa vixit, inter paucos quos conuertit, singulari quodam modo duodecim elegit, quos suos familiares & domesticos efficere voluit, circa quos excolendos plus videtur posuisse operæ, diligentix, sollicitudinis & laboris, quam circa totum mundum; ideo secum illos esse voluit perpetuo,

perpetuo, vt continuo ante oculos haberent ideam perfectionis vitæ, vitam, morésque eius, quos semper inspiceret, quos corrigeret, formaret: & certè nihil Euangelistæ describunt, quod non dictum gestúmque sit vel cum Apostolis, vel coram illis, & bona etiam eorum pars ad eos spectet: tanto ergo eos studio instruxit, vt bene comparatos, & in sinu suo quodammodo formatos, sui que quam simillimos in orbem mitteret, & in illos propagaret missionis illius suæ è sinu patris iura, prærogatiuas, & officia inter quæ illud potissimum, vt vexillum perfectionis Euangelicæ sibi traditum erigerent in mundo, & mundanæ superbix diuitiarúmque & honorum cupiditati omnem æstimationem detraherent.

Quartum punctum, fecerunt id strenuè Apostoli & successoribus suis quam acceperunt perfectionem tradiderunt, & illi aliis ad nostra usque tempora, quibus, sicut quibusdam aliis prioribus sæculis cum obscurari non nihil & minoris fieri videretur ipsa perfectio, misit Deus viros Apostolicos qui eam in se expressam mundo iterum repræsentarent, & dato veluti classico ad vexillum Christi homines à Dæmonis vexillo reuocarent, inter quos B. P. Ignatius & socij aliquam etiam Ecclesiæ Dei operam præstiterunt, & per eos non tantum in societatem ipsa deriuata perfectio est, sed & in alias etiam religiones.

Quintum punctum, atque ad hunc tantum finem nos à Deo singulariter electi inter multos hic fouemur in societatis sinu, partim vt quam per Apostolos & B. Ignatium vult Deus transferre in nos perfectionem, omnem omnino recipiamus,

piamus , partim vt deinde , aliis possimus communicare ; nec enim satis nobis esse debet salutem aliorum procurare, sed inuitandi omnes sunt ad perfectionem , vt quam accepimus posteris tradamus.

Sextum punctum. Inchoare verò debemus à domesticis ; Nam Dæmon valde conatur suum etiam inter nos vexillum erigere, non quod cupiditatem diuitiarum temporalium iniiciat, sed doctrinæ & studiorum quibus ad honores & munia honorifica fiat via , vnde tamen superbiæ & propriæ æstimationis barathro nos involuat, quod multis viris doctis & religiosis fraudi esse quotidie notissimum est : Itaque videndum est ne quid istorum locum hic habeat neque subintret , sed quam accepimus à perentibus nostris perfectionem eam factam , imo auctiorem, si possit fieri , aliis tradamus.

De Baptismo Christi.

HActenus intra priuatos parietes sese Christi Domini conuersatio continuit , & vitæ partim contemplatiuæ , partim actiuæ quidem, sed priuatis exercitiis coercita fuit ; iam vero vbi diuinæ prudentiæ placuit vt se mundo ad gloriæ Dei procurationem manifestaret , hoc tantum opus à Baptismo Ioannis inchoare voluit , vt ei qui aliorum saluti vacare cupit necessariam esse tum puritatem animi, tum humilitatem profundam, tum denique cum Deo aliisque vnionem, insinuaret.

Est autem notandum quod quamquam Christus Dominus tota se vita ad hoc opus pararit, voluit tamen immediatè antequam illud aggrediretur, hanc & quasdam alias quæ sequuntur præparationes præmittere ut intelligamus non satis esse vitam nos multis annis in religione egisse & in variis probationis modis in humilitate, obedientia, mortificatione esse exercitos, sed requiri præterea ut confectis studiis, & scientiarum, virtutumque instrumentis paratis, cum opus ipsum instat, aliam immediate præparationem præmittamus, & solidiora virtutum præsidia comparemus.

Nam quamquam in priuata nostra vita si eius perfectionem consequi possimus, magnæ planè virtutes requiruntur, eæ tamen satis robustæ esse non solent vita pro mixta, ut proximi salutem ad Dei gloriam procuremus, tum ob innumera pericula, quæ vitam illam circumdant, tum ob tam ardui negotii difficultates quæ maioris sanctitatis vim requirunt. Excellens enim omnino debet esse humilitas quæ functiones adeò excelsas & honorificas, diuina etiam opera conuersionis aliorum, imo & nonnunquam miracula sine periculo & cum proximi ædificatione fulciat. Obedientia planè admirabilis quæ in tā magnis rebus gerendis in tanta sapientia, prudentia, experientia, auctoritate, nihil suæ voluntati, nihil proprio iudicio tribuat, sed sese alteri prorsus committat, atque ita de aliis virtutibus. Merito ergo Christus Dominus ad tantam procurationem nouo se modo comparat.

MEDITATIO II.

De Baptismo Christi Math. 2.

Primum punctum. Matri valedicens è Nazareth, ad Iordanis flumen se contulit, vbi tunc Ioannes Baptizabat.

Secundum punctum. Baptizatus est à Ioanne excusante se primùm de indignitate, sed compulso his verbis, sine modo, sic enim docet nos implere omnem iustitiam.

Tertium punctum. Descendit Spiritus sanctus super eum, & vox de cælo sic attestans (hic est filius meus dilectus in quo mihi complacuit.)

Perpendenda hic tria.

Primum est quod etsi Christus Dominus utpote omnis puritatis & sanctitatis fons & veri Baptismi institutor, nullo modo hominis Baptismate, quod ad excitandam dumtaxat in pectoribus contritionem valebat, indigeret; tamen voluit eo Baptizari, ut significaret eum qui aliorum salutì vacare cupit, ita perfectæ puritatis debere esse amantem, ut nullum planè eius augendæ medium omittat, quantumvis se egere minimè putet: sunt enim qui in priuata vita diligentes esse solent in vñtandis puritatis instru

instrumentis, examine, confessione, pœnitentiis, verum postquam ad alios adiuuandos applicarunt se, quasi iis non egeant, sensim ea instrumenta parui faciunt, cùm tamen ipsi eo tempore maximè egeant.

Secundum est quod voluerit Christus à Ioanne baptizari, idque duabus de causis. Primò vt exemplum profundæ suæ humilitatis, qua se inferioribus in re tanta, nimirum ad virtutem & sanctitatem pertinente, quasi S. Ioannes eo sanctior esset, subiecit, nobis ab initio suæ conuersationis ederet; sic enim erant homines conciliandi, sic Deus hac veluti arte & machinâ aduocandus, & ad operandam aliorum salutem & perfectionem applicandus. Secundò expediebat eum Ioannis Baptismum & vitæ institutum ac missionem etiam ipso facto probare, vt omnes intelligerent nulla in re à se mutuo, Christum & Ioannem dissensisse, atque ita tantâ doctrinæ & institutorum consideratione Christique approbatione Ioannis vita, ac missio, atque testimonium de ipso Christo reddetur efficacius. Ita certè oportet si Iesum sequeris, & omnibus aliis in Ecclesia ex Dei missione laborantibus cedere atq; subiici, & omnium labores & instituta approbare, imo etiam exemplo tuo promouere; Nec enim egebat Ioanne Christus, at tu omnium & consilio & auxilio indiges, præcipuè verò prælatorum & sanctorum virorum, quales sunt alij religiosi.

Tertium est quod Christus tum Baptismo ipso, tum oratione quam in Baptismo & statim post illum fudit, dedit patri suo occasionem, tum voluntatem suam circa negotium salutis humanæ procurandû significandi, tum palàm missionē eius

eius approbandi , cum dixit. Hic est filius meus dilectus in quo mihi bene complacui , ipsum audite. Non egebat quidem Christus Dominus hac sensibili missione , verum quoniam ad promulgandam hominibus legem gratiæ missus erat à patre , conueniebat certè authenticum eius missionis testimonium hominibus ipsis à patre dari. Quare Sanctus Ioannes tantæ rei testis huius Christi missionis sæpe apud Scribas & Phariseos mentionem fecit. Sunt expendenda hæc Dei mittentis verba , vt & ad Christum audiendum exciteris & intelligas , si Dei negotium agere inter homines velis , opus esse tum vt interno Dei testimonio tibi dicatur , quod sis filius Dei , tum vt etiam à Dei vicario tuo superiore rite mittaris , & ab obedientia prorsus prodeas ; tunc enim vtiliter audieris , si Deus mittens dicat , ipsum audite.

*De solitudine & tentationibus
Christi.*

ACcepto authentico missionis suæ testimonio Christus non statim vel Hierosolymam vel ad aliam ciuitatem prædicaturus pergit , sed monente & impellente patris sui spiritu relicta ad Iordanem multitudine , pergit in solitudinem vbi oratione , ieiunio , vigiliis fugam parat se tum ad missionis suæ munus exequendum , tum ad eas tentationes propulsandas quæ excelsas & honorificas functiones tanti officij solent debilitare , eneruare , impedire , inutiles reddere : perti-

net ergo hoc Christi exemplum ad eam dispositionem quam necesse est esse in eo, cui commissum est munus aliorum salutis & perfectionis procurandæ si sui etiam curam habere velit.

MEDITATIO III.

De tentationibus Christi. Math. 3.

& 4.

Primum punctum. Post baptismum secessit in desertum Christus & ibi per dies 40. & totidem noctes ieiunavit.

Tertium punctum. Ter ab inimico tentatus est. Accedens tentator dixit. Si filius Dei es, dic ut lapides isti panes fiant; Mitte te deorsum; Hæc omnia tibi dabo, si cadens adoraueris me.

Tertium punctum. Angeli accesserunt & ministrabant ei.

Tria hic sunt perpendenda.

Primum quod ei qui non solum suæ salutis & perfectionis curam habet, sed ad alios iuvandos à Deo vocatus est, solet ea imprimis tentatio infensa esse, quod cum adeo utilis sit aliis curam maiorem corporis habere debeat, atque ita mortificationes consuetas prorsus omittit, quædam commoda quæ tale, singularitatis in vi-

ctu,

Et tu, vestitu, habitatione amat, ab illis vult lautè & indulgenter tractari, sui curam haberi, omnia non tantùm pro necessitate, sed etiam assatim sibi ultro suppeditari, timet quæcumque dura & corpori aspera apparent, prætextu, vt dixi, boni zeli, quasi ad maiorem Dei gloriam pertineat; contra illusionem Christus iam hominum doctor à patre palam datus, impellente Spiritu Sancto. relicto mundo in solitudinem lacum asperum & aëris iniuriis patentem, ad ieiunia, ad vigiliæ, ad humicubationes contendit, vt intelligamus non tantùm pristinas pœnitentias ei qui alios docturus est non esse omittendas, sed potius augendas, & castigandum corpus, atque in seruitutem redigendum, ne forte cum aliis prædicauerit, ipse reprobus efficiatur. Quamquam enim discretionem magna vtendum sit, tamen quantum in ipso est, etsi Deus id permittat, ei potius inclinandum est ad ea quæ incommoda sunt, & carni molestiora, in quibus exercitiis dum vacabit, instabit semper Dæmon, vt & oblata ab externis corporis commoda admittat, vel vt pro suo veluti iure à Deo aut hominibus inordinate quærat; Dicet enim si Filius Dei es, dic vt lapides isti panes fiant, hæc enim Filio Dei, hæc concionatori debentur, iam palam renunciatus es Dei Filius, tale accepisti munus, cūr ergo id non tibi curabis. Cui suggestioni responderi debet, id quod Christus Dominus: Non in solo pane viuit homo, sed in omni verbo quod procedit ex ore Dei, nimirum vitam illam suam Domino Deo suo, cui seruit, curæ esse, illius proinde prouidentia se credere, qui insuauibus, vili-

bus, mali succi, imo venenatis cibis, imo sine villo cibo, si quando ei placeat, potest viram nostram virisque ad suum obsequium idoneas conseruare, sibi proinde nihil curandum esse, sed nihil etiam sibi à Deo, vel à quoquam deberi, certum quamdiu ita volet Deus, in eo rigore perseverare, posse Deum quando opus erit, necessaria, imo commoda ad victum siue miraculo, siue inordinaria cura suppeditare, si enim vllus homo licet maxime vilis & despicibilis non in solo pane viuit, sed in omni verbo quod procedit de ore Dei, quomodo Deus non habebit curam filij sui siue ministri.

Secundum est quod altera tentatio quæ eum inuadit qui alios inuare parat, est vanitatis & præsumptionis; Nam vbi primum tantum munus accepit, si sibi non caueat statim prosilit ad quidvis audiendum & maiora persæpe suis viribus, non solum inutiliter, sed etiam periculose aggreditur, & licet verè à Deo destinatus sit ad externas functiones, & si expectet seque applicari sinat, vtilis sit futurus, tamen si se præcipitet, si Deus solum ad Catechizandum vel aliud simile munus deputet, ipse concionari volet, sibi nocebit plurimum, & Dei gloriæ, ergo quamuis Christus iam esset proclamatus mundi doctor, & meritò ad docendum exire potuisset, diuinus tamen spiritus vt nobis exemplo esset in solitudinem prius illum abdidit, vt illo interuallo quasi doceremur, quomodo accepta autoritate temperatè, & non studio vanitatis vtendum sit. Contra verò malus spiritus abditum in solitudine Christum rapit, & non tantum eum impellit, vt eat Hierosolymam, sed per aërem defert in sublime

sublime pinaculum templi, ut ab omnibus cerneretur, & coram populo se præcipitaret, eoque miraculo vanam populi gloriam captaret: verum ut notat alicubi Sanctus Thomas, & Chrysostomus, cum Dæmon putaret Christum, quem coram populo per aëra ferebat à populo videri, ipse Christus suæ solitudinis amans inuisibilem se fecit, ita sanè vanitatis spiritus suadet aliquando sine vlla consideratione, studio potius propriæ æstimationis quàm Dei gloriæ ad conuersionem cum proximo progredi, imo ad maiora viribus conuolare, & sine vlla prudentia & discretione cum magno periculo & iactura gloriæ Dei & salutis nostræ, ex pulpito præcipitare aliquas conciones: vtendum ergo Christi exemplo, & primo quidem Spiritus sancti, & obedientiæ motus expectandus & tempus probationis nostræ atque solitudini nostræ deputatum, tribuendum: mirum sanè est quod de Christo dicatur, hic est filius meus, ipsum audite & tamen mittatur in solitudinem, nam quomodo in solitudine audietur? verum tribuendum ei fuit tempus à Deo destinatum, deinde ad humiliores potius functiones veniendum, quales sunt doctrinam Christianam tradere pueris & rudibus, visitare Xenodochia, audire confessiones pauperum, quæ scimus à B. P. N. commendata omnibus, quos primum aliquò mittebat: sic enim vbique societas incoepit; deinde quando Deo placebit ad actiones functiones vocare, obediamus quidem, quantum ex nobis est timidè, generosè tamen confisi in iis viribus, quas diuina providentia concedet, hoc qui facit non tentat Deum, nam solus superbus est qui tentat Deum.

Tertium est quod tertia tentatio quæ solet aggre-
 di eum qui proximo vacare parat , est ambi-
 tionis & avaritiæ. Nam Evangelicæ functiones
 magnam ad comparandas diuitias & mundanos
 honores opportunitatem præbere possunt. Qua-
 re Christus Dominus vbi primum mundi factus
 est doctor , relicta multitudine quæ à Sancto
 Ioanne audierat eum esse Messiam , sicut postea ,
 ne Rex fieret , fugit in solitudinem , vbi in sum-
 ma rerum omnium inopia , sine lecto , sine lecto ,
 sine cibo , sine vlla societate 40. diebus mansit ,
 donec elapso populo suauiter mundo sese ma-
 nifestaret , & quidem illâ suâ fugâ exemplo Chri-
 stus fuit omnibus , honores omnes mundanos fu-
 giendi quantum in ipsis est ; contrà verò Dæmon
 assumpsit eum in montem excelsum , & ostendit
 ei omnia regna mundi & gloriam eius , & ait.
 Hæc omnia tibi dabo , si cadens adoraueris me .
 sic enim nonnunquam nostra solitudine & fuga ,
 nos in superbæ curiositatis montem defert , &
 carnalibus oculis mendacem honorum mundi
 gloriam offert , suadetque intueri à longe , quid
 deinceps facturi simus , ad quæ officij peruentu-
 ri , imo aliquando sinistras quasdam vias demon-
 stret , quibus domesticorum , Superiorum , exter-
 norum gratiam & æstimationem aucupari possi-
 mus , vt ad tale vel tale officium tandem perue-
 niamus ; sed quod Christus : vade , inquit , Satha-
 na : scriptum est enim Dominum tuum adorabis ,
 & illi soli seruias ; eodem planè modo nos con-
 uenit huic tentationi repugnare & quidquid de
 futuris nostris occupationibus & officiis vel à
 Dæmone , vel à quoquam alio suggeritur , illud
 generoso animo repellere , nōsque diuinæ pro-
 uidentiae

uidentia committere, id solum nobis proponen-
tes vt Deo soli, non nobis, non nostræ gloriæ, non cõ-
modis, non mudo seruiamus & placeamus, certi
plane nihil in tota vita aliud quærere, quam quod
ipse uolet, siue nos in abiectis officiis perpetuo re-
tineat, siue ad alia uocet, in quibus etiam aliud ni-
hil quam illi perfectiùs pluraque pro eo pati sem-
per desideremus.

Meritò Christo Domino sui & Dæmonis victo-
ri Dei prouidentia cibos mittit per Angelos, qui &
illi ministrant, atque eum honorant; sic etiam solet
eadem strenuis operariis, & nihil nisi bonum glo-
riæ eius quærentibus prouidere cibum in tempore,
& eorum authoritatem apud homines tueri, aut
saltem Angelis ipsis gloriosos & honorabiles effi-
cere.

Has porrò tentationes (quas Christus in solitu-
dine ita expressè passus est vt nos melius erudiret)
toto vitæ tempore, nisi se initio perfectè vicerint,
pati solent ij qui in proximorum salutem incum-
bunt, aded vt necesse sit illis solitudinem sæpe pe-
tere atque ad Christi arma, orationem, ieiunium,
mortificationes confugere.



De vocatione Apostolorum.

HIs igitur comparatis Christus Dominus ad opus sibi à patre impositum aggreditur : sicut autem potuisset sine vlla cunctatione & externa hac præparatione ad mundum docendum accedere , ita solus tantum negotium peragere poterat , verùm quia verus homo erat , & humano modo sese in omnibus gerebat, ordinariæ Dei prouidentix se submisit , qua solet Deus non simul omnia, non vi & imperio, sed pedetentim & suauiter, modisq̃ue ordinariis perficere , atque adedò homines per homines iuuare. Itaque inter eos omnes , quos cœlesti doctrinâ imbuit , elegit 12. quos sibi peculiare tanti operis socios , & paternæ gloriæ procurationis successores esse voluit.

MEDITATIO IV.

De vocatione Apostolorum.

Primum punctum: videntur sancti Petrus & Andreas fuisse ter vocati, primum ad solam quamdam Christi notitiam Ioan. i. Deinde ad sequelam solum temporaneam, cum animo reuertendi ad piscationem.

Secundum punctum : vocauit filios Zebedæi
Matth.

Matth. 4. & Philippum Ioan. 1. & Matthæum Matth. 9.

Tertium punctum, vocati sunt reliqui licet de quorundam vocatione & de ordine vocationum expresse mentio non fiat in Euangelio.

Tria hic perpendenda

Primum est ad quid eos elegit, nempe ut sibi socios assiduos haberet suo semper lateri adherentes, suos familiares & domesticos quibuscum sua secreta communicaret, quorum curam haberet peculiarem, quos præ cæteris omnibus erudiret, & vitæ suæ sanctitate imbueret, atque ita ad patris sui gloriam in mundo publicandam è sinu mitteret: nam tanti negotii pro quo venerat eos fecit socios & participes, ut non iam vel tolerandæ vitæ, vel pecuniis vel honoribus adipiscendis vacarent, non terreni alicuius regis obsequiis seruirent, sed in vna Dei gloria amplificanda, & animarum salute & perfectione, Deo ipsi & Christo cooperatores, quæ certè suprema est dignitas, & excellentissima rationalis creaturæ occupatio. Posuit igitur, inquit Apostolus 2. ad Corinth. 5. in nobis verbum reconciliationis: pro Christo ergo legatione fungimur tanquam Deo exhortante per nos.

Secundum est, quales erant Apostoli quos Christus elegit; nam relictis nobilibus, potentibus, doctis, Phariseis & Scribis qui sanctitate videbantur eminere, elegit 12. pauperes, rudes, indoctos, vili opificio vitam tolerantes, hominibus

minibus despectos , non solum quia Christus humilis humilium societate & simplicitate gaudebat , sed quia hæc eorum humilitas maxime erat necessaria tanto muneri , ne ad excelsa adeo opera vocati superbirent , & suam electionem vel opera tribuerent suæ nobilitati , diuitiis , doctrinæ sanctitati , sed potius de se nihil præsumerent. Quare si quos diuites , & doctos vocauit , ij erant magni peccatores. Præterea erant assueti laboribus quos in Euangelii prædicatione tolerare necesse erat. Tertio denique elegit illos. 12. qui prius quando illos vocauerat , fuerant valde obdientes , & vocati à Christo magna cum proprii iudicii & voluntatis , amoris proprii , vel creaturarum aliarum abnegatione , non obicientes domesticas curas , & negotia ; vel parentes , nihil excusantes , nihil tergiuersantes , sed Christi vocatione confisi , exciso omni alio amore alacriter , promptè , sine vlla dilatione , omnibus pro vt erant relictis continuo secuti erant eum. Talem te esse oportet si te Deus ad tantum munus elegit. Etsi enim aliquando doctos & nobiles eligat , tamen vel sunt humiles , & laborum tolerantes & valde obdientes , vt utiles & apti ad tantum officium esse possint. Nihil enim ita aduersatur gloriæ Dei procurationi , quàm nimium de se præsumere , in se confidere & sese æstimare , præcipue in spiritualibus functionibus , quarum efficacia à Deo solo , in cuius manu sunt corda , dependet. Gloriam , ait , meam alteri non dabo. Ideo quæ stulta sunt mundi elegit Deus vt confundat sapientes , & infirma mundi elegit Deus , vt confundat fortia ; & ignobilia mundi & contemptibilia elegit Deus , &

ea quæ non sunt , vt ea quæ sunt destrueret , & non gloriatur omnis caro in conspectu eius , sed) vt scriptum est , qui gloriatur , in Domino gloriatur. Pari modo elegit Dauid contrà Goliath. 1. Reg. capite 17. vt sciat (inquit) omnis terra quia est Deus in Israël , & nouerit vniuersa Ecclesia hæc , quia non in gladio , nec in hasta saluat Dominus ; ipsius enim est bellum , & paucos Gedeonis milites. Iud. 5. Ne gloriatur , inquit , contra me Israël , & dicat : viribus meis liberatus sum.

Tertium est quomodo eos elegerit : nam post traductam in continua oratione totam noctem , mane vocatis ad se discipulis plenus diuino lumine & incensus gloriæ diuinæ & patris voluntatis adimplendæ desiderio coniectis in eos oculis ex iis elegit quos voluit , quos æterno patris sui decreto sibi socios esse destinatos intellexit : dubium non est quin Christus Dominus in ea oratione non pro solis Apostolis deprecatus sit , sed pro iis omnibus , qui ad idem munus adsciti sunt , & in posterum adsciscuntur in Ecclesia. Nam habet omnia tempora , omnesque homines coram se , & pro patris sui gloria & voluntate , te etiam cum cæteris ad hanc viuendi formam tunc deputauit , cum nihil adhuc esses. Vide ergo ne tanto in Dei amore , & Christi Domini electione ac dignatione indignus & ingratus existas. Agnosce etiam quod cum de te omnino diffidere debeas , necesse plane est , vt valde confidas in Deo & Christo. Nam ad res tantas agendas Dei potentia , sapientia , bonitas tecum est , omne Christi meritum , & gratia electionis & vocationis
tuæ,

træ, tibi deesse nõ potest, fiduciam, (inquit B. Paulus 2, ad Corinth.) talem habemus per Christum ad Deum, non quod sufficientes simus cogitare aliquid de nobis quasi ex nobis, sufficientia nostra ex Deo est, qui & idoneos nos fecit ministros noui testamenti.

M E D I T A T I O V.

De octo Beatitudinibus.

Sic igitur electos Apostolos Dominus ad finem tam arduum antequam eos mitteret singulari studio perfectionis Apostolicæ summam eos bonus magister edocuit, vt eam suo pariter exemplo & aliis traderent. Hæc summa continetur in sermone Domini in monte habito, præcipuè verò in octo Beatitudinibus, quæ sunt veluti 8. principia vitæ Apostolicæ.

De sermone Domini in monte habito Matth. 5.

Primum. Ad dilectos suos discipulos octo Christus beatitudinis genera exposuit. Beati pauperes spiritu, mites, qui lugent, qui esuriunt & sitiunt iustitiam, misericordes, mundo corde, pacifici, qui persecutionem patiuntur.

Secundò Eos hortatur, vt acceptis donis seu talentis vtantur rectè: sic luceat lux vestra coram hominibus,

hominibus, vt videant opera vestra bona, & glorificent patrem vestrum qui in cœlis est.

Tertium. Ostendit se non soluere legem, sed adimplere, explicatis præceptis de vitando homicidio, furto, fornicatione, periurio, & de diligendis perpetuo inimicis. Ego autem dico vobis; diligite inimicos vestros, benefacite iis qui oderunt vos.

Primum præludium erit ponere sibi ante oculos Christum, vitæ eius perfectionem significantē verbis & modo dicendi efficacissimis, & zelo Apostolorum animis imprimere conantem intime perfectionis Euangelicæ summam, & audire patris æterni vocem in alio monte mihi dicentem. Hic est filius meus dilectus, ipsum audite.

Secundum præludium. A Deo petere gratiam vt ita aures cordis mei aperire queam, vt Christi tanti legislatoris, tanti magistri verba altissimè menti meæ impressa defigantur.

Primum punctum. De prima beatitudine: beati pauperes, & humiles spiritu. Paupertas hæc consistit primo in perfecta rerum omnium renunciatione, & abdicatione omnis affectus circa temporalia. Secundò in reali etiam expoliatione, & omnium abiectione propter Christum. Tertio in tolerantia cum quid nobis deest, circa victum, vestitum, quod vel ad decentiam vel ad commoditatem, vel etiam ad necessitatem Deo aliquando ita permittente spectat. Humilitatis verò consistit in vili sui æstimatione, in honorum & gloriæ reiectione propter Deum, in contemptu sui admittendo. Perpende etiam hîc & in sequentibus Beatos dici, non qui vnum tantum actum, earum virtutum fecerunt, sed qui pauperes spiri-

tu sunt , & mites spiritu &c. adeo vt ex certa electione & habitu tales sint.

Secundum punctum , beati mites qui primo impetum iræ tum externum tum internum comprimunt. Secundò omnes contentiones vitant , & aliis facilè cedunt , omnibùsque sese affabiles & faciles præbent , non alios mordent , non rident , non reprehendunt , vel si ex officio id agant , non ideo inflantur , non imperiosè , non turbulenter id faciunt. Tertiò contempti ferunt æquo animo , & obliuiscuntur iniuriarum , tantùmque abest vt læsi par referant , vt etiam parati sint offerre alteram maxillam. Quartò non vno in loco aut tempore , non tantùm , erga superiores & æquales , sed erga omnes illam mansuetudinem præstant.

Tertium punctum. Beati qui lugent primo peccata sua & miseras , item aliorum. Secundò qui carnem suam mortificant & crucifigunt , ac proinde leuitates omnes , lusus iocùmque & risus indecentes errorem reputant , & deceptionem quæ multis sæpe illudit.

Quartum punctum. Beati qui esuriunt & sitiunt iustitiam , qui reputant cibum suum esse facere Dei voluntatem , & Superiorum , propriæ plane renuntiando , leges & regulas obseruare , & tam aliis quam sibi quod iustum est rependunt magna auiditate , licet aliquando id amarum videatur. Secundò suam toto corde perfectionem desiderant & ea exercitia quibus conseruatur Dei amor , quæ vera est iustitia non secus atque famelici , & sitibundi cibum & potum appetunt. Tertiò eandem modo proximo optant & procurant.

Quintum punctum. Beati misericordes qui nimirum misérias proximī qualis siue temporales siue spirituales, aut circa famam & honorem, intelligentes extincta omni inuidia, primo quidem illis ex animo & sincere compatiuntur, & alienas misérias non secus atque suas sentire assuescunt. Secundò, etiam eosdem iuuant & omni ope subleuant quantum possunt, non verbo tantum, sed re ipsa, saltem Deum pro illis orando siue illi sint amici, siue extranei, siue etiam inimici benedicentes maledicentibus, & beneficientes afflicentibus, vt sint perfecti & misericordes sicut pater cœlestis.

Sextum punct. Beati mundo corde, qui primo non à mortali tantum culpa, sed à veniali etiam, quantum possunt purum seruant, sic vt quemadmodum oculi ne minimum puluerem, ita eorum cor ne minimum peccatum, præcipuè scœditatis ferat. Secundò. Et præterea illud ipsum purum, & sanctum desideriis Deo seruiendi & placendi in tota simplicitate ornant. Tertiò denique hanc munditiem & simplicitatem non tantum cum Deo conuersando, sed etiam cum hominibus, sine vlla duplicitate retinent.

Septimum punctum. Beati pacifici, qui primo seipsos pacificant, carnem spiritui, passiones rationi, animam Deo subiicientes. Secundò, cum omnibus, quantum in ipsis est, pacem habent ipsi, & vt inter se alij reconcilientur summa diligentia & zelo procurant. Tertiò, qui animas à Deo alienas cum eo reconciliare toto animo conantur, vt omnibus Deo subiectis ea pax vigeat, quam Christus verè Rex pacificus in mundum intulit.

Octauum punctum. Quia in horum omnium executione, & pro conseruatione harum virtutum multa ordinariè sunt ferenda ab amicis, ab inimicis, à mundo, à Dæmone, & magnæ contradictiones sustinendæ, ideo concludit quod Beati qui persecutionem patiuntur propter Iustitiam.

Colloquium pro affectu.

Pater Aue

Ad considerationem de tribus modis humilitatis.

Quis sanctitatis & perfectionis gradus vitæ Apostolicæ sit proprius.

Est ergo propria sanctitas non solum Deo gloriæ, sed etiam proximo vtilitati ad cuius salutem & perfectionem medium est præcipuum: verum cum varij sint perfectionis gradus, iam est dispiciendum, quis ille sit qui vitæ Apostolicæ magis conueniat, vt intelligamus quò aspirare debeamus. Proponitur in consideratione de tribus modis humilitatis. Licet enim humilitas non sit formaliter perfectio, est tamen ei ita connexa, vt iidem in perfectione gradus inueniantur, qui in humilitate designantur, Sicut dicebamus suprade mortificatione & proprij amoris abnegatione: potest verò hæc meditatio peti ex libello præmissis

præmissis præludiis quæ hic sequuntur, quia tamen breuiora sunt ea puncta quæ in libello extant, non erit inutile vt melius penetrari possint, quæ hic subiiciuntur 4. puncta percurrere.

Primus humilitatis hic modus est ad salutem necessarius, vt me penitus subdam diuinæ legi obseruandæ, vt ne quidem mundi totius oblato dominio, vel extremo vitæ discrimine obiecto, transgrediar ex deliberato mandatum vllum diuinum aut humanum, quod quidem peccati mortalis vinculo nos obliget.

Secundus est maioris perfectionis, vt fixo animo ad diuitias, paupertatem, honorem, ignominiam, breuitatem vitæ, & longitudinem æque sim propensus, vbi æqualis est diuinæ laudis & meæ salutis occasio, vt nullâ vel humanæ cuiuscunque fœlicitatis, vel propriæ mortis conditione propositâ adducar vnquam, vt culpam licet venialem tantùm, decernam admittere.

Tertius est modus humilitatis absolutissimæ, vt priores duos iam adeptus etiam si nullo superaddito laus Dei par foret, ad maiorem tamen imitationem Christi, eligam potius cum eo paupere, spreto & illuso pauperiem, contemptum, & insipientiæ titulum amplecti, quàm opes, honores, & sapientiæ æstimationem. Porro ad gradum hunc humilitatis attingendum magnum adfert compendium triplicis colloquij præcedentis de vexillis vsus, per quod suppliciter poscamus (si placeat diuinæ benignitati) ad talem educi electionem, siue maior siue æqualis obsequii mei erga Deum & gloriæ diuinæ prouentus subsit.

MEDITATIO VI.

Primum præludium stare cum discipulis, & laudare Christum eis dicentem. Discite à me quia mitis sum & humilis corde.

Secundum præludium, ut à tanto magistro discere possim non intelligentiâ tantum, sed imitatione, quæ sit illa cordis humilitas, quam me docere voluit.

Primus modus humilitatis, ut ita me subdam diuinæ legi & voluntati, ut malim etiam mori quam mortaliter peccare, circa quam expende.

Primò. Quàm sit rationi consentaneum ut homo vile mancipium, & misella creatura Domini, & Creatoris sui, & Regis regum, æternæ, purissimæ, immaculatæ legi, & sanctissimæ voluntati, à qua velit, nolit, necessario pender, voluntariè & liberè se subiiciat, voluntatem suam, regulam nimirum plumbeam, & erroris plenam prorsus submittat eius voluntati; & omnia ei sua bona externa, & vitam ipsam postponat, nihilque præ illa magni faciat, si enim Reges terræ leges suas seruari volunt, cur non ipse?

Secundò. Cogita id esse hominibus valde uti-ge: Primò enim sic debitam ordinem seruant Deo se subdendo. Deum time & mandata eius erua: hoc est enim omnis homo, ait sapiens. Secundò pace & quiete fruuntur; seruantes enim legem ab ea seruantur: nam quis restitit ei & pacem

eum habuit? Subtraxit se superbus Angelus, & primus homo, & in quæ mala pœnæque inciderunt, vt & alij qui eos sequuti sunt. Tertiò hæc humilis subiectio Dei amicitiam conciliat & conseruat, quæ diuinæ consortem naturæ hominem efficit, & innumeris eum bonis implet.

Tertiò. Cogita quomodo Christus Dominus sese legi patris subiecit, nam cum Adamus eam postposuerit vxoriis blanditiis, proprio commodo, & excellentiæ Christus Dominus vt nos exemplo suo doceret quanti sit facienda, amplexus est paupertatem, labores, ignominiam, & omnia bona vitæque propriam patris legi & voluntati postposuit, humiliavitque semetipsum vsque ad mortem, mortem autem crucis, vt (inquit) cognoscat mundus, quod ego diligo patrem, & sicut mandatum dedit mihi Pater, ego facio: surgite eamus.

Quartò. Eodem modo sancti Martyres qui pro lege Dei certarunt vsque ad mortem quam omnibus mundi bonis & malis postposuerunt, nam in eorum certaminibus tantum id agebatur, vt Dei legi & amicitiae quæ offerebantur bona vel mala præponerent: audierant enim à Christo, qui non odit Patrem, & matrem &c. & meminerant illius S. Pauli. Quis nos separabit à charitate Christi?

Quintò. Alij pariter omnes sancti omnia ei posthabuerunt: ideo enim mundum fugerunt, bona omnia reliquerunt, abdiderunt se in solitudines, vitam traduxerunt cum summa corporis mortificatione: Vide Benedictos, Bernardos, Franciscos à carne sollicitatos contra legem Dei in niuib., glacie & spinis se volutan-

tes, & scies quomodo legem Dei & amicitiam pluris fecerint quàm se.

Sexto. Perpende hunc humilitatis gradum esse ad salutem necessarium; nam qui amat animam suam plusquam me, non est me dignus, ait Dominus; Et quid prodest homini si totum mundum lucretur &c. Item si oculus tuus te scandalizat, erue ipsum & proiice abs te: unde in eo consistunt ordinariè boni sæculares, qui ordinariè altius non assurgunt, quia rei familiaris sollicitudo cor eorum diuidit, & affectus nonnulla terrenarum rerum cupiditate maculat, in eodem sunt religiosi omnes qui ideo mundum reliquerunt, ut occasiones fugerent Deum offendendi.

Age ergo Deo gratias quod singulari eius beneficio diuina perfusus luce mundum reliqueris, omniaque contempseris, ut te legi eius subiiceres, réque totum ei traderes.

Secundus modus; ita me subdam diuinæ legi & voluntati, ut malim etiam mori quàm venialiter peccare deliberatè, ubi,

Primò potes considerare quam sit rationi consentaneum, ut ne in minima quidem re homo Dei & Creatoris sui ut Filius amantissimi Patris voluntatem violet, quæ pluris facienda est quàm creaturæ omnes simul; cum enim in perfecta legis & voluntatis Dei adimpletione consistat eius gloria, & minimam eius gloriam iusta prudentique ponderatione quisque æstimet & præferat cuicumque bono creaturarum omnium, adeoque vitæ propriæ, certè iustissimè pluris nobis faciendum est veniale peccatum quam vita etiam propria, ac proinde quæ propria fama, honor, dignitas, quæ omnia minimæ Dei gloriæ cedere debent.

Secundò. Quantæ sint miseriæ illorum, qui licet à mortalibus decernant cauere, tamen venialia parui pendent: nam non habent tantam conscientiæ pacem & tranquillitatem, cum semper vulpeculas & latrunculos domi foueant, non est cum Deo amicitia adeò secuta & quieta, quem etsi ex corde expellere minimè vellent, tamen ibi suis passionibus voluntariè illudendum committunt & conspurcandum; quare destituuntur vt plurimum particularis prouidentiae Dei fructibus, carent illis consolationibus, illo lumine spirituali, illo robore & fortitudine spiritus sæpe necessario ad resistendum temptationibus, quibus plerumque faciliùs cedunt, denique aliis vt plurimum malæ sunt ædificationi.

Tertiò. Cogita sanctos omnes alienissimos fuisse ab ea laxitate vitæ.

Quartò. Perpende eorum qui ad hunc gradum peruenerunt, & in eo consistunt, duas conditiones. Prima est esse eos indifferentes ad bona & mala indifferentia, quod inde provenit quia intentio & affectus illorum est purior, nec vllis creatis adhæret. Nam intendunt tantum Dei gloriam, vt formale obiectum omnium desideriorum: quare æqualiter sese haberent, vbi illa æqualitas est, vnde etiam fit vt non velint etsi de propria vita agatur, deliberatè peccare venialiter, quia per peccatum veniale Dei gloria læditur. Secunda conditio est quod cum sint indifferentes, æquè retinent voluntatem fruendi diuitiis, commodis corporis, & gloria, modò id possint sine læsione gloriæ Dei per peccatū veniale deliberatum, quod circa talia obiecta bonorum indifferentium nulla ratione volunt ex destinato admittere.

Verùm non sunt adeò perfecti ; licet enim maneat id firmum propositum , imò nunquam de facto peccent venialiter deliberatè , tamen in mediis diuitiis , commodis corporis , recreationibus , honoribus , quæ omnia liberè admittunt cum suo illo proposito , difficile est admodum , primò quidem plurimos defectus veniales ex subreptione vitare in illis occasionibus , qui licet non sint deliberati , tamen omnem omnino animam maculant , & eam reddunt minus idoneam ad diuinos amplexus & puriorem amicitiam Dei. Secundò plerasque virtutes exercere quæ ab iis occasionibus impediuntur , vnde nec tanta in proximos hinc manat ædificatio.

Discute num gradum hunc attigeris , an non adhæreat cor tuū alicui bono creato ; num ob gloriā , complacentiam , vanam , mendax verbum , adulatorium , ridiculum.

Tertius modus humilitatis , vt etsi Dei laus par foret , & malit tamen nudus nudum sequi Christum , eique omnino se conformare : vbi nota suppositionem B. P. Nostri Ignatij intelligi debere si id aliquando contingat : nam vbi est maior Christi imitatio , ibi est consequenter maior Dei gloria , vnde quando est dubium , vbi est maior Dei gloria , in contemptu an in honore , tutius omnino est pro regula sequi Christi exemplum & crucem amplecti. Secundò potest etiam intelligi quando est par Dei gloria quoad peccatum , & , vt ita dicam negatiuè , quia non magis illa læditur veniali peccato quando diuitiæ & honor quærantur , quam si paupertas & ignominia affligeret : tunc enim perfectius est longè ad Christi

sti crucem conuolare , quia est maior Dei gloria positiuè. Tertio. Etiam si verè sit par Dei laus vtrunque , imo maior videatur , vt commoda aliqua & honorem admittamus , vel obedientia exigente , vel charitate , semper memores Christi crucis , inter ipsos honores & commoda , retineamus affectum sincerum imitationis Christi , & quantum ex parte nostra est , reiiciamus bona hæc omnia , cum protestatione quod non velle- mus ea acceptare , nisi esset euidenter maior Dei gloria. Sic poterimus & moderatè vti iis bonis , nec ab illis lædi , & proximo ædificationi esse nostrâ illâ modestiâ , & animi moderatione. Hic est Spiritus Apostolicus nosse abundare , nosse & penuriam pati , & per bonam famam , & infamiam vnius Dei gloriam procurare. Sic B.P. Ignatius licet vitam in societate communem , & proinde indifferentem , maiorem Dei gloriam semper in- tuendo , esse voluerit , tamen voluit omnes filios suos totis viribus concupiscere indui Christi insi- gniis.

Quartum punctum, Considerare quomodo qui ad Christum vocati sunt, omnes ad alteram horum trium modorum partem spectent; Nam qui in pec- cato mortali sunt , omnino ad vexillum spectant Diaboli , licet autem omnes qui in his gradibus versantur, sint sub Christi vexillo, non tamen eo- dem modo.

Nam primi sub eo sunt potius vt conseruen- tur , quàm vt perfectionem Euangelicam mun- do persuadeant ; experienciâ enim constat , sæcu- lares nisi ope religiosorum & aliorum perfectio- rum iuuentur , & fulciantur , vt caro ossibus , ruere facilè in mortalia , & flaccescere ; imò ali-

quando à fide cadere: similiter in religione qui tales sunt, vt sola mortalia vitare velint, nisi sustineantur aliorum exemplis, orationibus, sanctitate, inficiunt, & languidiorem reddunt ipsam religionem; quare non sunt apti vt mittantur ad alios perficiendos.

At, qui in secundo gradu consistunt, licet sint valde Deo grati, & pretiosi, tamen non adhuc omnem eam perfectionem habent, quam in iis quos ad alios idoneè & perfectè iuuandos requirit; Nam facile illi gloriæ Dei prætextu, quæ in vita communi & indifferente aliquando potest esse par, aliquando etiam maior, vt honores & quædam similia admittantur, solent sese decipere, & plus æquo in id quod naturæ gratum vel coram hominibus honorificum est, inclinari, seque effundere, non quidem ex proposito, sed errore aliquo, & infirmitate; vnde non ita bene ædificantur sæculares nec in eo agendi modo relucet ea virtutis & gratiæ viua imago, quæ hominum animos sola capit. Ad quod animaduertendum est, Christi Domini vitam & perfectionem fuisse omni tempore motiuum efficacissimum ad perfectionem: nam cum antea iaceret incognita, Christus Dominus eius in se exprimens imaginem (quæ in eo consistit vt præ Dei gloriâ & bono, bona omnia nostra condemnemus, nihil mali nec mortem quidem & eam ignominiosissimam fugiamus) eam nobis fecit pretiosam, adeo vt Regibus etiam, & principibus sæculi postea gloriosum visum fuerit ad Dei gloriam, paupertatem, & extremam humilitatem sectari, quia Dei Filius id fecerit.

Illud etiam motiuum modo vim suam exerit

ut nos ipsi experimur in nobis quibus dulce est contemni & despici, quia eo modo Christum imitatur; illud verò motuum solis in Euangeliiis expressum, licet ab omnibus legi possit, non tamen ita practicè intelligi: quæ causa est ut omnes viri docti non sint etiam perfecti. Ea de causa Dominus Deus initio Ecclesiæ suæ, perfectionis ideam Apostolis suis expressit, in quibus eorum successores eam legerent, & omni sæculo nova exemplaria misit quæ mundo apparerent, & exhiberent ex praxi illam ipsam perfectionis regulam quam scripto Euangelium tradit, quæ exemplaria quò sunt Christo magis conformia, eò efficacius, & illam perfectionem docent, & hominibus persuadent.

Quare illi propriè sub hoc Christi vexillo in Apostolico choro militant, qui ita Christum Dominum in vita communi sequuntur, ut semper sicut ipse in corde crucem gerant, quam cum opus est etiam in humeros tollunt, & sese affligunt, aut affligi alacriter patiuntur.

MEDITATIO VI.

De electione, & præmonitio
de ea.

BEne eligendi ratio in exercitiis spiritualibus à B. P. N. primum tradita, nostris propter singularem eius excellentiam, utilitatem, & summam necessitatem commendatissima & quam familiarissima

familiarissima esse debet ; locum & vsum habet, non solum circa vitæ totius statum eligendum, sed etiam circa quamlibet rem & negotium siue spirituale siue temporale, de quo in vtramque partem hæremus dubij ; ea verò hoc loco vti perutiliter possumus ad eligendum illum perfectionis gradum in quo Deo seruire in nostro statu debemus ; nam ea est humanæ voluntatis infirmitas, vt quanquam Ecclesiastici omnes, religiosi potissimum, ad summam vitæ perfectionem aspirare pro conatu maximè deberent ; plerique tamen sibi satis esse putent eum gradum etiam in religioso statu tenere qui ad salutem satis est ; itaque modò à peccatis grauioribus abstineant, vt Dei amicitiam conseruent, nihil admodum præterea curant ; alij ad secundum gradum etiam aspirant nihil de tertio solliciti, denique nonnulli etiam ad tertium contendendum esse existimant, nec verò qui in primo & secundo sibi consistendum putant, carent rationibus, quibus adducuntur vt credant sibi gradum illum potius conuenire. Quare non sine fructu magno rationes hæ, quæcunque demùm sint, coram Deo discutiendæ sunt, & instituenda seriò deliberatio est, vt cognita Dei voluntate, maiori constantiâ, & alacritate voluntas nostra ad eum finem siue perfectionis gradum quem ita solide elegerit, contendat. Nam primum ex gradu illo & mensura perfectionis quam sibi voluntas persequendam proponit, deinde verò ex modo quo eum gradum intendit, tota spiritualis ædificatio, praxisque perfectionis dependet.

Tres autem assignat B.P.N. & distinguit eligendi modos, quos, tempora, vocat.

Primus

Primus est cùm voluntas nostra tota quasi ardens & incensa tam euidenter & fortiter ad aliquid & sine vlla cunctatione vt ita dicam, rapitur, vt de diuina voluntate nihil dubitet, vt accidit B. Paulo.

Secundus est, cùm interno consolationum, desideriorum & diuersorum spirituum sensu ad aliquid impellitur.

Tertius. Cum per summam animi tranquillitatem, & considerato creationis & vocationis nostræ fine circa subiectam materiam deliberamus, & mētis discursu quærimus, quod nos maximè iuuat ad prædictum finem, adeò vt voluntas hunc ducem sequatur; licet autem in ipso exercitiorum cursu Deus nonnunquam varia lumina cōferat & variis modis voluntatem afficiat, & moueat ad hunc vel illum perfectionis gradum complectendum; atque adeò primum & secundum tempus eligendi locū hic habere posse videatur, tamen ratum est vt id sufficiat, atque ideo tertius electionis modus est magis ordinarius, minus scilicet errori obnoxius quod lumine vtatur, eoque idcirco communiter vtendum est confirmando desideria prius à Deo immissa. Id autem fiat hac methodo.



Electio.

Primum punctum erit, proferre in medium tres illos perfectionis gradus siue tres Ecclesiasticorum, siue religiosorum modos aut ordines, qui omnes sub Christi vexillo militant, adeoque salutis suæ curam habent.

Primus eorum est qui ita præcepta omnibus Christianis communia & particularia ad quæ ratione sui status obligantur, observant, vt ordinariè non peccent mortaliter nec damnabiliter viuant, quamuis pro humana infirmitate contingant nonnulla lapsus grauioris pericula.

Secundus eorum qui etiam venialia peccata ita vitant, vt nullum velint deliberata voluntate committere, non tamen magnopere sunt solliciti vt se ab aliis tueantur, itaque nec aspirant ad supremam vitæ puritatem & perfectionem, nec ab aliis sese abstrahunt, quibus vident se in defectus multos facilè labi posse pro sua infirmitate licet nolint.

Tertius est eorum qui supremam perfectionem verè intendunt, ita vt ad puritatem vitæ maximam aspirèt, proponantque venialia etiam quæ ex subreptione committi solent & numero & grauitate minori quantum poterant vitare, & ad perfectam Christi imitationem totis viribus contendant.

Secundum punctum. Erit attendere quem sibi finem creatoris & vocationis meæ ad hunc statum diuina voluntas proposuerit, & mihi ego
pro

proponere debeam, vt Electionis huius regulam, nimirum meam & proximi salutem & perfectionem ad maiorem Dei gloriam: itaque me in æquilibrio collocabo, omnino statuam cum perfectionis gradum eligere, qui me ad illum finem magis promouebit.

Tertium punctum petam à Deo, ne mentis meæ iudicium dæmonis arte aut amoris proprii blanditiis, aut pristinae consuetudinis odore, aut vi, aut difficultate, in fauorem naturæ inflecti, & voluntatem à maiore diuinæ gloriæ & perfectionis desiderio abduci permittat, sed dignetur me quo volet sua gratia, suo ductu, suo lumine deducere, dicamque cum Psalte. Doce me facere voluntatem tuam, quia Deus meus es tu.

Quartum punctum erit perpendere circa primum gradum, quænam mihi ad meum illum finem & maiorem Dei gloriam commoda euenirent; quæ item incommoda & pericula si in eo subsistam, item quæ commoda & incommoda, seu pericula, si eo non contentus vltius aspirem: erunt autem singula siue commoda, siue incommoda scripto notanda. His peractis circa primum gradum, idem præstabo circa secundum; postea circa tertium.

Quintum punctum, conferam commoda cum commodis, incommoda cum incommodis, & mecum ratiocinabor in quo tandem gradu considerato meæ vocationis & creationis sine exclusis aliis rationibus serio me constituere debeam. Quid Deus ipse à quo omnis bona electio procedit, his positis à me petat? quid ego alteri consilii darem? quid vel in mortis articulo, vel coram
Dei

Dei tribunali constitutus fecisse vellem ? & iuxta hæc electionem.

Sextum punctum, vbi concludero, illam statim Deo offeram petámque vt eam recipiat, firmet, stabiliat, vt voluntas ita generosè & constanter ad illum perfectionis gradum contendat, vt nulla in posterum ratione ab ea dimoueri se patiatur.

Pater Aue.

*Ad exercitium de tribus hominum
classibus.*

VBi certum aliquid de perfectionis gradu ad quem aspirare debemus constitutum est, non abs re erit considerare quam perfectâ debeat esse intentio voluntatis siue desiderium ad eum perueniendi. Hoc autem vt intelligatur, utilis erit consideratio de tribus hominum classibus. Nam hanc trium classium distinctionem efficit potissimum diuersitas intentionis. Quamquam enim qui ad Apostolicæ vitæ statum vocati sunt, omnes supremum hunc gradum perfectionis velut aptissimum & efficacissimum medium ad Dei gloriam maiorem, intendere sua ipsa professione videantur, re ipsa tamen plerumque nec verè nec seriò intendunt, ea in re sæcularibus ipsis aliisque ad eum vitæ statum non vocatis peiores, quod hi ex proposito in primo vel secundo gradu subsistunt, nec perfectionem illam Apostolicam profitentur, verùm non eâ propositi & desiderij perfectione

perfectiōne quæ requiritur ; Quod inde prouenit quod præter Dei gloriam, & propriam perfectiōnem, plurimis inordinatis affectibus abundant, quibus ipsa perfectioris gradus intentio cum magno plerumque periculō opprimitur. Erit autem valde vtile in hac consideratione repetere memoriā earum inclinationum & imperfectiōnum habitualium quas in nobis notauimus, tum in prima hebdomada, tum in reliquo exercitiōrum decursu ; tres quatuorue præcipuas quæ puritatem & perfectiōnem desiderii perfectiōnis in nobis impediunt, & voluntatem retardant, ne ad Apostolicam illam sanctitatem toto conatu aspi-
rer, seponere; vt deindè, si ita visum fuerit, iterum inter eas electiō instituat, fiatque manifestum, quid in nobis in diuinæ gloriæ procuratiōne cauendum magis esse videatur.

MEDITATIO VIII.

De tribus hominum Classibus.

Primum præludium fiat propositis vice historię tribus veluti Classibus seu differentiis, in quas videntur distribui homines vniuersi, quibus cura salutis suæ aut perfectiōnis aliqua esse videtur ; exemplo trium ægrotorum qui sanitatem exoptant, vel mercatorum qui 10. millia ducatorum Dei obsequio destinarunt, aut nobilium trium qui sui se principis obsequiis deuouerunt.

Secundum

Secundum præludium, loci compositio, in quo me videam stare coram Deo & sanctis, cum affectu ei quàm maximè placendi.

Tertium præludium petere à Deo gratiam quàm toto me affectu constituam in ea classe quæ ei est acceptissima.

Primum punctum. Prima classis optat quidem finem consequi intentum, sed media & adminicula non adhibet, nam qui in ea constitutus est æger, vult sanari, sed omnes omnino medicinas respuit. Mercator voluntatem, eam summam in Dei obsequium nummorum impendendi conseruat, sed nihil exequitur, nec eam attingit; Nobilis etsi paratus videtur ad sui principis honorem defendendum & propagandum, tamen re ipsa nihil agit; nec media quærit, imo si bellum ingruat; mortis ac laborum metu se subducit &c. Hi certe finem quem sibi proposuisse videntur, non verè & efficaciter intendunt.

Secundum punctum. Secunda classis est eorum qui media quidem adhibent nonnulla, sed pro suo affectu; sic secundus æger vult sanari & uti medicinis, non quibus libet quas medicus iudicaret & præscriberet, at solum delicatis pro suo gustu. Item Mercator eam summam aggreditur impendere in Dei obsequium, sed in ea opera & iis modis qui ipsi placent. Nobilis etiam honori principis sui seruit, sed modo sine suo periculo, incommodoque id fiat. Hæc media isti eligunt non tam quia media sunt, quàm quia placent ex alio affectu, atque adeo non valde efficaciter finem illum intendunt, cum efficacia media ad illum refugiant.

Tertium

Tertium punctum. Tertia classis est eorum qui ea omnia studiosè quarunt media & amplectuntur, quæ quàm efficacissima sunt ad finem intentum. Sic Tertius æger omnia remedia quæ medicus præscribere volet, ignem etiam ac ferrum admittet; Mercator etiam totam eam summam simul à se abiicere, & in Dei gloriam impendere vnâ vice paratus est, si ad Dei obsequium requiratur, quod vnum spectat. Nobilis in vnum bonum gloriæ suæ principis intendens oculos, eius solius affectu & desiderio occupatus, oblitus suorum, sui que, in pericula sese, in labores, famem, sitim &c. immittit magno animo. Atque ij soli verè & efficaciter finem illum intendere videntur. Circa has classes considerabo in quas hæctenus fuerim, & in posterum esse debeam ad illum perfectionis meæ & proximorum finem prosequendum, qui mihi est propositus.

Electio.

Primum punctum. Erit proferre in medium illas radices vitiosas, vt deliberemus quam potissimum toto eo anno expugnare contrariæ virtutis studio velimus.

Secundum punctum. Attento fine societatis, qui est perfectio propria, & aliorum, ad maiorem Dei gloriam in æquilibrio nos collocare; ita vt animo statuamus non potius vnâ aggredi quam aliam, sed eam demum eligere quæ hic & nunc magis nos vrget, & à dicto fine auertit,

R impeditque

impeditque in nobis magis perfectam illam Christi imitationem & gloriam.

Tertium punctum. Petam à Deo, ne mentis meæ iudicium Dæmonis arte, aut amoris proprii blanditiis, aut pristinae consuetudinis odore, aut vi & difficultate, in fauorem naturæ inflecti, & voluntatem à maiore diuinæ gloriæ & perfectionis desiderio abduci, permittat, sed dignetur me quò volet sua gratia suo ductu, suo lumine deducere, dicamque cum Psalte. Doce me facere voluntatem tuam quia Deus meus es tu.

Quartum punctum. Incipiam discurrere circa singulas imperfectiones, iis notatis quæ mihi occurrerent etiam scripto. Hac methodo.

Imprimis primam, aliis tantisper dimissis, totus aggrediar, perinde ac si sola mihi curæ esset, & nihil omninò de aliis cogitaturus essem, totus ergo intrabo in meipsum, & quandam veluti mei anatomen faciam, vt clarè distinctéque videam.

Primò. Effectus eius non quidem omnes, quos ex sua natura solet producere, sed quos de facto in me habet; in quorum notitiam veniam facile, si discutiam quid me faciat cogitare, loqui, omittere; Item quid delinquere contrà Deum, superiores, æquales, meipsum. Item quomodo se admisceat omnibus meis actionibus, à prima diei hora ad extremam, quos omnes defectus distinctè adhibito numero notabo.

Secundò. Perpendam imperfectionis illius vires in me, ad quam rem inuabit videre primo. An iam pridem in me regnet. Secundò. An continuò regnauerit. Tertio. An vires eius creuerint.

rint. Quartò. An & quibus mediis vsus sim & quo fructu. Quintò. In quibus occasionebus, locis, temporibus, & circa quas personas solet esse infestior. Sextò. Num me videntem & repugnantem aliquando abripiat, quæ omnia etiam notabo scriptò distinctè.

Tertiò. Considerabo pericula quæ inde mihi possunt euenire, attentâ imprimis natura meâ feruentiore elatiore &c. Secundò. Ex affectibus & viribus eiusdem passionis. Tertiò. Occasionibus quas habere potero impofterum vocatus ad varias functiones Societatis: si enim modo ita grassatur, quid erit postea? Quartò pericula hæc esse possunt, vel perdendæ Dei gratiæ, salutis, aut vocationis, aut perfectionis nunquam consequendæ, vel difficultatum perpetuarum cum superioribus & domesticis, aut denique impediendi fructum, quem Deus fortè per me facere vellet ad aliorum salutem. His ita diligenter consideratis & notatis circa primam, veniendum erit ad secundam, eodem modo ad tertiam, quas discutiam æquè accuratè ac si cum singulis tantum mihi esset negotium; vnde licet occurrant mihi aliqui effectus secundæ vel tertiæ, quos iam repereram in prima, mihi tamen semper notandi sunt, cum non sit nouum eundem effectum à variis causis pendere posse.

Quintum punctum. Hoc facto ratiocinabor mecum, hanc meam internam faciem oculis externis contemplans, quænam sit macula tetrîor. Primò conferendo effectus cum effectibus, vires cum viribus, pericula cum periculis. Secundò num effectus quique subscripti vere ab ea pendeant, & num directius, efficacius & immédia-

tiùs effluant ab alia præsertim cum effectus à pluribus pendet. Tertiò. Attendendo si vna radix etiamnum ab alia pullulet. Quartò denique omnibus consideratis accurate ponderabo quænam me magis à fine meo hætenùs impedierit, & imposterum plus videatur allatura negotij, & contrà eius virtutis exercitium habiturum sit plus momenti ad seriò proficiendum. In hac enim collatione & electione intuebor semper creationis & vocationis meæ finem, Dei scilicet gloriam, nullàsque rationes, quæ eò non tendant, admittam, méque passim iuuabo 4. reguris à B. P. N. traditis. Prima vt cognoscam & intimo corde persentiscam bonam electionem Dei donum esse descendens à patre luminum. Secunda, Si me amicissimus aliquis super ea re consuleret, quid ei consilij darem. Tertia in mortis articulo quid me vellem egisse. Quarta iudicandus coram Dei tribunali quid in re & negotio præsentis fecisse vellem.

Sextum punctum vbi electionem iuxta prædicta concludero, eam statim offeram Deo, petámque vt eam recipiat, firmet, stabiliat, & ad exequendum suæ me deinceps gratia adiuuet.

De missis ad prædicandum Apostolis.

VBi quæ ab propriæ perfectionis gradum, intentionem, & prosecutionem requiruntur, rectè constituta sunt, sequitur vt ad aliorum salutem & perfectionem promouendam accedamus, & concessa à Deo doctrinæ & sanctitatis media

media ad eum etiam finem adhibeamus, sic enim Christus Apostolos prius à se verbo & exemplo suo institutos misit, sic tamen ut voluerit semper eos ita propriæ perfectionis rationem habere, ut dum eam excolunt & adaugent, pro occasionibus variis quæ inter curandam aliorum salutem occurrunt, ea ipsa tanquam proprio modo ad aliorum ædificationem utantur, ut patet ex Matth. 10. ubi præclaris eos monitis ad eam missionem instruit, quæ quia ipsi bene seruauerunt, & Apostolicas functiones virtutibus sibi commendatis imbuerunt, ideo eorum missio admodum Dei gloriæ & proximorum saluti fuit: Christi verò instructiones Apostolis datæ pertinebant ad zelum animarum, ad paupertatem spiritus, ac sui mortificationem & contemptum mundi, ad humilitatem, ad obedientiam & indifferentiam, ad orationis studium, ad confidentiam in Deo, & id genus virtutes, quibus proprio amore eiectionis Dei amor succederet, & purius efficaciusque bonum gloriæ eius procurarent. Quas omnes virtutes ita illis commendauit, ut exerceri eas par erat in uitæ Apostolicæ statu, ut & Apostolos perficerent, & aliorum perfectioni simul seruirent, & ideo ipsemet præterea illarum exempla quæ in vita sua priuata dederat, imitari eos conuenit qui suæ perfectioni student, alia quædam vitæ communi propria longe præstantiora suis illis monitis adiunxit, ut quos verbo edocebat, eosdem vitæ suæ institutis & factis erudiret, & facilius doctrinam perfectionis Apostolicæ, & verbis & exemplis sibi traditam intellectu & voluntate caperent. Itaque operæ pretium erit videre primum quidem quæ sit natura missionis Apostolicæ, deinde

quæ sint illæ virtutes, quæ simul & propriæ & aliorum perfectioni, ac proinde maiori gloriæ Dei conducunt.

MEDITATIO IX.

De Missis ad prædicandum Apostolis.

Matthæi. 10.

Primum punctum. Discipulis Iesus conuocatis, dedit potestatem eiiciendi dæmonia ex hominibus, & omne morborum genus sanandi.

Secundum punctum. Prudentiam eos docuit & patientiam. Ecce ego mitto vos sicut oues in medio luporum, estote ergo prudentes sicut serpentes & simplices sicut columbæ.

Tertium punctum, perfectionis exponit modum. Gratis accepistis gratis date, nolite possidere aurum neque argentum. Ad hæc materiam prædicationis expressit. Euntes autem prædicate dicentes, quia appropinquauit regnum cælorum.

MEDITATIO X.

De missione Apostolorum ad illa verba,

Sicut misit me pater, & ego mitto vos.

Considerabo primo huiusce missionis originem primam esse Deum ipsum, qui etsi infinita

infinita sui cognitione & amore infinitam gloriam quæ Deus ipse est , sibi tribuat , tamen pro sua bonitate , vt extra se & cognosceretur , & amaretur , non tantum hominem , & opera naturæ produxit , sed etiam homo fieri voluit , vt vni-
genitus qui est in sinu Patris ipse enarraret nobis , & Dei ipsius perfectiones palam oculis nostris proponeret , atque ita ad amandum efficaciter permoueret : verum cum diu in hoc mundo mansurus non esset , huius missionis suæ seriem , cum esse continuam in mundo expediret , apostolos à se electos misit ad eum finem , & sic deinceps alios , vnde licet huius missionis dignitatem & simul quantam in Deo fiduciam habere nos oporteat colligere.

Considerabo secundò. Ad quos missi sunt Apostoli. Nam etsi prima eorum missio fuerit ad solos Iudæos , tamen secunda post Christi Domini ascensionem fuit ad omnes gentes , omnes nationes , omnes cuiusque status & conditionis homines , senes & pueros , diuites & pauperes , doctos & indoctos , Reges , Principes , nobiles , & plebeios , omnes enim vult saluos fieri , & ad cognitionem veritatis venire , & pro omnibus venit & mortuus est Christus qui est salus gentium vsque ad extremum terræ : itaque quotiescumque inter homines versaris , quicumque illi sint , memento tui muneris & cogita te ad eos missum à Deo Legatione pro Christo fungimur (dicebat Sanctus Paulus) tanti ergo officij partes omnes inter quoscumque liberè & generosè tibi puta obeundas.

Considera tertio quis sit finis missionis illius Apostolorum , & tuæ , nempe vt cognitionem

Dei, eiusque perfectionum omnium, & operum naturæ¹, gratiæ, & gloriæ, inter tot errores in omnium illorum quibuscum te versari contingeret, mentes inferas, cognitionem, inquam, non tantum speculatiuam sed etiam practicam, qua fiat ut quid tantæ Maiestati, Bonitati, Potentiæ, Iustitiæ debeant, omnes cognoscant, eique se subijciant, seruiant, obediant, & sanctissimas eius leges & amicitiam, quam diuitijs, honoribus, voluptatibus postposuerunt, impofterum rebus omnibus, suæque vitæ si opus sit præponant, atque ita non tantum salutem, sed maximam etiam perfectionem ad maiorem Dei gloriam æternam consequantur.

Confid. Quarto. ad hanc cognitionem hominibus imprimendam Christum Dei virtute & sapientia Apostolis cōcessisse tria, quæ ipse à patre acceperat. veluti instrumenta quorum duo omni tempore sunt necessaria, tertium aliquando.

Primum fuit sapientia & doctrina quam in eos deriuauit. Nam quæcumque à patre suo accepit, nota fecit illis, & haustam é patris sinu æternam rerum cognitionem eis communicauit, nec enim ea quæ de Deo Patre, quæ de filio, & Spiritu S. professi sunt & docuerunt, sanguis & caro eis reuelauit, sed Deus pater qui in cœlis est.

Secundum fuit sanctitas vitæ, omnium virtutum, sed maxime fidei, spei charitatis, & religionis splendore illustris, & prorsus admirabilis: ideo enim sæpe Spiritum sanctum illis dedit, sed maxime post Ascensionem.

Tertium fuit miraculorum potestas, duo priora ut pote semper necessaria, Deus in iis, quos ad statum vitæ Apostolicæ, vocat omni tempore requirit

requirit, quamquam enim non semper extraordinario modo doctrinam infundat, tamen eius prouidentia ita quibusque temporibus res humanas disponit, ut abunde eam quisque proprio saltem labore, Dei gratiæ cooperando, sibi comparare quæ necessaria est, possit, quod etiam de mediis ad vitæ sanctitatem conseruandam & augendam necessariis dici meliori ratione debet: quare agere, quisque debet Deo gratias, quod vtrumque hoc instrumentum à Domino accepit pro eo atque Deus, uti vnoquoque constituit.

Confid. Quinto, quod non solum Christus illos iis instrumentis instruxit, sed etiam quo modo & quibus foundationibus ea applicare deberent admonuit: nam misit eos prædicare Regnum Dei, & ut patet ex D. Marco, pœnitentiam. Nec enim otiosa potest esse vita Apostolica, sed in omni occasione pro suo officio Regni Dei gloriam, & hominum erga Deum subiectionem tota promouet: prædicat enim non curiosa & inutilia, sed Dei regnum & pœnitentiam, non in sapientia verbi, & sublimitate sermonis, ut non euacuetur crux Christi. Non enim, inquit Apostolus, nosmetipsos prædicamus, sed Iesum Christum Dominum nostrum: Virorum Apostolicorum labor est dura hominum corda salubribus contritionis lacrymis emollire, & ad vitam meliorem imo perfectam conuertere, & ex Dæmonibus Angelos efficere; id autem fit non sola publica prædicatione, & catechistica instructione, sed etiam priuatis colloquiis, & sacramentorum, præcipuè verò pœnitentiæ administratione. Hæ enim functiones; omnes ad Regni Dei & pœnitentiæ

pœnitentiæ prædicationem Apostolis commendatam pertinent, quas omnes, etsi pauci obire possint, nemo tamen est qui non possit saltem earum aliquâ Dei gloriam multum promouere, si sese serio & ex animo addicat.

Consid. Sexto. Quomodo Christus non solum verbo, sed etiam suo exemplo Apostolos docuerit in quo consisteret hæc missio: nam ipsemet toto triennio aliud nihil egit in Castellis, vicis, oppidis, ciuitatibus quam Dei regnum annunciare, & ad Dei cognitionem, amorem & pœnitentiam inuitare omnes quibuscum versabatur. Hoc enim in templo, in domibus priuatis, in nauibus, in ciuitatibus, in desertis, in montibus, in castellis, in mensa, in via ipsa, cum magnis & paruis, Pharisæis & peccatoribus, publicanis, piscatoribus præstabat, adeoque vere totus erat in ijs, quæ patris sui erant, negotiis impigrè & fideliter gerendis.

De animarum Zelo.

HAs functiones cum obirent Apostoli, virtutes sibi à Christo Domino commendatas ad propriam, & aliorum perfectionem, Christi Domini exemplo, semper his admiscuerunt, inter quas prima est proximi charitas, & Zelus animarum. Nam verus & sincerus animarum salutis Zelus ad gloriam eius qui eas creauit, siue ardēs desiderium gloriæ illius Dei, quæ ex hominum salute & perfectione existit, quamquam ad intentionem pertineat, censetur tamen inter media valde efficacia ad nos perficiendos, & iuuan-
das

das animas ; est enim non tantum magni amoris Dei effectus & signum , sed etiam veluti intrinsecum quoddam principium valde actiuum ; atque adeo ignis instar , quo sicut Deus ipse nos sibi , ita nos proximos nostros nobis similes in Dei amore efficere conamur quantum possumus. Nam omnes tum internas tum externas facultates , & vires nostras , non minus suauiter quam efficaciter ad ea omnia applicat , quibus bonum proximorum promoueri possit ; itaque non patitur nos esse otiosos , sed continuo excitat opportunè , importunè , & tanquam principium varia media suggerit , vt si vel non possumus concionari , catechisemus , saltem visitemus carceres & ægrotos , confessiones audiamus , pro aliis maxime peccatoribus sedulò & ardentè oremus , denique nouas quotidie industrias excogitemus quibus iuuari possint peccatores ad salutem ; alij verò etiam ad perfectionem possint , & sanè sine eo functiones omnes nostræ inefficaces sunt , & veluti mortuæ , & rarò satis constantes , cum præsertim sæpe contingat plurimis difficultatibus ac molestiis eos impugnari , quibus facilè cedunt ij in quibus Zelus animarum languet. Quare vitæ Apostolicæ status sine hoc Zelo est veluti corpus sine anima.

MEDITATIO VI.

COnsid. Primò Christum Dominum cum Apostolos ad se vocauit hunc iis Zelum infudisse tanquam veram Apostolici officij dotem.

tem. Nam tanta eos vi ad se traxit, vt ab omni alio desiderio, vel opum vel honorum eos auelleret, vt huic se rei totos addicerent; quare quosdam ex piscatoribus piscium, hominum fecit piscatores, alios ex mercatoribus à lucris pecuniarum quibus inhiabant, ad animarum lucra traductos, fecit spirituales gloriæ Dei negotiatores, atque omnes vineæ suæ cultores esse voluit, quibus passim sæpe non solitariam vitam atque priuatam, sed communem eos in vineam, in negotiationem, in medias hominum turbas mittendo, commendauit. Hunc Zelum à Sancto Petro vt sui amoris certum indicium ter exigit: si amas me, pasce oues meas, igne certè illo quem venerat ipse mittere in terram, eorum corda succendit, & cum viueret, & post Ascensionem, quando in ignearum linguarum specie Spiritum sanctum misit, vt hoc Zelo Apostolicæ functiones abundarent.

Considera Secundò. Non solum verbis, sed etiam suis exemplis hunc Zelum iis efficacissimè impressisse. Nam quandiu secum illos habuit in omni occasione manifestè apparuit quàm sibi cordi esset animarum salus; & quidem paulo ante Missionem Apostolorum videns turbas, misertus est eis quia erant vexati & iacentes; sicut oues non habentes pastorem, tunc dixit discipulis suis, Messis quidem multa est, operarij; autem pauci &c. & Ioann. cap. 4. videte regiones quia iam albæ sunt ad messem. Quoties palam significauit illis se venisse vt peccatores saluos faceret vt tanquam gallina congregaret pullos sub alas, vt ouem vnicam bonus pastor humeris reportaret, hoc esse opus suum, hunc cibum,

has

has delicias , ob quas desiderabat calicem sibi paratum bibere , & baptizari sibi parato baptismo. Qualis autem esset ille Zelus in sacro eius pectore Apostoli didicerunt , quando postquam eiecit vendentes oves & boues ex templo , recordati sunt discipuli quod scriptum est : Zelus domus tuæ comedit me; in hac fornace Apostolorum corda , salutis proximorum desiderio inflammata mirum in modum exarserunt.

Considera Tertio. Hunc Zelum Christi verbis, exemplis, & meritis fuisse inspiratum, habuisse aliquas conditiones maximè necessarias. Nam primò fuit valde sincerus & purus sine vlllo vllius boni admixto desiderio, præterquam Dei gloriæ, & salutis, ac perfectionis proximi: nec enim aut diuitias, aut honores, fauoremque, aut vanam hominum æstimationem, aut corporis commoda simul cum animarum salute intendebat, sed his omnibus contraria vt postea videbimus. Secundò etsi erat feruentissimus, tamen erat valde discretus: nam prudentissima Dei sapientia in hominibus quorum salutem procurabat, discernebat naturam à culpa, & licet culpam quatenus Dei Patris offensa & iniuria erat, infinito odio & animi indignatione prosequeretur, atque adeo puniri optaret & prorsus aboleri, tamen quatenus erat quoddam proximi malum, tantam ei perniciè causans, summo compassionis affectu maxima cum mansuetudine & benignitate sustinebat, ac sufferebat, conabaturque suauissime eum sanare. Quare Apostolos ignem è cœlo aduocare in ciuitatem Samaritanorum volentes increpuit. Nescitis cuius spiritus estis, filius hominis non venit animas perdere, sed

sed saluare. Hoc significabat, cum dicebat, venite ad me omnes qui laboratis & onerati estis; & ego reficiam vos. Et discite Matthæi. 23. Volui congregare filios tuos sicut gallina congregat pullos suos sub alas, & noluisti. Tertio fuit valde indifferens, etsi enim inter solos Iudæos versaretur, tamen pari charitate pauperum salutem & diuitum procurabat, imo maiori etiam. Nam ad Reguli filium ire noluit, iuit vero ad Centurionis seruum & pauperes discipulos adlegit.

Consid. quarto Apostolos & viros Apostolicos functiones omnes suas hoc igne accendisse, inter quos D. Paulus 2. Cor. c. 8. Charitas Christi vrget nos. Et, Filioli quos iterum parturio, donec formetur Christus in vobis. Nec solum pariturire vt matrem, sed & nutrire lacte, & tanquã si nutrix foueat filios suos educare magna cum benignitate & mansuetudine ait, passim Expende vnicum eius locum ad Rom. 9. & inde discere quo te affectu esse oporteat, quã mansuetudine erga proximos cum eos iuuas: veritatem, inquit, dico in Christo Iesu, non mentior, testimonium mihi præbente conscientia mea in Spiritu sancto, quoniam mihi tristitia magna est & continuus dolor. Optabam enim ego ipse esse anathema pro fratribus meis.

De paupertate Evangelica.

Est quidem optimum ad propriam perfectionem medium paupertas, qua omnia reliquimus,

inus, verum cum ad munus Apostolicum accedit, eius functionibus iungitur, non solum maiorem nobis perfectionem affert, sed etiam illis ingentem vim addit: quare Apostolis à Christo Domino est commendata verbo & exemplo, non qualiscumque, sed quæ Apostolicæ vitæ, & Evangelicæ prædicationi maxime congruebat, eo nimis fine ut omni rerum terrenarum desiderio vacuæ Apostolorum mentes purius Dei gloriam intenderent, & liberi ab omni solitudine alia, studium omne in id quod sui erat muneris conferrent, atque ita rerum omnium contemptu vero & sincero facilius hominibus persuaferunt, tum vera esse quæ prædicabant, tum quam omnia terrena bona longe postponenda essent Dei amicitia &, æternis bonis.

MEDITATIO XII.

Considera primò. Præcepta de paupertate Apostolis tradita à Christo, cum eos misit. Math. 10. & alibi, quorum primum est, Gratis accepistis, gratis date, quo voluit ne quid ob ministeria acciperent, ne quidem gratis oblatum: Est enim quidem hic eximius paupertatis modus, ut postquam Christi exemplo ultro ex diuite pauper factus es, etsi ea munia obeas quibus & magnas opes sine cuiusquam iniuria, imo iuste colligere possis, tamen omni illi iuri renunties, & in proximi salutem & perfectionem incumbas, sine vlla non solum mercede, sed etiam spe vllius boni alterius, quam Dei gloriæ, qui sibi purè serviens

tibus

tribus satis necessaria prouidebit , hoc præceptum ita est exactè seruandum , vt non solum pro nobis in particulari , sed pro domus aut Collegij fundatione, vel necessariis alimentis quidquam intendamus , dum saluti proximi vacamus , sed omni alia cogitatione abiecta Dei negotium agamus; cui non est difficilius necessaria centum hominibus prouidere, quam vel vni soli ; quamuis si Deus aliquam occasionem offerat non sit negligenda : hoc enim tunc Dei negotium est. Secundum præceptum est simile. Nolite possidere aurum, neque argentum , neque pecuniam , neque duas tunicas. Quo præcepto voluit vt omnibus rebus nisi necessariis nudi abirent , nec sibi sollicitè viaticum curarent (licet oblatum postea recipi non vetuerit) nullis essent onusti sarcinis superfluis , nullis districti curis terrenis, sed in omnibus penderent à Dei prouidentia ; tum vt ad susceptam legationem essent aptiores, & toti vacarent delegatæ functioni; tum vt iam inciperent discere quam tutum sit totam vitæ præsentis curam commendare Deo ; tum etiam vt declarantes hoc exemplo quam essent alieni ab omni cupiditate, plures lucrifacerent, & ad rerum terrenarum saltem pro Dei amicitia contèptum inducerent. Atq; hanc paupertatem professi , cum quartum votum obedientiæ summo Pontifici quo ad missiones faciunt, profitentur.

Considera Secundò, Christum Dominum ipso facto Apostolos suos paupertatem Euangelicam docuisse. Nam nihil omnino ipse possidere voluit, nihil accipere ob spirituales functiones; vultus, inquit Matthæi 8. illis qui ad eum sequendum se offerebant , foueas habent , & volucres cœli

cœli nidos, filius autem hominis non habet ubi reclinet caput. Et quamquam postquam Apostolicum collegium habere cœpit, eleemosynas etiam pecuniarias acceperit; quibus tantum numerum qui facile emendicato cibo vivere non poterat, sustentaret; eæ tamen exiguæ erant, & magna in illum fide, & charitate à piis personis ultro oblatae, quæ bona opera non tantum non impedire illam, sed etiam promouere oportebat, quod tamen ita effecit, ut effectus paupertatis quam plurimos experiri Apostolos vellet, ut quando Sabbatho spicas vellebant.

Considera Tertio. Quomodo Apostoli omnes, & viri Apostolici hæc Christi præcepta & exempla secuti sunt magno animarum bono, inter quos S. Paulus 1. ad Timoth. 6. Habentes alimenta, & quibus tegamur, his contenti sumus. Ad Phil. 3. omnia arbitror ut stercora ut Christum lucrifaciam: & alibi. Non quærimus vestra sed vos ipsos. Et alio loco. Nihil habentes & omnia possidentes. Imò etiam vnâ gloriâ Dei contenti fuerunt, ut etiam eleemosynas ad victum necessarias recipere vererentur, si quando probabile esset, ut vel minimum inde aliqui scandalizarentur. Certe D. Chrysostomus non aliam ob causam putat tam multos operarios in Ecclesia hoc tempore tam parû utiliter laborare, cum 12. Piscatores totum mundum conuerterint, quàm quia spiritu pauperes magnum & generosum rerum omnium contemptum præ se ferrent, ob Dei amorem & prædicationem Euangelicam: hoc vero tempore qui aliorum saluti vacant, licet pauperes ipsa professione sint, tamen nimium auidè & anxie ea quæ necessaria sibi putant expetunt

S petunt

petunt , atque ita puritas intentionis gloriæ Dei inficitur , & homines offensi resiliunt.

De Carnis mortificatione.

PAupertatis comes indiuiduus est dolor & labor , atque carnis mortificatio , non iam umbratica, & vt à Nouitiis solet experiri exercitij causâ , & propriæ tantum perfectionis studio suscepta, sed solida & officio propria , essentialis & intrinseca. Nam nulla plane vitæ ratio , aut maiores labores corporis adiunctos habet , aut austeriorem carnis mortificationem requirit quam Apostolica , sicut è contra corporis quies & comoda ita Apostolico muneri repugnant, vt eius finem prorsus evertant. Quare Christus ita Apostolos erudit vt in negotiotum Dei procuratione , nihil blandum carni , nihil corpori commodum , nihil suaue ; sed contrà labores magnos, & afflictiones corporis expectarent , vt omni inordinato erga se affectu exuti , & puriùs maiori-que cum perfectione propriâ , & efficacius aliorum saluti & perfectioni vacarent.

MEDITATIO XIII.

Considera Primo. Christum Dominum non solum elegisse quos in mundum mitteret homines delicatos, & otio ac corporis commodis assuetos, sed laboribus, fame, siti, frigore, durâ carnis tractatione exercitos : quod si alio
quosdam

quosdam non ita laboribus deditos elegit, eos postea simul cum cæteris ita instruxit, vt, abdicatis corporis deliciis & otio, ad labores & carnis mortificationem in animarum salute procuranda scirent se paratos esse debere. Illud perpende Lucæ 9. si quis vult venire post me, abneget semetipsum, & tollat crucem suam quotidie & sequatur me &c. Iterum cap. 14. Qui non odit animam suam, non potest meus esse discipulus. Quare ad vitam Apostolicam vocatos appellat aliquando piscatores, aliquando ouium pastores, aliquando agri vel vineæ cultotes; hos ad spiritualia contra Dæmones animos hominum obsidentes arma ieiuniorum, vigiliarum, orationum crebrò hortatur. Hos mittit sine sacculo, sine pera, sine pecunia, mandatque vt sint contenti iis quæ apponuntur, nec se prætextu necessitatis aut præbeant vlla ratione ea in re difficiles hospitibus, aut secum ea quæ delicias redolent, & ab Apostolico rigore aliena sunt, sui nimia sollicitudine ferant: eosdem permisit eâ fame premi vt spicas vellere cogerentur, idque in Sabbato, id est, die festo & in solitudine cum eorum animos laboribus fessos post missionem recrearet, nihil ad victum tot personarum inuentum est præter panes hordeaceos, & paucos pisciculos.

Confid. Secundo. Quomodo Christus Dominus tota quidem vita, sed potissimum eo tempore quo Dei regnum cum Apostolis annuntiauit in laboribus plurimis, tenui, eoque parabili; & communi victu, sine deliciis, vitam suam, quæ Dei vita erat, non sine magnis incommodis sustentauit, nam præterquam non habebat vbi

caput reclinaret , præter transactas in oratione noctes , præter humi-cubationes , & plurima exempla austerioris vitæ quæ in Euangeliiis sparsa sunt : vnum tantum perpende Ioan. 4. Iesus ergo , inquit , fatigatus ex itinere sedebat sic supra fontem : ecce in quærendis ouibus perditis defatigationem ; erat enim hora quasi sexta, idest duodecima , quare Apostoli iuerant in ciuitatem vt cibum emerent ; interim Christus quamquam & defatigatione & fame opprimeretur , sic vt compelleretur sedere supra fontem , datâ tamen occasione Samaritanam tam sedulo , tam alacriter docet , vt cibo deinde oblato , sui suarumque commoditatum oblitus non desistat , sed repudiato corporis victu dicat discipulis: Ego cibum habeo manducare quem vos nescitis , meus cibus est vt faciam voluntatem patris mei , & perficiam opus eius : leuate oculos vestros , & videte regiones , quia iam albæ sunt ad messem ; nimirum tanta Dei patris gloriæ fame & siti tenebatur , vt præ illa quæuis corporis incommoda non sentiret ; & alio se modo posse sustentari significabat , quàm eo pane , nempe illo qui ex messe propriis & Apostolicis laboribus & sudoribus collecta conficiendus erat. Tum vide quid hoc exemplo facere par sit , facile quidem & nouitiorum proprium , cum nihil corpori deest , pro Deo laborare , verum Apostolicum est multum die & nocte sine vlla intermissione laborantem optare durè tractari , & oblata corporis commoda quasi inuito animo , & aliunde saciato pro necessitate admittere.

Consid. Tertiò. Apostolis & viros Apostolicos hunc spiritum habuisse ; perpende illum
vnicum

unicū Apostoli locum ad Corinth. 2. cap. 11. Ministri Christi sunt, & ego (vt minus sapiens dico plus ego) in laboribus plurimis, in carceribus abundantius, in plagis supra modum, in mortibus frequenter, in labore, & ærumna, in vigiliis multis, in fame & siti, in ieiuniis multis, in frigore & nuditate : & 1. ad Corinth. 9. ego igitur sic curro, non quasi in incertum; sic pugno non quasi aërem verberans, sed castigo corpus meum & in seruitutem redigo, ne fortè cum aliis prædicauero, ipse reprobus efficiar. Hi ergo labores, hæ corporis afflictiones, ieiunium, frigus, fames, Apostolicæ vitæ deliciæ sunt, quibus Apostolicæ functiones circa proximum, carne, vt ita dicam, planè contusâ, spiritu Dei animatæ vegetantur, & efficacissimæ ad Dei gloriam efficiuntur. Quod si pro occasione aliqua commoda admittere necesse sit, Apostolicum est verbum; scio abundate, & penuriam pati, vt nimirum abundantia non dissoluatur animus, sed ita vitium integritati pro occasione consulat, vt eas ipsas ad maiores labores, & dolores deinde conferat.

De mundi contemptu.

ESt quidem valde laudabilis & magnæ perfectionis mundi ille contemptus, cum quis sese in abditam aliquam solitudinem recipit, vt eo impedimento sublato propriæ vacet perfectioni; verum longè excedit is quo quis in ipso mundo degens inter homines; magnis sublimibûsque functionibus deditus quæ mundo ipsi & admodum

vtiles & admirabiles esse solent, occupatur, atque ita mundi honoribus, fauore laude circumcingitur, vt iis tamen non tangatur, sed prorsus nihili faciat, & cum fastidio ac tædio sustineat. Talis est in Apostolicis cordibus mundi contemptus à Christo Domino commendatus, vt nullius fauore, nullius metu à Dei gloriæ procuratione impedirentur.

MEDITATIO XIV.

COnsid. primò. Quomodo Christus Dominus suis Apostolis mundi contemptum commendatit. Certè Matth. 6. cap. multis verbis hortatur, ne quid faciant ad vanam hominum gloriam captandam: attendite ne iustitiam vestram faciatis coram hominibus vt videamini ab eis; atque ita mandat, vt quantum fieri potest, opera sua bona alios celent: hoc facit quod cum duos discipulos mundi spiritu adhuc plenos argueret: Nescitis quid petatis, illud Matth. 20. ait, Scitis quia principes gentium dominantur eorum, & qui maiores sunt, potestatem exercent in eos, non ita erit inter vos; sed quicumque voluerit inter vos maior fieri, sit vester minister, & qui voluerit inter vos primus esse, erit vester seruus. Quod repetit Matth. 23. cum reprehendisset pro more Phariseos quod primos recubitus eligerent in cœnis, & primas Cathedras in Synagogis, & salutationes in foro, & vocari ab hominibus Rabbi: deinde cum discipuli exultarent quod Dæmonia ipsis subiicerentur, videbam, inquit, Sathanam sicut fulgur descendentem

scendentem de cœlo, indicans Luciferum ob factum cecidisse, & addit; Verumtamen in hoc nolite gaudere, quod spiritus subiiciuntur vobis. Imò verò Apostolis mundi odium, persecutiones, contumelias proponit: Beati estis cum maledixerint vobis homines, & persecuti vos fuerint, & dixerint omne malum aduersum vos, mentientes propter me.

Confid. Secundò, quomodo Christus ipse non solum quando vitam obscuram & priuatam egit, de quo suprà, sed præcipuè quando inter homines versatus est, omnem mundanam vanitatem, honorem & fauorem fugerit. Nam cum infinita esset eius sapientia, sanctitas, potentia; tamen ita temperare effectus scientiæ, sanctitatis & potentiæ ostendit, vt visus sit velle omninò latere: rarò versatus est Hierosolymis, rarò cum doctis, nunquam cum principibus, vbique miracula quæ faciebat, occultans & publicari vetans, doctrinæ suæ radios ita regens, vt posset quidem quantum satis erat efficaciter quosvis promouere, nihil tamen ad ostentationem, nihil ad gloriam suam; sanctitatem verò excellentē vitæ communis & conuersationis velo ita celauit, vt præ S. Iōanne Baptista à mundo contemneretur: quare cum vellent eum rapere vt regem constituerent, ipse fugit in montem: ita Dei Filius qui non rapinam arbitrabatur esse se æqualem Deo, Dei gloriam procurare voluit, vt à mundo nullum aliud bonum quam Dei gloriam accipere; nihil Apostolis, & Apostolicis viris expectandum, non honores, non fauores edoceret.

Confidera Tertiò, Quomodo Apostoli ita à Christo Domino informati ab hoc impuræ inten-

tionis veneno per veram mundi omniumque bonorum, & gloriæ contemptum, mentes & functiones suas purgarint. Non sumus, inquit Apostolus, sicut plurimi adulterantes verbum Dei, sed ex sinceritate, & sicut ex Deo, coram Deo in Christo loquimur. Nec enim hominibus placere, aut eorum fauores aucupari curabant, sed potius mundo crucifixi erant, & mundus ipsis; quare ne qua in re adulterarent prædicationem verbi Dei: sapientia verbi, inquit, ne euacuetur Crux Christi, non enim nos prædicamus, sed Iesum Christum. Suam etiam sanctitatem & bona opera quantum poterant, tegebant, imò peccata sua, & indignitatem apertè profitebantur, ut sæpius S. Paulus, qui se vocat blasphemum primum, etsi etiam contigerit aliquando & gratiâ in mundo, & autoritate, atque hominum æstimatione pollere, eam tamen ipsi non quæsierunt; sed Deus ipse, cum ipsi potius contemni optarent, ut sola Dei gloria resplenderet, iustus Iudex vicissim eam quæsiuit, cum sciret fideliter eos acceptam autoritatem & æstimationem ad Dei gloriam iterum relatu-
ros.

De Humilitate.

HÆc virtus propriæ salutis & perfectionis fundamentum, in priuata vita internos & externos actus proprios habet, qui quamquam sint magni momenti, tamen vitæ Apostolicæ ob finis, & functionum eius excellentiam non sufficiunt. Tres enim sunt humilitatis actus siue gradus.

Primus

Primus est quo quis se parui æstimat, & de se humiliter & abjectè in animo suo, sincerèque sentit, tum quia nihil est, tum quia peccator; qui gradus potest consistere cum desiderio ut nihilominus ab aliis magnificat.

Secundus itaque gradus est, quo non desiderat æstimari à proximo, atque adeò humanas laudes non quærit, sed potius refugit, & cum offeruntur non extollitur, sed potius confunditur; & contemni ab aliis non tantum patienter fert, sed etiam cum gaudio exoptat, qui actus vel gradus ad præclaros externos actus humilitatis coram proximo obeundos impellit: verum potest fieri ut quis facile nec se æstimet, nec ab aliis æstimari desideret, quia nec magnis præditus dotibus, nec magna sanctitate, doctrina, industria ornatus est, nec magnam apud homines authoritatem, dignitatem, officium obtinet, nec magna operatur.

Tertius. Quare Apostolicæ est humilitatis magnis præditum esse donis Dei, & virtutibus, ad magna & excellentia officia vocatum, in magno inter homines loco esse, magna & hominibus admirabilia atque utilia operari, & tamen inter hæc omnia magna, non solum magnum non sibi videri, nec videri ab aliis velle, sed etiam nihil se esse, nihil se posse, nihil se præstare, se feruum inutilem reputare & credere; & non solum omnia hæc bona atque opera Deo auctori, & omnium fonti referre, sed delatos sibi honores, & hominum laudes ita audire, quasi non ad te, sed Deum, cuius verè sunt, spectarent & dirigerentur, sibi que solam confusionem ut debitam retinere. Atque hic est tertius humilitatis actus, quo

quo non solùm intellectu , sed etiam voluntate clarè & certò intelligimus nos nihil facere posse, nisi peccatum & nihil ; Itaque omnia bona nostra & opera essentialiter & intrinsecè à Deo esse, cui ideò soli verè debetur honor & glòria. Hæc verè Apostolica humilitas est quæ Deo maximæ gloriæ est , quia omnia bona in eum refundit , & nos eximiè disponit , vt diuina maiestas quæ gloriæ suæ zelo ardet , nostrâ operâ libenter vtatur, cùm videt adeò fideliter nos agere , vt nihil nobis nisi confusionem retineamus , quo maior diuinæ gloriæ fructus existat.

MEDITATIO XV.

Considera Primò. Quod Christus Dominus non solùm elegit Apostolos pauperes , rudes , abiectos, vt ipsi ad tantum officium eleuati non superbirent , non in se confiderent , sed voluit eos in ipso munere obeundo , humilitatis & diffidentiae de se perpetuam memoriam & exercitium retinere. Nam sæpè id illis inculcat. Luc. 17. Cùm feceritis omnia quæ dicta sunt vobis , dicite , serui inutiles sumus , quod debuimus facere , fecimus. Et Ioan. 11. iam ad patrem abiturus. Ego sum vitis, vos palmites ; qui manet in me & ego in eo , hic fert fructum multum, quia sine me nihil potestis facere; sicut palmes non potest ferre fructum à semetipso nisi in vite manserit, sic nec vos nisi in me manseritis. Quamquam ergo tibi utilis videaris Deo & fructuosus, nihil tamen es ex te, inutilis es, vile & infructuosum

sum farmentum, si te putes aliquid esse & posse, & sine Dei operatione, te à Christi meritis separas. Matth. 11. magno affectu gratias agit Patri, quod absconderit hæc à sapientibus, & reuelauerit ea paruulis: & alibi, superbam Apostolorum inter se contentionem, quis eorum maior esset, grauitè reprehendens, ait. Nisi efficiamini sicut paruuli non intrabitis in regnum cœlorum.

Considera secundo, Christum Dominum inter eas perfectiones & excellentia dona quæ à Deo acceperat, summam etiam authoritatem, opera prorsus stupenda, summam tamen semper animi demissionem, quatenus homo erat, retinuisse, adeo ut nemo vnquam vel humilior fuerit, vel magis de se diffusus fuerit; Nam quanto ipse maior erat, tanto se profundius deprimebat, quando in suum nihilum se demittebat; erat enim infinita quasi profunditas ab ea dignitate qua præcellebat, ad eum statum quo se abiiciebat. Nam cum illuminatissima illa humanitas clare Deum videret, penetrabat intime suum nihil, non speculatiue tantum, sed etiam practicè: Nam & potentiam & sapientiam & sanctitatem rexit quantum potuit, & omnia sua patri accepta referebat. Doctrina, inquit, non est mea. Item gloria mea nihil est, testimonium meum nihil est: Quare nihil sibi tribuebat, nihil in se confidebat, nullam gloriam retinebat, sed in Deum omnia referebat, eaque humilitate omnes functiones suas condiebat, ut Apostolis & nobis esset exemplo. Discite à me quia mitis sum & humilis corde, & ut exemplum humilitatis daret, lauit eorum pedes.

Considera Tertio, Apostolos ita à Christo edoctos humilitate vera suas perpetuo functiones veluti condiisse, vere Apostolico sensu dixit S. Paulus
ad

ad Galat. 6. Si quis existimat se aliquid esse ipse se seducit: & primæ ad Corint. 3. Neque qui plantat est aliquid neque qui rigat, sed qui incrementum dat Deus; & paulo post. Nemo se seducat si quis videtur inter vos sapiens esse in hoc seculo, stultus fiat ut sit sapiens; & cap. 4. quid habes quod non accepisti? si autem accepisti, gloriaris quasi non acceperis? Lege si placet ea quæ idem Apostolus ibidem subdit de Apostolorum humilitate. Puto, inquit, quod nos Deus Apostolos nouissimos ostēdit tanquam morti destinatos, quia spectaculum facti sumus mundo, Angelis & hominibus; nos stulti propter Christum, nos ignobiles: & quæ ibidem sequuntur. Sæpe idem Apostolus sua peccata commemorat, profitetur se persecutorem fuisse, indignum Apostolico nomine & officio: itaque & suum nihilum, & indignitatem, ac peccata agnoscens, omne suum bonum & gloriam in Deum & Dei gloriam referebat, atque inter tantæ doctrinæ & sapientiæ cœlestis lumina, tot & tam conspicua miracula, verissimâ sui cognitione perfusus, nihil esse, nihil se mereri nisi pœnam; gratia & misericordia Dei esse id quod erat profitebatur, & bona omnia siue corporis siue famæ à se tanquam indigno reiiciebat.



De sui diffidentia & confidentia in Deo.

HVmilas perfecta fundamentum est diffidentiae in se, & confidentiae in Deo, quae utraque in diuinis functionibus maximi est momenti. Nam cum & haec ipsae & fructus qui ex iis speratur, longissime quascumque vires humanas superent, & Dei opera sint, si quid dum concionaris, dum agis cum proximo, tuo ingenio, industriae, doctrinae, sanctitati fidas, iam Deum ipsum quodammodo ab illo opere arces; contra vero si de te prorsus diffidas, & non tantum speculatiue, sed etiam practice, te nihil posse in ea re quam intendis, agnoscas, iam totum id negotium Deo committis, & omnipotentem Dei manum ad id opus admoues, cui proculdubio curae erit, ut ad ipsius gloriam res bene eueniat; qui enim suae Bonitatis & potentiae gloriam, mundum è nihilo creando, & deinde hominem è peccato quod etiam nihilo peius est, redimendo, maximè demonstrauit, gaudet plurimum & delectatur, cum licet operam nostram utatur; agnoscimus tamen illum non alia re uti quam nostro nihilo, ac proinde omnem rei gestae gloriam in eum referimus, atque haec duo ita se habent, ut quò magis de viribus nostris diffidimus, eò Dei virtus propius accedat. Vult enim Deus nos nihil esse, quia id in maiestatis eius gloriam redundat: vnde haec virtus vere est Apostolica. Hac ergo etiam ratione Apostolicae functiones non nostrae, sed diuinae esse debent, ut vtilis & nostrae perfectioni

perfectioni, & proximorum esse possint. Quare id à Christo fuit valde commendatum Apostolis.

MEDITATIO XVI.

Meditatio de diffidentia in se & confidentia in Deo fieri potest, vel de piscatione S. Petri. Luc. 5. vel de sedata maris tempestate, & ambulatione super aquas Matth. 14.

In piscatione S. Petri.

Confidera primo id quod ait Petrus. Præceptor per totam noctem laborantes nihil cepimus, in verbo autem tuo laxabo rete; quibus verbis. S. Petrus agnoscit suæ industriæ & laboris inanitatem, ac proinde in eo iactu retis in Christo solum confidit: cum ergo iecisset rete comprehendit magnam piscium multiutdinem, ita ut ambæ nauiculæ plenæ ferè mergerentur. Hic enim fuit fructus confidentiæ in Christo, & diffidentiae de se. Nam S. Petrus cum ordinario modo, & suis viribus confusus rete iecit, nihil cepit; & cum in Christi nomine & virtute confusus, solitos labores adhibuit, copiosam multitudinem comprehendit.

Confid. Secundo, quomodo S. Petrus hoc viso procedit ad genua Iesu dicens. Exi à me; quia homo peccator sum, Domine: sic enim discis quomodo gerere te debeas quando Deus per te vel in te aliquid magni & insoliti operatur. Nam sentire te debes planè indignum quo

Deus

Deus utatur ut instrumento ad res tantas, quantæ sunt eæ quæ eius gloriam promouent, quantumuis in se viles videantur: tu nihil es; unde ergo quæ facis prouenire videntur, unde in Dei gloriam cuncta referre debes, & Deum ipsum veluti à te indigno repellere, & opera eius esse omnia, non tua, agnoscere.

Confid. Tertio. Quod addit Euangelista. Stupor enim circumdederat eum, & omnes qui cum eo erant in captura piscium quam ceperat: sic enim solent ij qui verè parum sibi tribuunt, admirari, & stupere quando vident ea quæ Deus per ipsos facere dignatur, cum nihil esse in se sciant, quod ad eos effectus proportionem habeat.

Potest etiam institui meditatio ex illo loco Ioann. 15. sicut palmes non potest ferre fructum à semetipso nisi manserit in vite, sic & vos nisi in me manseritis. Ego sum vitis, vos palmites, qui manet in me & ego in eo hic fert fructum multum, quia sine me nihil potestis facere; certe qui aliquid boni operatur, præcipuè quoad aliorum salutem pertinet, non est otiosus, sed ipse aliquid agit & liberè agit, nec diffidentia in nobis otium nutrit, imo exigit ut vires nostras integras expromamus: verum id quod adhibemus & à Deo est: quid enim habes quod non accepisti? & tam parui momenti est ut sine Dei gratia non secus atque corpus sine anima nullum conatum, imo ne minimum motum ad supernaturales effectus habere possimus. Quare dum concionaris, dum cum proximo versaris, memento te esse seruum inutilem, te sine Deo nihil posse, omnia tua verba ab illo esse & verba Dei esse,
non

non tua , vt , si gloriaris , in Domino solo glorieris.

Est etiam insignis locus D. Pauli ad Corinth. 2. cap. 3. fiduciam autem talem habemus per Christum ad Deum , non quod sufficientes simus aliquid cogitare à nobis , tanquam ex nobis , sed sufficientia nostra ex Deo est , qui & , idoneos nos fecit ministros noui testamenti , non litera , vt textus quidam , sed spiritu. Nam Euangelici ministri non solam literam annuntiant , sed eorum ministerio adest spiritus sanctus , qui sese hominum mentibus applicat , vt intelligant & efficiantur.

De orationis studio commendato à Christo & exemplo illius dato ab eodem & accepto ab Apostolis.

HÆc virtus medium est Apostolicum quod ad maiorem Dei gloriam omnes functiones nostras & præire , & comitari , & subsequi debet. Nam hætenus numeratæ virtutes nos quidem à terrenis rebus & amore inordinato nostri remouent & separant : verùm non ita faciliter Deo supremo humanæ salutis artifice vt instrumenta coniungunt , hoc verò est proprium orationis , in qua primum quidem à Deo intellectus illustratur , & voluntas accenditur , vt debite functiones Apostolicas obeat , deinde humilibus precibus Deus ipse qui solus operatur in omnibus , & humanæ salutis & perfectionis progressum , & consummationem sua operatione

ne

ne attingit efficaciter applicatur ad ea operanda in hominum animis quæ pro officio nostro efficere intendimus. Nisi enim ipse accedat, omnes nostri conatus, conciones, exhortationes nihil efficiunt: ut autem Deus accedat, applicet se, & concurrat, non eum permouent nostra industria, facundia, ingenium, doctrina, sed pia oratio ex humili, & ardenti corde profiliens; quare etsi contingat quosdam concionatores orationi non deditos permouere auditorum animos, tamen certum est eos motus quos à Deo fieri constat, non tam eorum verbis quam feruentibus precibus aliorum qui fortasse hominibus despecti alicubi latent impetratos à Deo excitari; & in die iudicii mirabimur tot effectus diuinæ gratiæ, quos in hac vita quibusdam magnis concionatoribus homines tribuunt, aliis quibusdam simplicibus & idiotis à Deo iusto iudice tribui. Quando vero illi ipsi qui eas functiones obeunt, orationi sunt dediti, fieri non potest quin Deus illis ut suis instrumentis se coniungat; unde fit accedentibus præcipue virtutibus supradictis, ut eorum sanctitas inter eas functiones emicet, & iis auctoritatem quandam diuinam, ac proinde incredibilem in dicendo vim conciliet. Nam quæcumque ipsi dicunt ita excipiuntur quasi ea ipsa à Deo haurirent. Itaque mirum non est si altissimè auditorum animis imprimantur: quare B. P. Ignatius Societatis Professus ita studium orationis commendat, ut velit omne tempus, quod obedientiæ & charitatis operibus superest orando traducant. Sic enim Christus Dominus, cum non indigeret, fecit.

MEDITATIO IX.

Commendat Christus orationis studium.

Matthæi 7. Petite & accipietis, quærite & inuenietis, pulsate, & aperietur vobis: omnis enim qui petit accipit, & qui querit inuenit, & pulsanti aperietur. Aut quis est ex vobis homo, qui si petierit filius eius panem, nunquid lapidem porriget ei? si ergo vos cum sitis mali nostis bona data dare filiis vestris, quanto magis pater vester dabit spiritum bonum petentibus se?

Math. 21. Amen dico vobis si habueritis fidem, & non hæsitaueritis, non solum de ficulnea facietis vuas, sed etsi monti huic dixeritis, tolle te & iacta te in mare, fiet, & omnia quæcunque in oratione petieritis credentes, accipietis.

Math. 17. ad expellendos Dæmones ex hominum corporibus, & mortificationis studium & orationis fidei plenæ in Apostolis requirit. Hoc genus Dæmoniorum non eiicitur nisi in oratione, & ieiunio.

Ioan. 16. Si quid petieritis patrem in nomine meo dabit vobis, vsque modo non petistis quicquam in nomine meo; petite & accipietis, vt gaudium vestrum sit plenum.

Luçæ 18. Oportet semper orare, & non deficere, & cap. 21. dicit Apostolis: vigilate itaque omni tempore orantes, vt digni habeamini fugere ista omnia quæ ventura sunt.

Et Matth. 27. Orate ne intretis in tentationem.

*Christus studij orationis exempla dat
Apostolis.*

NOtandum est Christum duobus modis orasse ; Nam aliquando secessit , vt diutiùs oraret ; at aliquando inter medias occupationes externas orauit : cum secessit ita orauit , vt partim aliquid à Patre postularet , quod ad salutem nostram necessarium esse videbat (sicut enim oportuit eum pro nobis pati , ita & orare) partim vt etiam contemplationi Dei vacaret : porrò nulla occupatio in externis vel aliis operibus distrahebat Christi mentem vnquam, quominùs eam contemplationem in Dei laudem, & cultum, speciali affectu ordinaret : quare nihil obstat quominùs dicatur semper orasse in hac vita sine vlla intermissione , aliquibus tamen temporibus specialiter orauit etiam mentaliter, applicando intellectum, non tantùm vt operantem independentem à corpore, sed etiam coniunctum & indigentem phantasmatibus ad meditandum , & contemplandum res diuinas : vnde ad hunc orandi modum oportebat eum secedere, aliis externis non vacare, non dormire ; sed vigilare.

Hoc modo Christus Dominus sæpè in Evangelio orasse , imò ordinariè in oratione pernoctasse colligi potest. Sic enim orauit quando in deserto per 40. dies versatus est , vt supra diximus ex Matth. 4. & Luc. 6. antè electionem Apostolorum.

rum. Exiit in montem orare, & erat pernoctans in oratione Dei. Item Matth. 14. post multiplicationem panum ascendit in montem solus orare usque ad 4. noctis vigiliam qua venit ad discipulos ambulans super mare. Talis etiam fuit oratio Luc. 9. & Matth. 16. quando transfiguratus est. Ascendit, inquit Lucas, nocte ut oraret. Antè passionem aliquot diebus postquam concionatus fuerat in templo sub vesperam redibat ad montem Oliueti, in quo totas noctes eum orasse indicant Euangelistæ, Luc. 21 Mar. 11. unde etiam post cœnam ad eundem locum pro sua consuetudine oraturus de nocte fuit, ubi à Iuda, qui id non ignorabat, traditus est.

Quod si ita Christus qui eo secessu externo non egebat ad contemplationem, voluit tamen ordinariè ita noctes transire insomnes, ut corpus & imaginem ad contemplationem applicaret, totusque Deo vacaret, & præsertim quando aliquid Momenti incumbibat; quid nos facere par est? meritò ergo professi Societatis totum tempus quod liberum habent, Dei contemplationi, re cum Superiore collata, tribuere debent, atque adeò perpetuò cum Deo versari, tum ut cor suum diuinæ gloriæ desiderio accendant, tum ut necessariam ad munia Societatis sanctitatem hauriant, tum ut suos labores suis lachrymis & precibus irrigent, proximòque lumen & gratiam, salutem & perfectionem acquirendi impetrent.

Præter orationes illas longiores Christus Dominus etiam aliis usus est pœnè continuò: nam actiones omnes suas crebris orationibus intermiscibat: cum Lazarum suscitauit, oculis in cœlum eleuatis, rogauit patrem Ioan. 11. Item quan-
do

do panes 5. multiplicauit Ioan. 6. quando S. Sacramentum instituit Math. 16. post vltimam cœnam hymnum dixit, & satis prolixam habuit orationem ad Patrem Mar. 4. Ioan. 17. Et paulò ante cum gentiles vellent eum videre, & id Andræas & Philippus illi dixissent, orauit coram toto populo: Pater clarifica nomen tuum, Ioann. 12. Apostolis redeuntibus à prædicatione gratias egit Patri. Confitebor tibi pater, quia hæc abscondisti à sapientibus & reuelasti ea paruulis &c. Matth. 13. Denique in ipsa cruce preces & supplicationes Deo offerens cum clamore valido exauditus est pro reuerentia sua.

Studium orationis in Apostolis.

ORant dum spiritum expectant, & eligunt S. Mathiam Act. 1. Petrus & Ioannes ascendunt ad templum ad horam orationis nonam. Act. 3.

Sanctus Petrus in Ioppe ascendit in superiora, vt oraret circa horam 6. id est 12. ante prandium. Act. 1.

Sanctus Petrus vale dicens Ephesiis positis genibus cum illis omnibus orauit. Act. 20.

Apostoli quoties ad ægros viscendos veniebant, orabant, & imponebant illis manus. Act. 28.

D. Paulus Rom. 1. testis est Deus meus cui serui in spiritu meo in Euangelio Filij eius, quoniam sine intermissione memoriam vestri facio in orationibus meis, obsecrans, si quomodo tandem aliquando prosperum iter habeam in voluntate veniendi ad vos.

Et cap. i. fratres voluntas cordis mei & obsecratio ad Deum fit pro illis in salutem.

Plenæ sunt S. Pauli Epistolæ orationibus breuibus, gratiarum actionibus, quas suis monitis passim admiscet: nec etiam dubium est quin qui orationis studium aliis tantopere commendat, ipse in eo esset diligentissimus.

S. Petrus Epist. i. ca. 4. Estote prudentes & vigilate in orationibus.

D. Paulus ad Col. 4. orationi instate, vigilantes in ea gratiarum actione, orantes simul & pro nobis; & ad Thessalon. 5. sine intermissione orate, in omnibus gratias agite; hæc enim voluntas Dei est in Christo Iesu, in omnibus vobis. Et aliis innumeris locis.

De conformitate cum Dei voluntate.

HÆc omnia media ad Dei gloriam, nostramque, ac proximi salutem, & perfectionem promouendam magni momenti sunt: verum superest adhuc, sine quo illa omnia nihil proderunt, nempe resignatio suæ voluntatis & conformitas cum diuina. Nam cum cætera illa adhibemus, ita conatum nostrum applicare ad id quod intendimus, debemus, ut quoad modos ipsos circumstantias loci, temporis, personarum, effectus etiam ipsos, nos plane resignemus Dei voluntati. Potest enim sæpe fieri ut concionari velis, & te Deus aliis potius vacare velit; vel ut cupias in certo aliquo loco versari, certas personas iuuare, at Deo id non placeat, modo, ut
certum

certum tibi tuæ perfectionis , aut aliorum modum præscribas , Deus verò non illum , sed alium malit : Item , vt magnis tuis laboribus multam in proximorum conuersatione vtilitatem tibi promittas , qui tamen omnes Dei iudicio frustrà sunt : denique vt agendo , Dei gloriam promouere desideres , Deus autem pati te potius decreuerit ; pati , inquam , non prout cuperes , sed pro sua voluntate infirmitates vel animi , vel corporis eas quas minimè omnium velles. Hæc nostræ voluntatis cum diuina conformitas ad amorem Dei pertinet , quo Deo non tantum bonum gloriæ volumus quod sibi vult , sed etiam eo modo quo vult , atque ita voluntatem nostram eo amore prorsus perfundimus , quo ipse seipsum amat. Huius verò conformitatis exempla plurima dedit nobis Christus Dominus ; vt ea quæ ad eius pueritiam pertinent , de quibus suprâ satis multa insinuauimus ; ea quæ trium annorum spatio dum officio suo palam vacauit , nobis præbuit , possunt à nobis viriliter meditari.

MEDITATIO XVIII.

PRimò ergo quod attinet ad loca & personas , mirum est quomodo Christus Dominus omnium hominum saluator sese in vnius Iudææ finibus continuit ; & in ea , rarò Hierosolymis nisi sub vitæ finem , rarò in præcipuis vrbibus vixit ; nullos principes , paucos alicuius nominis viros vidit , sed pœnè semper in remotis à

principe regni sede , ciuitatibus , in villis , & castris , in desertis locis inter viles & ignotos homines egit , infinitum homines omnes illuminandi desiderium coërcens patris sui voluntate , vnde & dicebat : Non sum missus nisi ad oues quæ perierunt domus Israël. Sic nos facere conuenit vt libenter iis nos terminis etiam angustis coërceamus, quibus nos per obedientiam Dei voluntas coërcuerit , eas personas diuites , pauperes , nobiles, ignobiles , æquè libenter excipiamus , quas ad nos diuina prouidentia miserit. Nam cum audis confessiones , qui ad te accedunt eos omnes à Deo destinatos tibi puta , & te non minùs diligenter , benignè & suauiter illis impende etsi sint viles , quàm si essent Reges. Sic enim Christus Dominus Ioan. 6. omne quod dat mihi pater ad me veniet , & cum qui venit ad me non eiiciam foras , quia descendi de cœlo, non vt faciam voluntatem meam , sed eius qui misit me. Hanc Christus patris voluntatem sibi intuitus est etiam in Apostolorum electione.

Secundò etiam mirum est quomodo Christus Dominus Dei sapientia & virtus , cùm potuisset aliis modis quamplurimis patris sui gloriam cognitionem & amorem procurare , tamen ita latuerit , absconderit sapientiam , virtutem & sanctitatem sub communi illo viuendi conuersandique modo , quâ in re sine dubio patris voluntatem sequutus est , adeò vt præcipuas quasque vitæ suæ actiones , doctrinam , conuersationem , miracula , ad Dei voluntatem planè composuerit : Non possum , inquit , Ioan. 6. ego à me ipso facere quicquam , sicut audio , iudico;

&

& iudicium meum iustum est , quia non quæro voluntatem meam, sed eius qui misit me. Et Paulo antè : Non potest filius à se facere quicquam, nisi quod viderit patrem facientem : & cap. 7. Mea doctrina non est mea , sed eius qui misit me , si quis voluerit voluntatem eius facere , cognoscet de doctrina utrum à Deo sit , an ego à me ipso loquar. Ita certè nos Dei voluntati oportet conformare nostram, cum naturales nobis dotes, & talenta , & doctrinam , non prout optaremus largitur ; nam satis ei est , si quod largitus est, id fideliter impendamus : ne igitur aliud velis habere ingenium , aliud iudicium, aliam doctrinam, alia talenta , quam pro eius voluntate. Quid scis an si maioribus dotibus præditus esses , illis non abutereris ad tuam æternam damnationem ut plurimis contigit.

Tertiò. In eo etiam Christi Domini resignatio magna fuit , cum tanta pro hominibus fecerit ; tantos in Iudæis docendis labores sustinuerit, suæ vitæ, suo sanguini non pepercerit , tamen tam paucos conuerterit , & tantis impensis & laboribus fructus longè impar extiterit. Quoties ipse frustra in templo , frustra in priuatis domibus omni occasione laborauit , nec tamen idèd minori affectu semper ad eosdem labores rediit: Certè hoc nobis documentum esse debet , ut etsi frustra nos laborare videamus , tamen non desistamus , sed ad iniunctum nobis pensum alacriter redeamus , fortè ea resignatio efficiet , ut saltem aliquis à Deo tangatur , si non hoc tempore , sed postea cum maxima fructus multiplicatione , ut sæpè contigit , saltem peccata aliqua impediemus aut Dei sapientiam ac bonitatem à filiis

filiis suis iustificabimus, vt fecit Christus, aut tandem tanquam Dei famuli, officij nostri ad eius gloriam partes expleuerimus. Nam vt rectè S. Bernardus ad Eugenium Papam lib. 4. de Confid. Noli diffidere, curam exigit non curationem; denique audisti. Curam illius habe, & non cura, vel sana illum, verum dixit quidam.

Non est in medico semper releuetur vt ager.

At meliùs propono, de tuis tibi Paulus loquitur. Plus omnibus laboraui, non ait plus omnibus profui, aut plus omnibus fructificaui, verbum insolens religiosissimè vitans; alias autem nouerat homo quem docuit Deus, quia vnusquisque secundum suum laborem accipiet, non secundum prouentum, & ob hoc in laboribus potiùs, quàm in profectibus gloriandum putauit: sicut alibi quoque habes ipsum dicentem. In laboribus plurimis, ita quæso fac tu quod tuum est; nam Deus quod suum est satis absque tua sollicitudine, & anxietate curabit; planta, riga, affer curam, & tuas expleuisti partes: sanè incrementum vbi voluerit dabit Deus, non tu; vbi fortè voluerit tibi deperit nihil, dicente scriptura: Reddet Deus mercedem laborum sanctorum suorum; securus labor quem nullus valet euacuare defectus.

Quartò. Eius resignatio maximè eluxit in oratione in horto, quando propositis antè oculos internis externisque tormentis, cum natura refugeret pati, & potiùs agendo, hominum salutem vellet procurare, tamen magno animo se voluntati eius subiecit. Pater, si possibile est, transeat à me calix iste, verum tamen non mea, sed tua voluntas fiat. Ita certè fieri potest vt eam

Dei gloriæ mensuram quam Deus à te expectat, non tam agendo, & insignes virtutum heroicarum actus obeundo, quam patiendo, vel in animo scrupulos, anxietates, ariditates, desolationes; vel in corpore dolores & morbos, quibus ab aliis operibus gloriæ Dei procuratori seruiantibus, planè impediatis, procurari velit.

*Summa Apostolicæ missionis, & perfectionis
ijs titulis & nominibus, quibus Apostoli
in scriptura vocantur,
comprehensa.*

Qui ad Apostolicæ vitæ perfectionem vocati sunt, non inutiliter Apostolorum titulos, qui Apostolicæ missionis & perfectionis hætenus propositæ summam, vel omnes, vel quos volent expendere poterunt, exercendo memoriam vt singulos penetrent, & bene concipiant, viuâque fide apprehendant, deinde per discursum affectus aliquos voluntatis excitando. Hi vero affectus varij esse poterunt, cuiusmodi sunt.

Primus admirationis, & gratiarum actionis, & amoris, quod nos tanta vocatione dignatus sit, ita sibi coniunxerit, in rebus tanti momenti nostrâ operâ vti velit.

Secundus. Humilitatis, & propriæ diffidentiae, & timoris ne nos tanto statu indignos nostra socordia, & negligentia reddamus, & Dei gloriam impediamus.

Tertius. Magni & generosi propositi cum eius gratia, talenta & vocationis gratiam non deserendi

deserendi, nec vlla in re degenerandi, sed omnem perfectionem illi consentaneam omni studio confectandi, promouendi etiam Dei gloriam omni ope nullis parcendo laboribus, nullis molestiis, constanti, generosoque animo quælibet aduersa ad crucem vsque Christi, Apostolorum exemplo perpendendo.

MEDITATIO XIX.

Quales Christus Dominus Apostolos suos esse voluerit, & velit esse eos, quos ad vitam Apostolicam formam vocat, aperte significat iis nominibus, quibus eos appellare solet.

Math. 5.

Primo enim vocat eos salem terræ, qui doctrina & vitæ exemplo non conseruent tantum à putredine mundum, sed etiam putridum iam, pœnitentiæ vi sanent, & Deo sapidum cibum efficiant, quamuis exemplum Christi ad hoc necesse sit, ne soluantur ipsi & pereant.

Ibid.

Secundò. Lucem mundi vtpote ab ipso sole iustitiæ Christo illuminatos & accensos, deinde lumen doctrinæ & sanctitatis in totum mundum inferentes, & ignem diuini amoris, quem Christus venit mittere in terram, in omnium animis accendentes.

Ibid.

Tertiò, Ciuitatem non in solitudine occultam,

tam , sed in hominum oculis , & frequentia ; non in valle imperfectioris vitæ , sed suprâ montem eminentis cuiusdam perfectionis positam , quæque hostibus sit terrori , & omnibus iuste & perfecte viuere volentibus perfugio & exemplo , in qua Deus habitet , quam benè componat , & sancti amoris sui legibus gubernet.

Quartò , sicut oues æternis pascuis pinguescentes , & inter lupos mansuetudinem suam & patientiam retinentes , omnibus prodesse cupientes , & in pastoris prouidentia confidentes , atque deuotas Dei & Christi gloriæ victimas.

Quintò , Prudentes sicut serpentes , simplices sicut columbæ per prudentiam aliorum insidias , & læsionem cauentes , per simplicitatem non lædentes etiam læsi , nec malum pro malo reddentes. Rursum per prudentiam captantes omnem occasionem alios lucrificandi per simplicitatem , id facientes sine vlllo dolo malo , sine vlllo intuitu proprij boni ; nec desistentes , etsi affligantur , spolientur , sicut Columbæ pullis spoliatae Columbaria non deserunt.

Sextò. Perpetuos Christi comites , & domesticos , vt sicut filius ex patris sinu emissus ad nos docendos , ita ipsi ex eius quasi sinu & à latere legati eius regnum annuntiarent , & Christi perfectiones , virtutésque omnes quas oculis & mente contemplati imitarentur , & vitæ mentisque eius formam in se exprimerent , mundoque repræsentarent.

7. Amicos sponsi quos & ille plurimum amauit , & qui illum valde amarunt , quem illis amorem à patre Christus impetrauit.

8. Matrem Christi quæ continuo illum & concipiat

concipiat sanctis desideriis & in aliis parturiat ; donec in iisdem formetur.

9. Ministros Christi veri Salomonis : in eum continuo intuentes , & ad eius iussa , & gloriam propagandam semper paratos.

10. Operarios agri dominici ad aratrum Evangelicum vocatos, & pleni fructu virtutum , semen salutis in aliis spargant , & eos omni ratione, sine vlla cessatione excolant , exemplo , lacrymis, laboribus.

11. Dei & Christi coadiutores in ponendo Fidei fundamento & consummando opere sanctorum , adimplentes quæ Christi passionibus desunt in suo corpore , & in vita sua & occupationibus , spectaculum Deo, Angelis, & hominibus effecti.

12. Cœlestes Aquilas , quæ & congregentur ubi est corpus Dominicum , vt ex illo viuant, & ament in altum sese sustollere , & cum opus est ad prædam descendant & suos fœtus in alis portent.

13. Pædagogos, imo patres populi Christiani, qui suis eum orationibus , laboribus , verbi Dei & sanctitatis semine Deo pariunt , & magna sollicitudine nutriunt , vt illi obediens esse , & eius gloriæ seruire velit.

14. Belli spiritualis duces ad famem , sitim , labores , vigilias , pugnam , mortem , præeuntes cæteris , & expertos primum in se hostium fraudes , & eorundem victores per Christum.

15. Sapientiæ Architectos qui in se primum totius ædificium perfectionis firment , & turrim Euangelicam construant , deinde in aliis.

16. Tubas Euangelicas spiritu oris Christi semper plenas, & non voce tantum, sed præcipuè exemplis totum mundum percellentes.

17. Vitis Christi palmites ex illo continuo succum trahentes, & inde suauem fructum producentes.

18. Odorem bonum Christi, quos nempe Christus sibi intimè vnitos & quasi incorporatos sui spiritus, vitæ, perfectionis ex se veluti odorem misit.

19. Spirituales mercatores, & procuratores, Dei negotia in hoc mundo gerentes, quibus vbi Talenta distribuit, ait. Negotiamini donec venio.

20. Frumentum aræ Dominicæ prætiosius ad hoc separaturn vt cadens in terram moriatur, & multum fructum adferat.

C A P V T X X I X.

*Ad Tertiam hebdomadam de Domini
Passione.*

P A R A G R A P H V S I.

*Deus viros Apostolicos perficit tandem rebus
aduersis.*

EX secunda hebdomada satis notum est, perfectum Dei amorem, & gloriæ eius procuratorem, includere intrinsecè propriam abnegationem

gationem in omnibus rebus , per liberum virtutum Apostolicarum vsum : cum enim ea perfectio in eo posita sit , vt ita Deum pure amemus eiusque gloriam procuremus , sicut ipse seipsum amat , & suam sibi gloriam procurat , necesse omnino est vt continuâ abnegatione nostri , non tantum omnem terrenarum opum corporearumque voluptatum , & honorum , vanitatumque mundanarum affectum ex animo nostro eiiciamus , sed etiam omnem nostrum amorem etiam honestum exuamus. Hæc verò tanta abnegatio vix potest propriis actionibus fieri , vt id omne quod est humanum exhauriat , atque ad fundum vsque pertingat. Nam cum homo naturali affectu ab iis adeo asperis & difficilibus perfectæ mortificationis studiis plurimum deterreatur , & ex alia parte , cum maiori feruore agitur , periculum esse potest ne excedat , frequenter contingit vt siue amore , siue timore ab illis exercitiis & functionibus abstineat , quæ ad eam vitæ & amoris Dei puritatem , diuinæque gloriæ procurationem essent necessariae. Quare sapientissimè diuina prouidentia ita res humanas disposuit , & amicorum suorum vitam moderari constituit , vt plurimi quotidie aduersi casus occurrant vltro nihil cogitantibus , quibus proinde efficacius suffocatus proprius amor prorsus intereat , & vni purissimo Dei amori , ad eius gloriam cedat. Cum enim eos vere & perfectissime diligat , & vt omnis perfectionis artifex , & idea eos sibi reddere simillimos velit , nonnunquam communibus huiusce vitæ miseriis conflictari eos etiam grauius quàm cæteros permittit , aliquando impiorum hominum crudelitati , ac persecutionibus

secutionibus obiicit , sæpè Dæmoni affligendos relinquit , denique non rarò ipse variis eos rationibus probat & exercet , atque ita quod ipsi propriis actionibus rectè , & honestè facere non potuissent , cum nemo sibi manus afferre , nemo gravibus sese periculis obicere licitè debeat ; ipse illatis ab extrinseco, aliorum voluntate, & actione istiusmodi malis , eos perficit , vt tandem omnibus aliis bonis atque adeò aliquo modo seipsis, quasi non sint, id quod sunt, extra se eiectis , soli Deo, eiúsque gloriæ vivant. Huius extrinsecæ operationis fundamentum quoddam est , prior vita omnis generis mortificationibus , & virtutum actionibus , propriâ voluntate ex amore Dei , & gloriæ eius procuratione susceptis, exercita. Quâvis enim communibus huius vitæ miseriis , imò casibus quibusdam extraordinariis etiam imperfecti aliquando pulsantur , & iuventur etiam passionum certamine , rarò tamen diuina providentia ad ardua pro suâ gloriâ obeunda eos euehit, qui nimium adhuc amantes sui indulgentius sese habent, à sui mortificandi studio alieniores sunt, corporis , & honoris etiam , & famæ exactam nimis rationem habent, aspera carni , vel propriæ inclinationi, ac voluntati contraria reformidant. Et certè quos olim Martyrij certamen admisit, fuisse pœnè omnes legimus non opum tantùm, & voluptatum, atque mundi , sui , vitæque propriæ contemptu insignes , adeò vt his veluti studiis, quasi quibusdam priuatis exercitiis eruditi priùs à supremo hoc agonotheta videantur , quàm in publicum certamen ad fidei veritatem & Dei gloriam propugnandam prodirent , priùs generoso sui odio ex amore Dei per varias vitæ suæ siue

V

priuatæ

priuatae siue publicae actiones, & functiones amoris proprio mortem intulerint, quam ad illatas ab aliis iniurias ferendas vocarentur.

Hoc igitur fundamento posito solet diuina bonitas Athletis suis generosiora desideria patiendi ad Dei gloriam plura grauiorâque immittere: cum enim diuinæ maiestatis infinitam excellentiam, & bonitatem contemplantur, & ex altera parte quam parum illud sit quod ad eius gloriam, & pro eius amore facere ipsi possunt; exardescunt illicò inflammatis desideriis extrema quæque patiendi ut tanquam perfectissima holocausta ad eius honorem consummentur, & veluti in nihilum reducti Deum adaugeant.

Verùm cum in vitæ huius tenebris positi, & suæ fragilitatis conscij, nesciant, an, quid, quomodo pati possint, aut an hoc etiam modo Deus ab illis suam gloriam amplificari velit, hæc tanta desideria sanctissimæ eius voluntati submitunt. Nec enim ignorant Deum, cum infinito amore seipsum prosequatur, scire quam mensura quibusque modis, & afflictionibus internis an externis; perpetuis, an breui tempore finitis, per vnumquemque velit gloriam suam promouere.

PARAGRAPHVS II.

*Gloriam Dei maiorem per aduersa
promoueri.*

Quamquam ex vltro susceptis perfectionis studiis, & propriæ abnegationis operibus, atque

atque actiuæ vitæ functionibus illustrari plurimum soleat Dei gloria, longè tamen splendescit illa, cum mala quæ nobis circa honorem eius amplificandum occupatis, veleuenire permittit, vel immittit, patienti & æquo animo toleramus. Imprimis enim mirum quantum id nostram perfectionem ad summum veluti apicem promoueat. Nam vt paulò antè dicebamus, quod ultro susceptis exercitiis fieri nunquam consuevit, quicquid in nobis est proprium, quicquid humanum sapit, fortiter expurgat, & diuinum dumtaxat bonum in nostræ voluntatis fundo relinquit, atque ita voluntatem nostram efficit tandem diuinæ voluntati perfectè conformem, vt nimirum probeamus quæ sit voluntas Dei non tantùm bona & beneplacens, sed etiam perfecta: quo fit vt ea perfectione quasi quodam bono suo mirum in modum diuina voluntas delectetur, & sibi complaceat. Nam in omni actione nostra necessario aliquid nostrum est quod secretâ quadam familiaritate, delectatione nonnullâ tanquam pabulo amorem proprium nutrit. At cum quid patimur, nihil necessariò nostrum est præter ipsum pati, id est esse subiectum illius actionis, qua Deo vel agente, vel permittente patimur; Deus autem ex hac sua actione, & permissione, gloriæ suæ bonum purum liquidumque, prout ipse cupit, pro infinito eo amore quo eam prosequitur, colligit. Quare quicquid hic inuenitur, Dei agentis, & gloriam suam eo quo placet ei modo, colligentis; & humanâ voluntate sibi liberè resignatâ, tanquam propriâ vtentis, opus proprium est. Quid igitur mirum si in eo sibi complaceat, & delectetur? atque inde etiam fit vt perfectionum

suarum splendorem amplius & perfectius diffundat. Cùm enim optimè comparata sit viri perfecti & patientis voluntas ad qualvis actiones excipiendas, Deus optimus Max. gloriæ suæ summus artifex, nihil veretur quibuslibet eam aduersis in illum finem exercere, atque vt impios terreat, & iustitiæ suæ seueritatem testatam faciat, communibus etiam calamitatibus grauissimè nonnumquam affligi pietate insignes viros, sanctissimè permittit, & iustos quoque tribulari, vt Apostolus loquitur, in exemplum iusti iudicij Dei. De quo B. August. lib. 22. contra Faustum cap. 2. pressuras, inquit, persecutionesque iustorum dicit Apostolus esse exemplum iusti iudicij Dei: hinc enim intelligitur quomodo non parcatur impiis, tanquam sarmentis præcisis ad combustionem, quando iustis non parcitur propter perficiendam purgationem; ita Diuus Augustinus.

Sed mirum in modum per huiusmodi casus aduersos emicat admirabilis Dei sapientia, potentia, & iustitia; cùm enim ea sit hominum consuetudo, vt ad magnam rerum molitionem præstantissima quæque instrumenta adhibeant, quis non obstupescet diuinæ sapientiæ consilium, quæ eos quos ad res magnas perficiendas elegit, tribulationibus & aduersis casibus ita plerumque atterit & abiicit, vt tantis operibus inutiles prorsus forè videantur? quis rursus eiusdem potentiam non admirabitur? cum eisdem grauissimis contractos ærumnis, ac vt loquitur Apostolus, responsum mortis habentes, & propè desperatos non reuocat dumtaxat ad vitam, sed etiam ad res magnas efficiendas sursum erigit.

Quis iustitiæ eius æquitatem non extollet? quæ
vbi

vbi eosdem innumeris hominum contumelijs, irrisiõibus & ludibrijs, calumniisque obiecit, & despicatissimorum mancipiorum instar, contemni & omnium pedibus conculari permisit, subito postea magnis honoribus auctos, vel admirandis & naturæ vim excedentibus operibus insignes, vel rebus præclare gestis conspicuos, tanquam lucentissimas faces in candelabro collocat: quis iterum non magnificet eius potentia? quæ infirmas creaturas vniuerso Dæmonum tyrannorumque omnium ac totius mundi furori oppositas, ita vi gratiæ suæ confirmauit, vt superata eorum crudelitate, victis tormentis, domito furore, de iis gloriose triumpharent, vel potius in iis, ipsa Dei gratiâ de omnibus mundi malis triumpharet; adeo vt non immerito Tertullianus Beatum Iob non tantum operarium victoriæ Dei, sed etiam gloriæ eius vexillum ac feretrum, & quemdam veluti triumphantem currum appellarit.

Verum pertinet & illud ad Dei gloriam, quod non alia magis ratione detegat seruorum suorum veram & solidam sanctitatem, atque adeo eos toti mundo conspicuos reddat: hæc enim tanta eorū virtus probata, sicut aurum in fornace, tot ærumnis, hominibus admirationi est, ita nimirum in gloriam eius plurimum redundat, qui eius author est, & ad cuius iustitiæ laudem pertinet, vt tanta sanctorum virtus tribulationis vi foras erumpat, & in hominum opinione splendescat.

Atque inde etiam fit, vt tot aduersitatum ictibus protrusa in apertum virtutum omnium clarissima exempla omnium animos non erudiant modò, sed etiam vehementer ad omnem honestatem

statem accendant. Quis enim cum B. Iosephi , B. Iob , Tobiaë , Martyrumque denique passionibus intuetur , inde non discit , quanti Deus , eiusque amicitia & gloria , quanti virtus fieri debeat , pro quo videt tantâ alacritate viros prudentissimos & sanctissimos extrema quæque pati voluisse , atque adeo tanquam deuotas Deo victimas holocaustorum instar consumptos & quodammodo in nihilum redactos esse. Quamquam enim cæterarum virtutum exempla plurimam vim habeant ad animos mortalium permouendos , habent tamen hæc de quibus agimus nescio quid admirabilitatis , quo maiori vi hominum animis non huius aut alterius virtutis , sed omnium pœne ac præcipue Fidei , Spei , Religionis , amoris in Deum & proximum , fortitudinis , mundi , reumque omnium ac sui contemptus , & id genus cæterarum pretium commendant , & ad earum honestatem , ultra quam credi possit , incitant , quarum et si omnium aliarum virtutum exempla in viris sanctis nullo Deus tempore deesse voluerit , nullius tamen tot tamque illustria quàm patientiæ extiterunt , quæ ubi commemorauit Apostolus aptissimè nubem vocat : habentes , inquit , tantam impositam nubem testium per patientiâ curramus aspicientes in authorem Fidei , & consummatorem. Nubes enim vere sancti sunt , tum quia infinita propemodum multitudinis nubis densitatem adæquant , tum quia afflictionum & miseriarum viâ bonis omnibus creatis , atque adeo seipsis desciscientes atque diuini cælestis patientiæ exemplis velut fecundis imbribus præclaros , contemptus mundi , amoris Dei virtutumque omnium fructus in nobis exsuscitant ,

nutriunt

nutriunt, & ad maturitatem perducunt. Patientia enim opus perfectum habet.

Et certè quamquam præclarissima extiterint, & ad Dei gloriam, & ad nostram mutationem virtutum opera, quæ Christus Dominus toto vitæ tempore edidit, longè tamen manifestiùs vnà passionis die, dilacerato tot vulneribus, attrito tot doloribus, toto operto plagis corpore, effusa antè oculos intima viscera misericordiæ & benignitatis, sapientiæ item, & iustitiæ abditissimas opes atque adedò gloriam Dei patefecit, longè clarioribus, & potentioribus virtutum omnium exemplis, vnà cum sanguinis sui effusione duritiem cordium nostrorum irrorauit. Quare nihil mirum est, si quos Filio suo conformes esse prædestinauit, postquam eos vocauit, iustificauit primum, deinde sanctificauit, eosdem denique variis exercitiis aduersitatibus glorificet, & toti mundo conspicuos reddat.

PARAGRAPHVS. III.

Quanam sint illa quæ viros Apostolicos perpeti sæpè oportet ad Dei gloriam.

SVavis Dei prouidentia voluntates quidem nostras diuino amore succensas, rerum tamen etiam terrenarum vsu & affectu, etiam bene ordinato implicatas vt repurget admirabilis est, cum enim optimè nobis esse velit, non nisi ex ardentissima amoris erga nos fornace hæc nobis aduersa, quæ euenire permittit, emanare queunt, vt omnia nobis in bonum cooperentur. Solet

autem inchoare à vilioribus nimirum fortunæ bonis , non quidem superfluis tantum, quod Deum amanti , & terram paruipendenti durum non est, sed etiam à necessariis ad vitam , vel honestam sustentationem , aut ea pietatis officia quæ charitatis , & proximorum ratio aliquando necessaria exposcit : Nec verò simul omnibus spoliatur , sed sensim , vt Diuus Gregorius notat de B. Iob , qui omnibus facultatibus per partes Deo permitte spoliatus , cùm esset omnium Orientalium ditissimus, in extremam nuditatem , & paupertatem reductus est , adeò vt diceret. Nudus egressus sum de ventre matris meæ , nudus reuertar illuc, nihilque superesset ad vitam tolerandam , & insignia illa misericordiæ opera quæ prius exercebat : & certè nec iis bonis erat nimium affectus, nec iis malè utebatur , quin potiùs in pauperum vsùs largè consumebat , adeò vt diceret se buccellam suam solum non comedisse. Quamquam enim animus illis inordinatè non adhæreat , ipsa tamen rerum terrenarum sollicitudine plena procuratio , & possessio, non potest non impedimento esse puritati & simplicitati amoris Dei , qui solius Dei possessione , & procuratione eius gloriæ gaudet : fit enim sæpè vt sancti etiam viri iis quæ possident, confidant, & in eorum administratione velint nolint excedant aliquantulum. Id ipsum vsu venit in librorum aliarumque rerum ad pietatem etiam pertinentium vsu , etsi nihil sit superflui. Nam licèt affectum paupertatis retineamus , tamen non semper nos omnibus spoliemus propter Deum , sed ob certas rationes quas ad maiorem Dei gloriam esse putamus, conseruamus aliqua , iis bene vsuri ad Dei gloriam.

Quod

Quod ergo paupertatis affectus non potuisset à nobis euincere, vt propriis actionibus nosiis spoliaremus, id facit Deus, atque ita declarat non esse voluntatis suæ vt vsu illo honesto rerum huiusmodi, sed potius earundem priuatione gloriam ipsius promoueamus. Huius spoliationis etiam in Christi passione habemus exemplum, qui cum nihil haberet præter tunicam, etiam eâ spoliatus est & nudus cruci affixus. De hac nuditate gloriabatur Apostolus: vsque in hanc horam & nudi sumus &c. Et qui spiritu Cristi pleni sunt, nulli rei affixum affectum habent, sed omnibus exui, si ita res ferat, etiã optât.

Secundus gradus est earum afflictionum, quibus corpus exercetur, ac proinde naturalis eius amor planè excinditur, & radicitùs euellitur. Nam cum nec amor naturalis, nec etiam ratio ipsa patiatur, vt propria actione per mortificationis studia corpus vltia modum atteramus, ad magnam vtilitatem nostram permittit Deus, vt dum eius gloriæ vacamus, siue naturaliter, siue fortuitò, siue aliorum malitiâ, morbis grauib, vulneribus, mutilationibus conficiamur, quibus omnibus malis æquo animo humiliterque ferendis exercetur Dei amor, & ad maxima incrementa, deletò sensim omni proprii corporis amore, perducitur. Nam id etiam familiare est viris spiritualibus valetudinem magni æstimare, studioseque ac sollicitè eam ad Dei gloriam variis functionibus amplificandam conseruare; qua in re, etsi, quod sæpe fit, non excedant, tamen amor ille diuinæ gloriæ per illam corporis integritatem augendæ, coniunctum habet amorem & desiderium eiusdem integritatis, quod licet bene ordinatum sit, tamen est boni cuiusdã naturalis amor & desiderium: Quare nonnunquam Deus hoc etiam bono suos

suos spoliat, tum vt ex sui cognitione profundius humiliantur, & ita aptiores sint ad res magnas, tum vt insigni patientia, superato Dæmone & mundo, atque omni proprio amore, longè maiorem Deo gloriam tribuant. Ad eum modum B. Iobum non vno morbo, sed innumeris prope iisque acutissimis, & insuper totius corporis pessimo vlcere percutiendum Dæmoni permisit, & Filium suum innumeris corporis doloribus per flagella, coronâ spineam, crucem denique, & acerbissimos dolores consummari voluit. Cum enim tantum sit bonum, Dei gloria, & amicitia, non est tantum terrenis omnibus præferendum, sed etiâ ipsi vitæ nostræ: quare suos Deus non tantum spoliari bonis, sed etiam corporis integritate ac viribus, imo vitâ ipsâ voluit, atque ita puriore amore ab illis diligi, vt etiam quanti Dei amicitia facienda sit, alij omnes intelligerent. Quare nulla de re frequentius gloriatur Apostolus quam de tribulationibus, fame, siti, frigore, & id genus corporis afflictionibus quas pro Christo tolerabat.

Hinc sequitur iactura famæ, honoris, favoris, & amicitia humanæ, quæ bona cum altioris cuiusdâ ordinis sint, voluntatem deliniunt suauius, & potentiùs occupant, & cum indifferentia sint, videntur sine labe posse quæri, præsertim cum ad bonum finē atque adeo Dei gloriam, ad quam valere possunt plurimum, referuntur. Itaque multi quidem ferunt satis faciliè corporis mortificationes; at verò vbi de contumeliis & opprobriis atque infamia & contemptu agitur, grauiùs id ferrè consueuerunt: quamquam autem ij qui in perfectionis statu degunt, amoris Dei longissimè omnia bona hæc postponât, longè tamen magis vis elucescit, cum re ipsa pro

pro occasione non ab externis solum, aut hostibus, sed ab amicis etiam & domesticis, usque coniunctissimis deseruntur, contéptui habentur, conuitiis & contumeliis laceffuntur, & instar vilissimorum mancipiorum non tantum desptcatui habentur, sed etiam durissimis & vilissimis rebus exercentur, omnium prope pedibus proculcantur: Tunc enim expurgatus hoc igne Dei amor mirum in modum splendescit; etsi enim sæpe non expédiat ad Dei gloriam, famam propriam prodigere, tamen cum diuina prouidentia hoc vti instrumento ad suam gloriam non vult, sed potius infamia & contemptu, atque ea mala permittit euenire; tunc verò in camino ignominia nescis quomodo purius enitescit Dei amor, quam inter humanae gloriae pompas, & applausus etiam ad Dei gloriam relatos. Et hoc etiam modo probatus fuit S. Iob, qui uxoris & amicorum conuitia, contumelias, opprobria, detractiones cum tanta infamia forti animo tulit, sed incomparabiliter magis Christus Iesus, tum in omni vita, tum in passione & cruce illa infami, tanquam sceleratus, & grauissimorum criminum reus publicâ sententiâ suspensus, innumeris Iudeorum oppobriis, irrisionibus, maledictis expositus.

P A R A G R A P H V S I V.

*Non externis solum malis , sed etiam internis
Deus viros iustos ad suam
gloriam exercet.*

ATque hæc bona parui momenti sunt, & ideo facile generosus Dei amor patitur se iis spoliari. Verùm alia quædam sunt spiritualia, quæ diuino amor non tantùm non aduersantur, sed plurimum etiam prodesse solent, quibus tamen interdum diuina prouidentia nos spoliât, vt humilius & solidius à nobis diligatur, & maiorem gloriæ suæ fructum recipiat.

Horum spiritualium bonorum genera sunt plura : in primo ordine reponendi sunt habitus ipsi virtutum, qui cum valde occulti sint, adeo vt eorum priuationem vel augmentationem nullo certo indicio sentire possimus, non spectant ad hanc tractationem; præsertim cum eorum priuatio non possit esse nobis non noxia.

In Secundò ergo ordine sunt prædictorum habituum actus & virtutum exercitia siue externa, siue interna; nam iis, inquam, indiciis nostrum profectum deprehendimus; qui enim in prædictis Apostolicæ vitæ functionibus & virtutibus diu exerciti sunt, fieri non potest quin magna cum facilitate virtutum illarum actus siue internos siue externos obeant; quia facilitate pos-

sunt nonnunquam à Deo priuari, sic aliquando vix ac ne vix quidem solita virtutum exercitia possint retinere, adeoque ob suam ipsi tarditatem, & quamdam inutilitatem affligantur plurimum, & ingemiscant, atque etiam terreantur ac timeant, ne in pristinas imperfectiones & peccata, ad quæ vehementer sollicitantur, relabantur.

In Tertiò sunt sancta vitæ perfectionis desideria, agendi item & patiendi plura pro Dei gloria, quæ in viris Apostolicis incensa esse solent, quæ etiam nonnunquam debilitari Deus permittet.

In Quartò, est pax quædam sine ullo timore, cum enim tantam Dei gratiæ abundantiam, tantam in usu virtutum omnium facilitatem, tot lumina, desideriaque adeo inflammata in se quis experitur, non potest non in has psalmistæ voces erumpere: Dixi in abundantia mea non mouebo in æternum; sed auertente subinde Deo faciem suam, ita conturbatur, vel scrupulis vel variis tentationibus agitur, ut iam plane à Dei amicitia alienus, atque prope in inferno quodam viuere videatur.

In Quintò denique est delectatio, quæ non potest non sequi vel virtutum exercitia, vel perfectionis maioris desideria, vel animæ pacem; hæc enim ideo magna bona sunt, ut cum ea se possidere quis videt, non possit non rationabiliter gaudere: hæc verò delectatio si de iis bonis oriatur quatenus Dei gloriæ seruiunt, & bonitatis eius diuitias continent, ex Dei amore tanquam ex proprio fonte promanat, si vero ex iisdem quatenus nos perficiunt,

ciunt , ex amore nostri recto profluit : quod si se intra voluntatem ipsam contineat , purè spiritualis est & substantialis vocatur , si vero in sensitivum appetitum deriuetur , sensibilis dicitur.

P A R A G R A P H V S. V.

*Quo discrimine perfecti & imperfecti viri ad-
versa quæ contingunt , patiantur.*

EA est humanæ vitæ conditio , ut semper in ea aliquid patiendum sit , nullusque omnino sit siue incipiens , siue proficiens , siue perfectus , cui non multa quotidie contraria occurrant : verum , etsi ita sit , diverso tamen modo à perfectis siue viris Apostolicis tolerantur adversa , quam ab incipientibus.

Primò enim quæ ab incipientibus tolerantur , ad purgationem solent referri , ab aliis vero vel ad unionem cum Deo , vel ad Dei gloriæ procuratiōnem. Nec enim incipiens , quæ sibi contraria contingunt , eo proprie animo suscipit , ut Deo inde gloria aliqua pariat ; sed quia immediate videt per vitæ huius mala satisfieri prioribus peccatis & impediri posteriora , & corroborari virtutem patientiæ , qua instructus non facile propter ingruentia mala in posterum moueatur , turbetur , distrahatur , diuellaturque à quieta & tranquilla Dei fruitione. At vero perfectus totum

tum in Dei gloriam refert. pro qua etiam consumi & conterigaudet; & tantum abest ut exinde turberetur, ut potius augeatur pax quam cum Deo habet, crescâtque magis ac magis cum Deo unio & amor his occasionibus prouocatus, non secus atque quando ardenti foco exigua aqua affunditur, accendatur.

Secundò. Non tantum in fine quem sibi constituunt, cum patiuntur, differunt, sed in iis ipsis quæ patiuntur: in initio illa communiter toleranda sunt, sine quibus vita præsens ordinariè non solet traduci: sic enim D. Cyprianus de mortalitate. Quoddam, inquit mouet, quod nobis cum gentilibus sit communis ista mortalitas. Et paulo post respondet. Non ad hoc credit Christianus, ut immunis à contractu malorum, feliciter mundo perfruatur, sed ut omnia hic aduersa perpessus ad futuram lætitiā reseruetur, quandiu in isto mundo sumus, cum genere humano carnis æqualitate coniungimur, spiritu separamur: viris Apostolicis sæpe permittente Deo & fræna laxante siue Dæmoni, siue Mundo, grauissima quæque & maximè extraordinaria sunt toleranda, tum ut illorum virtus, tum ut Dei gloria magis illustretur. Quare Sanctus Cyprianus ibidem. Scire debet Christianus plus sibi quam cæteris in sæculo laborandum, cui magis sit cum Dei impugnatione luctandum: & Beatus Augustinus in psal. 50. Prior labor est, ait, ut displiceas tibi, ut peccata tua expurges, ut muteris in melius. Secundus labor est pro eo quod mutatus es, ferre tribulationes, & tentationes huius sæculi,

culi & inter eas perseuerare vsque in finem & Sanctus Gregorius lib.6.Regist. Confidenter dico, minus piè viuīs, si minus persecutionum pateris.

Tertiò, vt plurimum qui perfecti sunt, ea quæ patiuntur, propter iustitiam patiuntur, atque adeo propter bona illorum opera & dum bene agunt, & Dei gloriam promouent. Alij verò non tam idcirco saltem ordinariè, quàm propter nonnullas eorū imperfectiones, quarum saltem prætextu, quæ eos affligunt mala, iuste quodammodo irrogata videri possunt.

Quartò denique solent imperfecti adhuc cum magnis imperfectionibus aduersa tolerare, & facile frangi. Nam plerumque turbantur ipsi secum, & qui augere debuissent pietatis exercitia & orationis studium, deserunt; ad externa auxilia & consolationes profugiunt, operosè & anxie suam famā tueri conantur, repellunt acrius eas iniurias, in ultionis desideria erumpunt, impatientiæ & tristitiæ inordinatæ sededunt, & absorberi plerumque patiuntur. Contrà verò virorum perfectorum & Apostolicorum virtutes in camino aduersitatum probatæ perficiuntur & splendescunt.



*Quenam potissimum virtutes exercentur à
viris Apostolicis, cum quid patiuntur.*

MUltæ eæque magnæ, atque adeo in gradu
heroico.

Prima est amor erga Deum, & proximum siue
Zelus gloriæ diuinæ, & salutis animarum. Et
vero in Christi Domini pectore ita exarserat
hic ignis, vt nullis tribulationum, & tormento-
rum aquis nulla hominum ingratitude extin-
gui posset. Quare non solum extrema pro Dei
gloriâ & hominum salute pati voluit, sed etiam
ea ipsa quæ patiebatur Deo patri in eius glo-
riam qui eum pati ita volebat, & pro eorum à
quibus patiebatur salute offerebat, & insupe-
rabilis plane charitatis ardore pro ipsis cruci-
fixoribus orans, illata ab illis tormenta in eorum
utilitatem ad Dei honorem ordinabat. Ita ni-
mirum viri Apostolici postquam agendo vt po-
tuerunt, Dei gloriam, & proximorum salutem
promouerunt; id quod restat, cupiunt se prorsus
consumi & in nihilum redigi, vt Dei honorem
seipsis adaugeant: quare ad famem, sitim, fri-
gus, tormenta, ad cruces, ad mortem, insatia-
bili planè desiderio properant vt illis ipsis à qui-
bus patiuntur, salutem pariant: quare tantum
abest vt malum pro malo reddant, aut se defend-
ant, etsi id iustè facere possent, quin oblatas
patiendi occasiones vt efficacia media ad Dei &
proximi bonum magna cum auiditate acci-
pant,

piant, licet illis displiceant peccata quibus hæc mala inferuntur.

Secunda excellens quædam nuditas & omnium quæ in mundo sunt, expoliatio atque contemptus, ut in Christo Domino patet, qui si unquam, certe in passione & cruce pauper fuit, cum propriis exutus vestibus, & cruce nudus affixus fuerit, & in ea nuditate mortuus: vilescunt sane tempore persecutionum terrena omnia; si enim ipsa Apostolicis viris anima sua vilis est præ Dei amicitia & gloria, quanto magis cætera? Itaque cum mundi rabies ab hac spoliatione incipiat ut plurimum contra Dei seruos furere, terrenorum omnium contemptus, & paupertatis amor, tota vita variis probationibus exercitus, longè debet esse robustior.

Tertia est poenitentia & mortificatio quædam excellens qualis in Christo Domino fuit qui cum esset innocentissimus, in ipso tamen momento conceptionis suæ, pro eius luminis, quo perfundebatur, abundantia videns quot, quamque horrendis hominum peccatis supremus ille honor & amor quem Deo deberi cognoscebat, indigne proculcaretur, eo totam vitam retulit ut diuinæ iustitiæ ita offensæ satisfaceret, atque ita continuo atque adeo vehementi de tot iniuriis dolore cor eius transfixum in perfectissimarum virtutum actiones tum externas, tum internas erumpebat, quibus volebat tantum Deo honorem reponere, imo maiorem, quantum iniuriæ & contemptus, omnia hominum peccata inferre poterant. Itaque cum tota vita ultro plurima toleranda suscepit, tum verò in ipsa passione in qua cum potissimum ex

Patris voluntate pro hominibus satisfacere deberet, inexplicabiles & in anima, & in corpore dolores quantum ipsa natura poterat, sustinere voluit, ut esset copiosa redemptio. Hoc enim spiritu pleni viri Apostolici licet sancti sint, nunquam tamen sine intimo cordis dolore viuunt, cum diuinam maiestatem toties ab aliis offensam vident; atque ita ut eius iustitiæ satisfaciant vehementi illo ac continuo doloris sensu non contenti, quicquid poenarum in mundo est, quicquid molestiarum, quicquid mortificationum, optant in se venire, & millies & millies si possent, mori vellent, ut Deum contentum reddant.

Quarta est vanæ hominum existimationis, & honorum omnium, atque adeo famæ propriæ contemptus: sic enim Christus Dominus tanquam diuinæ humanæque maiestatis reus, seditiosus, incantator, blasphemus, vini potator, populi seductor, & accusatus & damnatus est, & maxima cum infamia inter duos latrones tanquam insignis malefactor crucifixus & mortuus; tota quidem vita impiorum Iudæorum maledicta & contumelias sustinuit, sed in cruce ipsa admirabile fuit spectaculum, cum rex gloriæ tribus horis iacta in se conuitia, & contumelias adeo patienter tanquam in regia sede exceperit, quale tunc erat eius iudicium de vanis mundi honoribus, opinione, & fauore?

Quinta est solidissima, & profundissima humilitas quæ in eo consistit quod cum Filius Dei esset innocens, sanctus, & ipsa sapientia, potentia, & gloria Patris, tamen non contentus serui formam accepisse, atque ita se exinaniuisse,

voluit illam suam maiestatem , sanctitatem , sapientiam , potentiam , tormentis , conuitiis , cruce atque morte ipsa non solum tegi , sed etiam prope obrui , ut Dei bonitas , misericordia , sapientia , potentia , in eius ignominiiis , humilitate & abiectione illustrior appareret , quamquam igitur à primo momento conceptionis illuminatissima illa Christi anima suum ipsa nihilum peritissimè agnosceret , suaque omnia ut non sua , sed Deo in Dei bonum referret , in passione tamen reipsa cum se tot ultro tormentis obiecit , quid aliud testabatur quam suam aduersus Deum submissionem , cuius gloriæ tanta cum sui despectione seruiebat ? Atque ita viri Apostolici exultant prius humilitatem cum toleranda sunt aduersa , non solum ostendunt , sed etiam perficiuntur , ut non tantum non indignentur , sed se iuste pati existiment , & vehementer gaudeant suis se ignominiiis & opprobriis aliquam Deo gloriam posse parere.

Sexta est diffidentia sui , & generosa quædam in Deo fiducia , nam hominum persecutionibus omnis quodammodo virtus atteritur , ut ipsi planè de se diffidendi magnam occasionem habeant , & in Deo solo confidendi qui ita nos veluti opprimit , ut in eius bonitate , & potentia confisi , non solum , non experiamur , sed totus etiam mundus , quam fidelis sit , quam bonus , quam sapiens , quam potens , cum ex tot malis nostris tanta bona ad suam gloriam , nostram coronam , & proximorum salutem expromat. Sic D. Paulus 2. ad Corinth. 1. testatur. Non enim volumus , inquit , ignorare vos fratres de tribulatione nostra quæ facta est in Asia , quoniam
suprà

suprà modum grauati sumus suprà virtutem, ita vt tæderet nos etiam viuere, sed ipsi in nobis ipsis responsum mortis habuimus, vt non simus fidentes in nobis, sed in Deo qui suscitatur mortuos, qui de tantis periculis nos eripuit, & eruit, in quem speramus, quoniam & adhuc eripiet.

Septima est excellens religio erga Deum. Nam longè perfectiùs quàm antea se Deo Sacrificium offerunt, sicut Christus Dominus qui cum in tota vita & oratione & sui oblatione Deo Patri gratissimum Sacrificium exhibuerit, non fuit ita tamen illud perfectum, donec in ipsa cruce consummaretur. Sic enim quando aliquid restat quod pro Dei gloria vel agere vel pati possumus, nondum perfectæ Deo victimæ sumus: in ipsius ergo rebus aduersis ipsa nostri oblatio & humilis oratio vt Deus nõ deserat, sed hoc Sacrificium in suum honorem, & proximorum salutem acceptare dignetur, virtutis huius omnem perfectionem, quæ non verbis solum, sed etiam rebus ipsis in Dei honorem consumptis exercetur, complectitur.

Octaua est patientia & tranquillitas animi siue mansuetudo quâ fiat vt alacriter omnia perferantur, nulli malum pro malo reddatur, sed contrà vincatur in bono malum, & Christi exemplo qui non solum tanquam agnus coram tondente se obmutuit, sed etiam magno compassionis affectu ob eorum malitiam permotus pro illis cum lachrymis patrem orauit.

Nona est resignatio perfecta, & plena sui derelictio in Dei manibus, atque conformatio voluntatis nostræ, cum diuina in omnibus, cuius exemplum Christus Dominus potissimum in passione nobis præbuit, cum externis internisque pressus angu-

stius oraret Patrem. Transeat à me calix iste: verum tamen non mea voluntas, sed tua fiat. Hæc enim virtus non solum est perfectissima, sed cæteras omnes ambit: nam voluntatem suam cum Dei voluntate conformare est excellens Dei amoris actus, qui coniunctus est cum maxima in Deo tanquam fidelissimo amico, & amantissimo patre confidentia, & cū profunda humilitate, & sui derelictione atque abnegatione, omniumque rerum inferiorum contemptu. Hoc actu voluntas nō solum bona omnia quæ pro obiecto habet, sed etiam seipsam planè & ex integro in Deum eiusque voluntatem refundit, ut modo quodam Dei voluntatem in gloriæ suæ procuratione iuuet, idque non pro suo gustu & affectu, sed eo modo quo diuinæ voluntati placet, potissimum tamen aduersis rebus; nam in iis præcipuè hæc virtus succurrit: Cum enim non agendi aliquid pro Deo, sed patiendi tantum occasio detur, nulla homini actio alia libera relinquitur, quàm velle pati quod Deus vult, atque ita toleranda aduersa vel intrinsecus, vel extrinsecus aduenientia Dei voluntati ea inferenti vel permittenti suam accommodare, quod est implicite velle ei bonum illud, quod ipse sibi vult: verum de conformitate voluntatis nostræ cum diuina alibi tractabitur.



PARAGRAPHVS. VII.

*Quenam perpendenda sunt in Meditatione
passionis Christi.*

EA potissimum sunt quinque. Primum est illum qui patitur esse Deum Maiestatis, & hominem sanctissimum, innocentissimum, iustissimum, liberalissimum qui tota vita nihil ulli mali, sed omnibus benefecit. Sic te decet post sanctam, & laudabilem, atque omnibus utilem vitam, aliud nihil expectare quam aduersa, si ei similis esse cupis.

Secundū est quid patiatu exteriorius, nuditatem & paupertatem extremam, contumelias & opprobria infinitæ eius sanctitati, sapientiæ, & potentiæ iniuriosa, amicorum fugam & derelictionem, dolores vehementissimos in omnibus membris & sensibus. Interiùs verò ariditates, anxietates, desolationes, & vehementem & continuam tristitiam sine consolatione vlla, ob iniurias Deo irrogatas, tot animarum perditionem, timores, tædia, agoniam ad sudorem vsque sanguinis. Nam tantum internos dolores admisit, quantum ferre potuit ad Dei gloriam & nostram salutem.

Tertium est à quibus passus sit; ab iis nempe à quibus honorari, & amari debebat, omnis generis & conditionis hominibus, Iudæis & Gentilibus, regibus, gubernatoribus, pontificibus, sacerdotibus, pharisæis qui eo tēpore erant aliis religiosiores, doctis, indoctis, aulicis, militibus &c. Hi omnes præter vehementes inuidiæ, ambitionis, avaritiæ, & id genus passiones contrà Christū, ab ipsis Dæmonibus

incitabantur acriùs vt nullâ illi in re parcerent, nihil ei reliquum in bonis, in fama & honore, in corpore, in vita facerent. Adde & discipulorum fugam, Petri negationem, Patris permissionem, adeo vt nullum planè videretur habere ad quem confugeret.

Quartum est pro quibus patiebatur nempè pro nobis, atque adeo vt omnia & singula peccata nostra expiaret, nobis virtutes omnes & gratias etiam singulas impetraret; nobis, inquam, qui ab eo alieni eramus, nam pro ipsis crucifixoribus suis quibus & peccatorum remissionem & salutem suo sanguine & lachrymis à Deo patre obtinebat.

Quintum est, quomodo passus est, nempè tanto amore, ardore, Zelo. Nam oblatus est quia ipse voluit: voluit verò cū ardenti desiderio gloriæ Dei reparandæ, & satisfaciendi eius iustitiæ. Itaque erat desiderium hoc ex vero Dei amore profluens insatiabile, adeo vt longè plura pati exoptaret. Item cum quanta humilitate, obedientia, & subiectione erga patrem, quanta patientia, suauitate, atque mansuetudine.



*Quomodo se Christus ad suam passionem
præpararit.*

Postquam igitur Christus Dominus sanctissimis vitæ suæ exemplis & documentis , factis & dictis Parris sui gloriam amplificauit , & traditum sibi à patre opus consummauit , sic vt nihil ex iis quæ diuina voluntate ei imposita erant, ad homines Dei cognitione & amore imbuedos , agendum superesset , sese ad patiendum cœpit comparare , vt hoc etiam modo Deum glorificaret , & quod sibi restabat , in eius honorem consumeret. Et licet ad rem tantam ex qua totius humanæ salutis summa , & maxima patris sui gloria dependebat , à primo suæ conceptionis momento per omnes vitæ suæ siue priuatæ, siue publicæ actiones tam externas quam internas se parasset, instante tamen passionis tempore singulari modo vt nobis exemplo esset, sese disponere voluit.

MEDITATIO I.

De Christi præparatione ad suam
passionem.

Considera primo , Christum Dominum ad
perficiendum per passionem redemptionis
nostræ

nostræ negotium magno patiendi desiderio Imprimis sese præparasse : Nam quanquam à primo momento id dicere potuisset quod dicit apud Lucam ; desiderio habeo baptizari , & quomodo coarctor donec impleatur , atque singulis vitæ momentis hæc illi tormenta in votis fuerint , tamen hoc tempore hæc desideria longè fuerunt ardentiora , quæ res colligi potest de sancti Marci cap. 10. vbi ait. Christum ascendentem Hierosolymam , vt vltima illi populo monita daret , & tandem pateretur , præcessisse Apostolos , & incenso quodam Patri se offerendi desiderio præcurrisse illis stupentibus , & timentibus & ipsi , & sibi. Deinde eos de passione sua , vt quæ cordi maximè esset , clarè & distinctè monuisse. Idem etiam patet ex Ioanne vbi ait discipulis. Desiderio desideravi manducare hoc pascha vobiscum antequam patiar. Sic nempe viri Apostolici magnis tota vita , sed potissimum post bonam eius partem , in sollicita Dei gloriæ procuratione consumptam patiendi pro Deo desideriis ad vltimos se agones parant. Vide num quantum boni in passionibus lateat , satis apprehendas ; atque adeò qualia desideria patiendi experiaris , solet enim Deus hoc suos modo à longè dispo-
nere.

Confidera Secundò , Christum insigni etiam humilitate , & demissione parasse se ad passionem ; sciens (inquit Ioan. cap. 13.) quia omnia ei dedit pater in manus , & quia à Deo exiuit , & ad eum vadit , surgit à cœna , & ponit vestimenta sua , & cum accepisset linteum , præcinxit se & lauit pedes discipulorum , & postea dixit illis. Si ego laui vobis pedes Dominus & magister , &

vos debetis alter alterius lauare pedes : exemplum enim dedi vobis , vt quemadmodum ego feci vobis , ita & vos faciatis. Amen dico vobis non est seruus maior Domino suo , nec Apostolus maior est eo qui misit illum , si hæc scitis , beati estis si feceritis ea. Nimirum humilitas veros Christi Apostolos facit , & optimè disponit , vt Deus ad suam gloriam nobis vtatur , quare viri Apostolici quò meritis , & rerum pro Christo & Dei gloria gestarum excellentia sunt maiores , eò se magis demittunt , vt magis Deum glorificent , & eum prouocent vt ipsis non parcat. Humilitatis enim & mortificationis exercitium , quædam sunt gloriosarum pro Deo passionum rudimenta.

Considera Tertiò , Eo tempore Christum instituisse sanctissimum Sacramentum , & sub speciebus panis & vini , corpus & sanguinem Apostolis & Ecclesiæ dedisse , vt hoc excellentissimo charitatis opere sua omnia opera quibus hominum salutem promouere conatus erat , veluti concluderet , & in summam quandam redigeret. Quo facto nihil superesse poterat quod agere posset , atque ita transiret ad passionem , cuius repræsentatio vera & viuifica erat hoc Sacrificium. Hoc enim charitatis opus factum hoc tempore quo Iudas proditionem , Iudæi crucem parabant ; satis indicat quanto ardore amoris ad patiendum accederet ; vt qui ita seipsum nobis relinqueret , quasi paratus esset non semel tantum vno die , sed ad extremum vsque iudicii diem in cruce pro hominibus millies ac millies , atque adeò toties quoties corporis & sanguinis sui sacrificia ad finem vsque mundi futura

tura videbat, mortem acerbissimam subire.

Considera Quartò, Habuisse etiam Christum curam aliquam suorum. Nam præter excelsum humilitatis, & insigne charitatis opus in institutione SS. Sacramenti, eos valde efficaciter exhortatus est ad amorem suum, & mutuam inter se concordiam, ad orationis studium, & fiduciam in Deo, & animi fortitudinem in aduersis; Sicut, inquit Ioan. 5. dilexit me Pater, & ego dilexi vos; manete in dilectione mea, hoc est mandatum meum, ut vos inuicem diligatis, sicut & ego dilexi vos. Maiorem charitatem nemo habet, quam ut animam suam ponat pro amicis suis. Amen dico vobis, si quid petieritis patrem in nomine meo dabit vobis: petite & accipietis, ut gaudium vestrum sit plenum. Denique in fine cap. 16. ubi persecutiones quas tolerare debebant, recensuit, ait: Hæc loquutus sum vobis, ut in me pacem habeatis: in mundo pressuram habebitis, sed confidite, quia ego vici mundum, quem vobis dabo vincere misso Spiritu sancto qui vos consoletur, & fortiores vos reddat omni mundi potestate. Ita Christus instanti passione, in ipsa verò Passione non omnem curam eorum abiecit. Nam in horto orationem abruptit, ut eos ad orandum excitaret, inter tormenta respexit Petrum, in cruce Matris & discipuli curam habuit: ita etiam faciendum est, ut nulla planè aduersitas nos à nostro officio præstando deterreat.

Confid. Quinto, Christum Dominum oratione insigni antequam ad passionem exiret sese parasse, in ea petit à patre imprimis ut breui secutura passio illustraretur iis signis quibus in-

notesceret

notesceret Dei Filius, atque ita Dei Patris gloria, cognitio, & amor per eam inter homines splenderet. Clarifica filium, scilicet per Passionem, ut Filius tuus clarificet te: in passione deinde ut discipulos suos ad sui nominis claritatem inter mundi pericula conseruet, inter se perfecta vnione qualis est Patrem inter & Filium coniungat, eosque sanctificet in veritate propter quos seipsum Deo iam erat sanctificaturus, idest immolaturus in cruce: Pater sancte serua eos in nomine tuo, ut sint vnum sicut & nos. Sanctifica eos in veritate, ut pro eis ego sanctifico meipsum ut sint sanctificati in veritate. Denique, ut Deus vnus, Pater, Filius & Spiritus sanctus à fidelibus in futuris sæculis cognoscatur & ametur, & sint vnum cum Deo & in hac vita, & in futura. Sicut, inquit, tu pater in me, & ego in te, ut & ipsi in nobis sint, ut credat mundus quia tu me misisti. Atque ita satis patet quem Christus Dominus finem sibi in patiando proposuerit, nempe Dei gloriam, & hominum salutem; & quam ardentem petierit, ut secutura passio efficax esset ad rem tantam medium. Quod certè viros Apostolicos imitari in id genus casibus oportet.

MEDITATIO II.

De tristitia & agone Christi.

INter omnia aduersa quæ in vita spirituali & procuratione gloriæ diuinæ toleranda sunt acrius

acrius solet mentem pungere, & affligere vehementius timor & tristitia interior, siue concipiat de malis externis & temporalibus, vt est paupertas, morbi, mors ipsa; siue de spiritualibus vt cum fructus salutis nostræ & diuinæ gloriæ, nostris desideriis, functionibus, & laboribus non responderet. Atque interna hæc doloris, timoris, ac tristitiæ afflictio eo acrior est longe, quando Deus omnem internam consolationem tollit, qua potissimum incipientes complete solet, adeo vt cum profunda tristitia nos ab omni opere bono, ab oratione, à cura proximi, ab vtilibus ad Dei gloriam laboribus reuocet, nihil prorsus consolationis à Deo dimanet quo iuuemur, & sustentemur, & perseueremus. Nam quamquam ipse Dei amor, & intentio gloriæ eius ad perseuerandum tum in agendo tum in patiando confortet, sensibilis tamen consolationis priuatio mirum in modum animam affligit, vt plerumque periculum sit ne succumbat. Hoc expertus fuit Apostolus 2. ad Corinth. cap. 1. Nolumus vos ignorare fratres de tribulatione nostra quæ facta est in Asia quoniam supra modum grauati sumus supra virtutem, ita vt tæderet nos etiam viuere, sed ipsi in nobis ipsis responsum mortis habuimus. Quare Christus Dominus voluit ipsemet hanc tristitiam & dolorem sine vlla consolatione tolerare, vt & nobis patientiæ & pœnitentiæ exemplum daret, & doceret ad quænam remedia, cum ita affligimur, confugere debeamus.

Considera Primo, Euangelistas describere quatuor veluti internas Passiones aliquo modo diuersas in Christo. Prima est tristitia quæ pro-

uenit

uenit ex apprehensione obiecti mali, & naturæ disconuenientis. Secunda timor qui prouenit ex apprehensione mali ardui imminenti. Tertia & quarta passio ad istas duas referuntur, nec proprie ita possunt ab illis distingui. Tertia ergo est tædium, & cœpit tædere, siue desolatio quædam quæ ad tristitiam & timorem addit quamdam derelictionem, cum scilicet homo ita tristatur & timet vt quocumque respiciat, non habeat effugium, vel vllam consolationem; vnde addit hæc tertia cæteris tantum puritatem quandam tristitiæ & timoris. Quarta potest esse agonia siue pugna rationis deliberatæ cum ratione naturali & sensu, illâ volente pati absolute, hâc verò ex naturali inclinatione horrente & subterfugiente: hæc autem pugna voluntatis naturalis, & sensus non fiebat nisi per aliquos actus harum potentiarum, qui non poterant esse alij quam fuga per timorem & tristitiam, quibus actibus cum resisteret deliberatio voluntatis superioris, illa resistentia ipsum timorem & tristitiam repercutiebat in partem inferiorem, illaque adhuc complebat vehementius in eadem pugna, voluntas naturalis & sensus ad orationem confugiebat, petens ab iis malis liberari, quam petitionem voluntas superior deliberata inefficaciter Deo proponebat vnde inferiori resistebat & petitionem corripiebat. Non mea sed tua voluntas fiat.

Confid. Secundo, Christum Dominum his passionibus fuisse ita afflictum vt quodammodo plenus iis esset. Nam primo appetitus eius inferior respectu obiectorum sensibilium, & rationi conformium, & Christo conuenientium ita timore

timore & tristitia repletus fuit, vt nullum planè gaudium ex vllò obiecto quocumque perciperet: nam quainquam ex Dei contemplatione debebat in appetitum sensitium delectatio omnem tristitiam excludens redundare, Dei tamen dispensatione factum est vt eò delectatio non pertingeret, vt, sicut loquitur Ambrosius, Christus Dominus, sequestrata omni diuinitatis æternæ delectatione, tædio nostræ infirmitatis afficeretur. Secundò voluntas eius naturalis siue inferior iis passionibus plena fuit, nam per illam voluntatem verè Christus timebat, fugiebátque mortem, cum illa in iis omnibus affectibus sequatur appetitum sensitium. Tertiò voluntas eius superior respectu obiectorum spiritualium, vt erant potentiæ hominum, tristitiam pariter admittebat, etsi beata simul esset: potuerunt enim in eâdem voluntate diuina virtute esse simul hi actus, gaudium ob beatitudinem, & tristitia ob mortem, vel ob hominum peccata; quia isti actus non sunt propriè contrarij, nec versantur circa idem obiectum & secundum eandem rationem. Quantum ergo diuina virtute fieri potuit, etiam Christi voluntas hac tristitia plena fuit.

Consid. Tertiò, quodnam fuerit huius timoris & tristitiæ obiectum in appetitu & voluntate inferiore: fuit malum naturæ sensibile, mors nempè, & tormenta omnia clarissimè, & distinctissimè, ac sigillatim imaginationi repræsentata, & perfectissimè apprehensa, tormenta inquam & mors malorum omnium maximum in Christo potissimum ob dignitatem vitæ eius propter vnionem. Atque hinc patet hanc tristitiam excessisse

cessisse omnem tristitiam quæ de humanis & temporalibus bonis concipi potest , præsertim cum coniuncta fuerit cum priuatione omnis consolationis. Nam appetitus Christi & voluntas inferior permissa est naturæ suæ , vt circa tale obiectum sic propositum quantum possèt naturæ propensione & efficacîâ contristaretur , & factum est diuinitùs , vt vnus actus alium non impediret , nec gaudium superioris partis in aliam deriuaretur , nec denique aliquod aliud solatium adhiberetur , quod tristitiam illam posset minuere vel leuare : nam humanum nullum habuit qui ab omnibus derelictus est Psal. 68. Consolantem me quæsiui qui simul contristaretur & non fuit. Nec diuinum , vt antea dictum est. Cœpit ergo in horto tristitia , sed postea progressu passionis aucta est , quia dolor sensibilis interiori representationi accessit , & tandem facta est summa in cruce , quando dixit ; Deus Deus meus vt quid dereliquisti me ? Inter hanc vero tristitiam poterat Christus considerare Dei charitatem , spem & fructum Passionum , B. Virginem , & fideles adhuc alios socios ; tolerabat ex charitate Dei & proximi , & cum magna fortitudine. Ex quibus videri potest consolationem recepisse , sed reuerà illa omnia iuuabant ad fortiter ferenda omnia , non tamen per se ad imminuendam tristitiam. Nam aliud est ita considerare ad confortandum , aliud ad consolandum , quod postremum Christus non fecit. Vnde dicitur confortatus ab angelo non consolatus ; interdum tamen in summis doloribus ne natura deficeret , potuit Christus his considerationibus aliquam inferiori parti laxari

consolationem , sed ad breue tempus. Atque hinc patet hanc tristitiam superasse tristitiam omnium Martyrum , cum illi non caruerint & consolatione diuina , quam eis hæc Christi tristitia promeruit, & consolatione partis superioris. Vult autem Christus Dominus tantam tristitiam pati. Primo vt etiam hoc modo pro nobis pateretur , id enim erat aptissimum ad finem redemptionis nostræ , & abundantiam Christi meritorum , & diuinam nobis consolationem in tot huius vitæ doloribus promerendam. Secundo , vt exemplo suo doceret quomodo & quando in diuinæ voluntatis obedientia , & procuratione gloriæ Dei variis pro huius vitæ conditione tristitiis affligimur , nihilominus pergere constanter , & ad finem vsque inter dolorum aculeos priuati omni consolatione non solum humana, sed etiam diuina , quam Deus solet in orationibus , virtutum exercitiis communicare, obedire in gloriam Dei debeamus.

Consid. Quartò , quæ fuerit causa & obiectum tristitiæ eius in voluntate superiori , nam fuit varium. Primò enim hæc tristitia fuit de Apostolorum scandalo & Petri negatione : ita S. Hilarius can. 13. in Matth. monuerat , ait , omnes esse scandalizandos , Petrum assumpserat cum Iacobo & Ioanne & aliis assumptis ait. Tristis est anima mea &c. atque ita non de se , sed de iis quos assumpserat mœstitudo : ita ille ; nec tamen audiendus quando excludit obiectum sensibile. Secundò S. Hieronymus in 26. Matth. Contristabatur , ait , propter infortunissimum Iudam , & scandalum Apostolorum , & reiectionem populi Iudæorum , & euerfionem miseræ

miseræ ciuitatis Hierusalem. Tertiò , ob omnium hominum peccata , ingratitude , damnationem. Ita S. Ambrosius in cap. 22. Lucæ. Minus inquit, contulerat mihi, nisi meum suscepisset affectum, ergo pro me doluit , qui pro se nihil habuit quod doleret , & sequestrata delectatione Diuinitatis æternæ , tædio nostræ infirmitatis afficitur. Sic Psal. 21. Longe à salute mea verba delictorum meorum : nimirum omnium peccata susceperat , & idè pro omnibus tristatus , vt Deo offenso satisfaciat & nos Deo reconciliet. Quartò ob suorum afflictiones , persecutiones , & tormenta.

Fuit autem ista Christi tristitia summa , excessitque omnem aliorum tristitiam quamcunque siue naturalem siue supernaturalem , turpem , aut honestam. Primo quia ex parte obiecti materialis dolebat de peccatis omnium hominum simul sumptis , & optimè consideratis & cognitis. Secundo. Ex parte obiecti formalis , nemo enim ita cognouit peccati malitiam. Tertio , ex parte principij : nemo ex tanta charitate Deum dilexit aut eius honorem optauit. Quarto , Nullus tantam habuit grariam aut auxilium ad peccata detestanda , vnde ex tota latitudine & intentione charitatis & gratiæ quæ erat summa , tristabatur de omnibus , & singulis peccatis , quatenus erant , & Dei offensæ , & proximi ruinæ , & damna. Nam homines intentissimè amabat , quare nullus vnquam dolor fuit huic similis. Quod si legamus quosdam ex contritionis vi subito mortuos corde diuiso , quam intensa erat Christi tristitia , qui de omnibus simul tali modo dolebat : Accedit etiam quod Christus

alias rationes , quæ consolari eum poterant , non considerabat : voluntariè autem Christus : sumpsit hunc dolorem , non sine causa. Prima erat vt doceret nos pro Dei offensis alienis dolere & tristari , est enim hæc sancta tristitia. Secunda vt doceret nos quantum malum sit peccatum , quod facit talem in Deo tristitiam. Certè est summa infamia hominis , quod solus creatorem suum ita contristet , de reliquis ait Psal. 103. *Lætabitur Dominus in operibus suis* , quia omnes vt suo auctori obediunt , & de homine Genes. 6, *pœnitet me fecisse hominem* , & iam ecce Christus Dominus tristissimus : attende bene peccati malum: in Christi anima erat infinita dulcedo , beatitudo , gaudium , & peccatum tuum in cor eius coniectum velut amarum quid totam illam dulcedinem turbat. Vide Dei dulcedinem , vna eius gutta satis , si in infernum descenderet , illum redderet dulcem , vnâ solam guttam cœli ab Abraham petebat diues ad se refrigerandum in inferno ; vna eius dulcedinis gutta satis est vt omne Martyrium dulce sit , vt Stephano lapis , & Laurentio ignis. Tantam ergo Christi Domini dulcedinem , quam ex beatitudine habebat , quid amaram fecit ? Peccatum solum. Pelagus omnium amaritudinum infernus vna Dei gutta dulcescit , & pelagus omnium dulcedinum beatitudo vno peccato amara fit. Tertia vt pararet nobis fontem vnde tristitiæ veræ & contritionis aquas haurire possimus , si enim ipse tantum pro peccatis nostris cōteritur , vt inde sanguis exeat , quid par est nos facere qui peccauimus. Sit ergo dolor ipse exemplar illius quem debemus habere in confessione , & si non habeamus , petamus hinc ,

& nostrum exiguum huic iungamus. Hac enim tristitia omnem nobis meruit tristitiam & contritionem de peccatis nostris, fecitque ut nostra tristitia & dolor à Deo recipiatur.

Confid. Quinto, quomodo Christus Dominus se gesserit, in hac tristitia, ut tu pariter eodem modo te geras, quando tristitia & desolatione probaris. Primò enim ultro eam suscepit quantum vires naturæ ferre potuerunt, & consolationem omnem exclusit, ut intelligas nihil esse in ea veri mali, imo posse eam plurimum conducere ad tuam & aliorum perfectionem. Quare tantum abest ut eam fugere debeas, & humanis eam consolationibus velle leuare, quin potius aggredi magno animo te oportet, sic enim & leuior erit & utilior. Hic etiam facit quod Christus noluerit rationes multas quæ eam potuissent imminuere, quin potius ipse mala illa, obiecta sensibilia, tormenta, ignominiam, crucem, singula cum suis circumstantiis diligenter pertractabat, & animo suo repræsentabat, atque intentissimè apprehendebat, ut eo maior esset tristitia, atque ita certando & eam reprimendo, in appetitu cresceret, & sic ampliùs pateretur, atque ita patientiæ victoria maior esset: ita ergo nos facere conuenit ut nostras ipsi passiones generosè aggrediamur, iisque prout Christus ad sanguinem usque resistamus. Secundò, humanis solatiis relictis non omittamus ad Deum recurrere, & eum orare non tam ut nos liberet, quamquam id, Christi exemplo facere possimus, quam ut sanctissima eius voluntas in nobis fiat: nam potissimum remedium in huiusmodi desolationibus est Dei voluntati se conformare, siue ipse

punire nos eo modo velit, & nostram negligentiam hac poenâ castigare, siue superbiam & inanem nostri æstimationem, quam alioquin ex bono rerum nostrarum successu nascituram videt, antequam oriatur, magno beneficio præuenire, siue denique probare qua animi constantia, amor in eum noster sine vlllo proprio bono in procuratione gloriæ eius, agendo, patiendóque perseuerabit.

Ad sequentia passionis Christi mysteria.

Derelictus est ergo Christus Dominus à patre hoc utroque modo, quia & cum permisit hominum dæmonumque crudelitati, enormiter omni tormentorum genere ad mortem usque ignominiosissimam cruciandum, interim dum ita cruciatus est, omni illum interna in parte inferiori consolatione destituit. Quare in sequentibus mysteriis etsi potissimum Christi tormenta considerata sint, tamen subinde reuocari in memoriam debet illa interna eius derelictio, & tristitia quæ ipsis tormentis præsentibus augebatur, & iis aliquomodo grauior erat.

Notandum autem quod cum multi variique sint modi, quibus diuina prouidentia casibus aduersis hominum patientiam exerceat (nam aliquando communibus eos malis, peste, fame, bello; aliquando priuatis, paupertate, morbis, aliorum odiis iniuste & sine vlllo honesto prætextu

textu susceptis probat) nullus acerbior esse videtur quàm cum publica eorum qui præsunt iustè, & suo probè muneri satisfacere putantur, authoritate rei facti, legitimo vt apparet processu, iustaque sententia deserti ab omnibus etiam amicis & notis, sic vt nullus tuendæ famæ, vitæque locus superfit, publicè damnantur. In eo enim genere non solum de corporis salute, sed etiam de omnibus bonis agitur; hunc ergo modum Deus Pater elegit, quo filium suum nostro bono & exemplo ad suam gloriam illustrandam cruciandum permetteret: quare cum aliàs vellent illum vel præcipitare, vel lapidibus obruere, ipse Christus in cuius potestate erat ponere animam suam quando volebat, quia nondum hora eius venerat, transiens per medium illorum ibat, donec in maxima Iudæorum solemnitate, ingenti hominum concursu, publica authoritate captus, omnibus Iudææ tribunalibus sacris & profanis præsentatus, coram omnibus de grauissimis sceleribus accusatus, ac tandem cum omni genere contumeliarum tanquam reus damnatus & cruci affixus est, qui persecutionis modus nihil reliquum facit ad summam infamiam & crudelitatem, nullum ulli consolationi locum relinquit, & eò acerbior est, quò generalior, & nullum mali genus excludit; adeoque omnibus simul veluti collectis quasi numeroso quodam & terribili exercitu, vndique ad opprimendum, & prorsus ad conterendum, atque in nihilum redigendum irruit.

Quamquam verò in omnibus passionis Christi mysteriis, facile sit animaduvertere hunc eius calicem intextum semper fuisse ex irrisionibus,

contemptu, magna infamia, iniustissimis calumniis, & grauissimis omnis generis corporis doloribus, sunt tamen mysteria in quibus hæc magis quàm illa considerari possunt. Nã in Christi accusatione calumniæ præcipuè considerandæ sunt, vt & ad similes nos comparare, & eius exemplo discere possimus, quomodo cum ita impetimur, nos gerere debeamus.

MEDITATIO III.

*De Christi comprehensione Math. 22. Luc. 22.
Marc. 14. & Ioan. 18.*

PRimò permisit se Dominus osculo à Iuda tradi, & quasi latronem comprehendi. Tanquam ad latronem existis cum gladiis ac fustibus cõprehendere me; quotidie apud vos sedebam docens in templo, & nõ me tenuistis; ipsòque interrogante, quem quæritis? corruerunt in terram inimici.

Secundò seruum Pontificis percutienti Petro ait: Mitte gladium tuum in vaginam &c. & sanauit seruum.

Tertiò. Captus & à discipulis derelictus ad Annæ domum pertrahitur, vbi à Petro paulopost secuto semel negatus est; & alapam accepit à quodam ministro obiiiciente, sic respondes Pontifici?

MEDITATIO IV.

De gestis in domo Caïphæ. Matth. 16.

PRimò. Abducitur ligatus Christus ab Anna in domum Caïphæ, vbi Petrus eum rursus bis negavit, atque respiciente ipsum Domino, egressus foras fleuit amare.

Secundò permansit ligatus tota illa nocte.

Tertiò. Circumstantes satellites illudebant, & velatâ facie colaphis cædebant interrogantes, Prophetiza nobis Christe quis est qui te percussit? ac modis illis blasphemabant.

MEDITATIO V.

De Christi apud Pilatum accusatione

Matth. 26. Luc. 23. Marc. 13.

Ioannis 18.

PRimò. Traditur deinceps ad Pilatum Christus, & coram eo à Iudæis calumniosè accusatur. Hunc inuenimus subuertentem gentem nostram.

Secundò. Eo semel atque iterum examinato, retulit Pilatus. Ego nullam inuenio in eo causam.

Tertiò. Barrabæ latronis quàm Christi Iesu libera

liberationem malle se Iudæi proclamarent. Non hunc, sed Barrabam.

MEDITATIO VI.

De transmissio Christo ad Herodem.

Primò. Transmisit Pilatus Christum ad Herodem, æstimans quod esset Galilæus.

Secundò. Herodi poscenti curiosa, nihil penitus respondit, licet à Iudæis valdè accusaretur.

Tertiò. Ab Herode cum suo exercitu spretus fuit, atque veste alba indutus.

MEDITATIO VII.

De reuersione ab Herode ad Pilatum

Matth. 27. Luc. 23. Marc. 15.

Ioannis 19.

Primò. Christum ad Pilatum remisit Herodes, & ambo ea ipsa die, cum prius inimici essent, sibi inuicem reconciliati sunt.

Secundò. Iesum flagellis cædi iussit Pilatus: Milites eundem spinis coronarunt, atque purpura induerunt, deinde iridentes dicebant. Ave Rex Iudæorum, & colaphos simul impingebant.

Tertiò.

Tertiò, Exiuit ergo Iesus portans coronam spin-
neam, & purpureum vestimentum, & Pilatus dicit
illis. Ecce homo; Pontifices verò condemnabant
Crucifige Crucifige eum.

MEDITATIO VIII.

De condemnatione & Crucifixione Iesu
Christi. Ioan. 19.

PRimò. Sedens pro tribunali Pilatus Christum
iudicauit, & tradidit crucifigendum, postea-
quam negantes Iudæi suum Regem esse, dixerunt.
Non habemus Regem nisi Cæsarem.

Secundò. Bajulauit Christus crucem suam, do-
nec ob virium defectum, Simon quidam Cyre-
næus illam post eum ferre compulsus est.

Tertiò, inter duos latrones crucifixus fuit
ascripto titulo. Iesus Nazarenus Rex Iudæo-
rum.

MEDITATIO IX.

De mysteriis in cruce factis. Matth. 27.
Luc. 23. Ioan. 19.

PRimò, Blasphemias pertulit in cruce, vah qui
destruis templum Dei, &c. descende de cruce,
& diuisa sunt vestimenta eius.

Secundò. Effatus est Dominus in cruce verba
septem, -

septem , orans videlicet pro crucifigentibus. Latroni parcens. Matrem & Ioannem sibi mutuo commendans. Exclamans sitio , quando aceto eum potauerunt , & deinde se à patre derelictum. Postea consummatum est : ac postremo , In manus tuas commendo spiritum meum.

Tertiò, sol obscuratus ipso expirante, & petrae scissae sunt , aperta quoque monumenta , & velum templi à summo vsque ad infimam partem scissum , & latus lanceâ confossum aquam effudit , & sanguinem.

MEDITATIO X.

De Christi sepultura.

Primò , de cruce sublatus est mortuus Dominus per Ioseph atque Nicodemum in conspectu ipso matris afflictissimæ.

Secundò , delatum est ad sepulchrum corpus vinctum & inclusum.

Tertiò. Adhibititi sunt inibi custodes.

C A P V T I I I.

Ad quartam Hebdomadam monita.

Non solùm vitam & Passionem , mortemque suam Christus Dominus ad maiorem Dei

Dei gloriam retulit, sed ipsam etiã gloriam & bona omnia quæ sibi & cæteris meruit. Nã expresse docet Apostolus resurrexisse eum propter gloriã Patris, nec semel ipse Christus quem in finem gloriam ipse suam & nominis exaltationem referret, declarauit. Sed præcipuè sub vitæ finem. Ioan. 17. Pater, inquit, venit hora, clarifica filium tuum, vt filius tuus clarificet te; Et ostendens qua in re hæc Dei clarificatio consisteret, subdit, sicut dedisti ei potestatem omnis carnis, vt omne quod dedisti ei, det eis vitam æternam; hæc est autem vita æterna vt cognoscât te solum Deum & quem misisti Iesum Christũ. Ego te clarificaui super terram, opus consummaui quod dedisti mihi vt faciam, & nunc clarifica me, Pater, claritate quam habui priusquam mundus fieret apud te. Ad hanc ergo septimanam pertinent ea omnia mysteria, quæ Christi Domini mortem consecuta sunt, quibus cum maxima Dei, diuinarumque perfectionum gloria, Dei Filius ita impiè, crudeliter, & ignominiosè pro Patris honore & hominum salute occisus, cum absorptus morte, & perpetuis infamis obliuionis tenebris sepulrus videretur, non solum rediuius apparuit, sed stupendis prodigiis & naturæ vim superantibus operibus Apostolorum & aliorum fidelium, sanctitate admirabili, totius orbis conuersione, mundi victoria, Ecclesiæ regni sui constitutione, omnium Dominus & caput, atque futurus aliquando Iudex, manifesta Dei potentia, iustitia, sapientia, bonitate cõstitutus est, & ea claritate ornatus, quam apud patrem habebat priusquam mundus fieret, vt nempe & in futura verus æternusque Dei filius agnosceretur, per quem homines ipsi in Dei Filios adoptati æterna etiam hæreditate potituri Deum Patrem & Filium &

& Spiritum sanctum visuri sint, sicuti est, & idcirco etiam Deo similes in perpetuas æternitates ipsa beatitudine, atque adeo dii quidam ad diuinæ bonitatis admirabilem commendationem futuri.

Ad hunc ergo finem Christus Iesus etiam suam gloriam retulit ut suo nobis exemplo præiret, atque intelligeremus verum Dei amorem non tormentis, non morte finire, sed in æternis illis bonis (quæ bonis operibus mercedem voluit ipse esse) vel desiderandis vel expectandis, vel admittendis non esse mercenarium, sed fidelem Dei gloriæ procuratorē.

Tanta certè est bonorum operum dignitas, ut in hac etiam vita Dominus Deus iustus iudex vellet statim suis servis mercedem reddere, & nonnunquā etiam quosdā miraculis, vel rebus præclaris gestis, vel eximia apud homines sanctitatis opinione, & diuina quādam authoritate (quando ita ei ad honorem suum videtur) glorificat, ut sic suam ipsi felicitatem, & amorem in hisce etiam bonis in Dei gloriam referendis exercent: verum post vitæ huius tempus quod laboris, pugnae, & periculorum est, reservata est huius gloriæ plenitudo. Tunc enim aperto veluti thesauro suo ad eos glorificandos qui ab omnibus contempti sunt, stupenda coram omniū oculis opera per eorum cineres, & inuocationem efficit, eorumque sanctitatem quam ipsi magna humilitate, quantum potuerunt, obscuram tenuerunt, in apertam lucem educit, & externis hisce suæ sapientiæ, potētiae, & bonitatis signis declarat quāti ipse illos faciat, quanta eos apud se gloria cumulet, quanta bonitatis ipsius sit abyssus, quæ tantā illis sui similitudinem cōmunicat: sic igitur sancti plerique post mortem Deum glorificant in hoc mundo, verum longè excellentior est illa gloria quàm

quàm ipsi in æternum in beato illo futuræ vitæ statu Deo attribuunt, quando miseri & tot peccatis astricti homunciones per inæstimabilé Dei bonitatem & misericordiam ei similes apparent, quia vident eum sicuti est; & quoniam Christus Iesus perfectionis exemplar est & magister, ab illo certè discere nos oportet, tum quæ nā sint ea bona quæ nos maneant, si eum secuti diligenter fuerimus, tū quæ sint à nobis intentione prosequēda. Laudabile sanè pro Dei gloria strenuè laborare in hac vita, & corporis incommoda, famem, sitim, frigus, vitæ breuitatem, paupertatem, & alia id genus mala intuitu resurrectionis, & cœlestis beatitudinis perferre, atque ita ad magnam coronam aspirare; verum longè laudabilius est nihil de se & sua fœlicitate, vt proprium horum est, esse sollicitum, sed tantum de Dei gloria, etsi in mentem veniat Dei gloriæ nostram beatitudinem necessariò coniunctam esse, in ea ipsa beatitudine non tam quod nostrum, sed quod Dei bonum est spectare, adeóque toto affectu ad maximam coronam aspirare, quia eo maior futura est diuinæ bonitatis æterna glória, quo perfectiore clarioreque visione, & cognitione atque amore ei similiore futuri sumus.

MEDITA

MEDITATIO I.

De Resurrectione Christi & prima apparitione facta matri suæ.

Primò anima Christi denuò vnita fuit ipsius corpori , & Corpus ad vitam & statum longè meliorem priore reuocatum, vtpote quatuor dotibus claritatis, agilitatis, subtilitatis, & impassibilitatis insignitum.

Secundò Christus rediuiuus , adoratus fuit ab Angelis & patribus è lyngo eductis.

Tertiò , matri primum omnium apparuit, eamque mirificè recreauit.

MEDITATIO II.

De Christi apparitione facta 12. Apostolis, absente Thoma. Ioan. 20 .

Primò, discipuli omnes præter Thomam, domi congregati , erant propter metum Iudæorum.

Secundò. Ingressus ianuis clausis Christus, stetit in medio, & dixit eis, Pax vobis.

Tertiò, Spiritum sanctum eis dedit, & ait, accipite Spiritum sanctum quorum remiseritis peccata remittuntur eis & c.

MEDITA

MEDITATIO III.

De apparitione in monte Tabor.

Marc. vlt.

Primò. Ex Domini mandato abeunt discipuli in montem Tabor.

Secundò. Iis apparens ille inquit. Data est omnis potestas in cœlo & in terra.

Tertiò. Mittens eos ad prædicandum per vniuersum orbem sic mandauit. Euntes ergo docete omnes gentes Baptizantes eos in nomine Patris, & Filij, & Spiritus sancti.

MEDITATIO IV.

De Domini Ascensione. Act. i.

PRimo. Postquam iam per dies quadraginta multoties se Christus discipulis suis viuum exhibuisset, in multis argumentis, &c. Loquens eis de regno Dei, misit eos Hierosolymam, vt promissum sibi Spiritum sanctum illic expectarent.

Secundò. Eduxit eos ad montem Oliueti, & videntibus illis eleuatus est, & nubes suscepit eum ab oculis eorum.

Tertiò. Visdem in cœlum suspicientibus dictum est per duos illos viros in vestibus albis assisten-

Z

tes,

tes , quos Angelos fuisse credimus , Viri Galilæi quid statis aspicientes in cœlum , hic Iesus qui assumptus est à vobis in cœlum , sic veniet quemadmodum vidistis eum in cœlum euntem.

C A P V T X X X I.

Ad contemplationem de amore spirituali.

P A R A G R A P H V S. I.

Quis fuerit scopus propositus B.P.N. Ignatio in his exercitiis.

EXistimarunt nonnulli B. P. Nostri scopum præcipuum in componendis , & deinde tradendis exercitiis fuisse , vt exercitantem in tribus perfectionis viis , purgatiuâ , illuminatiuâ , & vni-
tiua exerceret , & ideo ita exercitia disposuisse , vt eorum ordo , quoad materiam attinet , tribus illis viis responderet ; verum , quamquam B. Pater aliquam forte eius rei rationem habuerit , non videtur tamen id sibi præcipuè proposuisse.

Primò enim in prima annotatione explicans quid sit exercitia spiritualia obire , nihil de tribus illis viis dicit , sed finem ipsum exercitiorum ait esse tollere affectiones malè ordinatas , & Dei voluntatem inuestigare quoad salutem animæ ; quæ duo ita distinctè ab eo proposita , etsi primæ & secundæ viæ respondere videantur , ta-

men

men non significant suam esse mentem earum exactam habere rationem.

Secundò. In annotatione quarta expressè ait esse quatuor exercitiorum partes, quæ tamen non esse quatuor, sed tres tantum deberent, si de tribus viis propositum ei fuisset agere. Nam tam separat secundam & tertiam, quam tertiam & quartam; quod tamen non fieret si secundam & tertiam ad viam eandem retulisset.

Tertiò. In omnibus exercitiis vno tantum in loco mentionem facit viæ purgatiuæ, & illuminatiuæ, nempe annotatione 10. Esset vero mirum id eius consilium præcipuum nullo ex alio loco (cum tamen tam frequens eius rei occasio in exercitiorum ordine & dispositione occurrat) colligi recte posse: & certe si id intendisset in contemplatione de amore spirituali, aliquam eius mentionem fecisset.

Porro in illa annotatione 10. quamquam apertè dicat primæ hebdomadæ exercitia respondere viæ, quæ, ut loquitur, purgatiua dici solet; & secundæ hebdomadæ exercitia respondere viæ, quam, inquit, illuminatiuam appellant: satis tamen ipso loquendi modo indicat se non intendere propriè & expressè tres illas vias suis exercitiis comprehendere, vel ad eas ineundas exercitantem directè formare velle. Nam imprimis ipsam viæ purgatiuæ & illuminatiuæ appellationem ab aliis veluti mutuatur, quasi indicare velit de iis se non agere. Deinde secundam hebdomadam non continere viam illuminatiuam, aut primam continere purgatiuam, sed tantum respondere; imo B. P. N. cum eo tempore videret

frequenter à quibusdam piis authoribus exercitia quædam Theologiæ Mysticæ per tres vias tradi, abstinere ipse non tantum ab eo modo loquendi, sed etiam ab ipso eorum ordine, ut qui minus probabatur, eo tempore, & aliquo modo periculosus videbatur.

Quarè etiam monet id quod expertus ipse sine dubio erat longe facilius decipi à Dæmone, ac proinde longe minorem in spiritualibus exercitiis fructum facere, eos qui in via illuminatiua potius versati fuissent, quam in purgatiua.

Quarto. In contemplatione de regno Christi quæ est fundamentum non solum 2. sed etiam 3. & 4. hebdomadæ, satis ostendit intendere se potissimam Christi Domini imitationem, tum in finis intentione, tum mediorum ad eum finem vtilium electione, suum exercitantem formare, ut deletâ veteris Adami formâ Christum perfectè induat. Et quoniam Christi Domini vita triplici constat discrimine, ideo in tres hebdomadas reliqua exercitia partitur. In prima enim parte vitæ, suæ Christus Dominus nobis priuatæ vitæ, & communis status exemplum dedit, ut ipsemet B.P.docet in annotatione ad exercitium de vexillis. Deinde sub annum 12. cœpit Euangelicæ perfectionis statum inchoare quæ præter propriam perfectionem etiam aliorum salutem ad maiorem Dei gloriam per varias functiones & virtutum exercitia intendit. Quare 2. hebdom. continet imitationem Christi quatenus propriæ & aliorum perfectioni, agendo & varias functiones obeundo, vacare possimus, ynde in ea de status electione agit, quia ipsa sta-

tus constitutio maximi momenti est ad illum diuinæ gloriæ in nostra & aliorum salute & perfectione procuranda, cum varia atque adeo necessaria ad illum finem quem intendimus media ut plurimum comprehendat. Porro ij qui statum elegerunt in eadem 2. Hebdomada eius sui perfectionem, & varios illius gradus, & modos expendere possunt, ut ad vitæ emendationem de qua ibidem agitur, iuuentur, & quam proxime possunt, ad Christi imitationem iuxta status sui rationem, & finem propositum accedant. In tertia vero hebdomada non solum desideria de status electi susceptione vel perfectione confirmant, sed etiam Christi Domini pro hominum salute ad Patris gloriam patientis exemplo, ad suam illam vel etiam aliorum perfectionem procurandam, præter virtutum illarum exercitia & functiones varias, quæ agendo in 2. Hebdomada suscipiuntur, etiam ad extrema quæque sustinenda & aliorum quarundam virtutum heroicos actus incitantur & accenduntur. Denique in 4. cum in Christi Domini gloria contemplantur Dei bonitatem, non solum de Dei & Christi honore gaudent vehementer, sed tantorum bonorum spe iuuantur, ut agere ac pati plurima exoptent, quo & Dei gloriam maiorem in hac vita promoueant, & in futura Dei ipsius Beatitudinis consortes, atque ei similes effecti in æternum, eum quam poterunt maxime glorificent.

Ita igitur sese habent 4. exercitiorum partes ex mente B. P. N. Ignatii, quo fit ut etsi aliqua ex parte secunda hebdomada respondere videatur viæ illuminatiuæ, tamen perfectiuæ etiam

viæ exercitia contineat. Nam Christi Domini vitam, Dei gloriam, & hominum salutem procurantis ponit ob oculos, & ob eundem finem per eadem etiam media, quæ propriè ad tertium perfectionis statum pertinent, & quæ sine charitatis abundantia præstari rectè non possunt, tendamus; cum enim B. P. N. hæc Christi exempla supremæ vitæ mixtæ perfectionem continentia proponat iis qui vitæ statum eligere volunt, ut bene considerent, num ad eam perfectionem aspirare velint, atque maiori Dei gloriæ, & propriam non modo salutem, sed etiam perfectionem & proximi procurando, vacare; dici non potest in 2. hebdomada illum habuisse rationem duntaxat viæ mediæ; longè minùs, in 3. Cum in magna parte 2. Hebdomadæ, & in tota tertia excellentissima supremæ perfectionis opera non solum meditanda, sed etiam imitanda proponat. Scio equidem 3. perfectionis statum quem ipsi viam vnitiuam appellant in contemplandis potissimum Dei perfectionibus & operibus occupari, verum B. P. N. huiusmodi contemplationes passim in 2. & 3. hebdomada permiscet, ut satis constat, quas ipse secundum Christi Domini spiritum & imitationem ad praxim diuinæ gloriæ in nobis atque aliis magis ac magis amplificandæ (in qua re suprema hominis perfectio consistit) perpetuò retulit. Quare vnitiuam perfectionem puram non tradit, sed mixtam eamque excellentissimam; sicut igitur ad eum finem imitationem Christi Domini in 2. & 3. hebdomada ordinauit, ut eius perfectionem in proximorum salute agendo & patiando pro Dei voluntate consequamur, ita in 4. in eius resurrectione

etione & gloria contemplanda ita futuræ beatitudinis spe & gaudere & animari voluit ad gloriam Dei promouendam, vt simul Christi Domini exemplo omnem illam nostram beatitudinem in Deum ipsum eiusque gloriam refundamus, atque ita regni huius spiritualis per peccati rebellionem perturbati splendorem in beato illo æternitatis statu perpetuo duraturum perfectissimè reparemus.

PARAGRAPHVS II.

*Quomodo hac contemplatio cum exercitiis
cohareat.*

HAs ergo quatuor exercitiorum partes B.P.N. concludit hac contemplatione de amore spirituali, quæ, vt verè dicam, summam quandam non solum omnium exercitiorum spiritualium, sed etiam totius perfectionis continet, atque adeo brevis quædam est harum partium recapitulatio. Nam cum (sicut & fundamento & omnibus prope exercitiis constat) id spectetur passim vt homo seipsum suæque omnia ad finem diuinæ gloriæ referat perfectissimè, atque hoc officium sit charitatis, Dei gloriam, quatenus bonum quoddam eius est, velle & procurare, in hac contemplatione quæ ad practicum amorem tota pertinet, vbi bona quæ à Deo accepimus bonitatem eius & amorem in nos testantia consideramus, tanta eius beneuolentia excitati vicissim illa bona eadem quæ ab eo accepimus

cepimus ei reddimus vt ita aliquo modo inexhaustæ bonitatis eius oceanum hac veluti guttula adaugeamus, in qua certè vltro citroque bonorū communicatione, non autem in solo affectu amicitia vera, vt B.P.N. notat, consistit. Quare in singulis huius contemplationis punctis hoc agitur vt bona quæ à Deo accepimus agnoscamus, atque ita bonitatis eius sensum aliquo modo concipiamus, deinde verò eidem tantæ bonitati eadem ipsa bona refundamus.

CONTEMPLATIO

Ad amorem spirituales in nobis excitandum.

IMprimis duo notanda sunt. Primum quod ab operibus amor ipse magis quàm à verbis pendet. Secundum quod consistit amor in mutua facultatum, rerum & operum communicatione puta scientiæ, diuitiarum, honoris, & boni cuiusque.

Oratio præmittitur ex more.

Primum præludium est vt coram Domino, Angelis, sanctisque omnibus mihi propitiis stare me videam.

Secundum vt gratiam à Deo efflagitem per quam beneficiorum eius in me collatorum magnitudinem

gnitudinem perspicuens ad amorem , cultum , & seruitium ipsius exardescam , & totum me impendam.

Primum punctum reuocare in memoriam beneficia creationis ac redemptionis ; dona itidem particularia seu priuata enumerare , & cum intimo affectu perpendere quantum meâ causâ benignissimus Dominus egerit , atque pertulerit , quantum mihi elargitus sit de thesauris suis , quódque iuxta decretum , & beneplacitum , seipsum mihi , quantum potest , donare velit. Quibus optimè inspectis , vertar ad meipsum , & disquiram mecum , quæ meæ sint partes , & quid æquum iustumque sit vt diuinæ offeram & exhibeam Maiestati : haud sane dubium est quin mea omnia offerre debeam , ac meipsum cum summo affectu , & verbis huiuscemodi vel similibus.

Suscipe Domine vniuersam meam libertatem , accipe memoriam , intellectum , atque voluntatem omnem , quidquid habeo vel possideo mihi largitus es , id totum tibi restituo , ac tuæ trado prorsus voluntati gubernandum. Amorem tui solum cum gratia tua dones & diues sum satis , nec aliud quicquam vltra posco.

Secundum punctum erit , speculari Dominum in singulis existentem suis creaturis , & elementis quidem dantem vt sint , plantis vero vt per vegetationem viuant : animalibus insuper vt sentiant , hominibus postremo vt simul etiam intelligant , inter quos ipse & accepi vniuersa hæc beneficia , esse , viuere , sentire , ac intelligere , meque templum quoddam suum efficere voluit ad suam imaginem & similitudinem creatum , ex quorum omnium admiratione reflexus
in

in meipsum agam vt in primo puncto , vel melius si quid occurrerit id quod in punctis etiam sequentibus erit faciendum.

Tertium punctum. Est considerare eundem Deum ac Deum propter me in creaturis suis operantem , & laborantem quodammodo , vt in cœlis, elementis, plantis, frugibus, & animantibus, quatenus dat ipsis esse, conseruatque id quod sunt, quæ omnia vt supra in mei considerationem reflectenda erunt.

Quartum punct. Prospicere quo pacto munera, & bona omnia cœlitus descendunt, vt sunt potentia, iustitia, bonitas, scientia, & alia quælibet humana perfectio , terminis quibusdam certis circumscripta , quæ ab infinito illo totius mundi thesauro , sicut lumen à sole , & ex fonte aquæ, deriuantur. Addenda superest reflexio prædicta in mei circumspectionem.

Colloquium etiam in fine fiet terminandum cum *Pater Ave.*

AD COMTEMPLATIONEM

De amore spirituali.

IMprimis annotatiuncula exercitio præfixa legenda est diligenter , est enim anima meditationis , eiusque vsus est in omnibus punctis , & ex ea patet quem præcipue Dei amorem hic excitare intendat B. P. scilicet non tantum affectuosum , sed practicum.

Post præludia, puncta sic sunt distinguenda.

Primum

Primum punctum est considerare beneficia per quæ seipsum Deus nobis dedit, qualia sunt Creationis, Redemptionis, & glorificationis, particularia item quæ quisque in sui conseruatione & sanctificatione, atque ex tot periculis & peccatis liberatione sibi diuinitus collecta expertus est. His enim omnibus, & singulis beneficiis Deus nos immediatè attingit, seque nobis vnit & tradit, infinitamque suam potentiam, sapientiam, & misericordiam, ac bonitatem quodammodo expendit, & mancipat ex infinito nostri amore tantum vt nobis ex eo quàm optimè esse possit: hac consideratione crescet Deus ipse in nobis, vel potius magnificabitur æstimatio bonitatis eius; vnde factâ reflexione cogitabo: quid ergo par est facere? nonne infinito amore, si possem, debeo prosequi tantam bonitatem, & ei tradere meipsum totum vt eius amoris manciper; voluntatem, vt bonum eius tantum velit suo bono contempto, vt sit ipse Deus cordis mei, vires denique omnes.

Secundum punct. Non se tantum Deus dedit mihi immediate tot beneficiis, sed cum mihi creaturas dedit, iterum se nouo modo cum illis dedit, cum in illis intimè insit per essentiam, præsentiam, potentiam; Nam ab illo habent omnes essentialem dependentiam, & cuique eius essentia intimior est quam ipsa sibi; Nec modo quodam mortuo illis inest, sed per præsentiam, adeo vt vere in iis & cognoscat eas ipsas, & alia omnia, ac proinde libens volensque illis adest, sic vt in illis inexistens infinita eius sapientia, & potentia, & bonitas eas conseruet, præterea eas mihi offerat, ac dirigat ad fines suos, ad meum bonum,
nemp

nempe vt deinde illum cognoscam & amem: id verò singulari quodam modo in homine præstat. Ex horum consideratione concludam.

Primò, quod si Deus ita mihi præsentem exhibeat infinitam suam essentiam, sapientiam, potentiam, bonitatem, vt quocumque me vertam, me circumdet & ambiat, & tota in me intime resideat, adeoque vt sit basis mei, esse debeam vicissim illi præsens in omnibus non solùm hominibus, qui sunt eius imago, sed aliis amore perfecto sentire, amplecti, stringere, nunquam ab eo separari, & in eo totus viuere, cum in me tota sit eius vita, bonitas, dulcedo, amor, &c.

Secundò, quod cum creaturas ad vsum meum dat, intimè illis inexistens, iterum se mihi det cum infinito amore & bonitate in vfu creaturarũ, debeo cauere ne illis inhæream, sed potius infinito amoris eius igne quem continent ipsæ, & mihi applicant, incendar, vt eum toto corde diligam. Nam cum, verbi gratia, comedo, non creaturas tantum, sed Deum quasi mihi incorporo illis inexistentem, non modo mortuo, nam sciens volensque ex infinito amore se mihi eo modo communicat, adeo vt me magis alat eius amor & potentia, quam ipsa creatura, sic quando respiro, &c. debeo ergo toties illi me tradere possidendum, quoties eo modo se mihi tradit.

Tertio, eo ipso quo mihi creaturas dat, debeo ipsi eas reddere. Primo eum laudando de infinita sapientia, bonitate, & potentia, quæ in omnibus relucet, & agendo illi gratias pro omnibus creaturis, & bonis quæ illis communicauit, siue illæ capaces sint rationis, siue non sint, quarum præcipuè loco cum mihi
earum

earum dominium dederit , debeo sæpe pro iisdem gratias agere ; inuitando, vt eum laudent & benedicant. Secundo , earum dominium & meipsum quod à Deo accepi illi restituendo, vel pro illo omnia, adeoque meipsum relinquendo, & perfectè ei tradendo, vt sit votis religiosis. Tertio earundem vsum, & meipsum in eius solius gloriam referendo non in illum bonum meum.


Tertium punct. Non tantum Deus exhibet se præsentem in creaturis iis insistendo , & eas nobis donando ex vero amore , sed etiam cum illis intime operatur, & laborat assiduè mei causâ; cum sole me illuminat, terram mihi colit cum agricolis, frumentum colligit, panem ipse conficit, mihi que ministrat, parat mihi vestes, habitationem & cætera omnia , totam suam potentiam & sapientiam expendens, idque ex vero & summo in me affectu vt bene mihi sit.

Concludam vt in superiori , nimirum debere me: Primo, eius præsentiam in omnibus creaturarum laboribus agnoscere, meque vicissim illi præsentem exhibere ; Secundo gratias agere , offerre omnem creaturarum operam ad eius gloriam in actionem gratiarum ; Tertio meipsum continuò debere laborare pro bono eius procurando ; vitæ itaque meæ omnis labores in id impendendos esse ducam, vt in me & in aliis omnibus quam maxima sit eius gloria, idque sine vlla quiete, aut tædio, adeo vt mihi sit molesta omnis quies & labor qui non ad illum referatur. Gaudebo similiter quod alij ad eius gloriam se impendant , eoque magis quo in ea re magis superare videbuntur , & eo taliter modo cum omnibus creaturis pro eius honore laborabo.

Quartum punct. Bona, spiritualiatria sunt, potentia, sanctitas, doctrina, quæ Deus homini largitur ut eum sibi similem faciat, ac proinde ex vero amore ut ei sit quam optime, quibus etiam sese nouo modo, nobis præsentem facit: quare vicissim ego Primò, conabor eum intueri in Superioribus quibus dedit potentiam, & ex illius amore illis me subiicere, eodem modo in viris sanctis. Secundò. Agam illi gratias quod tot effusis donis se communicet nobis, & gaudebo quod eius gloria reluceat per communicationem horum bonorum, præcipuè sanctitatis quam tot hominibus contulit. Tertiò, Si quid mihi horum bonorum dedit, proponam uti ad eius gloriam. Hinc qui aliis præsumt, discunt in quem finem suam auctoritatem conferre debeant, nimirum ut Deus à subditis cognoscatur & ametur, eodem etiam referenda est scientia, imo & sanctitas quæ licet sit magnum donum, nostrum tamen est, etiam maxima Dei gloria, & ut sic è nobis expeti, & quaeri præcipuè debet.

F I N I S.





FRENCH

ALPHA 1616411
02-11262

